

ПИРИМҚУЛ ҚОДИРОВ

ЮЛДУЗЛИ ТУНЛАР

РОМАН

Ғафур Ғулом номидаги
Адабиёт ва санъат нашриёти
Тошкент — 1979

Қодиров, Пиримқул.

Юлдузли тунлар! Роман.—Т.: Адабиёт ва санъат нашриёти
1979г.—496 б.

Романда халқымиз тарихининг шиддатли воқеаларга ва ибратли сабо
марга бой бўлган мураккаб, фожиавий бир даври тасвирланади. Асар ма-
казида турган классик адабимиз, жаҳонга танилган давлат арбоби ва са-
карда Бобир ўз ҳаётининг энг оғир дамларида улуғ Алишер Навоий руҳи
дан мадад олади, Хондамир. Беҳзод каби илгор замондошларига су-
Романда меҳнаткаш халқ вакиллари тарихни ҳаракатга келтирувчи
кучлар тарзида кўрсатилади.

Қадыров, Пиримкул. Звездные ночи. Роман.

K $\frac{70303-65}{352(06)-79}$ 166—79

© Faafur Fulom nomidagi Adabiyot va san'at nashriesti, 1979 y.

БИРИНЧИ ҚИСМ

APOCAT



ҚУВА. Қил устида турган тақдирлар

Милодий 1494 йилнинг ёзи. Саратон иссиғида Фаргона водийсининг осмонига чиққан қуюқ булутлар куни бўйи ҳавони дим қилиб турди-ю, кечки пайт бирдан жала қуиб берди. Қизил тупроқли тепаликлар орасидан ўтиб келаётган серсув Қувасой қон қўшиб оқизилгандек қип-қизил бўлиб кетди.

Сой бўйидаги мажнунтоллар панасида бир йигит билан қиз шивирлашиб гаплашмоқда эди.

— Робия, инон, мен тирик бўлсан, сенга бало-қазони йўлатмасмен!

— Тангрим сизни ҳам паноҳида асрасин, Тоҳир оға!.. Еғийнинг¹ минг-минг аскари бор. Қайси бирига бас келурсиз? Ана, қочқинларга қаранг!..

Тоҳир орқасига ўгирилиб, Қувасойнинг қуи томонларига кўз югуртирди. Пастда қамишзор ботқоқлик ва унинг устидан ўтган узун ёғоч қўпприк бор эди. Қўпприкдан чумолидай беҳисоб одамлар, отлар, моллар, аравалар тизилиб ўтиб келаётгани ёмғир пардаси орасидан элас-элас кўзга чалинарди.

Самарқанд подшоси Қўқонни босиб олиб, қўшинига талатган ва Марғилонга ҳужум қилган эди. Босқинчилар шаҳару қишлоқларни талаш билан қаноатланмай, кўхлиқ қизларни чўрилилка олиб кетишар эди. Бунинг ҳаммасини эшигтан одамлар ёвдан қочиб, типч жой излаб бормоқда эдилар.

— Улуснинг шўри қурсин! — деди Тоҳир.— Қасофат подшолар урушмай туролмаса. Биридан қочсанг, бошқа-

¹ Еғий — ёв.

сига тутилсанг. Ундан кўра қочмаймиз! Таваккал. Пешонага битилгани бўлур!

Тоҳир ёмғирда ҳўл бўлиб, баданига ёпишиб турган қалами яктак устидан ханжар тақиб олган эди. Робия ханжарга қўрқа-писа кўз ташлади-да:

— Қайдам,— деди.— Отамлар мени қўргонга элтиб қўймоқчилар.

— Қайси қўргонга?

— Андижон қўргонида амаким борлар-ку.

Тоҳир Робиянинг ҳозироқ жўнаб кетишидан чўчигандай унинг билагидан олди. Илгарилар ҳуркович оҳудек тутқич бермайдиган Робия ҳозир алланечук ювош бўлиб қолган эди. Унинг хина қўйилган қўллари гулдай чиройли. Бошига отасининг қора жун чакмонини ёпиниб чиққан экан. Ёмғирда ҳўл бўлиб оғирлашган чакмон унинг нозик бўйнига оғирлик қилди. Робия чакмонни елкасига туширди. Шунда ёқасининг битта боғичи ечилиб кетди-ю, қизғиш мармардай силлиқ бўйининг пасти кўринди. Яшил нимчаси ўн етти ёшлик қизлардагина бўладиган толма белидан қучиб, қаттиқ кўкракларини маҳкам чирмаб турар эди.

Болаликдан Робия билан девордармиён қўшни бўлиб ўсган Тоҳир унинг қанчалик жозибали қиз эканини, босқинчи бек ва навкарлар мана шунаقا қизларга қанчалик ўч бўлишини гўё энди астойдил ҳис қилди.

Бу йил баҳорда ота-оналари уларни унаштириб қўйган пайтларида ҳам Робия Тоҳирга ҳозиргичалик чиройли кўринмас эди. Рамазон ойи ўтгандан кейин уларнинг тўйлари бўлиши керак. Тоҳир Робия билан ҳадемай бир ёстиққа бош қўйишларига ишониб, бехавотир юрган эди. Бироқ энди уруш довули Қувага яқинлашиб келаётган шу хатарли дамларда Робия унга ҳар қачонгидан ҳам азиз, ҳар қачонгидан ҳам ғанимат кўринди.

Тоҳир Робиянинг Андижон қўргонида бирорта бўйни йўғон бекнинг тузофига илиниб қолиши мумкинлигини ўйлади-ю:

— Йўқ!— деди.— Мени десанг қўргонга борма!

Робия Тоҳирнинг баҳмалдай майин мўйлови тагида хиёл титраб турган лабига ва изтироб билан чақнаётган қўнғир кўзларига тикилди.

— Менинг ҳам сиздан йироққа кетким йўқ... Лекин не қилай... Қўрқамен!..

Тоҳир қизни чакмон билан бирга қучиб, бағрига бос-

ди. Робиянинг майин соч толалари йигитнинг юзига тегди, бир лаҳза икковининг нафаси нафасига қўшилиб кетди. Тоҳир қизнинг бадани титраётганини сезди-ю:

— Чиндан қўрққанингми бу, Робия? — деди. — Сенга не бўлди?..

— Мен бир ваҳимали туш кўрдим, Тоҳир оға! Илоҳи тушим ўнг келмасин!..

Энди Тоҳир ҳам хавотирланиб, қизни қучоғидан бўшатди-да, унинг катта-катта бўлиб кетган кўзларига қарди:

— Ёмон тушми?

— Айтишга ҳам тилим бормайдир.

— Тушга нелар кирмас!.. Айт!.. Майли...

— Сизни бир қора ҳўқиз ханжардай шохлари билан сузиб... Йўқ! Йўқ! Эсласам этим жунжикиб кетадир!

Тоҳир ёмон бир фалокатни олдиндан сезгандай юраги увушди:

— Шошилмай гапир! Сузган бўлса, қон оқдими?

— Қон? Ҳа, ҳа... Қон тирқираб кетди.

— Үндай бўлса қўрқма. Тушдаги қон — ёруғлик. Отам доим шундай дейди.

— Тангриш шу таъбирни рост келтирсин! Тоҳир оға, мен... Агар Андижонга сиз бормасангиз... Мен ҳам кетмасмен. Неки бўлсак, шу ерда... бирга...

Мажнунтол барглари орасидан сирқиб тушаётган ём-ғир томчилари қизнинг пайваста қошлирига, тифиз киприкларига теккан, Тоҳирнинг назарида, Робия ёмон бир баҳтсиэлик бўлишини ҳозирдан сезиб, кўзига ёш олаётгандек кўринарди.

— Мендан кўп хавотирланма, Робия. Мен бир дех-қон одаммен. Ҳаво очилса далага чиқиб қўшимни ҳайдаймен. Уроғимни ўрамен. Ёғийнинг менга не иши бор? Лекин сен... эҳтиётингни қил. Андижон қўрғонида амакиларинг бор...

— Андижонда сизнинг ҳам мулла тоғойингиз борлар-ку! Е бирга кетайликоми?

Тоҳир ўйланиб қолди. Унинг Андижонда меъмор бўлиб ишлайдиган Фазлиддин тоғаси эл орасида танилган машҳур одам. Қувасой ботқоғининг устидан ўтган ма-на шу узун ёғоч кўприк ҳам Мулла Фазлиддин чизиб берган тарҳ¹ бўйича қурилган. Андижон аркида Мулла

¹ Тарҳ — чизма, лойиҳа.

Фазлиддин самовий нақшлар ва кошинлар билан безаб қурган девонхона тождор Умаршайх мирзога маъқул бўйландан кейин унга тўбичноқ от ва бир ҳамён олтий инъом қилганини Тоҳир ҳам эшитган. У тоғасининг шаҳар қўрғонидан ташқаридаги Бофот маҳалласида туришини билади. Мулла Фазлиддин Қувада турган пайтларида Тоҳирга хат-савод ўргатган эди. Энди жияни паноҳ истаб борса қаноти тагига олиши мумкин. Лекин бу ерда чол-кампирлар нима деркин? Тоҳир — ёлғиз ўғил, жавоб бермасликлари мумкин. У Андижонга Робия туфайли боришини эса ота-онасига айтишдан уялади... Балки буни Робиянинг акаси Маҳмуд айтар?

— Робия, майли, иложи бўлса, Андижонга бирга кетурмиз. Лекин дадамларни кўндириш осон эмас.., Маҳмуд оғанг эшикдами?¹

— Дўконга чиқсан эдилар. Ифтогача келурлар. Нима эди?

— Ифтодан сўнг бизникига ўтсин. Маслаҳат бор.

— Хўп, мен айтамен.

Робия юзини Тоҳирнинг кенг кўкрагига босди:

— Тангрим бизни бир-биримизга кўп кўрмасин! — деди-да, мажнунтол шохлари орасидан чиқди.

Сой бўйида турган бўш мис кўзани ёмғир томчилари чертиб-чертиб қўяди. Робия сувга келганини шу кўзага қараб эслади ва уни тўлдириб, уйлари томон кўтариб кетди.

Қаллиқлар одамларнинг кўзидан йироқда — яшириқча учрашиб юрар эдилар. Қиз узоқлашиб кетгандан кейин Тоҳир ҳам мажнунтолларнинг панасидан чиқди.

Шунда Робиянинг тушига кирган қўрқинчли воқеа унинг эсига тушди-да, номаълум бир хатар вужудига ларза солиб ўтди...

2

Бу йилги рўза ёз чилласига тўғри келган, жазирама кунларда тонг саҳардан кечқурун қоронги тушгунча туз totmай оч юриш кўп одамнинг силласини қуритар, бунинг устига ташналиқ азоби қўшиларди. Рўзадорлар кунни қандай кеч қилишларини билмай тезроқ қош қорайинини интизорлик билан кутишарди.

¹ Эшик — бу ерда уй, ҳовли маъносида.

Ғира-шира қоропғиликда Қува масжидининг мінорасидан азон товуши эшилди. Уруш таҳликаси қанчалик кучли бўлмасин, дастурхон атрофига йиғилган одамлар рўзасини очаётган пайтда очлик ва ташналиктан қийналган вужудлари роҳатланиб, дунё фамлари бирпасга бўлса ҳам хаёлларидан узоқлашди.

Тоҳир кекса ота-онаси билан бирга ифтор қилмоқда эди. Дастурхондан седаналик иссиқ нон ва ҳандалак ҳиди келади. Нон еб, бир косадан қатиқли ош ичганларидан кейин Тоҳир Андижонгага кетиш ҳақидаги гапнинг учини чиқаришга чоғланди.

Шу пайт кимдир қамчи дастаси билан дарвозани тақнлатди. Ҳовлида ётган кекса кўппак ит йўғон ва хирри товуш билан вовуллади. Тоҳир ўрнидан турган эди, отаси:

— Эҳтиёт бўл!— деди овозини пасайтириб.— Аввал кимлигини сўраб бил.

Ташқарида ёмғир тинган, лекин осмон булатли, қоронғиликда ҳеч нарсани кўриб бўлмас эди. Тоҳир дарвозахонага яқин бориб:

— Ким?— деб сўради. Кўппак қаттиқроқ ҳура бошлиди. Ташқаридаги одам овозини баландлатиб:

— Тоҳир жиян?— деб сўради.— Оч, мен тоғайининг мен!

Тоҳир ташқаридаги овозни таниб, очиқ дарча орқали ичкарига:

— Ая, Фазлиддин тоғойим!— деди-ю, чолиб бориб дарвозанинг занжирини туширди.

Ичкаридан чиққан чол-кампирлар меҳмон билан кўришаётгандан Тоҳир қорайиб турган икки филдиракли соябон аравани кўрди. Аравага қўшилган отнинг эгари устидан кимдир пайпасланниб тушмоқда эди.

— Мулла тоға, арава сизданми?

— Ҳа, жияним. Кўч-кўроним билан келдим.

— Шунақами?— деди Тоҳир ҳайрон бўлиб. Унинг кўнглида боя тоғасини кўрганда ёнган қувонч энди ташвишли ўйлар билан алмашинди. Тоҳирнинг Андижондаги паноҳи — мана шу тоғаси эди. Тоғаси кўчиб келган бўлса, Тоҳирнинг қўрғонга борадиган йўли бекилгани шу. Робия нима бўлади?

— Тоҳир, нега ағрайиб турибсан? Юкларни туширишгин!— деди онаси.— Мулла тоғайнинг ёмғирда кўп азоб торғанга ўхшайдир.

— Э, азоб ҳам гапми, опа! Арава лойларга тиқила-вериб жонимиздан тўйдирди. Йўллар тирбанд. Қочоқлар беҳисоб.

Тоҳир аравадан юк тушираётуб, отнинг сағрисига қўли тегиб кетди. Шунда қўлига шилимшиқ лой илашганини сезди. Лой отнинг сағрисигача чиққан бўлса, бу бечоралар кела-келгунча қанчалик қийналганикин? Ҳамма ёвдан қочиб Андижонга қараб кетаётганда булар нега Қувага кўчиб кёлганикин? Тоҳир қанор қопга солинган юкни аравадан туширмоқчи бўлганда тоғаси:

— Ҳушёр бўл, жуда оғир, икковлашиб кўтаришглар,— деди аравакашга.

Тоҳир қопнинг ичидаги унча катта бўлмаган пўлат сандиқ борлигини сезди. Мулла Фазлиддин ўтда куймайдиган, сув кирмайдиган бу сандиқни Қуванинг темирчи усталарига буюртма бериб ясаттирган эди. Унинг ичидаги тарҳлар, лойиҳалар, суратлар сақланарди. Мулла Фазлиддин уч йил Самарқандда, тўрт йил Ҳиротда таҳсил кўрган, ўша ёқдан меъморлик санъати билан бирга мусаввирилик¹ни ҳам ўрганиб келган эди. Ҳиротда жангномалар ичига суратлар чизиш одат тусига кирган, мавлоно Беҳзод чизган Алишер Навоий ва Ҳусайн Бойқаро тасвирлари расмий доираларда шуҳрат топган, лекин Самарқандда, хусусан, Фарғона водийсида одам шаклини чизиш ҳали ҳам қуръон номидан қаттиқ тақиқланиб келмоқда эди. Шунинг учун Мулла Фазлиддин ўзи чизган суратларини мана шу пўлат сандиқда доим маҳфий сақлар эди.

Тоҳир қопдаги пўлат сандиқни аравакаш билан кўтаришиб уйга олиб киришиди.

Мулла Фазлиддин ҳўл бўлиб оғирлашган пиёзи чакмони ва этигини даҳлизда ечиб қолдирди. Оёғига чармакавуш кийиб, обрез четида бет-қўлини ювди. Сўнг боя Тоҳирлар ўтирган дастурхонлик уйга кирди.

Унинг чакмонидан ўтган ёмғир калта енглик абосини нам қилган эди. Лекин ёз оқшоми илиқ бўлганлиги учун кийим алмаштириш эсига келмади. Йўлда қаттиқ толиқ-қанлиги учун дуруст овқат ҳам емади. Фақат бир-икки тилим ҳandalак еди-ю, уч-тўрт пиёла чой ичди. Аравакаш йигит икки коса тўла қатиқли ош ичгандан кейин отларига қарашиб учун ҳовлига чиқиб кетди.

¹ Мусаввирик — рассом

— Оббо! Мулла Фазлиддин-ей! — деди Тоҳирнинг отаси узун оқ соқолини ўйчан эзғилаб. — Зап келибсизда. Шу нотинч кунларда бирга бўлганимизга не етсин!

— Ҳамма ёғийдан қочганда биз аждаҳонинг комига яқин келиб қолганимиз ғалати бўлди, — деб Мулла Фазлиддин жиянига маъюс кўзлар билан қаради.

— Бирон сабаб билан келгандирсиз-да, мулла тоға? — сўради Тоҳир.

— Сабаб шуким, жиян, уруш бошланса, қурилиш тўхтайди, меъморнинг кераги бўлмай қоладир...

— Ие, ахир, сизни подшонинг ўзи хизматига олган эмасмиди?

— Подшо Аҳси қўргонида мудофаа билан овора. Тошкент хони Маҳмудхон ҳам Хўжанд томондан бизга қарши қўшин тортиб келмоқда эмиш. Қашқар ҳокими Абубакир дуғлат деган яна бир босқинчи шарқдан Ўзгантнинг устига бостириб келмишdir.

Тоҳирнинг кекса отаси қўрқиб ёқасини ушлади:

— Ё тавба! Бу ёққа Самарқанд қўшини... Уч томониздан ёғий бостириб келибдими, а? Бу не кўргулик, Мулла Фазлиддин? Ахир бу подшолар сал муроса қилсалар бўлмайдими, а? Ҳаммаси бир-бирига қариндош эмиш-ку. Шу ростми?

— Ҳа, рост. Тошкент хонига бизнинг подшомиз куёв бўладир. Қўқонни талаб, бизнинг устимизга қўшин тортиб келаётган Самарқанд подшоси Султон Аҳмад мирзо эса бизнинг подшомиз билан бир отадан бўлган оға-инидирлар. Яна бу икки подшо бир-бирларига қуда бўлмоқчи эдилар. Самарқанд подшосининг қизи бизнинг вали-аҳдимиз Бобир мирзога беш яшарлигидан унаштириб қўйилган эди. Шундан билингки, оға инига, қайнота күёвга қарши қилич кўтариб чиқмишdirлар!

— Е пока парвардигор! Охирзмон дегани шумикин, Мулла Фазлиддин?

— Билмадим, почча. Ҳар қалай, ёмон тождорларнинг замонаси охирлаб қолаётганга ўхшайдир. Қошки ўзлари билан ўзлари олишиб, бизни тинч қўйсалар! Ўрушнинг бутун жабру жафоси эл-улуснинг бошига тушадир.

— Шўримиз бор экан-да!

— Ҳа, толе бўлмаса қийин экан! Мен не-не орзулар билан илм-ҳунар ўрганиб келган эдим! Ватанимиз бўлмиш Фаргона водийсида Самарқанддагидек, Ҳиротдаги-

дек мадрасалару кўркам обидалар қурмоқчи эдим. Бу салтанату подшолардан не қолур? Ҳаммаси ном-нишонсиз кетгай! Биздан ёдгорлик бўлиб қолса Улугбек мадрасасидек, Навоий Үнсиясидек санъат асарлари қолур!

Мулла Фазлиддин оғзидан чиқиб кетган сўнгги гаплардан хавотирланиб, эшик томонга қараб қўйди. Унинг қарой аҳлига яқин юриб, айғоқчилардан юрак олдириб қўйганини Тоҳир ҳам сезди.

— Мулла тоға, сўзлайверинг, бу ерда ҳамма ўз-ўзимиз... Андижон қўрғонидан нечук сизга жой бермадилар?

Мулла Фазлиддин сўнгги кунларда бошдан кечирган мудҳиш ҳодисаларни эслаб, бир лаҳза оғир сукутга кетди...

Утган куни хуфтон пайтида Мулла Фазлиддин ўзларидан беш-олти уй нарида турадиган бир хаттот ошнасиникида ифтор қилиб ўтирганда қандайдир номаълум кишилар унинг уйига бостириб киради. Ҳовлидаги ит во-вуллаб қўймаганда уни қилич билан чопиб ташлайдилар. Бугун бу ерга аравани миниб келган хизматкор йигитнинг оғзига латта тиқиб, қўл-оёғини боғлайдилару қазноқقا ташлайдилар. Сўнг уйга кириб, тинтуб ўтказдилар ва пўлат сандиқни кўрадилар. Лекин уни очишининг иложини тополмай, қулфини болта билан уриб синдиришга киришадилар...

Қилич билан чопилган ит қаттиқ вангиллаганда дэвордармиён қўшнилар бир фалокат бўлганини сезадилар, Улардан бири чиқиб Мулла Фазлиддиндан хабар олмоқчи бўлса, дарвоза қаршисидаги дараҳт панасида бир одам тўртта отнинг жиловидан ушлаб турибди. Унинг юзи қора ниқоб билан бекитиб олинган, фақат кўзлари кўринади. Ичкаридан эса пўлат сандиқ қулфиға урилаётган болта товуши эшитилади...

Мулла Фазлиддинга қадрдон бўлган қўшни унинг уйига ёмон одамлар тушганини сезади-ю, дарҳол хаттотникига чопади. Ундан воқеани эшитган Мулла Фазлиддин уйига югуриб келди.

Пўлат сандиқнинг қулфини синдириб очиб, ундаги қоғозларни титкилаётган босқинчилар уй эгасини кўриб, дарчадан айвонга сакрашди.

— Тўхта, нобакор! — деб Мулла Фазлиддин биттасининг қаршисидан чиқсан эди, юзига қора ниқоб тутгац айиқдай зўр йигит уни елкаси билан уриб четлатди-да,

кўчага отилди. Бошқалари ҳам кўчадаги отларига ми-
ниб, бир лаҳзада фойиб бўлишди.

Мулла Фазлиддин уларни қувлаб етолмаслигини сез-
ди-да, тўс-тўполон бўлган уйга қараб интилди ва очиқ
ётган пўлат сандиқнинг тепасига келди. Токчада қўша-
лоқ шам ёниб турибди. Унинг ёруғида аралаш-қуралаш
бўлиб кетган, баъзи жойлари йиртилган лойиҳалар ва
чизмалар кўзга ташланди. Сандиқ ичида подшоҳ инъом
қилган олтиннинг бир қисми ҳамёни билан турган эди.
Шу йўқ. Лекин ҳозир Мулла Фазлиддиннинг кўзига ол-
тин ҳам кўринмас эди. Унинг бутун хаёли сандиқ туби-
даги маҳфий тагқутига бекитилган суратларда эди. У
сандиқ ичидағи қофозларни шоша-пиша пастга олиб
қўйди-ю, тагқутини бекитиб турган силлиқ мис парча-
сига қаради. Уни чапга секин сурган эди, тагқутининг
калит солинадиган жойи очилди. Мулла Фазлиддин ат-
рофига аланглади — уйда бошқа одам йўқ, қўшниси қаз-
ноқдаги хизматкорнинг оёқ-қўлини ечиш билан овора
эди. Мулла Фазлиддин қўйнидан кичкина калит олиб,
тагқутининг қулфига солди. Қулф очилгандан кейин таг-
қутининг мис қопқоғини секин кўтарди-ю, юпқа жилд
ичидаги суратларни очиб кўрди... Кекса боғбоннинг да-
рахт пайванд қилаётган пайти... Чилмаҳрам тоғларида-
ги ов тасвири... Энг пастда чанг чалаётгаш гўзал бир
қизнинг сурати...

Бу — Умаршайх мирзонинг қизи Хонзода бегим. Мул-
ла Фазлиддин Ҳиротдан келиб, Андіжон чорбогида под-
шоҳ оиласи учун тиллакори кўшк қурган пайтларида ўн
олти ёшлиқ Хонзода бегим унинг мусаввири ҳам эканли-
гини билиб қолиб, ўзининг суратини чиздирган. Мулла
Фазлиддин бу ишни яшириқча қилган. Агар шариат пеш-
волари унинг одам суратини чизганини билиб қолишса
соғ қўйишимайди. Яна тағин гўзал малика билан яшириқ-
ча тил бириктириб сурат чизгани қизнинг подшоҳ ота-
сига маълум бўлса борми, Мулла Фазлиддинни тилка-
пора қилиб ташлашлари ҳеч гап эмас.

Шу сабабли ҳозир уни энг қаттиқ қўрқитган нарса —
бу суратнинг босқинчилар қўлига тушиб қолиши эҳтимо-
ли эди. Хайриятки, улар сандиқ тагида маҳфий тагқути
борлигини сезишмабди. Лекин сандиқни отларига ўнга-
риб кетишса нима бўларди? Унда тагқутидаги сурат-
ларни ҳам албатта топиб олишарди!..

Хизматкор йигит сал ўзига келгандан сўнг Мулла

Фазлиддин ундан ва қўшнисидан воқеанинг тафсилотларини сўраб билди, ўзининг кўрганларига буни таққослаб, шундай холосага келдики, унинг уйига тушганлар — оддий ўғрилар эмас, балки қайси бир зўравон бекнинг йигитлари. Улар уйни тинтиб нимани қидиришган? Тарҳларни ташлаб кетишибди. Демак, суратларни излашган... Мулла Фазлиддиннинг сурат чизишини биладиган одам... унда қасди бор бек юборган бўлиши керак бу йигитларни!..

Изтиробли ўллар туни билан Мулла Фазлиддиннинг кўзига уйқу қўндирамади. Урушнинг алғов-далғовида тобора бўйни йўғон бўлиб кетаётган бебош беклар эсига тушгани сари кўнгли безовта бўларди.

Андижонлик беклардан Ҳасан Ёқуб дегани шу йили баҳорда Мулла Фазлиддинни чорбогига чақиритириб, катта бир иш топширмоқчи бўлди.

— Мирзо ҳаммомидан ҳам улканроқ бир ҳаммом қурдирмоқчимен... Эзда салқинлайдиган мармар хоналари бўлсин...— Ёқуббек овозини пасайтириб давом этди:— Чиройлик асира қизлар сотиб олғаймен. Олтиним етарли. Ўша қизлар ҳаммомнинг мармар ҳовузида чўмилгандан мен ўлтириб томоша қиласидиган махфий туйнуклари ҳам бўлмоғи лозим. Уқдингизми?— деб Ёқуббек хохолаб кулди-да, гапнинг холосасини айтди:— Ана шу ҳаммомнинг тарҳини ўзингиз чизинг. Қурилишига ҳам сиз саркор бўлинг. Қанча ҳақ тиласангиз берай. Хўпми?

Меъморликни муқаддас бир санъат деб ишонган Мулла Фазлиддин Ёқуббекнинг шаҳвоний ниятларини эшитиб нафрати келди:

— Жаноб бек, узр, мен ҳаром ишдан қўрқамен!..

— Нимаси ҳаром?.. Мен ҳаммомни ўз акчамга қурдиргаймен!

— Ҳаммомга махфий туйнуклар қўйиб қурадиган саркорлар бошқа... Сиз ўшаларга мурожаат қилинг. Менга мирзо ҳазратлари покиза бир даргоҳ қурдирмоқчилар. Шу кунларда мадраса тарҳини чизиш билан бандмен. Рухсат этинг, мен борай...

Уринларидан турганда Ёқуббек Мулла Фазлиддинга ўқрайиб кўз тикди:

— Лекин мен айтган гап шу ерда қолсин, жаноб меъмор. Акс ҳолда...

— Албатта, бу гап шу ерда қолур! Лекин сиз ҳам

Мендан озурда бўлманг. Ора очиқ! Маъқулми, жаноб бек?

— Маъқул!

Мулла Фазлиддин шу билан бу бўйни йўғон бекдан қутулдим, деб ўйлаган эди. Лекин бундан ўн беш кунча бурун Аҳмад Танбал деган яна бир бадавлат бек Мулла Фазлиддинни сўроқлаб, кечки пайт унинг уйига келди. Икковлари холи қолганда Аҳмад Танбал чўнтағидан бир ҳамён олтин олди-да, Мулла Фазлиддинга узатди:

— Тақсир, мана шу олтинни олингу битта сурат чи-зib беринг.

— Қанақа сурат?

Ёши йигирма бешлардан ошган бўлса ҳам юзига ҳали дуруст соқол чиқмаган, кўсанамо Аҳмад Танбал оғзини меъморнинг қулоғига яқинлаштириб шивирлади:

— Маликамизнинг сурати керак менга!

— Қайси маликамиз? — сергакланиб сўради Мулла Фазлиддин.

— Чорбоғда тиллакори кўшк қурганингизда кўрган-сиз... Хонзода бегим.. Узи ҳам сизнинг санъатингизга ихлосманд эмиш-ку...

Мулла Фазлиддиннинг юраги така-пука бўлиб кетди. Наҳотки бу бек пўлат сандиқдаги суратдан хабардор бўлса?

— Ким сизга шундай деди?.. Мен меъмормен... Мен фақат иморатларнинг суратини чизамен...

— Мендан яширманг, жаноб меъмор! Мен шариат пешвоси эмасмен. Сурат чизишни бизда ман қилганларига мен ҳам қаршимен! Ҳиротда Шоҳруҳ мирзо Бой-сунқур мирзо учун қурдирган саройнинг деворлари гўзал қизлар сурати билан безалган экан. Тўғрими?

— Тўғри-ю, лекин.. Ҳар жойнинг ўз тошу тарозиси бор. Агар Хонзода бегимнинг сурати ҳақида сиз айтган гапни подшоҳ ҳазратлари билиб қолсалар нима бўлиши ни ўйлайсизми?

— Билмагай! — деб шивирлади Аҳмад Танбал. — Икковимиздан бошқа ҳеч ким огоҳ бўлолмагай! Хўп денг! Манг, олтинни олинг!

— Шошманг, бек. Мени сурат чизади, деб сизга ким айтди?..

— Эшитдик-да!

— Кимдан?.. Ҳасан Еқуббекданми?..

— Ҳасан Еқуббек бир боғбондан эшитган экан...

«Демак, Аҳмад Танбалнинг бу ерга келганидан Ҳасан Ёқуббек хабардор!— ўйлади Мулла Фазлиддин.— Булар биргалашиб мени қўлга туширмоқчи бўлса керак. Сендек қурбақатахлит бек учун Хонзода бегимнинг суратини чизиб бериб мен аҳмоқ эмасмен!»

— Жаноб Аҳмадбек, камина боғларнинг суратини чизганда бир четида боғбонни ҳам тасвирлашим мумкин. Меъморлик санъати буни инкор этмайди. Аммо маликанинг суратини чизиш учун менда на санъат бор, на ҳақ ва на журъат!

— Хуллас, менинг сўзимни ерда қолдирмоқчимисиз?

— Бошқа иложим йўқ. Мени маъзур тутинг, жаноб бек. Бундай таклиф билан келиш сиз учун ҳам хатардан холи эмас!

— Э, мен буздиллардан¹ эмасмен!— деб Аҳмад Танбал қаҳр билан ўрнидан турди ва йирик тишларини иржайтириб қўшиб қўйди:— Лекин сиз менинг шахтимни қайтарганингиз учун ҳали пушаймон бўлурсиз!

Бу таҳдид мана энди тўртта босқинчининг қиёфасига кириб, қоронгида унинг уйига бостириб келган бўлса ажаб эмас. Қуролсиз, навкарсиз Мулла Фазлиддин Аҳмад Танбалдай юз-икки юзтадан қуролли йигитлари бор бекларга қандай бас келади? Лекин «бўлари бўлди», деб индамай юраверса, бу қутурган бек эртага бешбаттар ёмонликлар қилиши мумкин эмасми?

Мулла Фазлиддин эрталаб подшоҳ инъом қилган тўбичноқ отни минди-да, шаҳар доруғаси² қабул қиласидан маҳкамага йўл олди. Узун Ҳасан исмли ингичка, новча доруга аскарликка одам олиш ва шаҳарни яқинлашиб келаётган душмандан ҳимоя қилиш ташвиши билан банд экан. Мулла Фазлиддиннинг арзини қаёқладир кетмоқчи бўлиб шошилиб турган пайтда тинглади-да:

— Тарҳларингизга тегмай, ҳамёнингизни олиб кетган бўлса, бу — тўқайдан чиққан ўғриларнинг иши,— деди.— Егий ташвишидан қутулсак, тўқайларни ўғрилардан то-залагаймиз... Ҳозир аҳволни кўриб турибсиз!..

Қўл қовуштириб тикка турган Мулла Фазлиддин до-руғага яқинроқ келди:

— Менинг бошқа гумоним бор, жаноб доруға,— де-

¹ Буздил — эчкиюрак, қўрқоқ.

² Доруға — шаҳар ҳокими.

ди. Сўнг Аҳмад Танбалнинг сурат чиздирмоқчи бўлганини, рад жавоби олганда эса аччиқланиб кетганини айтиб берди.

— Кимнинг сурати? — деб доруға қизиқиб қолди.

Мулла Фазлиддин Хонзода бегимнинг номини тилга олишга қўрқди.

— Парилар суратимиidi? Яхши тушунмадим.

— Сандингида парилар сурати бормиди? Босқинчилар шуни олиб кетибдирми?

— Сурат ўзи бўлмаса нени олиб кетсин! Мен ҳазрати олийлари буюрган мадраса тарҳини чизиш билан бандмен. Сураткашликка вақтим йўқ. Сандиқда хомаки лойиҳаларим бор эди холос.

— Улар жойида қолганми, ахир? Ундоқ бўлса Аҳмадбекдан нечун гумонсирамоқдасиз?

— Сабабини айтдим, жаноб доруға! Тафтиш ўтказишингизни сўраймен!

— Аҳмадбек — сultonлар авлодидан эканини унуглан бўлсангиз мен эслатиб қўяй. Ҳазрати олийларининг катта хотинлари Фотима бегим Аҳмадбекка қариндош бўлурлар. Фотима бегимнинг чақириғи билан Сulton Аҳмадбек бугун аzonда пойтахтимиз Ахсига кетдилар.

«Агар ўша бек сандиқдаги суратларни қўлга туширса, Ахсига элтиб, подшоҳ оиласига кўрсатмоқчи бўлганми? — деган ўй Мулла Фазлиддиннинг ичини музлатиб ўтди. — Булар менинг қонимга шунчалик ташнами? Балки Аҳмад Танбал Хонзода бегимни ҳам шу сурат орқали қўлга туширмоқчиidir? Ҳали уйланмаган бу бек подшоға куёв ва Хонзода бегимдек гўзал қизга эр бўлишни жон-дили билан истаса керак!»

Ургимчак тўрига ўхшаш ёпишқоқ бир бало атрофини ўраб келаётганини сезган Мулла Фазлиддин жон-жаҳди билан бу тўрни йиртиб чиқиб кетишга уринди:

— Жаноб доруға, мен сиздан адолат истаб келдим! Подшоҳ ҳазратлари мени сизнинг ҳимоянгизга топширган эдилар! Агар босқинчиларни топиб жазо бермасангиз, мен подшоҳ ҳазратларининг ҳузурларига паноҳ истаб кетишга мажбур бўлурмен!

— Аммо шуни билингки, жаноб меъмор, ҳазрати олийнинг ҳузурига сиздан ҳам олдин баъзи бир гапларингиз етиб бориши мумкин!

— Яъни, қайси гапларим, жаңоб доруға?

— Баъзи меъморлар ўзларини подшоҳлардан ҳам ба-

ланд қўярмишлар. «Бу тахту салтанатлар беному нишон йўқолур, фақат меъмору мусавирлар яратган зўр санъат асарлари тирик қолур» деган густохона ақидалар бизга маълум!

Мулла Фазлиддин бугун Қувада поччасининг уйида бехосдан айтиб юборган бу эътиқодини бошқа ишонган одамларига ҳам айтган пайтлари бўлган эди. Ана шу ишонгандаридан аллақайсиси айғоқчилик қилиб, бу гапни доруғага етказганини, энди доруға буни подшоҳга дастурхон қилиб олиб бориши мумкинлигини сезди-ю, баданидан совуқ тер чиқиб кетди. Лекин доруғага сир бой бериш қанчалик хатарли эканини пайқаб:

— Бу ҳаммаси ифво! — деб хитоб қилди: — Жанобдоруға, сизнинг устингиздан ифво қилувчилар ҳам оз эмас! Буни билурсиз! Мен Андижонда неки бино қилган бўлсам, ҳаммасига мирзо ҳазратларининг номларини битмоқдамен! Аркдаги девонхонани кўринг! Чорбоғдаги кўшқни кўринг! Мен уларнинг бирор жойига ўз номимни ёзибменми? Қани, ифвогарлар далил келтурсинлар! Мен ҳаммасига мирзо ҳазратларининг муборак номларини битганмен! Демак, тарихда менинг номим эмас, мирзо ҳазратларининг номи қолсин, деганмен! Шундоқми, йўқми? Қани, айтинг!

Доруға бу мантиқли далаилларни рад этолмасдан!

— Шундоқликка шундоқ, аммо...

— Аммоси йўқ, жаноб доруға! Сиз мени босқинчилардан ҳимоя қилиш ўрнига, айғоқчиларнинг туҳматига ишонадирган бўлсангиз, мен алҳол Аҳсиға бориб, мирзо ҳазратларига арз қилурмен!..

Узун Ҳасан бу дўқни писанд қилмай:

— Майли, боринг, арз қилинг! — деди. — Лекин шуни билингки, атрофимизни ёғий босган бу хатарли дамларда подшоҳга меъмордан кўра навкар зарурроқ! Аҳмадбекдек, мендек жанговар беклар учун подшоҳ ҳозир сиздеклардан қанчасининг баҳридан ўтур!

— Аҳсиға борганда кўурмиз, — деб Мулла Фазлидин маҳкамадан шахт билан ташқарига чиқди. Унинг важоҳати ҳозироқ Аҳсиға, подшоҳ ҳузурига арзга борадиганга ўхшарди.

Лекин у отганиб уйига қайтаётгандан сал ҳовуридан тушди-ю, узун Ҳасан айтган сўнгги гапларда аччиқ бир ҳақиқат борлигини сезди. Ёв қуршовида қолаётган Үмаршайх мирзо битта меъморни деб уч юз-тўрт юзтадан

навкари бор зўравон беъларга қарши бормаслиги аниқ. Аҳмад Танбал бугун Аҳсида — шоҳ саройида. Агар у Мулла Фазлиддиннинг малика суратини чизгани ҳақида гап тарқатса... Лекин Аҳмад Танбал буни қандай пайқаганикин? Мулла Фазлиддин Хонзода бегимнинг суратини чизиш учун у билан тиллакори кўшкда пинҳон учрашгандা буни зимдан кўриб қолган канизлар ёки савдарлар¹ бўлса, Аҳмад Танбал шунинг бир четини эшитиб, ҳалиги ҳамённи кўтариб келганикин? Босқинчи йигитларини ишга солиб ҳам мақсадига етолмаган бу ёвуз бек энди шоҳ саройига бориб пешгирилик қилиши мумкин. Агар у ўзи эшитган мишишни ҳарамдаги аёллар орқали подшоҳнинг қулоғига етказса... Умаршайх мирзо бўй етган қизининг қаёқдаги бир меъмор билан яшириқча учрашиб, сурат чиздирганини ўз шаънига катта иснод деб билиши аниқ. Шоҳ исковучлари ишга туширилса, Мулла Фазлиддин яшириб юрган суратни топиб олиб, Аҳмад Танбалнинг гапига далил қилиш қўлларидан келади. Ана ундан сўнг шоҳ қизига иснод келтирган мусаввирни минг қийноқларга солиб ўлдиришлари турған гап!..

Мулла Фазлиддин Хонзода бегимнинг суратини чизиш билан нечоғлиқ хатарли ишга қўл урганини энди астойдил ҳис қилди. Агар сурат қўлга тушса у қиз ҳам маломатга қолади. Дунё бусиз ҳам ташвиш-таҳликага тўла!.. Мулла Фазлиддин тагқутидаги малика суратини титроқ қўллар билан жилддан олди. Иғвогар абраҳаларга далил қолдирмаслик учун буни йўқ қилиши керак! Мулла Фазлиддин ўчоқда ёнаётган оловга яқин борди.

Рангли бўёқлар билан ишланган мўъжазгина суратдаги гўзал қиз шу пайт унга тирик бир одам бўлиб кўринди. Аланга ёлқинида қизнинг киприклари, лаблари билинар-билинмас нафис ҳаракатлар қилаётганга ўхшаб кетди. Қизнинг ақлни шоширадиган жозибаси бор эди. Бу жозиба Мулла Фазлиддинни ҳар галгидай яна сеҳрлаб олди, бояги таҳлика хаёлидан узоқлашиб, қалбида илиқ туйғулар уйғонди. «Наҳотки мен бу қизга ошиқ бўлсам? — ҳайрат ичida ўйланди Мулла Фазлиддин.— Қора халқ орасидан чиққан мендай бир сураткашнинг шоҳ қизига муҳаббат қўйиши кулгили эмасми? Йўқ! Мен фақат ўзим чизган суратга — ўз ижодимга меҳр қўйган».

¹ Савдар — хос хизматкор.

мен, холос! Бошим омон бўлса, бундай суратни яна чизгаймен!

Шу ўй билан суратни ўтга ташламоқчи бўлиб эгилди. Қиз тасвири оловга яқинлашганда юзи қизариб бўғриққандек, кўзлари эса чақнаб кетгандек кўринди. Мулла Фазлиддин тирик одамни ўлдираётгандек, севиклиси ни ўтга ташлаётгандек сесканиб орқага чекинди. Ички бир овоз уни «Қўрқоқсен!»— дегандек жеркиди. «Душманларинг устингга бостириб келаётгани йўқ-ку! Аҳмад Танбал ҳали Ахсида. Билиб қўй, сен бундай гўзал суратни иккинчи марта чиза олмассен! Тасвирга бунчалик тирик жозиба баҳш эта олганинг — такрорланмас бир илҳомнинг натижаси. Ботир бўлсанг қутқариб қолурсен!»

Мулла Фазлиддин суратни тагқутига қайтариб солди-ю, хизматкор йигитни чақирди:

— Кўчларни йифиштир! Аравани қўш! Қувага жўнагаймиз!. Тез!. Тезроқ!..

Мана ҳозир опасининг уйида ўтириб, юз берган воқеани поччаси билан жиянига сўзлаб берар экан, пўлат сандиқда Хонзода бегимнинг сурати борлигини уларга ҳам айтмади. Бу сирни у ҳеч кимга билдиromoқчи эмас эди...

— Во дариф!— деб Тоҳирнинг отаси оғир уҳ тортиди:— Бизнинг суянган тогимиз сиз эдингиз, Мулла Фазлиддин!.. Энди сиз ҳам қувфинга учраган бўлсангиз.

— Начора? Ҳаммамизнинг ҳам тақдиримиз қил устида турибдир!

— Подшоҳга арзга борсангиз додингизга етмасмикин, мулла тоға?

— Бу тўполонлар босилса, бир марта бориб арз қилишим аниқ. Агар додимга етса етди, етмаса, яна Ҳиротга қайтиб кетурмен! Алишер Навоий Шифоия деган бино қурдиromoқчи, деб эшиштан эдим. Оламда биз учун ёнган ягона умид чироғи ўша сиймо бўлиб қолди.

— Ҳирот орзусини қилманг, Мулла Фазлиддин, Фарғонада ҳам ҳунарингизнинг қадрига етадиган одамлар бор. Қуванинг кўприги сизнинг режангиз билан қурилган эди. Халқ ҳалигача сизни дуо қилиб юрибдир.

— Халқ! Қани энди бу кўприкдан фақат халқ ўтса! Эрта-индин бу кўприкдан ёғий қўшинлари ўтиб келур! Халқнинг бошига ёғиладиган балоларни ўйласам, бугунги жалалар селга айланиб, ўша кўприкни оқизиб кетма-

танига афсус қиласмен! Агар ёғий, бу томонга ўтолмасин деб, ўша кўприкни ҳозир ёндириб юборсалар, мен жон деб рози бўлур эдим!

«Чиндан ҳам,— ўйланди Тоҳир ўзича,— ёғоч кўприк. Еф сепса ёнур. Ёғий фақат шу кўприкдан ўтиши мумкин. Кечув ҳам йўқ. Ҳаммаёқ ботқоқлик, қамишзор. Агар кўприк ёндирилса ёғий ўтолмагай!» Тоҳир кутилмаган жойдан најот йўлини топгандай бўлди. Тасавурида гавдаланган ёнгин алангасидан гўё унинг бадани қизиб кетгандай туюлди. Робияни бало-қазодан асрайдиган энг зўр қалқон ана ўша олов бўлиши мумкин! Тоҳир қалтис истакдан кўзлари ёниб отасига қаради. «Айтсаммикин? Йўқ! Розилиқ бермас. Елғиз ўғилмен. Тоғам... нозик одам, аралашмагани маъқул. Таваккалчи йигитлардан топишим керак!»

Тоҳир секин ўрнидан туриб, ҳовлига чиқди.

Осмонни тўлдирган булатларнинг йиртиғидан бирда-яrim юлдузлар кўриниб қолади. Уйлар чироқсиз. Кўчалар сукутда. Аҳён-аҳёнда кучуклар ҳургани эшитилади.

Ифторни қилиб чиқсан Маҳмуд Тоҳирга дарвоза олдида учради. Робиянинг акаси бўлган бу косиб йигит Андижон қўрғонига кетишдан гап очган эди:

— Э, бу ниятлар ҳаммаси пучга чиқди!— деб Тоҳир унга тоғасидан эшитгандарини айтиб берди. Маҳмудни ҳам бирдан ғам босиб:

— Энди қайдан најот излаймиз, э худо!— деди.

— Ўзинг учун ўл етим, деган гап бор, Маҳмуд... Юр, дарвозахснага кирайлик. Бир сир айтамен. Оғзингдан чиқарма! Кўприкни ёндирамиз!..

— Қандай қилиб?— ҳайрат билан сўради Маҳмуд.

Тоҳир унга ўзининг режасини шивирлаб тушунтириди:

— Еф сепсак, ёғоч тез ёнгай. Билдингми?

— Жинни бўлибсен! Кўприкда соқчилар бор-ку.

— Ўзимизнинг беклар қўйган соқчиларми? Ҳали ёғий яқин келса ҳаммаси қўрғонга қочгай. Ъшандада биз...

— Йўқ, шошма! Ахсидан бизнинг подшомиз қўшин тортиб келаётган эмиш. Бу кўприк ҳали ўзимизга керак!..

— Подшойинг қўрғонидан чиқса шу кунгача чиқар эди! Ана, Марғилон ҳам бой берилибди! Подшодан дарак йўқ!..

— Билмасам, кадхудо¹ гузарда ишониб айтди. «Под-

¹ Кадхудо — қишлоқ оқсоқоли.

шо ҳазратлари йўлда, эрта-индин ҳимоямизга етиб ке-
лишлари аниқ!»— деди.

— Чиндан йўлга чиқибдими-а?

— Ҳа, ўз қулогим билан эшиздим! Бултур подшомиз
ёғий билан Ҳўжанддан нари Ховосга бориб урушган
екан-ку. Қува Ахсига Ховосдан ёвуқроқ¹ эмасми?

— Ёвуқликка ёвуқ-ку!.. Зора сен айтганинг рост чиқ-
са-я, Маҳмуд?

— Ҳа, ахир, кўприкка соқчиларни бекорга қўйган-
ларми?.. Подшомиз эрта-индин келиб жонимизга ора
киргай... Мана, кўурурсен!..

Шу топда Тоҳирнинг кўнглида ҳам умид учқунлаган-
дай бўлди. У қоронғи осмоннинг узоқ бир четида — Сир-
дарёдан нарида жойлашган Ахси томонга интизор қўз-
лар билан тикилди.

АХСИ. Ажалга даво йўқ

1

Баланд тепалик устига қурилган Ахси қалъаси тун
оғушида тоғ қоясига ўхшаб қорайиб кўринади. Қалъа
этагида Қосонсој Сирдарёга гувуллаб қуйилаётгани, ик-
ки дарё тўлқинлари бир-бирлари билан олишиб, қирғоқ-
қа шалоплаб урилаётгани узоқдан эшитилиб туради.

Ахсининг ҳукмрони Умаршайх мирзо бу кеча ҳарам-
да ўн саккиз ёшлик Қоракўз бегимнинг хобгоҳида ух-
лаб ётибди. Шоҳона тўшакнинг ипак пардаси ортида
биттагина шам липиллаб ёниб турибди. Унинг заиф ёғ-
дуси ташқаридан босиб кирмоқчи бўлаётган тун қорон-
фисидан қўрқандай титраб-қалтирайди.

Саҳар пайтида қалъа сукунатини бузиб ҳазин сур-
най товуши янгради. Сўнг унга қўш нақора товуши жўр
бўлди. Рўза тутиш — шоҳу малайга баробар келган
мажбурият бўлгани учун сурнай ва нақора сарой аҳлини
саҳарликка уйғотмоқда эди.

Ез тунлари қисқа, уйқуга тўймай саҳарликка туриш
хийла нохуш. Шундай бўлса ҳам Қоракўз бегим ўрнидан
оҳиста туриб ювинди, кийинди. Лекин парқу тўшакда
бақувват қўлларини ипак чойшабдан чиқариб ухлаб ёт-
дан Умаршайх мирзо ҳамон уйғонмас эди.

Хобгоҳдан икки хона нарида ҳашаматли танобий

¹ Евук — яқин.

уйда аллақачон тузаб қўйилган дастурхон миrzога му-
тазир эди. Унинг кеча ифтордан сўнг берган амрига му-
вофиқ бугунги саҳарлик учала хотинлари ва болалари
билин бирга қилиниши керак эди. Мирзонинг биринчи
хотини Фотима Султон, иккинчи хотини Қутлуғ Нигор
хоним, ўн етти ёшлиқ қизи Хонзода бегим ва ўн яшар
ўғли Жаҳонгир миrzо — ҳаммалари ўша танобий уйга
йиғилган эдилар. Лекин ҳазратнинг ўзлари келмагунча
ҳеч ким тамадди қила олмас эди.

Ички эшикдан Қоракўз бегим чиқиб келди. Кичик
жуссали бу ёш жувон тепада ёнаётган қандил ёруғида
беҳад чиройли кўринди. У катта бегимларга уялибгина
салом берди-да, ҳазратни уйғотишга журъат этолмага-
нини айтди.

Қоракўз бегимнинг ёшлиги, гўзаллиги, хусусан, уя-
либ гапириши ҳозир унинг энг суюкли хотин эканини
эсга туширди-ю, Фотима Султоннинг рашкини қўз-
гади.

— Ҳазратимни мунча қаттиқ ухлатибсиз, энди уйғо-
тиш нечун илгингиздан келмайдир?

Қутлуғ Нигор хоним болалар олдида қилинган бу
киноядан озорланиб:

— Қўйинг, оға ойи. Бу бегимда айб йўқ! — деди.

Хонзода бегим ойисининг юзига маъноли кўз ташлаб:
«Айб бизнинг отамиздами?» — демоқчи бўлди. Подшоҳ
ота қизи тенглик Қоракўз бегимнинг хобгоҳида қонли
уруш ҳаммани бесаранжом қилиб турган шундай таҳ-
ликали тунда қотиб ухлаб ётиши унга беҳад хунук ту-
юлди. Ҳозир отаси келса, Хонзода бегим унинг юзига
қарай олмаслигини сезди-ю, ойисидан илтимос қилди:

— Рұксат беринг, мен кетай... Саҳарликни бошқа қиз-
лар билан қиласай...

— Ҳазрат отангиз сўрасалар биз не деймиз? Ҳафа
бўлмасинлар, тағин. Сабр қилинг, қизим... Мунча ошиқ-
манг...

Ташқари эшикдан таъзим қилиб кирган чошнагир¹
аёл овозини қўрқув билан пасайтириб хабар берди:

— Осмонда юлдузлар сийрак қолди. Ҳадемай тоңг
ёришур. Ҳазрати олий саҳарликсиз қолурларму?

Тоңг отиб, аzon айтилгандан сўнг рўза ўз кучига ки-
ради, ҳеч ким ҳеч нарса еб-ичиши мумкин бўлмай

¹ Чошнагир — подшонинг дастурхонига қарайдиган ходима.

қолади. Узун ва иссиқ ёз кунида подшоҳни саҳарликсиз қолдириш бегимлар учун ўзлари оч-наҳор қолишлари-дән қўрқинчлироқ эди.

Барча кўзлар ички эшик олдида ийманиб турган Қоракўз бегимга тикилди. Мирзо унинг хобгоҳида ётибди, у ерга кириб ҳазратнинг ширин уйқусини бузишга бошлиқа ҳеч ким ботинолмайди. Чошнагир аёл Қоракўз бегимга илтижо қилди:

— Илоҳо Рустамдай ўғил кўринг, бегим!.. Бутун умидимиз сиздан!

Қоракўз бегим ташвишли юз билан секин бурилди-ю, ички эшиклардан ўтиб, хобгоҳга қайтиб борди. Умаршайх мирзо боши ёстиққа ботиб, қаттиқ ухламоқда эди. Қоракўз бегим олтин шамдонни парда ортидан олиб, нақшин токчага қўйди. Шам ёруғи мирзонинг юзига тушди. Аммо бу ҳам уни уйғотолмади — мирзо қечаси маъжун¹ еган эди.

Қоракўз бегим уни чўчитиб юборишдан қўрқиб, маънин товуш билан:

— Ҳазратим! — деб чақирди. Бу ҳам кор қилмади. Қоракўз бегим гилам узра чўйкалаб, ваҳимадан хиёл титраётган нафис қўлларини ҳазратнинг майин чойшаб устида ётган залварли билагига қўйди. Тўшакдан гул ҳиди келмоқда эди — кеча оқшом чойшабларга гул атри сепилган эди. Қоракўз бегим мирzonинг уйғонмаётганидан ажабланиб, унга тикилиб қаради. Лаблари ярим очиқ, оқиш юзи осойишта. Шу ётишда у қўрқинчили подшоҳ эмас, ҳали қирқ ёшга тўлмаган ва баҳодирона уйқуга чўмган кўҳлик бир йигит бўлиб кўринди. Бу йигит Қоракўз бегимга тўсатдан жуда ғанимат туюлди. Ҳозир юрт нотинч, Ахсига ёв бостириб келяпти. Мирзони ажал кутаётганини олдиндан сезгандек, Қоракўз бегимнинг юраги ёмон бир увшиди. У тўсатдан эгилиб, мирzonинг юзидан, кўзларидан видолашган каби ўпа бошлади.

Умаршайх мирzonинг киприклари титради. У кўзини очиб, тепасида турган Қоракўз бегимга карахт юз билан бир лаҳза тикилиб турди.

Қоракўз бегимнинг катта-катта кўзлари хавотирлик туйғусидан яна ҳам улканлашиб кетди. У уйқудаги мир-

¹ М а ѡ ж у н — зиравор ва доривор гиёҳлардан тайёрланган. Қўпинча унга-ағион ҳам қўшганлар.

зони ўпиш беадаблік саналишидан таҳликаға туған
эди. Мирзо:

— Сизми? — деди-ю, пима бўлганини фаҳмлаб ку-
лимсиради.

Қоракўз бегим энди енгил тортди ва дадилланиб
таъзим қилди.

— Ҳазратим, саҳарлик вақти ўтиб кетмасин.

— Сизнинг бўсаларингиз саҳарликдан ширини-
роқ...

Бегим жиддий гапирди:

— Оға ойим, хоним ойи — ҳаммалари ҳазратимга
мунтализирлар.

Умаршайх мирзо бугунги режалари ва уруш таш-
вишларини эслаб қовоғини солди-да, индамай ўрнидан
турди.

У зардўзи кўрпачалар тўшалган танобийга тўрдаги
әшикдан кириб келди. Салласи ва камарига қадалган
қимматбаҳо гавҳарлар шам ёруғида нафис жилоланар-
ди. Одатдаги таъзимлардан сўнг аёллар нафасларини
ичларига олиб, бир лаҳза жим қолдилар. Подшоҳ кимни
қайси ёнига таклиф қилса — кимнинг ҳурмати қай да-
ражада экани шу билан белгилаб берилади.

Фарғона водийсига уч томондан душман ҳужум қи-
либ келаётган шу оғир вазиятда Умаршайх мирзо ҳамма
хотинларига иложи борича илтифот кўрсатмоқчи бўлди.
Хотинлари орасида энг ёши улуғи ва энг обрўпарасти
Фотима Султон бўлганилиги учун мирзо биринчи бўлиб
уни юқорига таклиф қилди. Фотима Султоннинг кўзлари
қувончдан чақнаб кетди. У подшоҳнинг ўнг томонига
ўтмоқчи бўлиб бораётган эди. Бироқ Умаршайх мирзо
унга чап томонидан жой кўрсатди. Энг мўътабар ҳисоб-
ланган ўнг томонга эса Қутлуғ Нигор хонимни таклиф
қилди. Хоним — таҳт вориси Заҳиридин Муҳаммад
Бобирнинг онаси эди, унинг ўнг томонида ўтириши ад-
латдан эканини кичик хотинлар тан олар эдилар. Аммо
Фотима Султон ўзининг ҳурмати Қутлуғ Нигор хоним-
нидан паст эканини яна бир марта ҳис қилиб, кўзла-
ри алам билан қисилди.

Дастурхонга тортилаётган кийик кабоби, кাকлик
гўшtlари ҳазратдан сўнг Қутлуғ Нигор хонимга қўйи-
лар, ундан кейин Фотима Султонга навбат келар эди.
Шу сабабли оғизда эрийдиган энг аъло гўшtlар ҳам
Фотима Султонга илитма овқатдек мазасиз туюларди.

Оқшом ифторда ейилган таомлар ҳазм бўлиб улгурмаган, дастурхон атрофидагиларнинг кўпчилиги ҳали кун бўйи оч юришини ўйлаб, ўзини мажбур қилиб бўлса ҳам кўпроқ овқат ейишга интилар эди. Қутлуғ Нигор хонимнинг ёнида ўтирган Қоракўз бегим овқатдан ҳам кўпроқ бодринг, ҳандалак ер, шарбат ичар эди — кеча кун иссиғида ташналиктан ниҳоятда қийналгани эсидан чиқмас эди.

Осмон оқариб қолди. Тонг ёришган сари қандилдаги шамларнинг нури хира торта бошлади. Аzon айтадиган пайт ўтиб боряпти. Аркдан ташқаридаги масжиднинг имоми кошинлик минорага чиқиб, баковул¹нинг ишорасини сабрсизлик билан кутяпти. Ахир мирзо ҳазратлари саҳарлик қилиб улгурмасдан аzon айтиш хатардан холи эмас.

Овқат ейилиб, чойга ўтилганда Умаршайх мирзо хотинларига вазият қанчалик оғирлашаётганини айтиб берди.

Шу пайт масжид томондан аzon товуши эшитилди. Чой ичаётган Хонзода бегим шошилиб пиёласини дастурхонга қўйди. Умаршайх мирзо хотинларига бир-бир қараб деди:

— Мўйсафидлар «тўрт мучанг бутун бўлсин», деб дуо қилурлар. Фотима Султон Қутлуғ Нигор хоним, Қоракўз бегим, фарзандларимиз Хонзода бегим, Жаҳонгир мирзо — ҳар бирингиз оиласизнинг азиз бир мучасидирсиз. Истайменки, бу мушкул вазиятда ҳамма мучаларимиз бутун бўлсин, бир-бирларига меҳру шафқат кўрсатсин. Илик² ўз ўрнида азиз. Кўз ўз ўрнида мўътабар. Агар кўз билан илик бир-бирига низо қилса, бундан ҳар иккиси жабр кўрур.

Сўнгги гап Фотима Султон билан Қутлуғ Нигор хонимга қаратилганини ҳамма сезди. Хонимнинг хаёли шу хатарли вазиятда ота-онадан узоқда — Андижонда турган ёлғиз ўғли Бобирда эди. Ҳазрат уни нега фарзандлари қатори тилга олмади?

— Ҳазратим, берган ўгитингизни бебаҳо гавҳар ўрнида қабул қилурмиз,— деди Нигор хоним.— Ижозат берсангиз, битта ўтинчим бор.

— Ижозат.

¹ Баковул — подшоҳ ошхонасининг жавобгар ходими.

² Илик — бу ерда қўл маъносида.

— Уруш хатари кучлик экан. Бобир мирзони Андижондан пойтахтга чақирилсангиз, ёнимизда бўлсалар...

— Андижон қалъаси мустаҳкам. Бобир мирзо у ерда бўлса қалъа янада мустаҳкам бўлур. Бизнинг мирзога ишончимиз катта.

Бу жавоб билан хонимнинг илтимоси рад этилди. Фотима Султон ёнида уйқусираб ўтирган ўғилчasi Жаҳонгир мирзони секин бағрига босиб, бошини силаб қўйди. Бу билан у Қутлуғ Нигор хонимдан кўра ўзининг аҳволи яхшироқ эканини намойиш қилмоқчи эди.

— Бобир мирзонинг онаси сиздан умрбод миннатдор, ҳазратим,— деди Қутлуғ Нигор хоним,— фақат ҳали ўн икки ёшга тўлмаган бола... уруш майдонида..

— Хоним, ортиқча хавотирга ўрин йўқ. Бобир мирzonинг ёнига энг яхши бекларимиз юборилган. Еш бўлса ҳам саркардалика тайёрланмоғи зарур. Агар менинг куним битса, ўрнимни Бобир мирзо олғай.

Энди ўттиз тўққиз ёшга кирган ва қирчиллама йигит ёшини яшаётган мирzonинг ўз ўлими ҳақидаги сўзларидан ҳарам аҳли оғир жимликка чўмди. Ҳамманинг ҳаёли қонли урушга кетди. Хонзода бегим отаси ҳақидаги бояги нохуш ўйларини унтиб, унга кўзи мўлтираб қаради. Умаршайх мирзо гапининг таъсирини янада оширгиси келиб давом этди:

— Агар мен бу фоний дунёдан кўз юмсам, ҳамманинг Бобир мирzonинг амрини ҳозирги менинг амрим каби бажо келтиргайсиз. Жаҳонгир мирзо!

Подшоҳ отаси билан муомалага яхши ўргатилган ўн яшар бола дарҳол сергакланиб, қўлини кўксига қўйди:

— Лаббай, ҳазратим!..

— Менинг бу гапларимни сен ҳам эсда тутгил. Бобир мирзо сендан фақат икки ёш катта бўлса ҳам агар менинг ўрнимда қолса, сен унга фарзанддек содиқ бўлғил.

— Хўп, ҳазратим!

Бола отасининг сўзларидаги маънони дуруст тушуммагани учун бунчалик тез ва осон «хўп», деди. Аммо аёллар мураккаб ҳислар туғёнида қолдилар. Қоракўз бегимнинг Умаршайх мирзога термилиб турган кўзларида ёш йилтиллади. Мирзо буни кўрди-ю, суюкли хотининг бояги ўпичлари эсига тушиб, видолашув аломати-

га ўхшаб туюлди. Умаршайх мирзо ўзининг сўнгги гаплари ҳам васиятга ўхшаб кетганини энди сезди. Юзига бирдан ажал шарпаси теккандай юраги «шиф» этди. «Менга не бўлди? Улимни бўйнимга олиб васият қилдимми? Йўқ, йўқ!»

Мирзо ўз гапларидан ўзи қўрқиб кетганини пайқаган Хонзода бегим бугун отасининг алланечук ёрдамга муҳтож бир аҳволда эканини кўриб, унга бехосдан раҳми келди.

— Ҳазратим, мен мунглиқ қизингиз, сизга худодан Шайх Саъдийнинг умрини тилаймен! Илоҳим юзга киринг!

— Айтганинг келсин, қизим! — деб Умаршайх мирзо енгил бир сўлиш олди. У қизининг зийраклигини, сўнгги пайтда бўй етиб, ҳусни етилиб, кўзга ниҳоятда яқин бўлиб қолганини гўё энди сезди-да, қўшиб қўйди:— Мен ахир сенинг тўйингни ўтказмоқчимен!

Хонзода бегимни Самарқанд подшосининг ўғли Бойсунқур мирзога сўратган эдилар. Лекин Умаршайх мирзо бунга рози бўлмаган эди. Мана энди агар жуда дўппи тор келса, балки у қизини подшоҳ акасининг ўғлига бериб, шу йўл билан урушни ярашга айлантирас! Лекин бундай истиқбол Хонзода бегимга қоронги тундек мавҳум ва ваҳимали туюларди. Унинг бошқа орзулари бор эди. Шунинг учун отасининг сўнгги ниятидан чўчиб, гапни бошқа ёққа бурди:

— Агар инимиз Бобир-мирзони чақиртириш имконисиз бўлса, мен билан ойимга рухсат беринг, биз Андижонга борайлик!

— Қизим, сен менинг энг бебаҳо гавҳарларимдансан. Бу хатарли аснода сени қанотим остидан чиқармагаймен!

— Ундоқ бўлса менга рухсат беринг, ҳазратим! — деди Қутлуғ Нигор хоним.

— Хоним, Марғилондан чопар кутмоқдамиз. Вазият аниқланса рухсат олурсиз.

Умаршайх мирзо дастурхонга фотиҳа ўқиб, ўрнидан турди-ю, шошилинч тадбирлар ўйлаб, ҳарамдан чиқди.

Ҳарамга кириш ҳуқуқидан маҳрум қўрчилар туни билан ташқарида қўриқчилик қилган эдилар. Энди ҳазрати олийнинг зътиборини тортмасликка ва хаёлини бўлмасликка тиришиб, секингина унга эргашдилар

Тонг энди отган, ҳали офтоб чиқмагап бўлса ҳам кўпчилик беклар ва мулодимлар девониомда ҳозир эдилар. Ҳаммалари мирзони таъзим билан қарши олдилар. Зарбоф тўн кийган, белига тилла камар боғлаган серсоқол эшик оға биринчи вазир даражасидаги энг катта бек эди. Мирзо унга юзланиб, қаердан чопар борлигини сўради.

— Ҳазрати олийлари, Исфарарадан.

Эшик оға икки букилиб таъзим қилас экан, юзи тунд кўринди.

— Қандай хабар, бек?

— Ҳазратим, қулингизнинг бир қошиқ қонидан ўтинг...

Демак, Исфара ҳам ёв қўлида! Мирзо ички бир титроқ билан Марғилон чопарини сўради.

— Ҳазратим, Марғилон чопарига интизормиз.

Наҳотки Марғилон ҳам таслим бўлган? Унда Андижон ҳам хавф остида қолади! Еки чопарлар ёв қўлига тушганмикин? Балки бирортаси хиёнат қилиб, нариги ёққа ўтиб кетгандир?

— Ҳазрати олийлари, яна чопар юборишга фармон берурларми?

— Чопар юбориб яна неча кун йўлига қарайлик?!

Эшик оға узр сўрагандек таъзим қилиб, орқага чекинди.

Ахси қалъасининг қамалда қолиши мирзога энди муқаррардек туюлди. У эшик оғага олти ойлик захира тайёрлатишни буюрди. Қалъа баланд тепаликда тургани учун унг а сув чиқмас, сувни мешкобчилар ташиб келтиришар эди. Мирзо ўттиз ёшлиқ, хушқомат Қосимбекка қалъа ичидаги янги бир тошховуз қурдириш ва уни сув билан тўлдиртириш амрини берди.

Мирзонинг авзойи ёмонлигини сезиб турган беклар дарҳол унинг фармонини бажаришга киришдилар. Мирzonинг ўзи эса отланиб аркдан чиқди. Мулодимлар ва кўрчилар ҳам отланиб, одатдагидай, унга эргашдилар.

Умаршайх мирзо қалъанинг бир четида дарёning баланд қирғоги устида, жар лабида турган кабутархонага қараб йўл олди. Отлиқ чопарлар дом-дараксиз кетгандилари учун мирзо энди қанотлик «чопар»ларини ишга солмоқчи эди.

Қабутарларнинг дон ва сувларига қараётган қабутарбонлар подшоҳни яқин келиб қолганда кўрдилару, шоша-пиша таъзимга чиқдилар. Мирзо отини тўхтатди. Орқадаги мулозимлардан иккитаси — рикобдор¹ билан жиловдор тез отдан тушдилар. Бири мирзо мингандан қора қашқа отнинг олтин жиловидан, иккинчиси кумуш узангисидан тутди. Мирзо каттагина қорин қўйган семиз одам эди, отдан эҳтиёт билан секин тушди.

Марғилон ва Қўёнга учадиган маҳсус қабутарлар келтирилди. Найча қилинган қисқа хатлар уларнинг қанотлари тагига маҳкамланди. Умаршайх мирзо қабутарларни ўз қўли билан учирашни яхши кўрар эди. У ҳаворанг чиний қабутарни қўлига олиб, ёғоч зина билан қабутархонанинг томига чиқди.

Томдан атроф жуда яхши кўринар эди. Узоқдаги тоғортидан қуёш жимгина кўтарилиб келар, пастда шовуллаётган дарёning тўлқинлари нафис жилоланиб турар, фир-фир эсаётган эрталабки шабада ипакдай майнин туюлар эди. Умаршайх мирзо том тепасида туриб, ўзи мустаҳкамлатган ва пойтахтга айлантирган Ахсига кўз югуртириб чиқди. Қўргоннинг қўй етмас баландликка қурилганидан ва атрофи чуқур ўнгирлар билан иҳота қилинганидан алоҳида бир мамнуният сезди. «Ҳали бу жарларга қанчадан-қанча ёғийларим қулагай», деган ўй кўнглини шод қилди.

Бироқ бу баҳайбат ўнгирлар оёқ остидаги заминни ичдан ҳилвиратиб қўйганини, қабутархона ортидаги жарнинг тагини сув ўйиб кетганини, ер ўпирилгудек бўлиб турганини мирзо ҳам, унинг атрофидаги мулозимлар ҳам мутлақо сезмас эдилар. Тупроғи тўкилиб, қулашга баҳона тополмай турган жарнинг қаърида хатарли бир шарпа борлигини ҳозир фақат қабутарлар сезаётган бўлса эҳтимол. Чиройли тўрлар ва озода катақлар ичида ўтирган бу жониворлар бугун кечаси негадир жуда безовталаниб, патир-патир қилиб чиқишиди. Ҳозир ҳам улар дон-сувга қарамай, нуқул ташқарига интилишар, катақ чивиқларини асабий чўқишар эди. Қабутарбонлар бунинг сабабини тушунмай ҳайрон эдилар.

Фақат Умаршайх мирзонинг қўлидаги чиний қабутар катақдаги хатардан қутулгандай осойишта бўлиб қолган эди. Ҳозир бутун олам Умаршайх мирзога мана

¹ Рикобдор — узангичи.

шу кабутардай маъсум ва осуда туюлди. У том ўртаси-
га бориб, кабутарнинг майин қанотини юзига босди. Уни
учиришдан олдин!

— Марғилоңга уч, қанотли чопарим! — деб шивир-
лади.

Тагидан нураб турган жар шу аснода бирдан ўпирил-
ди. Кабутарлар қўнадиган айри ёғоч «шақ» этиб паст-
га учиб кетди. Одамлар нима бўлаётганини тушуниб
улгурмасларидан кабутархонанинг нариги девори жар
 билан бирга ўнгирга қулаб, томни ҳам тортиб кетди.
Томнинг ўртасида турган Умаршайх мирзо чанг-тўзон
 ичиди қаттиқ бир чайқалди-ю, гандираклаб йиқилиді.
Унинг жон аччиғи билан қичқиргани ваҳимали қарси-
лаш ва гурсиллашларга қўшилиб эшитилди. У йиқилиб
 тушаётгандаги кабутарни қўйиб юборган эди.
Чиний кабутар чанг-тўзон орасидан юлқиниб чиқиб,
 осмонга қараб отилди. Мирзонинг ўзи эса том ёғочла-
рига, сомон сувоқларига, жар тупроқларига аралашиб,
 уч терак бўйи пастга қулаб кетди.

Мирzonинг кетидан томга энди чиққан кабутарбон
 зинапоядан ўзини ерга отди. Мулозимлар ва қўрчилар
 кутилмаган фалокатдан ваҳимага тушиб орқага қочди-
 лар. Отлар ҳуркиб, нўхталарини узгудек силтанишар
 ва кишнашарди.

Ҳазрати олийни хавф-хатардан асроймиз, деб юрган
 қўрчилар аввал нима бўлганини фаҳмлай олмай эсан-
 кираб қолдилар. Кейин улар жар ўпирилганини фаҳмла-
 дилар, лекин мирzonинг олдига тезда этиб бора олма-
 дилар. Чунки бош айланадиган баландликдан пастга
 тушиб бўлмас, нураб турган жарнинг лабига одам бор-
 са яна ўпирилиши мумкин эди. Қўрчилар ва мулозим-
 лар қалъадан от чоптириб чиқиб, мирзо қулаб кетган
 жар этагига этиб боргунларича, сўнг ўйилиб ётган туп-
 роқ, кесак ва ёғочлар орасидан уни топиб, кавлаб ол-
 ғунларича ўн жонидан бири ҳам қолмаган эди.

Унинг жасадини аркка киритиб ювдилар. Мажақла-
 ниб, таниб бўлмас ҳолатга келган юзини оқ шоҳи билан
 ёпиб қўйдилар.

Бугун эрталаб Умаршайх мирзо саҳарлик еган тано-
 бийда Қоракўз бегим Қутлуғ Нигор хонимни қуchoқлаб
 уввос тортиб йиғлар эди.

— Мен сабаб бўлдим, хоним ая! Ҳазратимни мен не-
 чун уйғотдим?! Уйғотмасам ўша жойга кечроқ борар

эдилар-ку! Мен юзи қора сабаб бўлдим бу ўлимга! Мен!

Бугун саҳарлик пайтида мирзо худди ўлишни билгандай васият қилганини эслаб, Қутлуғ Нигор хоним ҳам ўзини йиғидан тутолмас эди.

— Э воҳ, раҳматлик куни битганини қайдан билган экан-а?! Шундай гапларни айтдилар...

Қоракўз бегим хонимнинг қучоғидан чиқиб, кичкина мушти билан чаккасига урди.

— Мен ҳали туғилмаган фарзандимни отасидан жудо қилдим, хоним ая!— деб ўртаниб шивирлади:— Бўйимда бўлганини шу кеча билиб эдилар! «Ўғил бўлсин!»— деб орзу қилиб эдилар! Энди бу болага отасини қайдан топамиз? Қайдан топамиз? Мен ҳазратимни нечун ўйғотдим, хоним ая? У кишига келган ажал мени олса бўлмасмиди? Уша жардан мен қулласам бўлмасмиди?

— Ундоқ деманг, жоним! Биз ҳам энди жар лабида қолдик! Бутун атрофимиз таҳликали жар!

Қутлуғ Нигор хоним эрининг кутилмаган ўлимида қандайдир сирли бир маъно борлигини ҳозир тилига келган шу сўзлардан сезди. Умаршайх мирзодек жанговар одам қонли урушларда қилич чопиб юрганда ўлмасдан энди жардан қулаб ўлгани тасодифмикин? Мирзонинг ота-боболари барпо этиб кетган давлат мана шундай баланд жарлар лабига қурилган биноларга ўхшамасмикин? Парча-парча бўлиб кетган ва ўзаро урушларда емирилаётган улкан давлат Қутлуғ Нигор хонимнинг тасаввурода жарга қулаб тушаётган ўша биноларга ўхшаб кўринди-ю, вужудини сескантириб юборди. Ахир унинг ёлғиз ўғли, суюкли фарзанди Бобир ҳам мана шу биноларнинг бирида истиқомат қилмаяптими? Отасини олиб кетган ўпирилишлар Бобирнинг бошига ҳам тушмасмикан!?

— Йўқ, йўқ! Тангрим уни паноҳида асрасин! Мен борай, бегим, Андижонга чопар юборай! Бобир мирзони бу фалокатлардан огоҳ қиласай!

Қутлуғ Нигор хоним кўз ёшлиарини артиб, ўз хонаси га чиқди ва энг ишонган амирларидан Қосимбекни чақиртириди. Уни топиб келгунларича Андижон чорбогида Бобир билан бирга турган онаси Эсон Давлат бегимнинг номига мактуб ёзди.

Фотима Султон-бегимнинг төпшириғи билан Анди-

жонга яширинча жўнаган Аҳмад Танбал бу орада Сирдарё кўпригидан ўтиб, Банди Солор йўли билан анча жойга бориб қолган эди. Кўзга ташланмаслик учун биттагина навкар эргаштириб кетаётган Аҳмад Танбал кеча Андижондан олтмишта навқар билан келган эди. Бугун Фотима Султон унга катта ваъдалар берди. Агар Аҳмад Танбал Андижондаги содиқ бекларнинг бошини қовуштириб, Бобирни четлатса-ю, тахтга Жаҳонгир мирзони ўтқазса марра уники. Аҳмад Танбал Умаршайх мирзо саройида иккинчи даражали беклар қаторида шунча йил кўнгли чўкиб юрди. Энди бас! Жаҳонгир мирзо подшоҳ бўлса, Аҳмад Танбал унинг энг биринчи вазирига айланади. Норасида подшоҳга вазир бўлиш эса подшоҳ бўлиш билан баробар! Ана унда қаёқдаги мусавирандан Хонзода бегимнинг суратини сўраб юрмайди. У Хонзода бегимнинг ўзини олади! Мана шу орзу билан Андижонга от суриб бораётган Аҳмад Танбал орқага ўғринча ўғирилиб қараб қўйди.

Банди Солор йўлида бошқа ҳеч ким кўринмас эди, Орадан бир неча соатлар ўтиб, Аҳмад Танбал кўзга кўринмай кетгандан кейин Аҳсидан Қосимбек қавчин тўртта навкари билан от чоптириб чиқди. У ҳам тезроқ Андижонга етиб боришга интилар, Бобир мирзонинг тарафдорларини йиғиб, уни тахтга ўтқазишиш иштиёқи билан ёнар эди.

АНДИЖОН. Гул ва қуюн

1

Чопарлар ҳали йўлда. Уруш тўполони Андижонга етиб келганича йўқ. Шаҳарнинг шимолидаги кўркам чорбоғ баланд девор билан ўралган, дарвозаларга соқчилар қўйилган. Чорбоғ ичida ўн икки ёшлик Бобир мирзо чавандозлик машқлари ўтказмоқда. У чорбоғ четидаги ялангликдан бўз отни чоптириб чиқди-ю, бирдан жиловни қўйиб юборди. Камонга чапдастлик билан ўқ ўрнатди ва чопиб бораётган от устидан нишонга отди. Ей ўқи нишон ёғочига «так» этиб урилгани баралла эштилди.

Бир тўп отлиқлар машқни чинор соясида туриб кузатмоқда эдилар. Қора отлиқ Мазидбек нишонга би-

ринчи бўлиб яқинлашди. У Бобирнинг бек аткаси¹ эди. Бобир отини қайтариб келаётганда, Мазидбек унга:

— Мўлжални андак баландроқ олибсиз,— деди.— Аммо зарбингиз беҳад яхши.

Мазидбек сопига садаф қадалган ёй ўқини нишондан авайлаб суғуриб олди-да, қанчалик чуқур ботганини бармоғи билан ўлчаб кўрди:

— Билагингизда куч кўп, амирзодам! Шерпанжасиз. Подшоҳ ҳазратлари сизни Бобир деб атаганлари бежиз эмас. Бобир арабча шер демакдир!

Бобир мирзонинг-навкарлари, яроқбардор, тенгдош-кўкалдош² мулозимлари ҳам нишон атрофида йифилдилар. Улар Бобирнинг ҳали ўш ўспирин эканини, қўлидаги камони бўйи бастига мос қилиб кирайтириб ишланганини билар эдилар. Шуни ўйлаб, Бобир мақтовни ўзига олгиси келмади.

— Шерпанжа деб отами айтсинлар. Мен кўрганмен, зарблари бундан ўн ҳисса ортиқ. Мушт урсалар, энг зўр йигитни ҳам йиқитурлар.

— Камина ҳам айтмоқчи эдимки, амирзодамнинг шерпанжаликлари подшоҳ отангизга тортганлигингидан нишонадир!

Мазидбек гапни моҳирлик билан бурганини сезиб, Бобир кулиб қўйди. Унинг майин сарғиш тукли пешонасида юқори лабининг устида тер резалари йилтиради.

— Кун исиди, амирзодам. Эз рамазони тинкани қуритур. Ифтогача толиқиб қолмасинлар. Энди бориб, салқинда мутолаа қилсинлар. Камина Андижон қўроғини мудофаага тайёрлаш билан банд бўлурмен.

Бобир мулозимлари билан машқ майдонидан чиқаётганида кўнглида янги бир истак уйғониб, кўзлари шўх йилтиради. У отини тўхтатиб, орқасига ўгирилди ва жийрон қашқа от минганди навкарни ёнига чақирди. Навкар ёндашганда, қўлини чўзиб, отининг эгарини силкитиб кўрди. Эгар маҳкам урилган эди. Бобир навкарга эллик қадамча нарига боришини, отдан тушиб, жиловидан секин етаклаб кетаверишни буюрди.

Мулозимлар орасида энг эътиборлиси Бобирнинг опаси билан бир онани эмиб ўсган ўн олти ёшлик Нўён

¹ Бек атка — ҳали балоғатга етмаган мирзоларга ҳомийлик қилиш учун подшоҳ томонидан тайин этиладиган масъул бек.

² Кўкалдош — бир онани эмган болалар.

Кўкалдош эди. Мазидбек йўқлигида Бобирни эҳтиёт қилиш Нўёнга топширилган эди. Нўён Бобирнинг нима қилмоқчи эканини фаҳмлаб, безовталанди:

— Амирзодам, ҳозиргина бир машқдан чиқдингиз. Бошқа мушкул машқларни эртага қолдиринг.

— Хўп, мушкили эртага қолсин, ҳозир осонини кўрайлик,— кулиб деди Бобир.

Навкар айтилган жойга бориб отдан тушди ва жийрон қашқасини секин етаклади. Бобир бўз отни чоптириб бориб, навкарга етганда оёқларини узангидан бўшатди, қамчини тишига олди. Бўз от жийрон қашқа билан жипс келган заҳоти Бобир бўй чўзиб, нариги отнинг эгаридан икки қўллаб ушлади-ю, бор кучи билан эгардан-эгарга сакради.

Бироқ навкарнинг оти сакраш зарбидан чўчиб, ҳуркиб кетди. Бобирнинг хипча гавдаси бир лаҳза ҳавода муаллақ бўлиб қолди, кейин пастга тушиб кетди. Оёқлари ерга «тап» этиб урилди. Аммо у қўлларини эгардан бўшатмади — бўшатса ёмон ийқилишини сезиб, жон-жаҳди билан ёпишди. Билаклари чиндан ҳам кучли экан, шундай оғирликка бардош берди. Фақат навкар отини тўхтатиб олгунча Бобирнинг оёқларк ерни тирнаб судралиб борди-ю, бежирим ипак салласи бошидан учиб кетди.

Нўён Кўкалдош ёрдамга етиб келганда Бобир ўзини ўнглаб оёқда турар, бироқ ранги жуда оқариб кетган эди. Нўён отдан сакраб тушди ва Бобирга салласини олиб бермоқчи бўлди. Аммо Бобир тупроққа тушган саллага қарагиси ҳам келмади. Қамчи ҳамон тишида эди, уни қўлига олди, навкар етаклаб келган бўз отга индамай минди. Сўнг отига қамчи босиб, чорбоғ дараҳтлари орасидан от чоптириб кетди.

Нўён унинг кетидан ваҳима билан тикилганича қолди. Ҳаммаёқ дов-дараҳт, ариқ. Отлиқлар юрадиган катта йўл чорбоғнинг нариги четидан ўтади. Бобир эса тўғрига кетган тор сўқмоқдан, қалин дараҳтлар орасидан елдай учиб боряпти! От ариқдан сакраб ўтаётганда Бобирнинг боши ариқ бўйида ўсан ўрикнинг катта бир шохига уриладиган эди. Аммо у отнинг бўйини қучоқлаб, пастга шундай эгилдикни, ўрик новдалари орқасини ишқалаб ўтди. Пишган ўриклардан бир қанчаси узилиб, ариқдаги сувга «чўлп-чўлп» этиб тушди.

— Сен нега отни маҳкам тутмадинг, авбош! — деб

Нўён навкарни сўқди.— Ҳаммамиз амирзоданинг қаҳрига қолдик! Биздан хафа бўлиб кетдилар!

Бобир боғ тўридаги муҳташам кўшк олдига бориб, отини тўхтатди. Хизматкорлардан бири шошилиб келиб отнинг жиловидан олар экан, Бобирнинг ёлғиз ва бош яланг қайтганидан таажжубга тушди. Кўшкда Бобирнинг бувиси Эсон Давлат бегим уни кутиб ўтирган бўлса керак. Агар ҳозир у Бобирнинг қай аҳволда қайтганини кўрса-ю, нималар бўлганини билса, мулозимлар ҳам, навкарлар ҳам жазо олиши аниқ. Чунки подшоҳ ҳазратлари Бобирни кўз қорачиғидай асрарни Эсон Давлат бегимга топшириб, чорбоғ ва қасрни ҳамма хизматкорлари билан унинг ихтиёрига бериб қўйган.

Мулозим ва навкарлар қўрқа-писа кўшкка яқинлашшайданларида мармар ҳовуздан беридаги беҳи шохига қантариб қўйилган бўз отга кўзлари тушди. Бобир ҳовуз бўйидаги тиллакори шийпонга кирганини сезишиб, шу ерда секин отдан тушдилар. Нўён Кўкалдош Бобирнинг салласини чангдан тозалаб, қўлида авайлаб олиб келмоқда эди. Шу пайт шийпон ичидан бошига бўрк кийган Бобир чиқди. Оти ҳурккан навкар ўзини Бобирнинг оёғи тагига ташлаб узр сўрашга чоғланди.

Нўён Кўкалдош саллани нодир совғага ўхшатиб авайлаб кўтариб келаётгани Бобирга бирдан жуда кулгили туюлди. Ундан қаҳрли дашном кутиб бош эгиб турганлар тўсатдан кулги товушини эшитиб, ҳайрат билан бош кўтардилар. Бобир болаларча завқ билан гавдасини орқага ташлаб, хандон уриб кулар эди. Нўён Кўкалдош ҳам қўлидаги саллага энди бошқача кўз билан қаради ва кулиб юборди. Бошқалар ҳам елкаладидан тоғ қулаб тушгандай яйраб кулар ва жилмаяр эди. Бобир кулгидан тўхтаб, оти ҳурккан навкарга юзланди:

— Сизда айб йўқ эди...

Навкар ундан катта бир инъом олгандай астойдил миннатдор бўлиб таъзим қилди. Бобир Нўёнга тайинлади:

— Катта онам билмасинлар.

— Муддаомиз ўзи шу, амирзодам,— кулди Нўён ва бошқа мулозимларга сирдошларча кўз қисиб қўйди.

Шундай пайтда Кўкалдош ва тенгдошлар ўзларини тахт ворисига хизмат қилиб юрган ёш мулозимлар деб эмас, унинг сирларига шерик бўлган яқин дўстлар деб

билишар ва бундан кўнгиллари ўсиб, Бобирга меҳрлари ошар эди.

Кўшкдан чиқиб келган савдар Бобир қаршисида қўл қовуштириб, ичкарида мударрис уни кутиб ўтирганини айтди. Бобир бугун шариат илмидан дарс олиши кераклигини эслади ва тенгдошларидан истар-истамас ажраби, кўшкка йўналди.

Эшиклари нафис ўймакорликлар билан безанган, ичида олтин-кумуш буюмлар кўзни қамаштирадиган кўшкка ҳозир Бобирни фақат битта хона ўзига тортар эди. Мударриснинг кутиб ўтирганига қарамай, Бобир яхши кўрган китоблари қўйилган шу хонага бурилди. Бахмал ва чарм муқаволар ичида саҳифаларга битилган сатрларда улуғ шоирларнинг оташ нафаслари сезилиб тургандай бўлади. Бобир Фирдавсийдан, Саъдийдан минглаб байтларни ёд билади. Ҳозир у китоблари орасидан «Хамса»ни олар экан, узоқ Ҳиротда яшаётган Алишер Навоийни хаёл кўзи билан кўриб тургандай бўлди. Ҳиротда таълим олиб келган андижонлик меъмор Мулла Фазлиддин мана шу кўшк ва мармар ҳовузли тиллакори шийпонни қурган пайтларида ёш Бобирга Навоий ҳақида жуда кўп ажойиб ҳикоялар айтиб берган эди. Меъмор Ҳиротдан Алишер Навоийнинг Беҳзод чизган расмидан яхши бир нусха кўчиритириб келган экан. Бобир ҳам Навоийга ихлосманд эканини сезган меъмор унга мана шу расмни инъом қилган эди. Бобир «Фарҳод ва Ширин» достони қатидан шу расмни олди-ю, шариат илмига оид дафтарининг ичига солди. Сўнг мударрис ўтирган хонага чиқди.

Оппоқ соқоли кўкрагини қоплаб ётган, катта оқ салла ўраган қошлари ўсиқ кекса мударрис дарсхона тўрида, банорас кўрцача устида ўлтириб, қуръондан қироат билан суралар ўқигач, форс тилида фиқҳ¹ илмининг қонунларини тушунитиришга киришди. Бобир арабфорс тилларини яхши ўрганган, қуръон сураларининг кўпини ёд билар, маъносини ҳам тушунар эди, фиқҳ илмининг баъзи нуқталарига қизиқар ҳам эди-ю, аммо ҳозир шу дақиқаларда унинг кўз олдидан Суҳроб ва Фарҳодларнинг қаҳрамонона ишлари сурон солиб ўтмоқда эди. Чорбоғдаги машқлар пайтида танасига сифмай

¹ Фиқҳ — мусулмон қонуншунослиги.

авжланиб кетган шўх, бебош бир куч ҳали ҳам қалбини жунбишга келтириб турибди.

Унга ёд бўлиб қолган севимли байтлар гоҳ туркий, гоҳ форсий оҳангларда мударрис қироатини ёриб ўтиб, хаёлида жаранглаб эшитила бошлади:

«Қоши ёсинму дейин, кўзи қаросинму дейин?»

«Зи мардони жаҳон марди биёмуз!»

Ёд бўлиб қолган бу сатрлар хаёлидан ўтаётганда, Бобир дафтари орасига солинган суратни мударрисга кўрсатмасликка уриниб секин олди. Қўзларидан илҳом ва меҳр ёғилаётган Навоий узун қора чакмон кийган, ингичка ҳассага суюнган. Унинг бутун қиёфаси яхшилик истаб келган ҳар бир кишига катта яхшиликлар қила олишидан далолат беради. Бобир суратга қараб туриб ўзича сўради: «Улуғ амир насиб қилса, ҳузури нгизга борсам, йўлимда Аҳраману аждаҳо учраса, Фарҳодингиздай ҳаммасини енгib ўтсам. Ўшандা сиз менга... шеърият тилсимини очфувчи калит берурмисиз?»

Мударрис қироат билан уқтираётган дарслари беҳуда кетаётганини бирдан сезиб қолди, секин ўрнидан турди-да, Бобирнинг ёнига келди. Бобир суратни яширишга улгуролмади.

— Одам сурати?!— шиддат билан сўради мударрис.— Сиз қуръони шарифдан сабоқ эшитиш ўрнига, шарнат қатъиян ман этган сураткашлик билан машғулмисиз, мирзом?

— Мударрис жаноблари, бу суратни мен чизган эмасмен. Буни менга Ҳиротдин келтирмишлар. Бу улуғ зот — Амир Алишер.

Мударрис Навоийни шоир деб эшитган, асарларини ҳали ўқимаган эди.

— Одам суратини тарқатмоқ — шайтону лайннинг иши! Қани бу суратни менга беринг, мирзом! Беринг!

Мударриснинг қаҳрли важоҳати суратни йиртиб ташлашдан ҳам тоймаслигини кўрсатар эди. Шунинг учун Бобир суратни бермай туриб олди. Мударриснинг ғазаби келди-ю, аммо тахт ворисига қаттиқ гапиришдан қўрқди. Бобирдан хафа бўлиб, Эсон Давлат бегимга шикоят қилгани кетди.

¹ «Мардликни жаҳон мардларидан ўрган».

Эллик беш ёшлардаги салобатли кампир сидирға оқ атлас кўйлагини шитирлатиб дарсхонага кириб келәётгандা Бобир дарҳол ўрнидан туриб, бувисига салом берди. Эсон Давлат бегим суратни қўлига олди ва На-войй тасвирига бейхтиёр қизиқиб:

— Юзларида фаришталари бор зот эканлар,— деб қўйди. Сўнг ҳарир даканасининг бир чети билан юзини мударрисдан тўсиб, унга ярим ўгирилган ҳолда деди:— Мударрис жаноблари, бу сурат Ҳиротда шариат пешвонларининг рухсатлари билан чизилган-ку.

— Мени маъзур туting, ҳазрат хоним,— деди эшик олдида қовоқ солиб ерга қараб турган мударрис,— аммо Ҳиротда шариат қонунлари бузилмишdir. Шиалар таъсирида чизилган бу сурат бизнинг пок сунний мазҳабимизга мутлақо тўғри келмайди. Мен тахт ворисини огоҳ қилмоқчиманки, бизга Муҳаммад алайҳисса-лом васият қилган чин мусулмонлик алҳол Ҳурсонда эмас, Мовароунаҳрдадир!

Эсон Давлат бегим мударрис билан мазҳаблар тўғрида баҳслашиб ўтиришни истамади. Бобирга юзланиб:

— Мударрис жаноблари бир жиҳатдан ҳақлар,— деди,— фиқҳ дарсида сурат томошаси ўринисиз, азизим. Тангри иноят қилса, сиз ҳукмдор бўлиб юрт сўрагайсиз. Шунинг учун фиқҳ қонунларини бошдан-охиригача билиб олинг. Суратни мен олиб кетай.

Бобир суратни бувисидан бир нафасга сўраб олди-ю, авайлаб китоб орасига солиб берди.

— Эҳтиёт қилингиз, сизга орзуйимни топширдим,— деди.

Эсон Давлат бегим неварасининг сўзларини ёқтириб деди:

— Балки Алишербекни Андижонга таклиф қилурсиз.

— Қелурмиканлар?— кўзлари ёниб сўради Бобир.

— Самарқандга келганлар-ку, Фарғона водийсining таърифи оламга машҳур. Илож топсалар, албатта келурлар. Алишербек ниҳоятда пок, авлиётабиат одам, деб эшитганмиз. Ўзлари келсалар, мударрис жаноблари га ҳам манзур бўлишлари шубҳасиз!

Мударриснинг энди сал чеҳраси очилди. Қаддини тиклаб:

— Шояд шундай бўлса!— деб қўйди.

Эсон Давлат бегим уларни усталик билан яраштирганидан мамнун бўлиб дарсхонадан чиқди.

2

Кун қиёмига келиб, пешин намози ўқилгандан кейин кўшкнинг ич-таши жимжит бўлиб қолди. Рўзанинг азоби энди билина бошлаган, ёз кунида чанқаб ҳолсизланган одамлар кунни қандай кеч қилишни билмай бетоқат бўлишар эди. Кошона эгалари салқин хоналарда жимгина ётиб, уйқу билан жон сақлашни одат қилгандар.

Бобир ҳам бугунги сабоқларини тугатиб, ўз хонасида ёнбошлаб ётибди. Бироқ бояги ширин орзулар ҳамон хаёлини тўлқинлантириб, кўзига уйқу қўндирамайди. У қоғозқалам олиб, шеър ёзмоқчи бўлди. Лекин ҳозир унинг хаёлига ёд бўлиб қолган машҳур байтлардан бошқа шеър келмас эди. Шунда у иккинчи бир дафтарни олди-ю, Фарғона водийси ҳақида билганларини оддий наср тариқасида ёза бошлади: «*Гирдо-гирди тоғлар, Ови қуши кўп. Оқ кийикни Ахси чўлида кўрганбиз. Марғилон ёвуғида ҳам бор*». Бобир Фарғона водийсида нимаики гўзаллик кўрган бўлса, ҳаммасини ёзгиси келар эди. Кейин Ҳиротга Амир Алишернинг ҳузурига боргандা бу ёзувлари жуда керак бўладиганга ўхшарди.

У ёзувга берилиб кетиб, кўшк олдигача чопиб келган отнинг дупурини эшилтмади. Бирдан жимжит кўшкнинг алләқайси хонасида аёл кишининг ўртаниб йиглагани эшитилди. Бобир чўчиб бошини кўтарди. Йиғи товуши Эсон Давлат бегимнинг хоналари томондан келмоқда эди. Бобир ўрнидан сакраб турди, такрор эшитилган аламли йигидан эти жунжикиб, бувисининг хонасига қараб югурди.

Эшик ланг очиқ. Эсон Давлат бегимнинг рўмоли бошидан тушиб кетган. У қизи Қутлуғ Нигор хоним юборган хатни очиб ўқимоқчи бўлади, аммо ёшли кўзлари ҳеч нарсани кўрмайди.

Ахсидан ўлим хабарини олиб келган Қосимбек де-ворга елкаси билан мажолсиз суюниб, оёқларида зўрға турибди. У саксон чақиримлик йўлни отда дам олмай босиб ўтган ва киприкларигача чангга ботган эди.

Ҳозиргина гулдай нафис туйғулар ичидаги юрган Бо-

бирга ўлим ҳабари шу гул орасидан чиқсан илон бўлиб туюлди. У Қосимбекдан сессангандай ранги ўчиб, бирдан орқага тисарилди. Қосимбек эса унга интилди, Бенир қаршисида тиз чўкиб, бўғик ва илтимоскорона овоз билан гапира бошлади:

— Мирзом!.. Тангри сизга қувват берсин! Энди бизнинг пушти-паноҳимиз ўзингизсиз! Икки тарафимишни ёғий босган. Волидангиз тайинлаб юбордилар. Дарҳол Андижон қўрғонига бориб, бекларни тўпламоқ керак!

Эсон Давлат бегим қайғуга берилиб йиғлаб ўтирадиган пайт эмаслигини энди сезди. Қосимбекни оёққа турғизди-да:

— Садоқатингиздан миннатдормиз,— деди.— Сиз Бобир мирзо билан бирга отланинг! Биз ҳам энди чорбоғдан қўргонга кўчамиз.

Мудҳиш ҳабар Бобирни жимжит қилиб қўйди. У қарахт бир аҳволда кийинди, отига минди. Шу пайт унинг кўзига яшнаб турган дарахтлар, суви тўла мармар ҳовуз алланечук мунғайиб тургандай қўринди. Буларнинг ҳаммасини отаси бино қилган эди. Энди у одам бу жойларга ҳеч қачон келмайди. Ана у нашватиларнинг кўчатини Умаршайх мирзонинг ўзи ўтказдирган эди. Ҳозир шулар мева солған, ҳадемай пишади. Аммо уларни эктирган одам энди ҳеч вақт бу мевалардан татиб кўролмайди.

Чорбоғдан чиқиб, тош йўлдан бораётганларида Бобир яна отасини эслади. Бу йўлга отаси тўшатган тошлилар ҳам турибди. Узоқда қўринган баланд қўргонни ҳам отаси қурдирган эди. Ҳаммаси бутун, ҳаммаси бор. Факат унинг ўзи йўқ. Бобир энди отасини умрбод кўролмаслигини бутун вужуди билан ҳис қилди-ю, аччиқ жудолик туйғуси бирдан унинг борлигини тўлдириб, қўзларидан ёқасига ёш бўлиб томди.

Олдинда сув тўлдирилган чоҳ ва ўн бир пахсалик баланд девор билан ўралган Андижон қўрғони қўринди. Улар Мирзо дарвозасига яқинлашганларида ичка-ридан беш-олти киши от чоптириб чиқди. Олдинда саман от миниб келаётган қисиқ кўзли мўгултахлит бек — Бобирнинг онасига қариндошлиги бўлган Шерим тоғойи эди. У Бобирнинг юзида оғир мусибат аломатини кўрди-ю, отдан сакраб тушди, кўзига ёш келмаса ҳам ҳўнграб:

— Мен ишонмаган эдим, амирзодам!— деди.— Пуш-

ти-паноҳимиздан айрилганимиз ростми? Оҳ, бевафо дунё!

— Кимдан эшитдингиз? — сўради Қосимбек.— Бу хабар ҳозирча сир тутилмоғи керак эди!

Шеримбек ёқасини ушлаб:

— Тангрининг қудратини қарангки, — деди, — бир алоқачи кабутарим осмонда учиб юриб бирдан йўқ бўлиб қолди. «Ким уни тушуриб олди?» — деб том устига чиқдим. Анчадан кейин кабутар олдимга келиб қўнди. Қанотининг тагида бир қофоз кўринди. Олиб қарасам— мана шу қайғули хабар! Ким ёзган? Осмонда фариштадар ёзиб юбордими, билмадим!

Шеримбек Бобирнинг эгарига бир қўлини қўйиб, юзини унга яқинлаштирида, паст товуш билан:

— Мирзом, қўргонга кирмангиз, хатарли, — деди.

Бу сўзларни Қосимбек ҳам эшитди. Умаршайх мирзо тириклигига дурустроқ лавозим ололмай кўнгли чўкиб юрган Шеримбек энди Бобир мирзога бошқалардан олдинроқ меҳру оқибат кўрсатиб, унинг ишончини қозонмоқчи ва каттароқ мартабага эришмоқчи эди. Қосимбек буни сезиб Бобирга осойишта гапирди:

— Амирзодам, ортиқча таҳликаға ўрин йўқ. Тезроқ қўрғонга кириб содиқ бекларни тўплайлик.

Шеримбек от устидаги Қосимбек билан ердан туриб сўзлашишни ўзига эп кўрмади. Шошиб отига минди-да, шиддат билан деди:

— Сиз ҳали аҳволни билмайсиз, жаноб Қосимбек! Содиқ бекларингиз Хўжандни ёғийга топширди! Исфара ни топширди! Марғилонни топширди!

— Марғилонни?! — сесканиб сўради Бобир. — Қачон?

— Ҳозир хабар келди! Ёғий мўри малаҳдай ёпирилиб Қуваға яқинлашди! Энди навбат Андижонга Содиқ беклар Андижонга қўшиб мирзомни ҳам ёғийга берсинларми? Йўқ! Мен тирик бўлсам, бунга йўл қўймасмен!

Оғир мусибат устига қўшилган бу шумхабарлар Бобирни жуда эсанкиратиб қўйди. Узи куни билан рўза тутиб, дармони кетиб борар, ниҳоятда қаттиқ чанқагаңлигидан тили танглайига ёпишиб қолгандек туюлар эди. Унинг ташна кўзлари қўрғон девори тагидаги хандакقا тўлдирилган қорамтири сувга тушди. Туриб қолган шу қора сув ҳам унга алланечук жозибали кўринди. У қуруқлашган лабларини намсиз тили билан ялаб қўйди.

Шеримбек дадил бориб, Бобир мингандан бўз отнинг олтин безакли юганидан олди:

— Мен содиқ тогойингизмен, миরзом, ижозат беринг, сизни бу хатарлардан узоққа олиб кетай!

Бобир Шеримбек айтаётган хатарларни ҳозир унча ўйламас ва аниқ ҳис қилмас эди. Аммо унинг қайғудан эзилган кўнгли ҳам, ташналиқдан қийналаётган тани ҳам кўз олдиаги бекик ва дим қўргондан кўра, узоқдаги дарахтзорларни, кенг, очиқ жойларни афзал кўрарди. Шунинг учун Шеримбек унинг отини орқага бураётганда Бобир қаршилик қилмади. Қосимбек саросима бўлиб:

— Мирзом, волидангизнинг тайинлаганлари бошқа эди! — деди.

— Волидалари бу ердаги аҳволни билмаганлар! — деб Бобирнинг ўрнига Шеримбек жавоб қилди. Аммо Қосимбек унинг гапига қулоқ солмай Бобирга ёндашиб:

— Хоним ҳазратлари бугун дафи маросимини ўткашиб эртага Андижонга келурлар. Улуғ онангиз ҳам чорбодан қўргонга кўчмоқчи эдилар. Ўлар сизни қаердан топурлар?

Бобир энди сал хаёlinи йигиб, Шеримбекдан сўради:

— Қаёққа бормоқчимиз?

Шеримбек Қосимбеккага эшиттирмасликка тиришиб, Бобирнинг қулоғига шивирлади:

— Олатоф томонларга. Ушга. Балки Ўзгантга.

Бобир буни Қосимбекдан сир тутишни истамай, секин унга айтди:

— Ўш ўйлида бўлурмиз. Онамга хабар беринг.

— Мен аввал қўргондаги беклар билан сўзлашай, амирзодам! Уларнинг кайфиятини билай!

— Ундан кўра Хўжа Абдуллага учранг.

— Бу амрингизни дарҳол бажо келтиурмен!

Қосимбек отини қўргон дарвозаси томонга бурди. Бобир эса ёнидаги элликка яқин отлиқ билан қўргондан узоқлашиб кета бошлади.

3

Қўргон ичидан дарвозахонанинг томига чиқиб олганинг япасқи бир навкар девор кунгураси орасидан уларни кузатиб турган эди. Қосимбек Мирзо дарвозасидан шитоб билан кираётганда бу навкар ҳам томдан секин тушди-ю,

девор олдига боғлаған қўйилган отини миниб, хўжайини Аҳмад Танбал кутиб турган жойга қараб кетди.

Мевалари фарқ пишган катта боғнинг тўрида мармар гумбазлик ҳаммом бор эди. Боғ эгаси Ёқуббек ёзининг иссиқ кунларида шу ҳаммомнинг меҳмонхонага ўхшатиб безатилган салқин бир хонасида дам олар эди. Асл гилемлар тўшалган бу хонанинг тўрида ҳозир Аҳмад Танбал ўтирибди. У кумуш билан безатилган қимиз кадидан жийдагули пиёлага қимиз қуйиб, сипқорди. Сўнг сарғиш мўйловини кафти билан артар экан:

— Тангрим мени кечирсин, бугун рўзани буздим, — деди. Йўлда ташналиқдан тилим танглайимга ёпишиб қолди. Ҳушимдан кетиб отдан йиқиладиган ҳолатга келдим.

— Бугун сизга рано, — деди Ёқуббек. — Зарураст — маъзураст. Мушкул ишга бел боғлабсиз. Агар кушойиши корингизни бериб, тахт Жаҳонгир мирзоға ўтса, сиз унинг энг ишонган раҳнамоси бўлурсиз.

Аҳмад Танбал бу нурли истиқболни кўз олдига келтириб, бир энтикди. Олдинги тишләридан иккитаси тушиб кетган семиз Ёқуббек унга синовчан назар билан қараб турарди. Ёқуббекнинг нигоҳида «Менинг бу хатарли ишга нечун бош қўшаётганимни унутмасмикансен?» деган маъно бор эди. Аҳмад Танбал сергакланди:

— Бек жаноблари, сиз билан биз асли мўғул¹ уруғиданмиз. Барлосларинг Фарғона вилоятида шунча вақт ҳукм сургандари етар. Энди навбат бизники. Мен сизни мўғул бекларининг энг улуғи деб билурмен. Тангри омад бериб, агар мен тахт ворисига раҳнамо бўлсам, ўшанда ҳам менга сиз раҳнамолик қилғайсиз!

— Иншооло! — деб Ёқуббек мамнун юз билан калта соқолини силаб қўйди. — Қани, Аҳмадбек, чанқоқ босилгандан сўнг очлик билинадир. Яхна гўштдин тотининг.

Аҳмад Танбал чинни лагандаги гўштга энди қўл узатганда эшик секин очилди. Аҳмад Танбал лаганин бир четга суриб, эшикка қадалиб қаради. Бояги япасқи павкар хўжайинининг тинчини бузгани учун узр сўрагандай бўсағадан нарида туриб, таъзим қилди:

— Бек жаноблари, севинчи беринг! — деди. — Бобир мирзо қўрғонга кирмай қайтиб кетдилар.

¹ Бу ерда гап ўзбеклашган мўгуллар ҳақида боради.

— Шеримбек билан биргами?
— Айни шундай!

Аҳмад Танбал учун бу чиндан ҳам қувончли хабар эди. Чарм ҳамёнидан битта олтин танга олиб, бўсаға олдига ташлади. Япасқи навкар тангани шоша-пиша олиб, икки букилиб раҳмат айтди. Сўнг Аҳмад Танбал-нинг ишораси билан эшикни секин ёпиб, орқага чекинди.

Ахсидан Андижонга келиб тўғри Ёқуббекнига тушган Аҳмад Танбал подшоҳнинг ўлими ҳақидаги хабарни энг аввал Шерим тоғойига етказдирган эди. Унинг ҳовлиқма феълини қўзғатиб, ўзи панада қолиш учун имзосиз хатни кабутар ёрдамида осмондан туширирган эди.

— Маслаҳатингиз билан тузилган режа шарофатли чиқди! — деди Аҳмад Танбал уй эгасига мамнун кўз ташлаб.

— Ҳа, Шеримбек энди жиянини хавф-хатардан яхшилаб «халос қилур». Унинг энг нуфузли бекига айланиш учун Олатоғдан ҳам ошур.

— Энди биз Бобирнинг хатардан қўрқиб қочганини халойиқнинг қулоғига етказмоғимиз керак. Бобир шундай пайтда ота юрти Андижонни ташлаб кетганини халқ билсин, ундан ихлоси қайтсин. Ана ундан сўнг Жаҳонгир мирзонинг тахтга ўтиришига ҳеч бир монелик қолмас.

Ёқуббек соқолини тутамига олиб, бир лаҳза ўйланиб турди-ю:

— Овоза тарқатишининг энг афзал жойи, бозор, — деди. — Менинг савдогар межозларим бор.

— Аммо овоза биздан чиққанини ҳеч ким билмаслиги зарур!

— Хотиржам бўлсинлар, жаноб Аҳмадбек. Сир сақлашга қодирмиз...

* * *

Андижон аҳолиси душман қўшинлари яқинлашиб келлаётганини эшитиб, шу кунларда жуда хавфсираб юрар эди. Шунинг устига «Подшоҳ жардан йиқидиб ўлганмиш, шаҳарни бугун ёғий босар эмиш, Бобир мирзо қўрқиб қочганмиш», деган овоза тарқалди. Андижон расталаридаги ва тимнинг тагидаги дўконлар савдо энг қизиб турган пайтда бирин-кетин ёпила бошлади. Ҳалиги овозанинг қаердан чиққанини ҳеч ким аниқ билмас эди-ю, лекин халойиқ унга бир-биридан ваҳимали тафсилотлар

қўшар эди. Ниҳоят, «Ахсини ҳам ёғий босганмиш, ёғий подшони жардан ташлаб ўлдирганмиш», деган гаплар ҳам пайдо бўлди. Халойиқ орасида юрадиган хуфялар даҳшатли мишишларни шаҳар ҳокими — доруғага етказиш учун аркка томон шошилдилар.

Бу орада Қосимбек Бобир мирзонинг устози Хўжа Абдуллани уйидан қидириб топган, улар икковлашиб, аркдаги беклар олдига чиқишиган эди. Хўжа Абдулла ҳам, беклар ҳам подшоҳнинг ўлимидан мутлақо бехабар эдилар. Бу хабарни Қосимбекдан эшигандаридан кейин уруш хатари кўзларига янада таҳликали кўринди, ёмон ўзгаришлар бўлишини сезишиб, саросима бўлиб қолишиди. Шунинг устига бозорда даллол бўлиб юрадиган ишончли бир хуфя келиб, хунук овозалардан ҳаммаёқ тўполон бўлиб кетганини айтиб берди-ю, Узун Ҳасан номли новча доруға эсанкираб қолди.

— Биздан омад кетди, жаноблар! — деди йиғламешиб. — Ташқаридан ғаним. Ичкарида тўполон. Бобир мирзо қўргонга кирмай кетганлари бежиз эмас!

— Биз ҳам жон сақлаш учун ҳар қаёнга тарқаб қочсакмикин? — киноя билан сўради Хўжа Абдулла.

Узи ҳам, соқол-мўйлови ҳам қоп-қора Хўжа Абдулла катта олим бўлишидан ташқари, Андижон бекларининг энг нуғузли пири ҳисобланар эди. Бобир мирзо ҳам уни ўзига муршид санаб қўл берган эди. Шунинг учун Узун Ҳасан Хўжа Абдулланинг киноясига қарши кескин жавоб берга олмади.

— Пирим, Бобир мирзо узоқлашмасдан қайтариш зарур! — деди Қосимбек.

— Бобир мирзонинг кўнгиллари менга аён, — деди Хўжа Абдулла. — У олий зот қўрқиб қочган эмаслар. Бекларнинг садоқатини билмоқ учун шундай қилганлар. Бозордаги овоза — фитнанинг белгиси. Агар фитна бўлмаса, подшоҳнинг қазо қилганини биздан олдин бозордагилар қандай билмишлар?

Узун Ҳасан ўзининг ақли етмаган бу мантиқли фикр га тан берди. Бобирнинг кўнглида нима борлигини Хўжа Абдулла шўерда туриб билганига қойил бўлди. Хўжа Абдулла унинг кўзига чинакам авлиё бўлиб кўринди:

— Пиримга ҳаммаси аён бўлган экан! — деди у чуқур эътиқод билан. — Энди пирим нима десалар биз шунга шаймиз!

— Менга аён бўлгани шуки, — деди Хўжа Абдулла

овозини пасайтириб, — агар бир тан-бир жон бўлиб, Бобир мирзога хизмат қилсак, ҳаммамиз омон қолурмиз, ҳеч қайсимизнинг бир мўйимиз хам бўлмағай!

Хўжа Абдулланинг комил ишонч билан айтган бу сўзлари Узун Ҳасанни бир оз таҳликага солди. Агар иш Хўжа Абдулла айтгандай бўлиб чиқса-ю, Бобир мирзо подшоҳ бўлса... унда Узун Ҳасанинг бугунги иккила-нишлари қандай оқибатга олиб келади? Унинг рақибла-ри бу иккиланишларни бўлажак подшоҳга айтиб, дору-ғалик амалини тортиб олишлари мумкин эмасми? Йўқ, Узун Ҳасан бунга йўл қўймаслиги керак:

— Пирим, менга фотиҳа беринг, Бобир мирзонинг ҳу-зурларига мен ўзим борай. Бекларнинг номидан садоқат изҳор қилиб, қўрғонга таклиф этай!

— Ниятингиз таҳсинга сазовор, жаноб Ҳасанбек. Аммо сиз доруғасиз. Сиз аввал шаҳардаги ғулуни бар-тараф қилинг, фитнанинг уясини топинг, ана унда Бобир мирzonинг иноятлариға сазовор бўлғайсиз.

— Яна каромат қилдингиз, пирим! Биз зудлик билан бу ишга киришурмиз!

* * *

Ез офтоби еру кўкни шундай қиздирмоқдаки, от туёқ-ларидан кўтарилиган чанг юзга аланга тилларидек тега-ди. Ҳаво дим. «Фир» этган шамол йўқ. Тупроги билқили-лаб ётган тор кўчадан ўтаётганларида Бобирни тер бос-ди. У бениҳоя чанқаганлигидан оғзи тахир бўлиб кетгани эди. Кечак шу пайтларда Андижонсой бўйида салқинлаб ётгани эсига тушди. Бундан бир неча соат олдинги ҳаёти, чорбоғнинг мусаффо ҳавоси, зилол сувли ҳовуз, сал-қин кўшк, беташвиш дамлар — ҳаммаси бирдан узоқ ўт-мишга айланган эди. Назарида, шиддатли бир қуюн уни ўша мәсьуд ҳаётдан юлиб олиб, аллақаёқларга чирпин-рак қилиб учирив кетаётиди. От туёқларидан кўтарили-ган чанг унга мана шу қуюннинг чангидек туюлади. Уни отасидан жудо қилган, пушти-паноҳидан айириб, ҳавф-хатарлар комига тортган машъум бир куч гўё мана шу қуюннинг кучи эди. Уни қўриқлаб бораётган эллик чоғли отлиқлар ҳам Бобирга мана шу қуюн ичидагандай хира қўринарди. Рўза тутиб куни бўйи туз тотмаганли-гидан унинг боши айланмоқда эди. Атрофидаги отлиқ-лар тўғри юриб бораётган бўлсалар ҳам Бобирнинг на-

зарнда уларнинг ҳаммасини ўша қуюн чирмаб айлантираётгандай бўларди.

Ўзгант йўли билан бориб Намозгоҳга етганларида узоқда қорли тоғлар кўринди. Бобир тоғ салқинини кўзи билан ҳис қилгандай бўлди ва ўша ерга тезроқ етиб боргиси келиб, отининг биқинига ниқтади. Қақроқ лабларини қийинлик билан очиб Шеримбекка:

— Тезроқ! — деди.

Шеримбек эса орқага ўғирилиб қараб:

— Чопар бор! — деди. — Тўхтайлик.

Андижон беклари юборган чопар Хўжа Абдулланинг қўли билан ёзилган мактубни Бобирга топширди. Бобир ўрам қилиб юборилган мактубнинг ишак боғичини узиб, ёнида турган Нўён Кўкалдошга берди:

— Ўқинг.

Мактубда Андижон бекларининг Бобирга садоқат билдирганлари айтилган эди. Сўз орасида ёмон овозалар тарқалаётгани, номаълум фитначилар «Бобир мирзо қўрқиб қочди», деган туҳматни тарқатиб, бунга элни ишонтиromoқчи бўлаётгани айтилган эди.

— Мен сизни ана ўша фитначилардан эҳтиёт қилган эдим, амирзодам! — деди Шеримбек Бобирга. — Ҳозир вазият ёмон. Кўргон — иғволинг уяси. Кўргонга қайтманг, амирзодам! Содиқ беклар бўлса кетингиздан келсинлар!

«Ота юртини ташлаб қўрқиб қочди» — бу овоза оғиздан-оғизга ўтиб шаҳарма-шаҳар, қишлоқма-қишлоқ тарқаб кетиши мумкин!

— Йўқ! — деди Бобир отини орқага буриб. — Мен қочмоқчи эмасмен!

— Амирзодам, бу ҳаммаси ифво!

— Мен бунинг иғволигини исбот қилурмен! Қайting ҳаммангиз. Кўргонга қайting!

Бобир орқага бурган отининг юганини бўшатди-ю, сағрисига қамчи урди. От чопиб бораётгандан кўкрагига, шамол тегиб, ўзини бир оз енгил сезди. Бояги даҳшатли қуюн энди ундан орқада — изма-из елиб келаётган навкар ва савдарлар орасида қолиб кетгандай бўлди.

Улар офтоб уфқа яқинлашган пайтда Андижон қўргонига кириб келдилар. Кечқурун гавжум бўладиган кўчалар ҳозир алланечук жимжит. Дўконлар ёпиқ. Ҳаммаёқ ҳувиллаган. Бутун шаҳар хавф-хатардан қўрқиб, биқиниб турганга ўхшарди.

Шеримбек олдинда бораётган Бобирни эҳтиёт қилмоқчи бўлиб; навкарларига «қуршаб боринг» ишорасини қилди. Ўзи эса Бобирнинг олд томонига ўта бошлади. Атрофини отлиқлар ўраб ола бошлагандага Бобир яна қуянинг ичига тушиб қолгандай бўғилди. Кўз ўнгидага яна отлар, одамлар чирпирак бўлиб айланишга тушди. Бобир ютоқиб олдинга интилди, отини қамчилаб, навкарлар қуршовини ёриб чиққанда юзига шабада тегиб, хиёл енгиллашди. Шеримбек яна олдинга интилиб, Бобирга ёндашмоқчи бўлганда Нўён Кўкалдош унинг жиловидан маҳкам ушлади:

— Бек жаноблари, қўйинг, амирзодам олдинда борсинлар. Фуқаро таҳт ворисини кўрсинг, кўнгли таскин топсин. Ана, туйнуклардан мўралаб турган одамлар иғвогарларнинг гапи ёлғонлигига амин бўлсинлар!

— Фитначилар бирор тешикдан амирзодамни ўқласалар-чи?

— Ниятни яхши қилинг!

Бобир бошлиқ отлиқлар аркка яқинлашганларида улкан дарвозанинг ҳар икки тавақаси ланг очилди. Хўжа Абдулла ва бир тўда беклар, мулоғимлар Бобирга пешвоз чиқдилар. Бобир отдан тушиб устози билан кўришар экан, бирдан кўнгли юмшаб, кўзларига ёш қуишилб келди. Хўжа Абдулла ранги ўчган, лаблари титраётган Бобирни бағрига босиб, тасалли бергиси келди, аммо беклар ва навкарлар олдида таҳт ворисини қучоқлаш одобсизлик саналишини ўйлаб, ўзини тутди. У ҳам кўзига ёш олиб:

— Кулфатда қолдик, амирзодам, мусибатда қолдик! — деди. — Энди бизнинг пушти-пеноҳимиз ўзингиз-сиз!

Мазидбек аъёнлар даврасидан бир-икки қадам олдинга чиқди. Ўзининг Бобирга бек атка эканини билдириб кўйгиси келиб, Хўжа Абдулланинг гапини оғзидан олди:

— Амирзодам, ҳамма беклар сизга содиқ хизмат қилишга тайёрдурлар!

Бобир тўпланиб турган бекларга кўз ташлаган эди, улар ҳаммаси Мазидбекнинг гапини тасдиқлаб; қўллари кўкракларида, таъзим адо қилишди. Бобир товуши титраб:

— Миннатдормен, — деди.

У яна отланиб арк дарвозасидан кираётганда орқадан Ёқуббек ҳам етиб келиб, беклар даврасига қўшил-

ди. У Бобир қайтганини эшитган заҳоти ҳар қандай шубҳадан холи бўлиш учун дарҳол отланиб, садоқат из-ҳор қилишга шошилган эди. Хўжа Абдулла ўнгда, Мазидбек чапда юриб, Бобирни арк тўридаги қишилик қасрга бошлаб келдилар.

Илгари пойтахт Андижондалигида тахт мана шу қасрга ўрнатилган эди. Қейин пойтахт Ахсига кўчирилгач, устунлари ўймакорликлар билан безатилган мармар зинапояли бу қаср аввалги ҳашаматидан маҳрум бўлиб, кўримсизлашиб қолган эди. Бугун Бобир келишидан олдини Хўжа Абдулланинг фармойиши билан қасрнинг зинапояларига яна пояндоз тўшалди. Илгари тахт қўйилган шаҳнишинга туркман гиламлари ва кимхоб кўрпачалар солиниб, маҳсус жой ҳозирланди.

Бобир бинафшаранг пояндозга қадам қўйганда қуруқшаб кетган томоғини ҳўлламоқчи бўлиб ютинди. Аммо оғзида нам йўқлигидан томоғини алланарса қириб ўтгандай бўлди. Бўлажак подшоҳга хизмат қилиш учун тўпланган бекларнинг ҳеч қайсиси Бобирга ҳозир бир қултумгина сув кераклигини сезмас эди. Бирда-ярим сезганлари ҳам шунча одамнинг олдида ёш подшоҳнинг рўзасини очириш мусулмончиликка тўғри келмайди, деб бундай ишни қилишдан қўрқишар эди.

Ҳамма ўлтиргач, Хўжа Абдулла қуръон ўқиб, Ахсида бугун дағн этилган Умаршайх мирзонинг арвоҳига бағишилади. Бир неча киши:

— Илоҳо жойлари жаннатдан бўлсин! — деб қўйди. Яна бир неча киши Бобирга юзланиб кўнгил сўради.

— Муҳтарам беклар, давлатхўҳлар! — деб гап бошлиди Хўжа Абдулла. — Уруш ташвиши бўлмагандан биз аввал мотам маросимини ўтказган бўлур эдик. Эшишимизча, Ахсида ҳазрати олийни ҳурматларига яраша маърака ўтказиб қабрга қўйғанлар. Андижонга ёғий яқин келиб қолган шу оғир кунда бизнинг аввалин машваратимиз давлатни янги подшоҳга топширмоқ хусусида бўлгани маъқул.

Мазидбекдан нарироқда семиз Ёқуббек ўтирган эди. У Хўжа Абдулланинг сўзларини ҳаммадан олдин илиб кетди:

— Доно тадбирни ўртага солдингиз, пиrim. Бандагизнинг фикрича, Заҳириддин Муҳаммад Бобир мирзони қонуний подшоҳ атаб, муборак номларини хутбага қўшиб ўқитмоқ керак!

Бобир «ялт» этиб Ёқуббекка қаради. Унинг овозидаги майинлик, юзидағи ҳаяжон, ҳатто олд тишилари тушиб кетган оғзининг кемшиклиги Бобирга алланечук ёқимли туюлди. Ёқуббекнинг энг нуфузли ва қайсар мүғул бекларидан эканлигини ҳамма биларди. Фақат унинг бундан бир неча соат олдин Бобирга қарши фитна уюштириб юргани ўтирганлар учун сир эди. Энди Ёқуббек мана шу сирни яхшироқ бекитиш учун Бобирга ҳаммадан ортиқ садоқат билдиримоқда эди. Унинг шу сир очилиб қолишидан изтиробга тушиб, дардли ва ҳаяжонли кўзлар билан Бобирга қарши, ундан нажот кутгандай бўлиб ҳаяжонлашиши ўзи қийналиб ўтирган Бобирга ғалати таъсири қилди. Ёқуббек биринчи бўлиб Бобирни подшоҳ деб атагани ёш ўспириннинг ўртаниб турган қалбига гўё сарин бир шабада бўлиб тегди. Қачондир бир вақт тахтга чиқиш ва шу юрган ҳамма бекларга бош бўлиб, ғолибона жанглар қилиш Бобирнинг энг кучли орзуларидан эди. Ёқуббекдан кейин гапирган беклар ҳам бирин-кетин Бобирни подшоҳ деб тан олар эканлар, унинг мана шу орзуси булат орасидан чиққан тўлин ойдай чараклаб юзага чиқди-ю, кўнглини бирдан ёриштириб юборди. Бошига тушган мусибат ҳам, ичини куйдираётган ташналиқ ҳам хаёлидан узоқлашди.

Шу пайт эшикдан шаҳар доруғаси Ўзун Ҳасан таъзим қилиб кирди.

— Амирзодам! — деди у энтикиб. — Қулингизни авф этинг, сизни кутиб ололмадим. Мен Андижонда помуносиб гаплар тарқатган фитначиларни овлаш билан банд эдим. Алҳол бир фитначи арбони тутиб келтирдим.

Бобир беихтиёр олдинга интилиб:

— Қайси арбоб? — деди. — Ким у? Келтиринг!

— Бажонидил, амирзодам! — деб Узун Ҳасан шошилиб орқасига қайтди.

Ҳамма кўзлар очиқ эшикка қадалди. Ёқуббекнинг ранги «қув» ўчди. Наҳотки Аҳмад Танбал қўлга тушган бўлса? Унда сир очилади. Ёқуббек саросима кўзлар билан дарчани қидириб топди. Дарча у ўтирган жойдан анча узоқ. Дарчадан нарида аркнинг ўн пахсалик баланд девори бор. Йўқ, бу ердан қочиб қутулиб бўлмайди! Ёқуббекни титроқ босди...

Шу пайт эшикдан нарида йўғон бир овоз:

— Қўлимни ечинг, мен гуноҳкор эмасмен! — дегани эшитилди. Товушидан Аҳмад Танбалга ўхшамайди.

Оқ шоҳи яктак кийган йўғон гавдалик бўйдор кишини икки навкар икки томонидан маҳкам тутиб олиб кирди.

— Э, бу — Дарвеш гов-ку! — деди Ёқуббек бирдаи енгил тортиб.

Андижон миробларининг бошлиги бўлган бу одам гардани жуда гўштдор бўлганлиги учун ҳўқизга ўхшаб бўйнини бир оз олдинга этиб юрар, шунинг учун орқаворатдан уни «гов», деб аташар эди. Андижон қўргонига тўқ-қиз ариқ сув кирса ҳам, боғ-роғларнинг кўплигидан ёз ойларида сув етишмайди, амалдорлар оддий фуқаронинг навбатини ҳам олишга интилишарди. Шундай пайтларда Дарвеш гов кўпинча фуқаронинг томонини олар, бекларга навбати келмагунча сув бермас эди. «Бек бўлсанг, ўзингга, худонинг ·олдидаги ҳамма бандаси баробар!» — деб тап тортмай гапирганини кўп одам эшигтан. Шу сабабли беклар Дарвеш говни ёмон кўришар, айниқса доруға Узун Ҳасан кўпдан бери унга кек сақлаб юарди.

Қўли боғлоғлик Дарвеш гов Бобирга ва ундан берироқда ўтирган Хўжа Абдуллага бош этиб таъзим қилиди-ю:

— Адолат қилинг, амирзодам! — деди. — Мен фитначи эмасмен, устод! Бозорда бир япасқи навкар менга айтди. «Подшоҳ Аҳсида маст бўлиб жардан йиқилиб ўлибdir, Бобир мирзо ёғийдан қўрқиб Олатоғ томонга қочибdir», деди.

Бобирнинг ғаши келиб:

— Бўҳтон бу! — деди.

— Бўҳтонлигини мен кейин билдим, амирзодам, мени авф қилинг! — деб Дарвеш гов бир-икки қадам берига келиб, қўли орқасига боғланган ҳолича тиз чўқди: — Туҳматлигига бу ерда муборак юзингизни кўриб амин бўлдим. Аммо бозорда ҳалойиқ ваҳимага тушиб тўс-тўполнон бўлиб қочганда ўзимни йўқотиб қўйдим. Бир одамини тўхтатиб, «шундоқ гапларни эшигдим, наҳотки рост бўлса?» деб сўраётганимда доруға жанобларининг хуфялари гапимни эшитиб турган эканлар...

— Йўқ, сен гап сўраш баҳонаси билан бу қабиҳ овоззани тарқатиб юрганингда қўлга тушдинг! — деди Узун Ҳасан.

— Каломуллони беринг, қасам ичамен!

— Каломуллони ҳам хор қилмоқчи бу қасамхўр! — деди Ёқуббек Бобирга юзланиб: — Амирзодам, агар бу мардак садоқатли қулингиз бўлганда ёмон овоза тарқат-

ган ўша навкарни қўлидан тутиб доругага топширмасми-ди? Ваҳоланки, бу ўзи ўша овозани бошқаларга айтган, яъни ифво тарқатган. Буни ҳозир ўз тилидан ҳам эшитдик!

Дарвеш гов ҳанг манг бўлиб:

— Ё алҳазар! — деди.

Ёқуббек Бобирга боягидек мулоийим кўз ташлаб, кемшик оғзини содиқ бир табассум билан очди:

— Амирзодам, сизнинг раҳматлик отангиз Дарвеш говни миробларга сардор қилиб қўйган эдилар. Отагизнинг инояти билан шундай мартабага эришган бу гов энди ҳазрати олийни муқаддас рамазон ойида маст бўлиб йиқилган деса-я! Бу қандай нонисофлик!

Бобирнинг ёш қалби бу машъум ифвога қарши ғазаб тийғусига тўлиб бормоқда эди. «Алдаш учун бола яхши!» — ўйланди Ёқуббек умид билаи. Ифво тарқатган бу одам ўзининг айбини жони-дили билан Дарвеш говга ағдариб, Бобирни бунга ишонтиришга бутун кучини сарфламоқда эди. Бу ишда Ёқуббек ёлриз эмас эди, — бекларнинг кўпчилиги Дарвеш говни айбдор деб билмоқда эдилар.

— Ифво тарқатганини ўзи бўйинига олди! — деди Ёқуббек.

— Тилидан тутилмишдир, жазосини бериш даркор! — деб Али Дўстбек номли бадқовоқ кўса бир киши Ёқуббекнинг тарафини олди.

Үйчан ўтирган Қосимбек боя Шеримбек тогойиннинг имзосиз хат келтирган кабутар ҳақидаги гапини эслади-ю:

— Балки яна тафтиш ўтказиш лозимдир? — деди.

Унга Мазидбек эътиroz қилди:

— Ортиқча тафтишларга фурсат қани? Ёний Марғилонни олиб, Андижонга бостириб келўр. Қонли уруш пайтида элни ваҳимага туширган, подшоҳнинг мартабасига рапхна солмоқчи бўлган ифвогарларга раҳм қилинэ майдир!

— Сиёсат учун майдонда ясоққа етказиш керак, токи бошқаларга ибрат бўлсин! — деди Узун Ҳасан.

«Ясоққа етказиш» — халойиқ олдида бошини кесиш деган гап эди.

Дарвеш говнинг юзига ўлим шарпаси соя солиб ўтгандай бўлди. У тиззаси билан юриб Бобирга яқинлашар экан, йиглаб илтижо қилди:

— Амирзодам, мен иғвогар эмасмен! Мен иғвогарларнинг қўрбонимен! Менга раҳм қилинг! Бешта ёш болам бор! Ноумид қилманг, амирзодам!

Дарвеш гов, йўғон гавдаси силкиниб, ўкириб, йиғлар экан, қўли боғлиқ бўлгани учун юзини яширолмас, кўз ёшлари мош-туруч соқолига томчилаб оқиб тушар эди.

Шундай катта ёшлик одамнинг бунчалик куюниб йиғлагани Бобирнинг қалбида кўпиреб турган ғазабни бирдан бөсди. Унинг Дарвеш говга раҳми келди-ю, устози Хўжа Абдуллага савол назари билан қаради. Хўжа Абдулладан «шу бечоранинг қонидан кечинг!»— деб бир гап кутди.

Бироқ Хўжа Абдулла оғиз очгунча бўлмай, яна Ёқубек гапирди:

— Бешта боласи бор одам, тилини тийиб юрса бўлмасмиди!

— Э, бу гов ўзи ҳаддидан ошган!— деди Узун Ҳасан.

— Бўлмаса, подшоҳ ҳақида ифво қилганларнинг гапини эшитган ҳамоно оғзига урмасмиди! Ёки у ҳаромнамакларни бизга тутиб бермасмиди!

Бир-бирини инкор қилувчи бу гаплар Бобирнинг хаёлларини чалкаштириб юборди. Вужудини ўртаётган ташналиқ янги бир куч би...ян қайтиб келди. Юзлар, деворлар, гиламлар бир-бирига қўшилиб, чаплашиб, гиргир айланада бошлади: Дарвеш говнинг йиғлаб гапирган сўзлари гўё узоқдан эшитилди:

— Амирзодам! Адолат қилинг! Мен отангизнинг содиқ раиятлариданмен! Сиз ёшсиз, беғуборсиз. Сиз ҳали бу бекларни билмайсиз! Буларнинг менда кеки бор! Бекларга ишонманг, амирзодам! Халқдан сўранг! Мени эл-улус билади! Раият билади!

Али Дўстбек қўлини миробга пахса қилиб:

— Эшитдингизми, амирзодам?— деди.— Бу говнинг ичи қоралигини кўрдингизми?

Ёқуббек Бобир томонга таъзим билан эгилиб, боягидай меҳрибон товуш билан тушунтириди:

— Бу гов эл-улусни бекларга қарши қўзғамоқчи, амирзодам. Ёйи ҳужуми пайтида барият билан раиятнинг¹ орасига нифоқ солмоқчи!

— Нияти бузуқлиги шундан ҳам аён!— деди Узун Ҳасан ва навкарларга қараб буюорди.— Бас, олиб чик!

¹ Барият — бек ва аъёнлар. Раият — фуқаро.

Бояги икки навкар Дарвеш говни икки қўлтиғидан олиб, ўрнидан турғизди-да, куч билан эшикдан олиб чиқа бошлади. Энди Бобирдан ҳам умидини узган банди:

— Мен бегуноҳмен! — деб қичқирди. — Беш боламнинг уволи уради сен бекларни! Менинг бегуноҳ қоним тутади ҳаммангни!

Бу қарғиш Бобирнинг қалбига ўткир тиғдай қадалди. Унинг қўл-оёқлари титраб, ўтирган жойида кўзи тина бошлади. Назаридা, бояги қуюн аввалгидан баттар ҳурж қилар, уни мана шу одамларга қўшиб чирмаб айлантирап эди. Атроф кўзига чанг-тўзон орасида қолиб кетгандай хира кўринар эди. У ўтирган жойида йиқилиб кетмаслик учун икки қўлини икки ёнига тиради.

Дарвеш говнинг қарғишидан ғазаби ошган беклар энди унинг ўлдирилишини яна ҳам қаттиқ туриб талаб қилдилар:

— Бу қўрнамак ясоққа етмагунча элдаги ваҳима босилмайдир!

— Сиёсат учун битта иғвогарнинг бошини кесмоқ зарур!

— Ясоқ!

— Ясоқ!

Бобирнинг кўз олдидан бояги одамнинг соқолига оқиб тушган кўз ёшлари кетмас, қулоғи тагида унинг аламли қичқириғи ҳамон жаранглаб турарди. Шу тирик одам мурдага айланиши керак, Бобир бунга фармон берishi керак. Нечун? Беклар у одамни гуноҳкор деб, Бобирни ишонтиришгани учунми?

Балки бу беклар чиндан ҳам Бобирни алдаётгандир? Балки мана шунақа беклар Ахсида Умаршайх мирзони жардан итариб юбориб ўлдиргандирлар? Балки булар эрта-индин Бобирнинг жонига ҳам қасд қилишар?

Бирдан Бобирнинг бегам юрган даври эсига тушди. Кечагина у тенгдош ўртоқлари билан от чоптириб ўйнаб юрмаганмиди? Алишер Навоийнинг расмиға тикилиб мусаффо ёшлик хаёлларига берилгани қачон эди? Орадан бир неча йил ўтганга ўхшайди. Ҳолбуки шу бугун эрталаб, шу бугун чошгоҳда унинг ҳаёти қуёшли осмондай тиниқ ва соғ эди-ку. Бу қора булатлар унинг атроғига қаёқдан ёцирилиб келди? «Ясоқ!» — деб қичқираётган ҳар дарғазаб бек Бобирдан қуёшни тўсиб олган бир қора булатга ўхшарди. Бобирни чирмаб айлантираётган даҳшатли қуюн мана шу қора булатларнинг шамоли

эмасмикин? Наҳотки бу булутлар доим тожу тахт билан бирга юрса-ю, Дарвеш говга ўхшаганларнинг қонига шунчалик ташна бўлса?! Боя Бобирга худди булутлар орасидан сузиб чиқсан тўлин сайдай гўзал кўринган тожу тахт энди ой тутилган тундай ваҳимали тусга кирди. Бобир номаълум хавф-хатарлардан сесканиб, Хўжа Абдуллага ёрдам сўрагандай қаради:

— Устод!

Хўжа Абдулла унга томон сурилиб:

— Амирзодам, бардам бўлинг,— деди.

— Не қилай, айтинг!.. — шивирлади Бобир.

— Ҳукм чиқаринг! Беклар ясоққа етсин деб талаб қилмоқдалар.

— Сиз-чи, устод?

Агар Хўжа Абдулла, ўтирганларга қарши чиқиб, Дарвеш говни ёқласа, шунча амал-тақал билан бошлири зўрға қовушган беклар яна пароканда бўлиб кетишлари аниқ эди.

— Амирзодам,— шивирлади Хўжа Абдулла,— подшоҳлик удумига биноан хатарли уруш пайтида тождорлар шаънига номуносиб гап айтган одам жиноятчи ҳисобланур! Дарвеш гов яна бу ерда ҳам тилини тиймай чатоқ қилди. Барча бекларни ёмонлаб, қарғаб, оловга мой сепди! Энди сиз... битта Дарвеш говни деб барча беклардан воз кечолмагайсиз. Вазият таҳликали... Сиёсат учун говни ясоққа етказмоқдан бошқа илож йўқ!

* * *

Эртаси куни пешинда Андижон аркининг қархисидари жазо майдонида нақоралар чалинди. Тўпланган хало-йиқнинг кўзи олдида Дарвеш гов, ёмон овоза тарқатишида айбланиб, боши кесилди.

Ёқуббек Аҳмад Танбални япасқи навқари билан бирга ўша куни кечаси Ахсига яшириқча жўнатиб юборган эди. Икки орадаги сир сирлигича қолди.

Душман Марғилонни олиб, Андижонга таҳдид солмоқда эди. Хўжа Абдулла бошлиқ элчилар Бобирнинг номидан Самарқанд подшосининг Марғилондан беридаги қароргоҳига бориб, сулҳ тузишни таклиф қилдилар.

— Сиз билан уруш бошлаган инингиз Умаршайх мирзо жардан йиқилиб шунқор бўлди!¹ Бобир мирзони

¹ Вафот этди маъносида.

фарзанд ўрнида кўргайсиз! Ахир у зот сизга куёв бўлиш орзуисидалар! Сизни бош ҳукмдоримиз, деб тан олурлар! Улпон тўлагаймиз! Урушни тўхтатинг, ҳазратим!

Хўжа Абдулланинг бу таклифига Самарқандлик беклар қаттиқ қарши чиқдилар. Улар Андижон ва Ахсиини босиб, талаб, катта-катта ўлжа олиш умидида эдилар. Сулҳ эса уларни мана шу ўлжалардан маҳрум қилас, ўллонни подшонинг бир ўзи олар эди.

— Шунча жойдан қон кечиб, жон бериб-жон олиб келиб, энди етдик деганда қуруқ қайтамизми? — деди Муҳаммад тархон номли бек.

— Сулҳ тузманг, ҳазратим!

— Қаттиқ туринг! — дейишди бошқа беклар ҳам.

Султон Аҳмад мирзо бекларининг раъйини қайтаролмайдиган заиф тождорлардан эди. Хўжа Абдулла бошлиқ элчилар ундан рад жавоби олиб қайтдилар.

Энди аввалгидан баттар қирғин бўлишини сезган бек ва навкарлар Андижон қўрғонига кириб бекина бошладилар.

ҚУВА. Жасоратнинг жазоси

1

Утган куни отланиб Андижонга кетган Мулла Фазлидин бугун қаттиқ изтироб ичида яна Қувага қайтди.

У Бобирнинг отаси ўрнига ҳукмдор бўлганини эшишиб, ундан ҳимоя сўраш ниятида аркка борган эди. Агар унинг ҳузурига кирса ноумид қайтмаслигига ишонар эди. Чунки Мулла Фазлидин чорбоғда кўшк қурған пайтларида Бобир билан кўп ҳамсуҳбат бўлган, унинг зеҳни ўткир, шоиртабиат, зукко ўспирин эканини сезиб, Алишер Навоий суратини ҳадя қилган эди. Бобир бунга жавобан Мулла Фазлидинга зарбоф тўн кийдирган эди. Энди Мулла Фазлидин бўйни йўғон беклардан кўрган ёмонликларини айтиб берса, Бобир уни ҳимоясиз ташлаб қўймаслиги керак эди. Лекин арк дарвозаси олдида ўша доруға Узун Ҳасан турган экан,

— Бобир мирзонинг ҳузурига кирмоқ учун маҳсус рухсат керак,— деб унинг йўлини тўсди.

— Рухсатни ким берур, жаноб доруға?

— Эшик оға Ёқуббек жаноблари!.. Ана, ўзлари ичкаридан чиқмоқдалар!..

Ўнтача навкар қуршовида ичкаридан отлиқ чиқиб келаётган Ёқуббек фақат бириңчи вазир даражасидаги

эшик оғалар тақадиган энли олтин камарни белига тақиб олган эди. Пули катта бу бек Андижон мудофаасига ҳаммадан кўп маблағ ажратган эди. Унинг навкарлари ҳам бошқа бекларнидан кўпроқ эди, ўзи ҳам Бобирга ихлоси зўрлигини ҳар ишда намойиш қилиб, туну кун тинмас эди. У биринчи куниёқ Бобирга ўзини содиқ кўрсатгани устига бу ҳаммаси қўшилиб, ахiri соҳиб ихтиёр эшик оға бўлиб олган эди. Буни энди билган Мулла Фазлиддин хиёл саросима бўлди. Лекин ўзини дадил тутишга тиришиб, отлиқ келаётган Ёқуббекнинг қаршисидан чиқди:

— Жаноб эшик оға, ижозат беринг, камина Бобир мирзо ҳузурларига кирай!

Ёқуббек отининг жиловини тортиб, хиёл тўхтади ю, қўлини қўксига қўйиб турган Мулла Фазлиддинга тепадан кинояли назар ташлади:

— Кириб не қилмоқчисиз?

— Арзим бор... Меъморлик санъатига оид...

— Ҳозир ёш подшоҳимизга меъморлар эмас, мамлакат мудофаасига ярайдиган навкарлар керак! Уруш тугагандан сўнг келинг!

Ёқуббек «Гап тамом!»— дегандек қилиб, отини елдирганича ўтиб кетди. Мулла Фазлиддин бирлаҳза қаққайиб туриб қолди. Бир вақт Узун Ҳасанинг:

— Жаноб меъмор, тавочилар навкарликка одам олмоқдалар, истасангиз бориб навкар бўлинг!— деган кинояси уни ўзига келтирди.

— Улмасак ҳали меъмор керак бўладиган кунларга ҳам етишурмиз!— деди Мулла Фазлиддин доруғага нафратли назар ташлаб.

Энди унинг Бобир ҳузурига киролмаслиги аниқ. Ёқуббек билан Узун Ҳасанинг ихтиёрига ўтган қалъада қолиш эса жуда хатарли. Дарвеш говнинг ўлимига шубеклар сабаб бўлганини Мулла Фазлиддин эшиитган эди. Ҳозир унинг учун сал бехатарроқ жой — Қувадаги опасининг уйи эди...

Мулла Фазлиддин хуфтон пайти ҳовлига кириб келса, поччаси билан опаси ёв яқинлашаётганини эшитиб ваҳимага тушиб ўтиришган экан.

Қувасойдан нарида — Каркидон адиридаги ёв илфорлари ёққан гулханлар милт-милт қилмоқда эди.

— Мулла Фазлиддин, ёғий келса пўлат сандигингиз-

ни тинч қўймас,—деди поччаси.—Буни тезроқ яши-
ринг.

— Бўш ўрангиз борми, почча?

Бор. Ана, бедаҳонада.

— Тоҳир қани?

— Маҳмуд билан кўприкка қараб кетди. Билмадим,
не иши бор? Сўрасам айтмади.

Мулла Фазлиддин поччасининг ёрдамида пўлат сан-
диқни яна қонга солиб, бедаҳонадаги бўш ўрага туши-
риб қўйди-ю, ўранинг оғзини тахталар билан бекитди.
Кейин бу тахталар устига беда боғларини баланд қилиб
тахлаб ташлади,

* * *

Осмоңни яна қуюқ булат қоплаган. Бирда-ярим ём-
ғир томчилаб қўяди. Қува кўчалари жимжит. Ёв яқин-
лигини сезган одамлар уй-уйига бекиниб олган. Аҳён-
аҳёнда итлар ҳургани эшитилмаса, бутун Қува кўчиб
кетганга ўхшарди. Қувасой устидан ўтган ёғоч кўприк
ҳам кимсасиз. Элчилар ёмон хабар билан қайтгандан
сўнг кўприкдаги соқчилар қўрғонга қочиб кетишган...

Тун яримлаганда шу кўприкка қараб кетадиган йўл
четида учтўртта қора кўринди. Йўл бўйидаги дарвоза-
нинг бир тавақаси секин очилди-ю, ундан катта чўва кў-
тарган пакана одам чиқди.

Тоҳир шивирлаб сўради:

— Чақмоқ билан тутантириқни ҳам олдингми?

— Олдим.

Пакана йигитнинг кийимларидан зифир ёгининг ҳиди
келади — унинг касби жувозказ.

Тоҳир юзига ёмғир томчилаганини сезиб осмонга қа-
ради. Булат қуюқлашиб, юлдузлар кўринмай қолган.

«Жала қўйса олов ёнмай бало бўлармикин?— ўйлан-
ди у.— Кўприкнинг ёғочлари ҳам ҳўл бўлиб ивиб ётган-
дир».

— Маҳмуд, мен битта болта олдим. Энди яна битта
болта билан икки кишилик катта арра керак. Сен ду-
радгорсен, асбобларинг тахт.

— Аррани нима қиласен?

— Керак! Умрзоқ, сен ҳам бирга бор. Дарров олиб
чиқинглар.

Икки йигит бир тор кўчага кириб кетишиди-ю, анчадан кейин айтилган нарсаларни олиб келишиди. Кейин ҳаммалари деворнинг зеҳи билан юриб олдинма-кетин кўприкка яқинлашиши.

Тоҳир кўприкда қоровул йўқлигини боя аниқлаган эди. Андижон қўшини орқага чекиниб, қўрғонга кириб кетган, бостириб келаётган ёв буни яхши билар, шунинг учун Қувадай жойларда ҳеч қандай хавф-хатар бўлиши ни кутмас эди.

Тоҳир кўприкдан берироқда — қорайнб турган катта бир дараҳтнинг тагида ҳамроҳларини тўхтатди:

— Узларингдан қолар гап йўқ. Беклар билан навкарлар бизни ёғийнинг оёғи остига ташлаб кетди. «Ўзинг учун ўл етим», деган гап бор. Худо кушойиши коримизни берса, ҳаммамиз уй ичимиз билан бир балодан халос бўламиз. Мабодо, ишимиз ўнгидан келмаса... Битта яримтамиз қўлга тушадиган бўлсак...

— Ўшанда ҳам мард бўлиш керак,— деди Маҳмуд.— Онт ичайлик: кимки ёғийга сир берса, онаси хотини бўлсин!

— Омин!

— Омин!

Ҳаммалари юзларига фотиҳа тортишиди-ю, бирин-кетин кўприкка чиқишиди. Тоҳирнинг мўлжали қирқ-эллик қадам ичкарироқقا бориб, кўприкнинг ўртасидан ўт қўйиш эди. Аммо улар илгарилаган сари атрофлари очиқлиб, ўзларини ҳимоясиз сеза бошлишди. Сувининг очиқ саҳи соҳилга нисбатан ёруғроқ эди. Кўприк ёв қўшинлари қаршисида нишон тахтасига ўхшаб тургандек ваҳмали туюларди.

Бир вақт дурадгор йигитнинг қўлидаги катта арра эгилиб, юпқа пўлати Тоҳирнинг болтасига тегиб кетди. Унинг жаранги қоронғида шундай кескин эшитилдики, йигитлар сесканиб тўхташди. Атрофга қулоқ солиб, бирлаҳза қотиб турнишиди. Қурбақалар бир текис қурилламоқда эди.

— Тоҳир, кўп нарига бормайлик! — деб шивирлади Маҳмуд.— Келиб қолса қочиб қутулишни ҳам ўйланглар.

— Нарёқдан келадими? Умрзоқни ўша ёққа қоровул қилиб қўямыз. Қўрқманглар, ёғий узоқда.

Шу пайт ёмғир савалай бошлади. Энди узоқдаги гулханлар ҳам кўздан ўйқолди. Ёв уларни кўриб қолиш

эҳтимоли бутунлай бартараП бўлганини сезиб, Тоҳир
кчиди суюниб қўйди.

Кўпприк хийла узун бўлганлиги учун уч-тўрт жойида тагидан қўйилган зўр сепоя тиргаклари бор эди. Тоҳир кўпприкнинг қанотидан пастга эгилиб қараб, шу тиргаклардан бирини мўлжалга олди-ю, тўхтади. Умрзоқ кўпприкнинг нариги четида қоровул бўлиб туриш учун кетди. Қолганлар кўпприк ёғочларининг осонроқ ёниши мумкин бўлган жойларидан танлаб, болта билан пайрача кўчириши, сўнг чўвада ёғдан сепишди. Уч кишилашиб чақмоқни тошга уриб, тутани¹ ёмғирдан бекитиб, роса уринганларидан кейин, ниҳоят, аччиқ пахта тутуни димогларига урилди. Ўт ёқишига эпчилроқ бўлган жувозкаш йигит тутани пуфлаб-пуфлаб чўғ қилди. Тоҳир чакмонининг тагидан қўлтиғига қисиб олиб келган қуруқ похолни шу чўққа тутди.

Похолнинг заиф олови зигир ёғи сепилган пайрачаларга илашиб энди сал кўтарилай деганда, шамол қайриб ураётган ёмғир томчилари «жиз-жиз» этиб тегди-ю, ўчириб қўйди.

— Енмайдиган сирқинди мой экан! — деди Маҳмуд жувозкаш йигитга таъна қилиб.

— Ёмғир ўчирди-ку! Шу мойни топиб чиққанимга ҳам жон де!

— Бас! — шипшиди Тоҳир жувозкаш йигитга. — Тутани ўчирмай тур!

Тоҳир иккита белбоғни бир-бирига улаб, бир четини белига боғлаб, кўпприкнинг тагига осилиб тушди. Тиргакларнинг нам тегмаган жойларидан пайрача кўчириб олиб, ёғ сепиб, минг азоб билан энди олов олди-раётганда шамолнинг кучли бир эпкини ёнаётган пайрачаларни сувга учирашиб туширди.

Тоҳир кўпприкка қайтиб чиқди-ю, болтани қўлига олиб, ғазаб билан кўпприк қанотларини уриб синдира бошлиди:

— Мана ёнмасанг! Мана ёнмасанг! Мана! Мана!

Жувозкаш йигит иккинчи болтани қўлига олиб, кўпприкнинг нариги қанотини синдиришга тушди.

— Тоҳир, бу ишларингдан нима фойда? — деди Маҳмуд. — Ундан кўра болтани менга бер. Мана бу михланган ёғочларини кўчириб ташлайлик.

¹ Тута — чақмоқ учқунидан ёниши қулай бўлган пахта ипи.

Ҳансираган Тоҳир Маҳмуднинг олдига келди. Қоронғида мих кўринимаса ҳам касби дурадгор бўлган Маҳмуд ёғочга мих қоқилган жойни тусмоллаб топди. Тоҳир иккаласи кўприкка кўндаланг қўйиб михланган тахтасимон бир ёғочни кўчириб олишди. Аммо иккинчи ёғочни кўчириш жуда қийин бўлди.

— Айтмоқчи, арра бор-ку! — деди Маҳмуд.

Бир четда ётган аррани Тоҳир пайпаслаб топди. Икки йигит уннинг икки дастасидан олиб, кўприк ёғочларини арралашга тушишди.

— Шошма! — деди Тоҳир. — Бу ердаги беш-ўнта ёғочни арралаб ташлаганимиз билан ҳеч иш чиқмайди.

— Нега чиқмасин? От-арава ўтолмайдиган қила-миз!

— Бирорта устани олиб келиб, кўприкни тузатиб, ўтиб кетаверса-чи?

— Фойдаси йўқ ишга уннадик чамаси-да! — деди жувозкаш йигит умидсизланиб.

— Йўқ, биз кўприкни бўйига эмас, энига қараб ар-ралашнимиз керак.

— Энига қўйилган ёғочлар жувозкундадай йўғон-ку. Арралаб бўладими?

— Бўлади!

Тўрт киши навбатма-навбат арра тортиб, кўприкнинг кўндалангига тўсин қилиб қўйилган йўғон ва қаттиқ ёғочни арралётганда қора терга ботиб кетишди. Илиқ ёмғир ҳали ҳам савалаб турар, уларнинг юзлари ва баданларидан оққан тер ёмғир сувига қўшилиб ки-йимларини шалаббо қилган эди. Йигитларнинг мақсади кўприкни икки томондан ушлаб турган ўқёғочларни арралаб, уни бир-икки жойидан узиб ташлаш эди. Аммо улар кўприкнинг ҳар икки томонидаги йўғон ўқёғочларни арралаб қирқишиди ҳамки, кўприк улар кутгандай узилиб тушмади. Уни яна қандайдир михлар, бир-бира-га тишлатиб қўйилган болорлар ва «белбоғ» ёғочлар маҳкам ушлаб турарди. Тоҳир билан Маҳмуд аррани қўйиб, яна болтани қўлга олишди, қоронғида тимирскиланиб, болорларга тишлатилган қавс михлардан бешолтитасини топишидни ва кўчириб ташлашди. Шундан кейин кўприкнинг аллақаери қирсиллади-ю, аммо ўзи аввалгида тураверди.

— Бўлди! — деди Маҳмуд мадорсизланиб. — Қўли-миздан келмайдиган ишга уннабмиз!

— Падарига лаънат!— деб, Тоҳир қўлидаги болта билан яна кўприк қанотларини қарсиллатиб синдира кетди. Шу пайт кўприкнинг нариги четидан улар қорувул қўйган йигит чопиб келди:

— Кўй, бас! Мунча қарсиллатма! Нариги адирдиг ёғий келаётганга ўхшайди.

— А?! Кўрдингми?

— Товушларини эшиздим. «Отлан!», «Сафлан!»— деб бақириб чақирганлари қулоғимга чалинди!

— Бўлмаса ҳозир бостириб келади!— деб жувозкаш қочишга чоғланди.

— Аррангни ол, бу ерда ҳеч нарсани қолдирманглар!— деб Тоҳир ёнмаган пайраҳаларни, ёғоч синиқларини сувга отди.

Беш йигит муваффақиятсизликка учрагандай руҳлари тушиб, уйларига тарқаганиларида тонг ёриша бошлади. Эди.

2

Саҳарликни еб йўлга тушган ёв қўшинининг олдинги тўпи кўприкка чиқа бошлаганда тонг қоронғиси ҳали тарқалмаган эди. Ёмғир тоғларда қаттиқ қуяётганилиги учун Қувасойнинг суви тобора кўтарилиб бормоқда эди. Олдинда келаётган отлиқ чиғдовуллар унча қўп эмас эди, шунинг учун кўприкдан сийрак саф билан ўтиб кетишиди.

Аммо улардан кейин келаётган сафлар жуда қалин эди. Ҳар бир бекнинг навкарлари ўзларига қарашли юкларни тую қўшилган оғир араваларга ортиб келмоқда эдилар.

Чуғурчуқдай беҳисоб қўшин отлари, туялари, аравалари билан бирга ёмғирли тонгда қоп-қора селга ўхшаб, кўприкни лиммо-лим тўлдириб кела бошлади.

Кўприкнинг ўртасида бояги йигитлар михларни суғуриб, тўсинларини арралаб кетган жой бунчалик оғир юкка бардош бериши амримаҳол эди. Бунинг устига худди ўша жойда бир чўбир отнинг икки олдинги оёғи михи кўчирилган ёғочларнинг ёриғига тушиб кетди. От ўмрови билан йиқилиб тушиб, оёғини суғуриб ололмай типирчилай бошлади. Эгарда ўтирган навкар отнинг бошидан ошиб, бошқа отларнинг оёғи тагига учиб тушди. Ҳозир беҳисоб туёқлар остида қолиб янчилишини

сезди ю, дод солиб қичқирди. Ҳамроҳлари беихтиёр жиловларини тортишди. Баъзи отлар қўрқиб орқага тиса-рилиб кетди.

Орқадагилар эса ҳеч нарсадан бехабар ёпирилиб келмоқда эди. Бир лаҳзада кўприкнинг шу жойи ҳаддан ташқари тиқилинч бўлиб кетди. Аппа ва болта зарбаларидан ночорлашган кўприк ёғочлари тўсатдан қар силлаб синди. Тиқин бўлиб ётган ўнлаб отлар, одамлар кўприк ёғочларига қўшилиб сувга қулаб тушди. Тошиб турган сойнинг суви қулаб тушганларни лопиллатиб оқизиб кетди.

Кўприк устида қолганлар жон ҳолатда орқага бурилиб қочмоқчи бўлишди. Аммо орқадан ҳамон отлиқлар, аравалар, туялар кўчкидай бостириб келмоқда эди. Олдинда нима ҳодиса бўлганидан бехабар подшоҳ энг яқин беклари билан сойнинг нариги четида туриб, қўшинни кўприкка томон йўналтиримоқда эди. Лекин кўприк ўртасидан кўтарилган қий-чув тўполон тобора зўрайиб борарди. Ваҳимага тушган қўшин бирдан ўзини орқага ташлади, аммо ур-сур тўполонда кўприкка сифмай, от-уловлари билан сувга тутдай тўкила бошлади.

Кўприк қанотларининг анча жойи синдириб ташлангани уларнинг қулаб тushiшини осонлаштиради. Тартиби бузилган аравалар бир-бирини итариб, кўприкнинг бутун турган қанотларини ҳам синдириб қуламоқда эди. Баъзи навкарлар йўлида учраган тирик жоннинг ҳаммасини қамчилаб ўтмоқда бўлса, баъзи беклар қилич яланғочлаб, тўполонни тиғ билан босмоқчи бўлишади. Аммо ғиж-ғиж бўлиб, қурт-қумурсқадай қайнаб ётган қўшин кўприкка шундай тиқилиб қолган эдикি, унга на қамчи кор қилар эди, на қилич. Туялар бўкиради. Одамлар қичқиради. Таъласага тушган оломон тиғ кўтарган бекларнинг ўзини от-улови билан суриб бориб, кўприкдан ағанатиб юборади.

Подшоҳ билан бирга қирғоқда турган хос навкарлар сувда оқиб бораётганларни қутқарнишга фармон олдилар. Улар қамишларни шалдиратиб, сувга яқин келганларида ўzlари ҳам балчиқقا ботиб кета бошлади. Кейин орқада қолганлари арқон ташлаб уларнинг учтўрттасини зўрга қутқариб олди. Бошқаларини қамишзор балчиқ қаърига тортиб кетди.

Сувга қулаб тушганларнинг чўккани чўқиб ўлди. Сузишни биладиганлари эса отларининг бўйнига ёпи-

шиб қамишзор қирғоққа чиқай деганда балчиққа ботди. Сассиқ ботқоқлик аждаҳога айланиб одамни ҳам, отни ҳам оёғидан пастга тортар эди. Отлар жон аччиғида силтаниб кишинар, одамлар қамишларга қўллари тилиниб дод солар, аммо улар талваса қилганлари сари балчиққа чуқурроқ ботиб, юз азоблар билан жон беришар эди.

Үртаси синиб тушган кўприкнинг устида — ағдарилиган аравалар, йиқилиб ётган от ва туялар орасида талай навкарларнинг эзғиланган жасадлари қолди. Ёвнинг шу бир-икки соат ичидаги кўрган талафоти уруш бошлангандан бери кўрган ҳамма талафотларидан кўпроқ ва даҳшатлироқ эди. Яна бу фалокатнинг сабабини ҳеч ким билмас эди. Шунча одамнинг мислсиз қийноқларда жон берганини кўрган жангчилар мағлубиятга учрагандан баттар эсанкираб, руҳсизланиб қолдилар.

3

Қуваликлар тонг ёришгандан кун ёйилгунча бўдиб ўтган бу фалокатни нариги қирғоқдаги девор ва томлардан мўралаб кўриб туар эдилар. Уларнинг баъзиси «ёғий баттар бўлсин», деб шодланса, баъзиси не-не йигитларнинг сувга оқиб, балчиққа ботиб, минг азоблар билан ўлаётганидан ачинарди. Тоҳир кечаси ўртоқлари билан қилган ишларини боя Фазлиддин тоғасига «ухдасидан чиқолмади», деган маънода маъюсланиб айтиб берган эди. Кейин юз берган ҳодисани томга чиқиб кўрган Мулла Фазлиддин нарвондан тез пастга тушди-ю. Тоҳирни бир четга имлаб чақириб олди:

— Үртоқларингга айт! Ҳаммаларинг тезроқ беркинглар!

— Нечун, мулла тоға?

— Кўприк арраланган жойидан синганга ўхшайди. Агар кўприкка ўт қўйиб юборганларингда ҳам бунчалик талафот бўлмас эди. Чунки ёғий кўприкнинг ёнган жойини тузатмагунча устига черик чиқармас эди. Улар рафлатда қолиб балога йўлиқкан! Агар қилган ишларингни билиб қолса, ҳаммамизни қириб ташлашларин аниқ!

— Ёғий ҳали нарёқда-ку?

Чиғдовуллари бу ёққа ўтган экан, мен кўрдим. Гап-

ни жўпайтирмай тезроқ яширин. Тўқайга чиқиб кетинглар. Тез!

Тоғаси астойдил хавотир бўлаётганини сезган Тоҳир бошқа эътиroz қилмади-ю, ўртоқларига секин хабар бериб чиқди:

— Арқон билан ўроқ олинглар. Қим сўраса, ўтинг борамиз, денглар. Лекин хўрак икки-уч кунлик бўлсин.

Беш йигит одамларнинг кўзига ташланмасликка тиришиб қишлоқдан якка-якка чиқишиди-ю, тўқай ичида учрашишиди.

Кўприк синмасидан олдин бериги томонга ўтиб қолган чигдовуллар Қуванинг кадхудосини топиб, унинг ёрдамида дурадгор усталарни кўприк тузатишга ҳайдаб чиқди. Нарёқда қолган навкарлар арқон ташлаб, ёғоч ташиб, уларга кўмаклаша бошлишди.

Кўприк тузатишга чиққанларнинг орасида Тоҳирнинг отаси ҳам бор эди. У кечаси ўғлининг қаёқладир бориб, саҳар пайтида чарчаб қайтганини сезган эди. Дурадгорлардан бири ёғочнинг арраланган жойини Тоҳирнинг отасига кўрсатиб, ўз шубҳасини айтмоқчи бўлганда, уста бунинг олдини олиб лабини тишилади:

— Дамингизни чиқарманг,— деб шивирлади.—Агар ёйий бирор гумонингизга ишонса, бутун Қувага ўт қўяди. Ҳаммамизни қиличдан ўtkазади!

— Гапингиз ҳақ!

Шундан кейин бу тўғрида ҳеч ким оғиз очмади. Икки кун деганда кўприк наридан-бери тузатилди-ю, ёвнинг отлиқ аскарлари битта иккитадан бўлиб, эҳтиёт билан ўтишди. Ниҳоят, подшоҳ ҳам мулозимлари билан кўприкдан ўтиб, Қувада тўхтамасдан йўлида давом этди.

Ёвнинг араваларга ортилган оғир юклари ва тия карвонлари кўприкдан нарида қолиб кетди. Шунга қараганда ёвнинг режаларида қандайдир бир ўзгариш юз берган эди.

Тўқайда яшириниб юрган Тоҳир Робиядан хавотирда эди. Ота-онаси қизини қўлларидан келганича авайлаб, яшириб юрганларини билса ҳам ёвнинг ҳамон Қува атрофида ўралашиб юргани жуда таҳликали эди. Учиичи куни йигитларнинг хўраклари ҳам тугади. Аҳвол қандай бўлаётганини билиш ва хўрак ғамлаб келиш учун Тоҳир ўзи борадиган бўлди. У кечки пайт бир боғ қамишини орқалаб секин ҳовлиларига яқинлашди. Дарвоза занжир экан, қўлнинг учини тиқиб, занжирни туширди.

Мулла Фазлиддин бостирманинг олдида аравацинг гилдиракларини кўздан кечираётган эди. Қамиш кўтариб кирган Тоҳирни кўриб унга қараб чопди:

— Сулҳ муборак, жияним! Сулҳ!

— Уруш тугадими?

— Худога шукур, тугади.

Тоҳир елкасидаги қамишни ерга ташлаб юборди. Тоғаси уни бағрига босиб қулоғига шивирлади:

— Жасоратларинг бекор кетмади, жияним! Самарқанд подшоҳининг ўзи сулҳ таклиф қилган эмиш! Кўп рикдаги талафот ёғийнинг белини синдирган экан!

Мулла Фазлиддин елкасига энсиз жияк тикилған кифтаки кўйлак кийган эди. Тоҳир энгагини жиякнинг боғичига босиб ва кутилмаган шодликнинг зўридан ўпкаси тўлиб:

— Хайрият!— деда олди, холос.

Мулла Фазлиддин унинг залварли елкасини силаб паст товуш билан:

— Аломат бўлди,— деди.— Не-не бекларнинг қўлидан келмаган халоскорлик сендеқ бечораҳол йигитларнинг қўлидан келгани аломат бўлди! Узинг ўроқчи деҳқон, бир ўртоғинг дурадгор, бири косиб, яна бири... ким эди?

— Жувозкаш.

— Ҳа, жувозкаш!— деб Мулла Фазлиддин завқланиб кулди-ю, жиянини қучоғидан бўшатиб, унинг юзига тикилди:— Киборлар сендеқларни «қора халқ», деб писанд қилмайдилар. Аммо бугун шу «қора халқ»нинг жасорати билан уруш балосидан халос бўлганларини билсалар эди!

— Лекин мунчалик бўлишини биз ўзимиз ҳам билмаган эдик, мулла тоға. Бир чеккаси, сизнинг келиб қолганингиз яхши бўлди. Сиз бўлмаганингизда бу иш менинг хаёлимга ҳам келмас эди.

— Шундайми, а, жияним? Агар шундай бўлса менинг бошимни сен кўкка етказдинг!

Мулла Фазлиддин нуқул овозини пасайтириб, қандайдир хавф сезиб гапирмоқда эди.

— Мулла тоға, Қувада ҳали ҳам ёғий борми?— деди Тоҳир.

— Ҳа, ёғий ўтиб тамом бўлганича йўқ. Подшоҳлари Андижондан бир ёғоч¹ берида сулҳ тузиб орқага қайтган

¹ Бир ёғоч — тахминан ўн олти чақирим.

әмиш. Чөригининг бир қисми кўприкдан нарига ўтиб қетганини, ўзим кўрдим. Аммо қолган-қутганлари энди қайтса керак. Эҳтиёт шарт, жияним, уйга кир.

Тоҳир усти бошига илашган қамиш баргларини қоқиб уйга кираётганда қўшни ҳовлидан аёл кишининг алласи эшитилди.

Тоҳир Робияни эслади-ю, юраги бир орзиқди. Сулҳ тузилганини эшитганмикин? Тоҳир уни жуда соғиниган эди. Қани энди иложи бўлса-ю, ҳозир девор ошиб қўшини ҳовлига ўтса. Робияга уруш қандай даф бўлганини айтиб бериб, унинг қувонганини кўрса! Лёкин қаллиқлиқ одоби бунга йўл бермас. Тоҳир Робия билан фақат яшириқча учрашар эди.

Тоҳир энди уйга кириб, онасини сулҳ билан муборак бод қилаётган эди, кўчада бирдан итлар асабий ҳуриб, от дупури эшитила бошлади. Тоҳир шошилиб дарчадан ҳовлига қаради. Айвондан пастда турған Мулла Фазлиддин унга ўтинҳонани кўрсатиб!

— Бу ёққа чиқ! — деб шийшиди. — Бекин!

Тоҳир белига тақилган ҳанжарни сопидан ушлаб, айвон орқали ўтинҳонага чолиб ўтди ва қамиш боғларининг орасига яширинди.

Дарвоза тавақалари шахт билан очилди. Эгарларининг қошига ёй осилган, бошларига дубулға кийган, кенг чоловорлари этикларининг кўнжини ёпиб турган отлиқ аскарлар ҳовлига кираётib атрофга аланг-жаланг кўз югуртириб чиқди. Улардан иккитаси битта қора отга мингашиб олган эди.

Дубулғасининг учига яшил матодан байроқча қадалган понсад бостирмада турган яйдоқ отни кўрди-ю, мингашиб келаётганларга қараб:

— Ана у сеники! — деди.

Ҳабашдай қорайиб кетган ўсиқ мўйловли йигит қора отнинг сағрисидан сакраб тушди-ю, бостирмаға қараб югурди. Қолган йигитлар понсаднинг ишораси билан уйга кириб, янгироқ кигизми, гиламми, бўхчами ҳаммасини ҳовлига кўтариб чиқа бошлади.

Айвоннинг устунига суюниб жим турган Мулла Фазлиддин буларни «Кўприк воқеасидан хабар топиб Тоҳирларни қидириб келганми?» — деб қаттиқ қўрқсан эди. Энди буларнинг баднафс талончилар эканини кўриб нафрати келди. Отдан тушмай ҳовли ўртасида турған понсадга қараб:

— Меҳмон, инсоф ҳам даркор! — деди. — Подшоҳла-
римиз сулҳ тузганиларидан кейин бунчалик талон-торож
қилиш мусулмончиликка тўғри келармикин?

Бостирмада Мулла Фазлиддиннинг отини аллақачон
ўзиники қилиб унга эгар ураётган қора йигити

— Сулҳ, омон-омон! — деб, бу сўзларни масхарала-
гандай кулиб айтди.

Бошқа бир йигит бўхчани титкилаб, ундан бир жуфт
атлас топди-да, понсадга узатиби:

— Моли амон!¹ — деди.

Понсад атласни олиб хуржунига солар экан, Мулла
Фазлиддинга зуғум қилиб, самарқандча талафуз
 билан гапира бошлади:

— Олмишта отимиз ўлат бўлиб ўлди. Бизга касофат-
ларинг урди. Сен бунда савори юргину мани йигитим
Самарқандга пиёда кетсунми? Икки киши бир отга мин-
гашиб кирганини кўрдингми?

— Кўрдим. Агар аравага қўшилган шу чўбир от йи-
гитингизни Самарқандга кўтариб боролса, майли, олинг.
Лекин аёлларнинг бўхчасини кавлаш сиздек олижаноб
понсадга жоизмикан?

— Бизнинг аёлларимиз Фарона атласидан савго
келтуринг деб тайин қилган. Биз шунча жойдан ово-
ра бўлиб келиб, энди бесавго қайтайлукми? Инсоф
шуми?

Понсад сўнгги сўзни алам билан айтганига қараган-
да, урушнинг ғалабасиз тугаганидан жуда норози эди. Бу
одамлар, урушдан катта ўлжалар олиш умидида ойлаб-
йиллаб қон кечиб, ҳамма азоб-уқубатларга бардош бе-
риб юрар эдилар. Агар Андижон ва Аҳси каби бой ша-
ҳарлар босиб олинса, жангчиларнинг ҳар бири ўлжадор
бўлиши шубҳасиз эди. Бироқ Қувадаги талафотдан ке-
йин дарҳол сулҳ тузилди. Андижондан ярашиш учун
чиққанлар Самарқанд подшоҳига олтин-кумуш совға-
лар, қимматбаҳо саруполар, бир неча юз чопқир от ва
туялар инъом қилдилар. Бу инъомлар подшоҳнинг ич-
килари, мулоғимлари, беклари ва бошқа яқинларидан
ортмай қолди. Мана бу понсадга ўхшаган жангчилар
эса ўлжасиз қолди.

Шунинг аламига улар орқага қайтишда йўлларида

¹ Моли амон — урушда тўланадиган товои.

учраган қишлоқларни тинтиб, ўлжа қидиришга тушган эди.

Улардан бештаси ҳозир Робияларнинг ҳовлисига ҳам бостириб кирган эди. Утихонанинг бир девори Робияларнинг ҳовлисига туташ бўлгани учун Тоҳир қўшни ҳовлида ҳам тўполон кўтарилганини эшишиб қолди.

Кечак эҳтиётини қилиб ичкарида бекиниб ўтирган Робия уруш тугаганини эшигтан сўнг ҳовлига сигир соғишига чиққан эди. Сигирга бузоқни қўйиб, уни ийдирш билан андармон бўлди-да, ҳовлиларига отлиқ аскарлар кириб келганини кеч сезди.

Аяси оғилхонага чопиб кирди.

— Вой, ўлай, сен шу ердамидинг?

— Нима бўлди, ая?

— Ефий! Тўхта! Ҳовлига чиқма!.. Ана у туйнукдан сомонхонага ўт!

Ўлжа от қидириб юрган навкарларнинг иккитаси дарҳол оғилхонага кирдию, унинг тўридаги туйнукдан нарёққа ошиб ўтаётган қизни кўриб қолди. Қисиқ кўзли қипчоқ йигит ёнидагига қараб:

— Сулув қизга ўхшайди!— деди.

— От жўқ экан-да,— деди шериги афсусланиб.

— Жахши қиз отдан ҳам қиймат бўлади. Жур, олиб чиғайиқ. Самарқандга олиб бориб Фозилбекка сотамиз!

Сигирнинг панасида турган она бу даҳшатли сўзларнинг маъносини тушунди-ю, чопиб бориб туйнукнинг оғзини гавдаси билан бекитди.

— Мусулмон бўлсаларинг қизимга тегманглар! Мени ўлдирсаларинг ўлдиринглар! Қизимга яқинлашманглар! Бироннинг омонати! Биронга фотиҳа бўлган!

Бу сўзлар қисиқ кўзли йигитнинг назарида қизнинг қийматини яна ҳам оширгандай бўлди. У кампирни қўлидан бир силтаб, охурга қараб улоқтирди. Кампир охурга боши билан урилиб чинқирди-ю, хушидан кетди.

Қипчоқ йигит туйнукдан сомонхонага ўтганда Робия сомонхонанинг эшигидан қочиб ҳовлига чиқди. Шунда иккинчи йигит қаршисидан чопиб чиқиб уни тутиб олди. Ичкаридан қисиқ кўзлиги етиб келди. Қиз уларнинг қўлидан чиқиб кетмоқчи бўлиб балиқдай патиллар эди. Учинчи бир йигит эгаридан қоп олиб қопнинг оғзини очганича уларга яқинлаша бошлади. Қиз ҳозир бошига

қоп кийдирилишини сезди-ю, бор овози билан дод со либ қичқира бошлади.

Тоҳир шу вақтгача тишини-тишига қўйиб, уйларида бўлаётган талон-торожга чидаб ўтирган эди. Аммо Робиянинг чинқириғини эшигандан кейин кўзига ҳеч нарса кўринмай қолди. Утихонадан чопиб чиқди-да, қўшни ҳовлининг деворига тирмашди. Деворнинг сувоқларини кўчириб, нарёққа ошиб тушар экан, шунча кундан бери уни хавотирга солиб юрган энг ёмон бахтсизлик у кутгандан ҳам даҳшатлироқ бир тарзда рўй бераётганини кўрди. Бири Робияни оёқларидан ушлаб олган, иккинчи унинг қўлларини белига қўшиб маҳкам қисиб турган ва учинчиси қизнинг бошига қоп кийдирмоқчи бўлаётган йигитлар Тоҳирнинг баданига ҳам заҳарли илон бўлиб ёпишаётгандай туюлди. Тоҳир қичқириб юборди. Ҳовлида бир йигит отларни жиловидан тутиб турибди. Яна бири қўлида узун найзаси билан от устида ўтирибди. Ҳаммасининг белида қиличи, ёнида ўқ-ёйи. Тоҳир бир ўзи буларга бас келоладими, ўқуми, буни ўйлаб ўтирадиган аҳволда эмас. Робияга ёпишган илонларга тезроқ тиф уришдан бошқа ўйи ҳам, истаги ҳам йўқ. У югуриб бораётиб ханжарини қинидан суғурди.

Найза кўтарган отлиқ:

— Тўхта! Тўхта!— деб унинг кетидан от солди. Тоҳир икки сакраб мўлжаллаган жойига етиб борди. Робияни оёғидан қучоқлаб олган қисиқ кўзли йигитнинг биқинига ханжар урди. Ханжар сопигача ботиб кетгани, қисиқ кўзли йигит инграб Робиянинг оёқларини қўйиб юборгани эсида. Тоҳир ханжарни тортиб олаётгандай ўзининг елкасига фарчиллаб санчилган найза зарбидан гандираклаб кетди. Унинг ханжар тутган қўллари даҳшатли бир оғриқдан бўшашди. От устидан унга найза санчган йигит найзасини узун сопидан тортиб суғуриб олаётган Тоҳирнинг елкасидан — кўйлаги билан бирга кесилган баданидан — қон тизиллаб отилиб кетди. У ўзи қулатган қисиқ кўзли йигитнинг устига йиқилар экан, Робиянинг косасидан ўйноқлаб чиқкан ваҳима тўла кўзини кўрди. Қизнинг:

— Вой, Тоҳир оғам!— деб қичқиргани узоқлардан келган шарпадай зўрға эшитилди. Сўнг бу ҳам зулмат қаърига шўнғиб йўқ бўлди.

Тоҳир қонига беланганичча қолди-ю, Робияни Самарқанд томонга олиб кетишиди.

ЎШ. Нажот қайдар?

1

Баланд қоятошлар билан текис воҳалар бир-бирнга ғалати тарзда киришиб кетган Ўш атрофлари бир неча кундан бери жуда серҳаракат. Андижондан туяларга ортиб көлинган ҳашаматли ҷодирлар Буратоғ этагидан оқиб ўтадиган Жаннатариқ бўйига ўрнатилди. Оқбурасой бўйларида ҳам, Чилмаҳрам тоғининг этакларидаги кўкаламзорларда ҳам юзлаб ҷодирлар ва ўтовлар пайдо бўлди. Тоғдан ҳайдаб тушилган думбали қўйлар сўйилди, кабоб қўраларида арчанинг пистоқи кўмири чўфлатилди, дошқозонларда гўшт қайнай бошлади.

Бугун Ўшга Бобир мирзо бошлиқ ҳамма аркони давлатларнинг келиши кутимоқда.

Мулла Фазлиддин ёш подшоҳнинг амри билан Буратоғ¹нинг чиқиши қийин бўлган хушманзара бир қоятоши устига кичкина ҳужра қурган. Бобир мирзо бултур шу ишни унга топширгандан кейин Самарқандга қўшин тортиб келган ва Ўшга мана энди йўли тушмоқда эди. Мулла Фазлиддин савдарлар билан пастга тушиб, ҳужрага ярашадиган гилам ва зарбоғ кўрпачаларни ўзи танлатди. Тик, сирғанчиқ қоятошга чиқиб ўрганмаган савдарлар жиҳозларни олиб келаётганда жуда қийналиб қолишиди. Қашқарча кумуш обдаста кўтариб келаётган семиз офтобачи ҳар ўн қадамда бир тўхтаб қоларди. Мулла Фазлиддин унинг қўлидан обдастасини олиб, ўзини суяб чиқди.

Савдарбоши айвоннинг сангфарш қилинган зиналарига гулдор пойандоз тўшатган эди, Мулла Фазлиддин илтимос қилиб, уни олдириб ташлади. Чунки зиналарга ишлатилган рангли тошлар ҳар қандай пойандоздан қимматроқ ва гўзалроқ эди.

Тоғ қиррасида турган ҳужрадан бутун Ўш шаҳри ва унинг атрофлари кафтдагидек аниқ кўринар эди. Ҳали ҳам нафасини ростлаб ололмай ҳансираф ўтирган офтобачи пастга тикилиб қаради-ю, ўрнидан сакраб турди:

¹ Буратоғ баъзи манбаларда Боратоғ ҳам деб аталади. Бироқ «Оқ бурасой» каби асли «бура» сўзидан олинган бўлиши керак. Туркий тилларда нортуянинг энг ўлкани «бура» ёки «бугра» деб аталади. Бу тоғ чиндан ҳам текис жойда чўк тушиб ётган улкан нортуяга ўхшаб кетади. (Авт.)

— Ана, келдилар!

Мулла Фазлидин ёйвон четига бориб, пастга кўз югуртириди.

Оқ отлиқ Бобир мирзо юздан ортиқ беклари за хос навкарларидан билан Жавзо масжидидан ўтиб, тоғ этагига яқинлашиб қолган эди. Улар ҳаммаси Жаннатариқ бўйинга ўрнатилган боргоҳ¹ ва хиргоҳ² олдида тўхтадилар. Ичи заррин ипак, усти қимматбаҳо майин мовут билан қопланган бу чодирларнинг зарҳал чилвирлари кумуш қозиқларга боғланган эди. Чодирларда дам олиш ва катта зиёфатлар бериш учун ҳамма тайёрликлар кўриб қўйилганини Мулла Фазлидин билар эди. «Энди бугун Бобир мирзо ўша ерда дам олсалар керак, бизнинг ҳужрага балки эртага чиқарлар»,— деган ўй билан ишини секин давом эттириди. Аммо орадан бир соат ўтар-ўтмас пастдан серсоқол қўрчибоши тўртта соқчиси билан ҳансираб чиқиб келди.

— Ҳозир бу ерга олий зотлар қадам ранжида қилурлар. Тахтиравон қаерда?

Савдарбоши Мулла Фазлидинга ёрдам сўрагандай қилиб қаради. Зира беқасамдан юпқа тўн кийган Мулла Фазлидин қўрчибоши қаршисида қўл қовуштириб:

— Маъзур тутинг, жаноби бек,— деди.

— Хўш?

Мулла Фазлидин шу ҳужрани қуришда ғиштларни замбилга солиб кўтартириб чиқмоқчи бўлган, аммо иложини тополмаган эди. Чунки бу тик қояга одам фақат битта-битта бўлиб, гоҳо қўли билан қояга суюниб чиқиши мумкин эди. Тахтиравонни эса тўрт киши тўрт томонидан кўтаради, унинг ичидаги подшоҳ ёки маликалар ўтиради.

— Биз тажриба этиб кўрдик, бу қояга тахтиравон кўтариб чиқиши мумкин эмас,— деди Мулла Фазлидин.

Қўрчибоши уч томони девордай тик қоятош бўлган, фақат бир томонидан ёлғиз одам зўрға ўтиб келадиган тоққа дурустроқ қаради-ю, тахтиравон ишлатиш фикридан қайтди. Савдарбошига хўмрайиб:

— Бу ерга ортиқча одам бўлмасин!— деб буюрди.

Ҳужра атрофидаги саҳн торроқ бўлса ҳам қоянинг

¹ Б о р г о ҳ — подшоҳнинг хос чодири.

² Х и р г о ҳ — подшоҳнинг тахти қўйиладиган ва қабул маросими-лари ўтказиладиган чодир.

шимол томонида — уйдай баланд тошлар ортида кичкина майдонча бор эди. Соқчилардан иккитаён офтобачи ва савдарбоши билан бирга ўша ёққа ўтиб туришди. Бошқа савдарлар пастга тушиб кетишди. Кўрчибоши Мулла Фазлиддинга қараб:

— Жаноби меъмор, сиз йўлни яхши билурсиз, подшоҳга пешвоз чиқинг,— деб буюрди. Қоидага биноан, қўрчибошининг ўзи ҳам пастга қайтиб тушиб, подшоҳ билан бирга чиқиши керак эди. Аммо бу тоққа икки қайта устма-уст тушиб чиқиш бениҳоя қийин. Буни сезган ўрта яшар қўрчибоши иккита соқчини Мулла Фазлиддинга қўшиб пастга тушириб юборди-ю, ўзи ҳужра ёнидаги силлиқ тош курсига ўтириб, терлаб кетган йўрон бўйинларини арта бошлади.

Мулла Фазлиддин Буратоққа ҳар куни неча қайтадан тушиб-чиқиб ўрганиб қолган. Унинг оёғидаги ихчам мўккиси тошдан-тошга енгил ўтиб боради. Аммо кўнгли нотинч. Ҳозир подшоҳ ва унинг бекларига дуч келиши кераклиги, улар билан муомала қилишининг қийинлиги қалбига таҳлика солади.

Бобир мирзо ва унинг одамлари тоғнинг кунчиқиши томонидан отлиқ айланниб ўтиб, қоятошга жанубдан яқинлашдилар-да, мазоратдан юқорироқда отдан туша бошладилар. Шунда Мулла Фазлиддин бек ва навкарларга қўшилмай алоҳида тўп бўлиб келаётган аёлларни кўриб қолди. Ювош қора отда ўтирган ва оппоқ кийнган ўрта яшар аёл — Бобирнинг онаси Қутлуғ Нигор хоним эди. Гулибодом рангли шўх, ўйноқи отда қирмизи ипак қабо¹ кийган Хонзода бегим келмоқда эди. Мулла Фазлиддин уни шўх от устида чавандоз йигитлардай яхши ўтирганидан ҳам таниди-ю, вужуди бирдан қизиб кетгандай бўлди. Кўнглидаги бояги безовталик устига оловли бир ҳаяжон қўшилиб, юраги қинидан чиққудай ҳаприқиб кетди. Мулла Фазлиддин ўзида бирдан юз берган бу ўзгаришни бировга сездириб қўйишидан қўрқиб, подшоҳни кутиб олаётган мулозимларнинг панасига ўтди-да, бош эгиб, қўл қовуштириб турди. Шунда тиззалари ҳам қалтираётганини сезиб, «Худоё, ўзинг шарманда қилма!» — деган сўзларни дилидан ўтказди.

¹ Аслзода аёллар киядиган узун енгли устки қийим, Камзулга ўхшаш.

Бобир мирзонинг опаси Хонзода бегим Мулла Фазлиддинни кўпдан бери ҳайратга солиб келади. Бундан тўрт йил муқаддам Мулла Фазлиддин Ҳиротдан келиб, Умаршайх мирzonинг Андижондаги чорбоғида кўшк қура бошлаган кезларнда Хонзода бегим ўи олти ёшда эди. Аслзода қизлар орасида энг кўҳлиги бўлган Хонзода бегим бир марта эркакча кийиниб, от миниб, инисининг ўсмир мулозимлари билан чавгон¹ ўйнаган, Мулла Фазлиддин буни кўриб, бир ҳайратга тушган эди. Орадан икки йил ўтгач, Мулла Фазлиддин Андижон аркидаги тўрхонанинг баъзи нақшларини янгилаш учун чақирилди. Шунда ўн саккиз ёшли Хонзода бегимни равонда канизлар орасида сетор чалиб ўтирган пайтида яна бир кўрди-ю, ўз кўзларига зўрга ишонди. Чунки бир вақтлар йигитча кийиниб чавгон ўйнаган ўша қиз энди сеторда шунчалик нафис, шунчалик майин куй чалар, унинг ўзи ҳам шу қадар нафосатга тўлиб ўтирас эдики, Мулла Фазлиддин беихтиёр унинг сеҳрига берилиб, галати бўлиб кетди.

Кейин Мулла Фазлиддин деворга хомаки нақш чизаётганда Хонзода бегим унинг олдига келиб, ишини қизиқиб томоша қила бошлади. Мулла Фазлиддиннинг қўидаги паргор² ҳаяжонидан ерга тушиб кетди.

— Ажойиб нақш чизган эдингиз, кўзим тегдими, мавлоно? — деди Хонзода бегим айбни ўзига олгандай бўлиб.

Мулла Фазлиддин паргорни ердан кўтарар экан:

— Йўқ, аксинча, бегим, сизнинг назарингиз тушган нақш янада яхшироқ чизилгай!

— Мен эшитдимки, мавлоно мусаввир ҳам эмишлар.

— Аслида меъморлар мусаввирлик санъатидан хабардор бўлмоқлари даркор.

— Ундоқ бўлса менинг суратимни чизиб кўринг!

Кутилмаган бу таклифдан чўчиган Мулла Фазлиддин атрофга аланглаб қаради. Тўрхонада бошқа ҳеч ким йўқ. Шундай бўлса ҳам овозини пасайтириб деди:

— Бажонидил чизар эдим..., Фақат...

¹ Чавгон — ҳозирги хоккей ўйинига ўхшайди. Фақат очиқ майдонда от миниб ўйналади.

² Паргор — циркуль.

— Хавотир олманг, мавлоно, мен сир сақлашга қодирмен!

— Агар мен чизган сўрат нариги дунёда жон талаб қилса, қайдан топурмен, бегим?

Мулла Фазлиддин бу сўзлар билан шариат сурат чизишни ман этганини, агар қўлга тушса жони хавф остида қолишини айтмоқчи эди. Хондоза бегим унинг очиқ айтолмаган фикрини тушунди-ю, жилмайди:

— Агар суратим учун сиздан жон талаб қилсалар, менга айтинг, мен ўз жонимни бергаймей!

...Мулла Фазлиддин пўлат сандиқда яшириб юрган суратни мана шу гаплардан кейин чизишга журъат этган эди. Шундан кейинги тўполонларда у Хонзода бегимни узоқ вақт учратолмай юрди.

Ниҳоят, бултур кузда мана шу Буратоққа Хонзода бегимнинг ўзи келиб қолди. Бобир Самарқандга кетишида ўз онаси ва эгачисига «Ушдаги ҳужрадин хабар олурсизлар», деб тайинлаб қўйган экан. Мезон ойида Ушга меҳмон бўлиб келган Хонзода бегим битта канизи билан Буратоққа чиқди. Мулла Фазлиддин ўша пайтда ёлғиз шогирди билан ишламоқда эди. Ҳар битта фиштни, ёғочни, ҳар бир кўза сувни пастдан олиб чиққусларича тинкалари қуриб кетарди. Мармар йўниб сангкорлик қилишга сангтарош йўқ. Сирланган кошин олишга пул йўқ. Бу ҳаммаси Мулла Фазлиддинни жуда қийиаб қўйган. Лекин бу мушкулотларни Хонзода бегимга қандоқ айтади? Бегимнинг марварид қадалган ипак тоқиси¹ дан тортиб уни қайрилган қизил этикласигача бутун борлифи шундай нафис кўринар, бу самовий гўзаллик олдида тош ва фиштдан гап очиш жуда эриш туюларди. Бироқ Хонзода бегим Мулла Фазлиддиндан бўлажак ҳужранинг режаси чизилган тарҳни сўраб олди. Қоғозга қараб туриб:

— Гумбазини кошин билан безатмоқчи бўлибсиз, кошинингиз етарликими? — деди.

Мулла Фазлиддин энди дардини айтишга мажбур бўлди. Бу қиз меъморлик санъатидан ҳам хабардор экан, анчагина китоб мутолаа қилган экан:

— Бобир мирзо зафар билан қайтсалар, худо раҳмати отамнинг ўша орзуларини рўёбга чиқарурлар, — деди. — Ўшанда яна ўзингиз бош бўлурсиз, мавлоно!

1. Тоқи — чўққисимон заифона бошқийим; тоғри кўришни кийиб

Дунёда ҳали ҳеч бир товуш Мулла Фазлиддинга бунчалик ёқимли туюлмаган эди. Хонзода бегим ҳар гал уни «мавлоно», деб улуғлаш билан гүё порлоқ бир истиқбол ваъда қилгандай бўларди. Подшоҳ оиласидан меъморчилик санъатини шунчалик биладиган, қадрлайдиган иттифоқдош топилгани Мулла Фазлиддиннинг кўнглини кўтарибгина қолмай, қалбida ғалати бир завқ ва дадиллик уйғотди.

У сирпанчиқ қоятошга кўтарилишдан кўра тушиш қийинлигини билар эди. Шунинг учун Хонзода бегимни пастга кузатиб туша бошлади. Ҳалқ «қилқўприк» деб ном қўйган тор ва хатарли тош сўқмоқдан ўтаётганларида Хонзода бегимнинг оёғидаги таги силлиқ чармдан тикилган этиги тойиб кетди. Хонзода бегим мувозанатини йўқотиб, ёнида бораётган канизига қўл чўзди. Аммо каниз ҳам зўрға келаётган эди, иккови баробар чайқалиб кетди. Каниз қўрқиб чинқириб юборди. Улар пастдаги чақир тошларга йиқилиб тушадиган бўлганда Мулла Фазлиддин олдинга сакраб ўтиб, икковини икки қўли билан қучоқлаб тутиб қолди. Ёшгина каниз қўрқанидан Мулла Фазлиддиннинг елкасига ёпишиб олди. Қийикдай чаққон Хонзода бегим йигитнинг елкасидан тутиб, ўзини тез ўнглади ва унга секин раҳмат айтди. Шу пайт Мулла Фазлиддин ўз юзида Хонзода бегимнинг қилиқ нафасини ҳис қилди. Қизнинг юзидами, лабларидами, гул атрига ўхшамайдиган, аммо ундан ҳам ёқимлироқ, сирлироқ бир ҳид бор эди. Мулла Фазлиддин шу ҳидни олди-ю, Хонзода бегимнинг шоҳ қизи эканлигини гүё унутди. Қизнинг салқин, юмшоқ қўлидан ушлаб нарёғи текис кетган сўқмоққа чиққунларича қўйиб юбормади. Беш-ўн қадамлик масофада оддий меъмор билан малика орасидаги фарқ гүё йўқолиб кетди, улар бир-бирларига фақат забардаст йигиту гўзал қиз бўлиб туюлдилар.

Лекин ундан нарида яна канизлар, жиловдорлар, савдарлар орага тушиб, Хонзода бегимни қуршаб олиб кетдилар. Мулла Фазлиддин ғалати бир туш кўриб уйғонган одамдай ҳайратланиб қолаверди.

Эртаси куни Хонзода бегим ёрдамга юборган иккита норғул йигит Мулла Фазлиддинга керакли юкларни пастдан ташиб чиқа бошлади. Орадан бир ҳафта ўтга, туяга ортилган кошинлар ҳам етиб келди. Хонзода бегим юбортирган ҳар бир нарсада Мулла Фазлиддин

унинг ўзиниң кўргандай бўларди. Пўлат сандиқдаги су-
ратни оқшомлари ёлғиз қолганда қўлига олиб узбек-
узоқ тикиларди. Қиз сирғаниб кетган мана шу тоғнинг
тошларидан Хонзода бегимнинг ўшандаги илиқ нафа-
си ва сирли ҳиди ҳамон келиб турганга ўхшарди. «На-
ҳотки бу муҳаббат бўлса? — дерди Мулла Фазлиддин
ўзига-ўзи. — Иўқ, зинҳор! Мендаги туйғу — беғараз
илоҳий бир меҳрнинг нишонаси, холос. Бошқача бўли-
ши мумкӣ эмас!»

Хозир яна Хонзода бегим яқинлашиб келаётганини
кўриб, саросимага тушиб қолган Мулла Фазлиддин ўзи-
ниң мана шу эътиқодида маҳкам туришга тиришар ва
аёллар томондан нигоҳини олиб қочарди.

3

Бобир мирзо отдан тушганда бўйи ўсиб, катта йи-
гитларга кенглашиб қолғани билинди. Қадам олиши ҳам
хийла салмоқли. Тахтга ўтирганидан бери ўтган сўнгги
уч йил ўни жуда тез улғайтирган, кўз қарашлари кўпни
кўрган одамларникидай вазмин. Фақат хипча қомати ва
ҳали унча тўлишмаган елкалари энди ўн беш ёшга кир-
ганини эслатиб турарди.

Аммо тоққа чиқишида Бобирнинг ўсмирлиги жуда иш-
бердий. У ҳаммадан олдинда тошдан-тошга енгил кўта-
рилиб борар, гоҳ онасига, гоҳ опасига юқоридан қўл чў-
шиб ёрдамлашиб қўярди.

Беклар ва мулоғимларнинг кўпчилиги пастда қолиши-
ди. Иўл тор, ҳужра кичкина бўлганлиги учун ҳозир би-
ринчи навбатда подшоҳ оиласи ва Бобирга энг яқин
киши бўлган эшик оға Қосимбек чиқишмоқда эди. Қав-
чин уруғидан чиққан Қосимбек тўладан келган барваста
киши эди, тоғнинг ярмига чиққунча нафаси бўғилиб,
қийналиб қолди. Бобир буни кўриб, текисроқ бир тош
устида тўхтади. Қосимбек ҳам тўхтаб, орқада келаётган
Мулла Фазлиддинга юзланди:

— Жаноби меъмор, бу тошлардан ҳинапоя тара-
лаш хотираларига келмабдир-да.

Мулла Фазлиддин пастроқда тўхтаб қўл қовуш-
тириди-ю, енгил бир таъзим билан жавоб берди:

— Агар зоти олий амр берсалар, ҳинапоя тараашлаш
имкони бор.

Қосимбек юқорига юз ўғириб, Бобирга савол назари билан қаради. Бобир кулимсираб:

— Ажабо! — деди энди йўғонлаша бошлаган ўсмир овози билан. — Тот чўққисига ҳам зинапоя билан чиқурларми?

Соддароқ одам бўлган Қосимбек таклифи ўринсиз чиққанини сезди-ю, иззат-нафсга бормай, гапни кулгига бурди.

— Амирзодам лутф қилдилар. Каминани бу терлаб ҳансирашлардан зинапоя ҳам қутқаролмас эди.

Энди Қутлуғ Нигор хоним ҳам кулди:

— Қосимбек жаноблари ҳақлар. От-улов ўтолмайдиган бу чўққиларга шоҳ ҳам пиёда чиқур, малика ҳам!

— Ҳатто, хонзодалар ҳам! — деб Бобир опасига қараб шўх кулимсиради.

Шунаقا ҳазил-ҳузуллар билан ҳужрага етиб бордилар. Нилий гумбазли жажжи бино кўклам қуёшида шундай нафис жилоланиб кўриндики, Бобирнинг дили бирдан равшан тортиб кетди.

Атрофдаги табиатнинг гўзаллиги, баҳор ва тоғлар айвонга ишлатилган нақшларни, гумбаздаги кошинлар рангини алланечук жуда очиб кўрсатар эди.

Қосимбек Бобирни, унинг онаси ва опасини тавозе билан ичкарига кузатиб қўйди-ю, ўзи мармар зинапоя олдида қўл қовуштирганича қолди. У аёллар бор жойга подшоҳдан ишора бўлмагунча кирмас эди.

Мулла Фазлидин Қосимбекдан берироқقا — айвон тагига келиб турди.

Ҳужра эшиги ёнгоқ ёғочидан ўймакор қилиб, зар билан ишланган эди. Бобир гўзал ўймакорликларга, девор ва шифт безакларига бир-бир кўз ташлаб чиқди-да, ҳужранинг эшигини очди. Онаси билан опасига йўл бериб, кейин ўзи ичкарига кирди.

Ҳужранинг ичи қоронги бўлмаса ҳам қоидага биноан гарб томонидаги меҳробга шам ёқиб қўйилган эди. Кундузги ёруғлик қаршисида кўзга зўрга ташланаётган шам ёғуси ён-веридаги гулгун нақшларга тушиб, элас-элас жилваланарди.

Бу ҳаммаси Бобирда ғалати бир завқ уйғотди. У шам ёнидаги тўқ қизил нақшларни Хонзода бегимга кўрсатиб:

— Ислими гулхан шуми? — деб сўради.

Хонзода бегим бир укасига, бир нақшга қаради-ю.
шўх жилмайди:

— Бир қошиқ қонимдан кечсангиз айтурмен.

Бобир ҳам кулимсираб:

— Кечдим, айтингиз,— деди.

Хонзода бегим ўнгга қайрилиб, эшик тепасидаги қип-
қизил нақшларни кўрсатди:

— Ислими гулхан мана бу. Сиз нақши лолани бунга
ўхшатмишиз, амирзодам.

Хонзода бегим кўрсатган нақшлар ҳақиқатан қип-
қизил олов тилларини эслатар, унинг эшик тепасига
нақшланиши ҳам бежиз эмас эди. «Келувчига эргашган
бало-қазони олов олиб қолади»,— деган қадимий эъти-
қод ва келин-куёвни эшик олдига ёқилган оловдан ай-
лантириб олиб ўтиш одатларй Бобирнинг эсига тушди.
У опасига тан берган каби қараб:

— Сиз ҳақсиз, мен саҳв қилибмен,— деди.

Шунда Қутлуғ Нигор хоним гап қўшди:

— Бобир мирзонинг саҳвлари узрлик. Чунки бу ҳуж-
рада нақши лола ҳам худди гулхандек ёниб кўринур!

Онасининг лутф қилиб айтган сўzlари Бобирнинг
ҳужрадан олган завқини яна бир даража ошириди.

Учовлари айвонга қайтиб чиқар эканлар, пастда тур-
ган Мулла Фазлиддин Бобирнинг чеҳраси очилиб кетга-
нини кўрди. Бобир зинапоя олдида турган Қосимбекка
қараб:

— Буратоққа жуда муносиб!— деб қўйди.

Буратоғни Бобир ёшлигидан яхши кўрар эди. Текис
водийнинг ўртасига тушган бу баланд тоф одамларни
ҳайратлантириш учун яратилганга ўхшарди. Гўё уулкан
тогнинг бир парчасини илоҳий бир куч шундай кўтариб
олиб келгану томоша учун сайҳон жойга чиройли қилиб
ўрнатиб кетган. Мана шундай тоқقا муносиб бўлиш
ҳужра учун жуда катта шараф эканини сезган Қосим-
бек бир четда қўл қовуштириб, сукут сақлаб турган меъ-
морни чақирди.

Бобир подшоҳ бўлгандан бери ўз кўнглидан чиқариб
қурдирган биринчи иморати жуда кичик бўлса ҳам унга
азиз ва ғанимат туюлди. Бу ҳужра тоф қиррасида шун-
дай жозиба билан узоқ вақт турини истаб, меъморга
савол назари билан қаради:

— Тоғда қор-ёмғирлар кўп бўлур. Ҳужра узоқ вақтга
бардош берурмикни?

Айвонда турган Қутлуғ Нигор хоним билан Ҳонзода бегим ҳам меъморга кўз тикишди. Мулла Фазлиддин ҳаяжонланганидан тиззалари букилиб-букилиб кетмоқда эди. У қўлини таъзим билан кўксига қўйиб:

— Иншоолло, бардош берур,— деди, Қосимбек унинг гапини тасдиқлаб:

— Ҳа, қирқ-эллик йил яхши турур,— деб қўйди.

«Қирқ-эллик» йил деган сўзлар Мулла Фазлиддинга озор бергани унинг Қосимбекка қисқа бир кўз ташлаб қўйганидан сезилди. Шу пайт Мулла Фазлиддин ўз юзиға кимнингдир майн нигоҳи тушганини ҳис қилди. Бошини кўтарса, Ҳонзода бегим юзига ёпилган юпқа оқ ҳарир парда орқали Мулла Фазлиддинга қараб турибди. Мулла Фазлиддининг бутун вужуди олов сели ичада қолгандай бўлди. У ҳозир сири фош бўлиши мумкинлигини сезиб, яна таъзимга бош эгди. Шунда Ҳонзода бегим Бобирга изоҳ берди:

— Амирзодам, худо ҳоҳласа, бу ҳужра кўп авлодларни кўргай. Қаранг, қор-ёмғир тегадиган жойлари сангкорлик қилинган. Пойдевори қоятошга маҳкам ўрнатилган. Мулла Фазлиддиннинг маҳоратлари баланд — Ҳирот билан Самарқанд меъморларидан таълим олмишлар.

Мулла Фазлиддин Ҳонзода бегимнинг мақтовини ишга оид оддий гаплардек қабул қилмаса, кўнглидаги нозик ҳисларни сездириб қўйса, ўн жонидан бири ҳам омон қолмаслигини сезди. Ахир жўн бир меъморнинг шоҳ қизига муҳаббати подшоҳ оиласига ҳам, унинг бекларига ҳам ҳақоратдай туюлиши мумкин!

Хайриятки, ҳукмдорлар олдида ҳаяжонга тушиш ва таъзим қилиш одат тусига кириб қолган. Мулла Фазлиддин Ҳонзода бегимнинг илиқ сўзларига жавобан яна бир таъзим қилди-да, ерга қараб, худди қиличининг тифи устидан юриб бораётгандай эҳтиёт бўлиб гапира бошлади:

— Ҳазрати олийга арзим шулки, Самарқандда Улубек мадрасасининг деворлари учун қандай ганчу гилмоя, ғишту кошин ишлатилган бўлса, бу ҳужранинг деворларига ҳам фақир шуларни ишлатмишмен. Худодан умидим бор: Бобир мирзонинг муборак номларига мансуб бу ҳужра асрлар давомида мустаҳкам турур¹.

¹ Чиндан ҳам Ўшдаги бу ҳужра тўрт юз эллик йилдан ортиқ умр кўрди. Асрлар ўтиши билан унинг гумбазидаги кошинилар кўчиб тушди, ичидаги нақшлари ўчиб кетиб, қайтадан қўмсувоқ қилинди, би-

Бобир бу сўзлардан таъсирланиб:

— Айтганингиз келсин,— деди.— Ҳужра биз истага·
нимиздан ҳам яхши!

Қосимбек «қирқ-эллик йил турар», деб ҳужранинг
умрини қисқа қилиб қўйганидан энди хижолат бўлди.
Ҳужрадан нарида харсанг тош ортида буйруқ кутиб
турган савдарбошига бир қараб олди-дә, кейин меъмор-
га ўгирилди:

— Офарин сизга, Мулла Фазлиддин!

Бобир Қосимбекнинг гапини тўғрилаб:

— Мавлоно Фазлиддин!— деди.

Шу билан меъморга мўътабар мавлонолик унвони
берилгандай бўлди. Қосимбек подшоҳнинг олдида бир
иша марта устма-уст саҳв қилганини бир ҳаракат билан
тўғрилагиси келди-ю, савдарбошига буюрди:

— Мавлонога тўён келтирилсин!

Савдарбоши саросима бўлиб пастга қаради. Мукофот
учун олиб юриладиган тўнлар тоф этагидаги чодирларда
қолган эди. Қосимбек буни сезди-ю, ўзининг эгнидаги
янги кимхоб тўнни ечмоқчи бўлиб:

— Мирзо ҳазратлари, ижозат беринг!— деди. Бобир
унинг жўмардлигига тан бергандек жилмайиб бош ир-
ғади.

Қосимбек зар ёқали кимхоб тўнини ечиб, Мулла Фаз-
лиддиннинг елкасига ташлади.

— Мавлонога биздан битта от анжоми билан инъом
қилинсин,— қўшимча қилди Бобир.

Мулла Фазлиддин таъзимга эгилиб миннатдорчилик
билдирав экан, бир неча кишининг:

— Муборак! Муборак!— деган сўзларини эшитди.

Бу сўзларнинг орасида энг ёқимлиси — Хонзода бе-
гимнинг муборакбоди бўлди. Мавлоно Фазлиддин унга
иккинчи марта қарашга журъат этолмай ерга кўз тикиб

ровлар рангдор мармарларини кўчириб кетиб, пичоқларига даста қил-
диришди. Ҳужранинг ўзини эса тамагир шайхлар «Сулаймон пайғам-
бар томонидан қурилган қадамжо», деб эълон қилдилар. Оми одам-
ларнинг анчасини бунга ишонтириб, кўп йиллар давомида мўмай
наэр-ниёз ундиридиш. Совет олимлари тарихий ҳақиқатни тиклаб, бу
ҳужрани ёш Бобир қурдирганини айтиб чиқдилар, унинг, пештоқига
буни билдирадиган ёдгорлик лавҳа осиб қўйдилар. Аммо ўжар шайх-
лар бу ерни «тахти Сулаймон» деб аташда давом этдилар. Шундан
сўнг орага бошқа англашилмовчиликлар ҳам қўшилиб, бу ҳужра
1963 йилда бузиб ташланди. Ҳозир фақат пойдевори бутун ту-
рибди.

турган бўлса ҳам шу дақиқаларда ўзини баҳтиёр сезар эди.

4

Кечки пайт ҳужрада Бобирнинг ёлғиз ўзи қолди. Қосимбек керакли одамларга «ҳужра — мирзо Ҳазратлари нинг хилватдоҳлари бўлди, кечаси ҳам ўша жойда туна-мәқлари мумкин», деб билдириб қўйди. Қўрчилар Бобирнинг кўзига ташланмасликка тиришиб, ҳужранинг орқа томонида қўриқчилик қила бошладилар.

Доимо кўпчиликнинг диққат марказида бўлиш ва подшоҳнинг ҳар бир гапи, ҳар бир ҳаракати кимнингдир тақдирiga таъсир қилишини унотолмай ҳамйаша ҳийрак ва эҳтиёткор туриш Бобирни жуда сиқилтирас ҳади. Еш танаси әркин бўлишни, оддий тенгдошлари қаби очиқ-соғиқ яйраб юришни қўмсанади. Ҳозир у ҳужра ичка-рисиға тўшалган беқасам кўрпачалар устига чиқиб бошига ёстиқ қўймасдан бирпас чалқанча ётди. Кейин ағанаб юзтубан бўлди-да, энгагини кафтига тираб, девордаги нақшларга тикилди. Куни бўйи отда юриб толиқ-қан бўлса ҳам дам олиб ётгиси келмас эди. Урнидан сакраб туриб, бир-икки марта қулочини ёзиб керишиди, эснади. Сўнг айвонга чиқди-да, яна атрофни томоша қила бошлади.

Тўрт томоннинг ҳаммаси баҳор нафосатига тўла. Ҳаво мусаффо бўлгани учун пастда ёқилаётган оловнинг туруни ҳам одатдагидан тиниқроқ қўринади. Охири қорли тоғлар билан туташиб кетган водийнинг кўз илғаган ҳамма жойи кўкаламзор. Бир ёғида Ўзгант, бир ёғида Марғилон, узоқларда Исфара, Хўжанд, Косон ва Аҳси — бу ўрчин¹ларнинг ҳаммасида боғ-роғлар чаман бўлиб туллаганини Бобир гўё хаёл кўзи билан кўриб турибди. Улуғвор тоғлар афсонавий қалъа деворларидек атрофни ўраб турган бу гўзал водий ҳозир аввалгидан хийла осуда. Уруш тугаганига икки йилдан ошли.

Бундай тинч, масъуд дамларда уни қофоз-қалам ўзига тортарди. Савдарлар ҳужрага олти оёқлик миз² келтириб қўшишган. Бобир миз ёнига — беқасам кўрпача устига ўтириб «Вақоиъ» деб атаган хотира дафтарини

¹ Ўрчин — ҳозирги «район» тушунчасига тўғри келади.

² Миз — олти оёқлик столча.

очди. Сўнгги ёзувлари — ўзи яқинда кўрган Конибодом ва Исфара ҳақида эди. Энди бу ёзувларини давом эттириб, Уш тўғрисида бита бошлади: «Уш қасобаси Андижондан тўрт ийғоч йўлдур... Боратоғнинг тумишүғида тарих тўққиз юз иккода¹ мен бир айвонлик ҳужра солдим. Бу ҳужра бисъёр яхши воқеъ бўлибдур. Тамом шаҳар ва маҳалла оёғ остидадур...»

Бобир Ўшнинг бинафшаси, лолалари, оқар сувлари, оқ мавжли қизил тошлари ҳақида ҳам берилиб ёзаётган эди, бирдан Қосимбек эшик оғзида пайдо бўлди:

— Амирзодам, хаёлингизни бўлсам маъзур тутинг. Бухородан — Султон Али мирзодан мактуб келмишдир!

Бобирдан ишора бўлгач, Қосимбек ичкарига кириб, ўрам қилинган олтин боғичли мактубни Бобирга узатди. Бобир мактубни очиб ўқиди-ю:

— Султон Али мирзо бизни Самарқанд юришига чорлабдир,— деди.

— Битим тузган эдингиз-да, амирзодам. Сафарга чиқмоқ керак.

— Ошиқманг, бек. Аввал онам ҳазратларининг ризолигини олайлик.

Бобир ҳар муҳим ишда онасидан маслаҳат сўраши Қосимбекка унча ёқмас эди. Чунки аёллар жанг жадалдан жуда безган эдилар. Жанговар беклар эса урушсиз ўрса қиличлари занглаб қоладигандек бетоқат бўлишади.

Қосимбек Қутлуғ Нигор хонимнинг чодирига Бобир билан бирга тушиб борди.

Хонзода бегим ҳам онасининг ҳузурида ўтирган экан. Улар Бобир учун дастурхон ёздириб, олтин лаганда кабоб келтирдилар. Қабодан сўнг қимиз ичилди: Қосимбек мўйловига теккан қимиз юқини кафти билан артиб сўз бошлади:

— Амирзодам Султон Али мирзо билан иттироқ тузганилар. Бу ердан черик тортиб бормоқقا сўз берганмиз.

— Тангрим бизни фараҳли кунларга етказди,— деди Қутлуғ Нигор хоним.— Энди шуни ғанимат билайлик, жаноб Қосимбек. Султон Али мирзо ўз оғаси Бойсунқур мирзо билан Самарқанд тахтини талашурлар. Бобир мирзо улардан баланд турмоқлари керак. Тангрига шукур, амирзодамнинг Андижонда ўз тахтлари бор.

¹ Милодий 1497 йил.

Қосимбек бу сўзларга тезда жавоб тополмай тарад-
дудланиб қолди. Шунда Хонзода бегим гапга аралаши:

— Амирзодам, Самарқанд юришининг сарфу харо-
жатига Андижонда саройлар, мадрасалар қурсангиз
бўлур. Андижон ҳам Самарқанддек сайқали рўйи замин
бўлса, номингиз Улугбек мирзонинг номидек шуҳрат
қозонса — биз муштипарларингизнинг орзуимиз шу!

Бобир ҳазиломуз кулимсиради: •

— Мен аввал Самарқанд сайқалини бир кўрмоқчи-
мен. Ибрат олсак, ундан сўнг олурмиз.

Қосимбек Бобирнинг сўзларини ёқтириб:

— Лутф қилдингиз, амирзодам! — деб қўйди.

— Лекин амирзодам Самарқандни ўшликларида кўр-
ганлар,— деб эътиroz қилди Қутлуғ Нигор хоним.

— Беш ёшимда кўрганим ёдимда унча қолмабдир.
Хонзода бегим кулди:

— Бултур Самарқанд азимати билан кетиб бизни кўп
соғинтирган эдингиз-ку?

Бобир бултурги муваффақиятсиз юришини эслаб
жиддийлашди:

— Рост, бултур тўрт ой Самарқанд атрофиини кездик.
Аммо шаҳар дарбозалари биз учун бирон марта очил-
мади. Биз бобокалонимизнинг пойтахтини кўришга му-
носиб эмас эмишмиз!

Бобир бу сўзларни шундай куюниб, алами келгани-
ни яширолмай лаблари титраб айтдики, унинг ҳали ҳам
жуда ёш эканлиги бирдан билиниб қолди. Ҳолбуки, у
Самарқандга қўшин тортиб борган, агар шаҳарга кирса
тахтга ўтириши керак эди. Тўғри, Бойсунқур мирзо ҳам
темурийлар авлодидан эди, яна тагин Бобирдан беш ёш
кatta эди, демак, тахтда ўлтириши қонуний эди. Бироқ
Андижон беклари Бойсунқур мирзодан юз хил камчилик
топиб, уни ҳамиша ёмонлаб гапиришар ва Самарқанд
тахтига фақат Бобирни муносиб кўришар эди. Бойсун-
қур мирзо буни билганилиги учун Бобирни Самарқандга
йўлатмас эди. Мабодо Бобир шаҳарга қўшинисиз шун-
чайин пойтахтни кўриш учун кирадиган бўлса, Бойсунқур
мирзо уни туттириб, йўқ қилиб юбориши мумкин эди.
Чунки орадаги тахт талаши ва бекларнинг адовати улар-
ни бир-бирларига душман қилиб қўйган эди.

Қутлуғ Нигор хоним энди ўн беш ёшга кирган ўғли-
нинг бу талашлар ва адватларга аралашмасдан, ўз
мулкида осойишта ҳукм суришини истарди. У Бобирнинг

аламдан ўзгариб кетган юзига оналарча қайшиш қара-
ди-ю, унга жони дилини бергиси келиб гапирди:

— Бобиржон, сўзимга ишонинг, бу беш кунлик дунё
сизнинг куюнишингизга арзимайдир!

Онаси ўғлини подшоҳ бўлмасидан олдинги номи билан атаб, меҳри товланиб гапиргани Бобирга жуда ёқимли туялди. Бир лаҳза у ўзини меҳрибон бир онанинг беғам, беташвиш бўталоқ ўғлидек сезди-ю, елкасидаги катта юк ерга тушгандек енгил тортди.

— Вақти соати келур, Самарқанд орзусига ҳам етишурсиз,— деб давом этди Қутлуғ Нигор хоним.— Бироқ ҳозир раият осойишта умр кўришга муштоқ. Қанотингиз остида Қосимбекдек тадбиркор амиру умаронгиз бор. Мана шу Ўшдаги ҳужрани қурган меъмордек ҳунарпешалар сизнинг хизматингизда. Энди онангиз сиздан илтимос қилур: Самарқанд муҳрабасини беш олти йилга кечикитирсангиз. Барчамизга бош бўлиб, водийни обод қилсангиз, Андижонда, Марғилонда, Ўшда катта обидалар қурсангиз!

Қутлуғ Нигор хоним подшоҳ ўғлига кўпдан бери бунчалик жиддий, бунчалик қатъий илтимос билан мурожаат қилмаган эди. Қосимбек ерга қараб сукутга кетди. Бобир ҳам бир лаҳза дастурхон четида олтин жомда қизғиши кўринаётган қимизга кўз тикиб жим қолди. Умумий сукунатда Хонзода бегимнинг нафис, тиниқ овози эшитилди:

— Амирзодам, сиз Навоийнинг достонларини ёд билурсиз. Фарҳод қандай ажиб бинолар қурганини бир эсланг. Мен бир мунглиқ эгачингиз доим орзу қилурмен: сиз ҳам Фарҳоддек бунёдкор бўлингиз! Дунёда бундан улуғ, бундан савобли иш йўқ!

Бобир Ўшда ўзи қурдирган кичик бир ҳужрадан бугун қанчалик завқ олганини эслади-ю, онаси билан опасининг тилакларини қўллаб-қувватлагиси келди. Аммо у бундай муҳим давлат ишларини бир ўзи ҳал қилолмаслигини ҳам билар эди. Бобир Қосимбекка кўмак сўраган каби қараб:

— Чораси топилурмикиш?— деди.

Гап Самарқанд юришини қолдириш ҳақида эканини Қосимбек сезди. Асли ҳарбий одам бўлган ва жуда кўп жангу жадалларда қатишган Қосимбек Бобир истаган чора топилмаслигини ич-ичидан сезиб турарди. Чунки Самарқанд юриши ҳамма нуфузли бекларнинг машва-

ратида маъқулланган, тайёрлик ишлари аллақачон бошлаб юборилган. Катта бир тўсиқдан ўтиш учун бутун кучи билан сакраётган отни бирдан тўхтатиб бўлмайди, мабодо зўр билан тўхтатилганда ҳам от йиқилиши, ча вандозини ерга улоқтириши мумкин. Қосимбек буни очиқ ётишга журъат этолмади-ю, қўлини кўксига қўйиб:

— Амирзодам, қулингиз чора топишдан ожизман,— деди. Бу жавоб Бобирга оғир ботди:

— Онамнинг илтимосларини рад этайликми?

Бобир бу сўзларни шундай зарда қилиб айтдикки, Қосимбек унинг ҳозир онаси ва опаси айтган ишларни қилигиси келиб турганини аниқ сезди. Сўнг у Бобирнинг ўечагина Самарқанд юришига тарафдор бўлиб, жангларда қатнашиш иштиёқида ёниб айтган сўзларини эслади-ю, ичиди фижиниб қўйди. Бобирдаги бу ўзгарувчанликни Қосимбек ёшлик гўрлигидан кўрар, хусусан, бундай мураккаб давлат ишларида аёлларнинг гапига киришни катта бир заифлик белгиси деб биларди. Аммо Қосимбек Қутлуғ Нигор хоним билан ҳам ҳисоблашишга мажбур, чунки ёш подшоҳга онасининг таъсири кучли эканини ўз кўзи билан кўрмоқда эди.

— Хоним ҳазратларининг илтимослари менга тожи сар бўлсин,— деди Қосимбек чўккараб ўтирган қўйича бош эгиб.— Қулингиз айтмоқчименким, бундай муҳим ишда барча нуфузли бекларнинг ризолигини олмасак бўлмас.

Подшоҳ оиласи Қосимбекка алоҳида эҳтиром билдириганда унинг номига «амирлар амири» деган унвонни қўшиб айтар эди. Ҳозир ҳам Қутлуғ Нигор хоним:

— Жаноби амирул умаро,— деди унга.— Сиз бошқа бекларнинг ризолигини олишда Бобир мирзога кўмак берурмисиз?

— Жоним билан! Аммо бекларнинг баъзи андешаларидан фақир хабардормен... Густохлик саналмаса айтай.

— Айтингиз,— деди Бобир.

Қосимбек ерга қараб, бир лаҳза ўй сурди, ҳали оқ тушмаган ғайир қўнғиртоб соқолининг учлари сақарлот чакманинг заррин ёқасига тегиб, қайрилди. Ниҳоят Қосимбек бошини кўтариб Бобирга қаради-ю, Самарқанддаги улуғ обидалар улкан бир давлатнинг кучи ва

¹ Сақарлот чакманинг заррин ёқасига тегиб, қайрилди. Ниҳоят Қосимбек бошини кўтариб Бобирга қаради-ю, Самарқанддаги улуғ обидалар улкан бир давлатнинг кучи ва

бутун вилоятларнинг иштироки билан қурилганини, ҳозир ўша ягона давлат парчаланиб кетганини, Фарғона катта водий бўлса ҳам, аммо Мовароуннаҳрнинг фақат бир қисми эканини гапира бошлади. Ўнинг нима демоқчи эканини сезган Хонзода бегим истеҳзоли жилмайиб сўради:

— Жаноби амирул умаро, Андижонда обидалар қуришга кучимиз етмайди, демоқчимисиз?

— Олий насаб бегим, сиз Самарқандек улуғ шаҳар қуриш ҳақида сўз очдингиз. Беклар айтурларки улуғ шаҳар бунёд этмоқ учун яна ўша улуғ давлатни тикламоқ керак. Бутун вилоятларнинг кучини бир жойга йифмоқ керак. Ҳозирги парокандалик улуғ қурилишлар қилишга имкон бермагай.

Қосимбекниңг бу гаплари Бобирга жуда мантиқли туюлди. У онасига қараб бундан ҳам мантиқлироқ бир сўз кутди.

— Жаноб Қосимбек улуғ обидаларни фақат Амир Темурдек соҳибқиронларгина қурган эмас,— деди Қутлуғ Нигор хоним.— Ҳиротда Алишербек Ихлосия, Унсия отлиқ бинолар қурмишлар. Бобир мирзонинг ҳокимиятлари Алишербекининг ҳокимиятларича эмасми? Ахир Алишербек бир тоҷдорнинг мусоҳиби¹ бўлсалар, Бобир мирзо мустақил давлатнинг подшосилар-ку!

Қутлуғ Нигор хонимниңг бу сўзлари Бобирнинг қалбida чўкиб ётган энг ўтли истакларини юзага қалқитиб чиқаргандай бўлди. Ўнинг ёшлиқ эҳтироси билан қалбига тугиб юрган энг кучли орзуси — жангларда катта ғалабаларга эришиб ёки ажойиб шеърлар, достонлар ёзиб эл оғзига тушиш, сўнг Навоийдек улуғ одамларга ташлиш ва уларнинг маҳсус эътиборларига сазовор бўлиш эди. Етти ой овора бўлиб Самарқандни ололмай келганидан кейин жангларда катта ғалабаларга эришиш ҳали ушалмайдиган бир орзу эканига унинг кўзи етиб қолди. Улуғ шоир бўлиш орзуси ҳам қўл етмас бир баландликда учиб юрган баҳт қушига ўхшайди, Бобир уни тутишга ҳали кучи етмаслигини сезади. Аммо ҳозир онаси Навоий қурган иморатларни тилга олиши билан Бобирни ўша ўтли орзусига етказадиган бошқа бир йўл «ялт» этиб кўзига кўриниб кетди. Навоий қурган Ихлосия ва Унсияларнинг шуҳрати оғиздан-оғизга ўтиб, Фарғона

¹ Мусоҳибни — яқин суҳбатдоши, дўсти.

водийсига ётиб кёлған экан, энди бу ерда ўн беш ёшлиқ подшоҳ ўшанақа обидалар қурдирса, овозаси Ҳиротга ҳам етиб бормасмикин? Кейин, эҳтимол, Навоий ҳам буни эшитар, Бобирнинг кимлигини сўраб билар, уни орқаворатдан таниб қолар. Кейин балки Бобир Ҳиротга борар ёки Навоий ўзи бу томонларга келишни ихтиёр қиласар. Навоий Ҳусайн Бойқаронинг саройидан безиб юрганини Бобир ҳам эшишган эди. Балки улуғ шоир Хуросондан Фарғона водийсига келиб, ёш Бобирга мураббий бўлар. Ўйи шу ерга етганда Бобир жуда ҳаяжонланиб кетди. Қўзлари ёниб, Қосимбекка қаради-ю:

— Онам ҳақлар,— деди.— Бекларни кўндиromoқ керак!

Бобирнинг сўнгги сўзи фармондек эшишилди-ю, Қутлуғ Нигор хоним билан Хонзода бегимнинг чеҳралари очилиб кетди. Улар, «Қосимбек энди енгилди», деб ўйладилар. Аммо улкан гавдали Қосимбек ўзининг кенг елкалари ортида зўр беклар турганини ҳис қилгандай ҳамон таслим бўлmas эди.

— Амирзодам, фармойишингизни адо этишдан олдин бекларнинг яна бир андешасини айтишга рухсат этинг.

Бобир истар-истамас бош иргаб, рухсат берга бўлди. Қосимбек лабларини ёпиб турган узун қўнғир мўйловини қўли билан икки ёнга сурди-да, кулимсираб Хонзода бегимга қаради:

— Бегим, сиз амирзодамни Фарҳодга яхши қиёс қилдингиз. Бекларимиз замон Фарҳодининг хизматида бўлишдан ифтихор қилурлар. Бизнинг орзуимиз — Фарҳодимизни ўз Ширинларига етказишдир. Аммо,— деб Қосимбек бирдан жиддийлашди,—маълумингизким, бизнинг Ширин бугун Самарқандда ёғий қуршовида асира каби изтироб чекмоқдалар.

Бобирнинг юзига нафис қизиллик югорди. У уялганини сездиргиси келмай, бошини эгди-ю, ўз тиззаларига кўз тикди.

Қосимбек жуда мушкул ва нозик бир гапни қўзғаган эди. Бобир беш ёшлигида унга Самарқанд подшоси Султон Аҳмад мирзонинг ўртанча қизи Ойиша бегимни унаштириб қўйишган эди. Ҳозир шу қиз ўн уч ёшга кирган. Бобир уни яқин йилларда кўрган эмас, аммо кўрганлар ҳаммаси Ойиша бегимнинг ғунчадек гўзаллигини мақтаб келганини эшишган. Ўша гўзал қизча Бобирни

Ўз најоткорини кутгандай кутади,—буни ҳам Бобирга келиб айтувчилар бор. Бобир ҳам ўзининг маликасига қаҳрамонликлар кўрсатиб етишишни истайди. У Ойиша бегимнинг ўзини эслолмаса ҳам беш ёшида Султон Аҳмад мирзога узатилган термизлик гўзал бир келинчакни яқиндан кўргани ёди.

«Бет очар» деган одатга биноан, ёш келинчакнинг юзидағи пардасини пок нафасли ёш бола очиши керак эди. Уша кунларда Қутлуғ Нигор хоним беш ёшли жажжи ўғли Бобирни Самарқандга тўйга олиб борган эди. Султон Аҳмад мирзонинг ўғли йўқ эди, Бобирга подшоҳ оиласи ҳавас билан қарап эди. Шунинг учун кайвонилар «янги тушган келин ҳам мана шу шердек ўғил кўрсинлар», дейишиб, бет очишга Бобирни муносиб топдилар. Бу ҳодисанинг кўп тафсилотлари Бобирнинг хотирасида қолмаган. Аммо олтин қўшиб тўқилган ҳарир оқ пардан келинчакнинг юзидан олганда бутун борлигини ниҳоятда ёқимли бир туйғу чулғаб олгани ҳеч эсидан чиқмайди. Бу — гўзаллик туйғуси эканини у энди билади. Термизлик келинчак ақлни шоширадиган даражада кўҳли бўлганига беш яшар боланинг фаҳми етмаган бўлса ҳам, аммо гўдак қалби афсонавий бир жозибадан тўлқинлангани ёдида қолган. Шунинг учун ҳозир унга Самарқанддаги қайлигининг ҳуснини мақтаганларида, ўша келинчак эсига тушади. Бошқа тафсилотлар ўқиган китобларидаги гўзаллар тасвиридан олиб қўшилади. Бобир Самарқанддаги қайлигини ўсмирларча бир софлик билан ғойибона севади. Мана шу севгилиси бугун Бобирнинг душманлари асоратида экан, у Андижонда бамайлихотир юра olandimi?

— Жаноб Қосимбек,— деди Қутлуғ Нигор хоним,— келинимизнинг тақдири бизни ҳам изтиробга солур. Биз оналаридан илтимос қилиб китобат юборган эдикки, Ойиша бегимни Тошкентга әгачилари Робия бегим ҳузурига жўнатсинлар. Эҳтимол, шу илтимосимиз бажо келтирилгандир?

Қосимбек маъюс бош эгиг:

— Афсус, хоним ҳазратлари, афсус!— деди.— Қулингиз Самарқанддаги хуфялардан келган бир хабарни амирзодамга кўрсатишдан тортинган эдим. Сизларни ҳам хавотирлантирмоқчи эмас эдим...

— Нима хабар? Тинчликми?— хавотирланиб сўради Бобирнинг онаси.

— Ойиша бегим оналарни ю, опалари билан бирга Тошкентга яширинча кетмоқчи бўлганларида Бойсунқур мирзо билиб қолиб, монелик қилмишdir. Ёйийлик мақомида дурушт гаплар айтмишdir. Уйлари атрофига одам қўймишлар. Ҳовлиларидан чиқармас эмишлар. Асиralар энди бутун нажотни Андижондан кутар эмишлар!

Сўнгги сўзлар Бобирнинг бутун вужудини зирқиришиб ўтди. Унинг қаллиғига қўпол гапириб, бечорани асирадек азоблаётган Бойсунқур мирзо шундай ғазабини келтирдики; өртагаёқ унинг устига қўшин тортиб, бостириб бориш ва қайлигини асоратдан қутқариш истаги Бобирнинг қалбидаги бошқа ҳамма истакларни босиб кета бошлади.

Хонзода бегим укасидаги ўзгаришни сезиб:

— Амирзодам илоҳо асиirlарни қутқариш сизга тезроқ насиб бўлсин! — деди. — Аммо нажотни фақат жангу жадал келтирурмиккин? Заифа эгачингизнинг эътиқодим шулки, қон тўкилса, адоват кучайор. Бойсунқур мирзо асиralарга баттар ўчакишур. Нажот урушда эмас, амирзодам, нажот — сулҳда!

Бегим ҳаяжонланиб айтган бу сўзлар Бобирнинг кўнглида қўэзгалган бояги ғазабни анча пасайтириди. «Сулҳ» сўзи қалбига илиқ туюлди.

Хоним дарҳол қизининг гапини қувватлаб, ўғлига юзланди:

— Бойсунқур мирзога элчи юборингиз, амирзодам! Орадаги адоватни йўқотингиз!

— Бойсунқур мирзо зўравонлик қилсин! Мен мўминларга бош эгиб элчи юборай!

Бобир бу гапларни айтар экан, унинг зўрликка зарбга зарб билан жавоб берниш истаги нақадар кучли эканлиги ҳаммага сезилди. Қосимбек ундаги бу истакни қўллаб-қувватлашга тушди:

— Хоним ҳазратлари, ҳозирги замонда зўравонлика мўминлик мутлақо рост келмас. Зўрлар орасида зўр бўлмоқ керак! Алҳол Шайбонийхон Самарқандга шимолдан кўз тикмишdir. Ҳисор ҳукмдори Ҳисравшоҳ илож топса, Самарқандга жанубдан чанг солғусидир. Бойсунқур мирзо — ношуд тождор. Пойтахтни өртами-кечми бой бергай. Агар Бобир мирзо Самарқандни тезроқ эгалламасалар, боболаридан қолган салтанат бегона сулола илкига ўтиб кетгусидир. Ҳудо кўрсатмасин, агар Шайбонихонми, Ҳисравшоҳми,— биронтаси Самар-

қандни забт этса, куч-қудрати ошиб, тез кунда Андижон устига ҳам қўшин тортиб келгусидир...

— Ахир барча темурийлар бирлашиб иттифоқ тузсалар бўлмасми?— деди Нигор хоним куюниб.

— Барча темурийларнинг пароканда кучларини йиғиб бирлаштироқ учун ҳам қудрат керак. Истеъод керак! Бойсунқур мирзога ўхшаганларда на униси бор, на буниси. Мовароунаҳрдаги темурийлар орасида энг соҳибистеъод, соҳибқудрат сиймо — Бобир мирзодирлар. Шунинг учун биз жонимиизни амирзодам қўзлаган улуғ мақсадлар йўлига тикканмиз. Иншоолло, Самарқандни бу йил забт этсан, хавф-хатарлар бартараф бўлғай. Ана ундан кейин чинакам осуда давр келур, ҳар қанча бинолар қурсак осон бўлур.

Хонзода бегим Қосимбекка тикилиб сўради:

— Хуллас, волидаи муҳтарамамизнинг илтимослари рад этилурми?

Қосимбек қўлини кўксига қўйиб, бош эгди:

— Қулингизнинг густохлигини афв этинг, бегим, мен амирзодамнинг ижозатлари билан дилимда борини сўзладим.

Бобир аросатда қолиб қийналар эди. Онаси шунчалик ишонтириб айтган ҳақли илтимосларни рад этишга унинг тили ҳам бормас, кўнгли ҳам чопмас эди. Аммо Қосимбек унинг қалбида шундай туғёнли ҳислар қўзғадики, улардан қутулишнинг ҳам иложи кўринмай қолди. Агар у Самарқанддан воз кечса, нариги зўравонлар пойтахти олиши, кейин Андижонга бостириб келиши муқаррар экани унга ҳозир жуда аниқ сезилмоқда эди. Бутун Мовароунаҳрда уруш гирдобидан қочиб қутуладиган бирон вилоят қўзига кўринмас, Бобир қашқирлар қуршовига тушиб қолгандек безовталанар эди. Онасининг «Сулҳ тузинг, бинокор бўлинг!»— дегани «кийикдай беозор яшанг», дегани эди. Лекин Бобир йиртқичлар орасида кийик бўлиб кун кўролмаслигини ич-иҷидан ҳис қилар, шунинг учун атрофини қуршаб келаётган бўрилар билан шер бўлиб олишишни истар эди. Буни сезиб турган Қосимбек мунозарани ортиқ чўзиб ўтиргиси келмади.

— Амирзодам, бугун отлиқ сайрга чиқмоқчи эдингиз, хоним ҳазратларининг таклифларини барча беклар билан кенгашиб кўурмиз. Оқшом хиргоҳда машварат ўтказайлик.

Хонзода бегим онасига «ялт» этиб қаради-ю, «Ҳозир

биргина Қосимбекка ўтказа олмаган таклифларимизни
кейин барча бекларга қандоқ ўтказурмиз?»— демоқчы
бўлди, Қутлуғ Нигор хоним Бобирга яна нималарни дир
айтмоқчи бўлиб оғиз жуфтлади. Аммо Бобир Қосимбек-
ка қараб:

— Машварат эртага чақирилсин, яхшироқ ўйлаб кў-
райлик,— деди-да, ўрнидан турди. Сўнг Қосимбек бош-
лиқ мулоzимлари билан отлиқ сайдрга чиқиб кетди.

5

Ушнинг жанубидаги кенг текисликлар, тўлқинсимон
қир ва адирлар турли-туман дала гуллари билан безан-
ган. Сап-сариқ қоқилар, кўк-қизғиш нахўтаклар, нафар-
мон эрбаҳолар орасида узоқдан қип-қизил гиламга
ўхшаб кўзга ташланадиган — қийғос очилган лолақиз-
ғалдоқлар эди.

Бобир олисдаги қорли тоғларга қараб борар экан,
тиззага чиқадиган юмшоқ кўкат устида отлар ҳам ма-
йин қадам ташлаб бораётганини сезарди. Баҳор нафо-
сати ҳозир унинг кўзини эркалаётган бўлса ҳам, аммо
дилига таъсир қилолмас эди. Бояги мушкул зиддиятлар
ҳали ҳам хаёlinи банд қилиб, кўнглида тугун бўлиб ту-
рибди. Бобир бу чигал тугунларни ўзи ечолмаслигини
сезади. Бу тугунларни у истагандай ечиб бера оладиган
доно одам бормикин? Унинг эсиға устози Хўжа Абдул-
ла тушди. Бетоб бўлиб Ушга бирга келолмаган Хўжа
Абдулла ҳам Бобирнинг Самарқандга қўшин тортуб бо-
ришига тарафдор эди. «Мовароуиннаҳрдагӣ пароканда-
ликни тугатиб, қудратли давлат тузмагунча катта орзу-
ларимиз рўёбга чиқмагай!»— деган сўзларни Бобир ус-
тозидан ҳам кўп эшитган. Аммо бунинг учун яна уру-
шиш керак, Урушга эса онаси қарши. Ким ҳақ? Бобир
бу саволга жавоб тополмайди.

Отлиқлар узун бир тепаликка кўтарилганларида Қо-
симбек тоғтомонни кўрсатиб:

— Сурувлар бу қадар кўп?— деб таажжуб билдириди.

Бобир у кўрсатган томонга кўз югуртириди. Қир ва
адирларнинг ҳар биридан бир нечтадан сурув ёпирилиб
тушиб келмоқда эди. Хўжа Қалон деган йигирма беш
ёшли қоп-қора бек қўлини пешонасига соябон қилиб
кунботиш томонга қаради-ю!

— Ў-ҳў-ў!— деди.— Бу томонда ундан ҳам кўп!

— Кунчиқиши томонда ҳам бор!

Сурувлар гуж-гуж бўлиб қелаётганига қараганда ёйилиб юрган қўйлар әмас. Ана, тўғридаги қирлар ортидан яна икки сурув чиқиб келди. Сўнг узоқдаги адирлар орасидан бирин-кетин уч тавила йилқи отилиб чиқди-ю, бериги томонга қараб селдай бостириб кела бошлади. Чап томонда яна уч-тўрт тавила йилқи кўринди.

Йилқилар ҳам, қўй сурувлари ҳам узоқдаги қорли тоғлардан үшга қараб келмоқда эдилар. Ниҳоят, тоғ томондан тизилиб тушиб келаётган отлиқ аскарлар кўринди.

Шунда Бобир тоғларга қўй ва йилқи ундириш учун уч юз аскар билан чопқинга кетган Аҳмад Танбални эслади. Қосимбек қувониб:

— Азаматларнинг ўлжаси жуда улуғ-ку! — деди.

Хўжа Қалон ҳам ҳаяжонланиб:

— Беадад! — деб хитоб қилди. — Баҳодирона ўлжас!

Одатга биноан, бу беҳисоб қўй ва йилқиларнинг бешдан бири подшоҳ ихтиёрига ўтар, қолган тўрт қисми ҳамма бек ва мулоғимларга тақсимланар эди. Шуни билган беклар гўё осмондан тушаётган бу катта бойлика қараб севинчларини яширомас эдилар.

Бобир отини тоғдан келаётган аскарлар томонга буриб, жиловини бўшатди. Бедов от қушдай учиб бора бошлади. Бошқалар ҳам Бобирнинг кетидан от чоптириб кетдилар. Бир қир ўтиб, иккинчисига кўтарилганларида, нариgilар ҳам буларни кўриб, бурилиб кела бошладилар. Бобир баланд бир жойда отини тўхтатди.

Аскарларнинг олдida келаётган Аҳмад Танбал зирҳли кийимда эди. Елкаси ва кўкрагини ёпиб турган жибанинг темири офтобда йилтиради. Унинг бўйнига ёй ўқи теккан, ярадор жойини яшил мато билан боғлаб олган эди. Үзи озиб, мўғулча ёноқларининг суюклари яна ҳам бўртиб чиққан. У Бобирдан эллик қадамча нарида отдан тушиб, қўл қовуштириб келди-да, ер ўпиб юкунди:

— Мирзо ҳазратларига ёғийлик мақомида бўлган чаграклар ўлпон тўлашдан бош тортганлари учун ўн олти минг қўйлари, икки ярим минг йилқилари жарима тарзида тортиб олиб келинди!

— Чопқин талафотсиз бўлдими?

— Мирзо ҳазратлари, бизнинг уч йигитимиз ҳалок бўлди, ўн киши яраланди. Аммо биз ёғийлардан бунинг қасдини олдик!

Аҳмад Танбал олдинги сафда турган йигитларидан
ширига ишора қилди. Айиқтахлит, қўпол бир йигит эгари-
нинг устида дўмпайиб турган хуржунни олди-да, под-
шоҳга яқинлашди. Олачадан тикилган хуржуннинг ҳам-
ма ёфи қон эди. Айиқтахлит йигит Аҳмад Танбалнинг
ишораси билан хуржуннинг ҳар икки кўзини тўлдирган
нарсани ерга ағдарди. Ўн-ўн бешта одам калласи кў-
катлар ва лолақизғалдоқлар устига юмалаб тушди. Бо-
бир каллаларни кўрган заҳоти «Чаграклар ҳам бизнинг
одамларга ўхшар экан-ку!»— деган ўйдан эти жунжиқиб
кетди. Чорвадор туркий қабила бўлган чаграклар ҳам
Бобирнинг ватандошлари эканлигига, ҳаммалари бир
эл, бир улусданлигига унинг ишонгиси келмас эди. Чун-
ки чаграклар унинг ҳукмига бўйсунмас, юборган киши-
ларини қўлда қилич билан қарши олишарди. Мана эн-
ди ўzlари қиличининг тифидан ўтиб, бошлари оёқ остида
ағанаб ётибди. Бу жонсиз бошлардан бирининг соқоли
йўқ, кўк-сағиши юзи спиллиққина, мўйлови энди чиқа
бошлаган. Бобир унинг ўн етти-ўн саккиз ёшли йигит
бўлганини пайқади-ю, энгаги тагидан кесилган гўшт
аралаш қонли бўйнига қараб, кўнгли бирдан беҳузур
бўлди. Ердам сўрагандай, ўнг томонида турган Қосим-
бекка қаради.

Султон Аҳмад Танбал ҳам, унинг отлиқ аскарлари
ҳам Бобирдан мақтов ва мукофот кутмоқда эдилар. Ўн
олти минг қўй, икки ярим минг йилқи ҳазилакам бойлик
эмас эди. Ўч йигит ўлган бўлса, уларнинг қасдига ўн
беш-йигирмата ёғийнинг бошини кесиб келиш ҳам шу
турганларнинг одатига биноан мардона иш ҳисобланар,
буни тақдирламаслик эса адолатсиэлик саналар эди.

Қосимбек Бобирнинг юзи оқариб кетганини кўриб
ҳайрон бўлди. Унинг фикрича, кесик каллалар Бобирга
бунчалик таъсир қилмаслиги керак эди. Бултур Самар-
қанд урушида ёш подшоҳ бундай бошларни кўп кўрган
эди. Одатда «фалончи юзта ёғийни ўлдирибди», деб қу-
руқ мақтасалар учча ишонарли бўлмайди, чунки озғина
ишини кўп қилиб кўрсатиб, лоф урадиган бек ва навкар-
лар ҳам бор. Жангчининг хизмати ишонарли бўлиши
учун ўлдирилган душманларнинг бошини кесиб келиб
ҳисоб бериш эскидан одат тусига кирган.

— Амирзодам,— деб шивирлади Қосимбек.— Қулин-
гиз сўзлайними?

Бобир тасдиқ маъносида бош иргади. Қосимбек юзи-

ни Бобирга яқинроқ келтириб, яна эшитилар-эшитилмао қилиб сўради:

— Мукофотига қилич берсак... Розимисиз?

Бобирнинг яроғбардори олиб юрган тиглар орасида олтин дастали катта бағдодий қилич бор эди, Бобир бир икки маҳта таққанда жуда оғир туулган эди. Бобирнинг нигоҳи шу қиличда тўхтаганини кўрган Қосимбек, «тушундим», дегандек бош иргади.

— Султон Аҳмад жаноблари,— деб овозици кўтариб гапириди Қосимбек.— Сиз баҳодирона зафар билан қайтганингиз мирзо ҳазратларини беҳад шод қилди. Сиз Бобир миrzога нечоғлиқ содиқ эканлигингиzinи яна бир бор исбот этдингиз: 'Бутун мавқаб¹' бугун сизларни олқишилағай! Ўшдаги қароргоҳда бу оқшом сизларнинг шарафингизга тантанали зиёфат берилур, ҳамма йигитларингиз шоҳона инъомлар олурлар. Ҳозир мирзо ҳазратлари Султон Аҳмад жанобларига олтин дасталик шамшири хос инъом этдилар!

Қосимбек бағдодий қиличини яроғбардордан олди-ю, ерга таъзим қилиб турган Султон Аҳмадга узатди. Султон Аҳмад тиз чўкиб қиличини қинидан тўрт энликча чиқарди-да, пўлатидан ўпди, сўнг овози ҳаяжондан титраб деди:

— Мирзо ҳазратлари, ўлгунимча бу марҳаматингизни унутмасмен! То умрим охирача сизга содиқ хизматда бўлғаймен!

* * *

Шу куни оқшом Ўш қалъасининг миноралари устида, шаҳар атрофига тикилган юзлаб чодир ва ўтовлар олдида карнайлар, нақоралар чалинди, машъаллар ёқилиб, катта тантаналар бошланди. Минг-минглаб қўй ва йилқиларни инъом тариқасида текинга оладиган барча беклар, навкарлар ва мулоzимлар бугун астойдил шодланмоқда эдилар. Подшоҳнинг ҳашаматли хиргоҳида оқшом қабул маросими ва базм бўлди. Созандалар энг қувноқ куйларини чалишди, ҳофизлар энг яхши ашулаларини айтишди.

Бобир хиргоҳ тўрида тўртта олтин зина билан чиқиладиган баланд шоҳсупа устида ёлғиз ўлтирибди. Бугун

¹ Мавқаб -- подшоҳ ва упинг барча аъёнлари, яқинлари.

унинг ўнг томонидан ўрии олган энг нуфузли беклари
орасида Аҳмад Танбал ҳам пайдо бўлган. У кундузги
зирҳли кийимлар ўрнига зарбоф тўн ва симоби салла
кйиган, подшоҳ инъом қилган олтин сопли қиличини ку-
муш камарга тақиб олган. Ҳамма уни мукофот билан
муборакбод қиласди. Табрикларнинг барчасидан ёқимли-
си — боя хиргоҳга кирганда уни Қутлуғ Нигор хоним
муборакбод қилгани бўлди. Подшоҳнинг онаси билан
эгачиси ҳозир катта дастурхоннинг нариги томонида
Аҳмад Танбалга ярим ўгирилган ҳолда ўтириб, созан-
даларнинг куйига қулоқ солишаپти. Аҳмад Танбал ҳар
замонда уларга кўз қирини ташлаб қўяди. Хонзода бе-
гиммининг нафис қадди-қомати, ҳафткор¹ ипак матодан
кийиган камалакдай товланувчи қабоси Аҳмад Танбалга
буғун ҳар қачонгидан ҳам жозибали кўринади.

Ёш подшоҳнинг базмларида ичкилик ичилмас, Бобир
ҳали майни оғзига ҳам олган эмас эди. Қосимбек ҳам
ичкиликни ёмон кўрап ва уни базмларга йўлатмас эди.
Лекин Умаршайх мирзо даврида май ичиб ўргангандан
бошқа беклар мана шундай базмларда Бобирдан яши-
риб чет-четда ичиб олишар эди.

Али Дўстбек деган қотма, кўсанамо бир бек орқада
шарбат кўтариб турган шарбатчига сирли кўз қисди-ю,
Аҳмад Танбални кўрсатди. Шарбатчи маъноли кулим-
сираб Аҳмад Танбалга яқинлашди ва кумуш кўзачадан
чинни пиёлага тўлдириб кўкимтири «шарбат» қўйиб бер-
ди. Аҳмад Танбал пиёланин қўлига олар экан, димогига
ўтиқир май ҳиди урилди.

— Олинг, бек, илоҳим Самарқандда бундан ҳам
улуғ зафарларга мусассар бўлинг! — деди Али Дўстбек.

Аҳмад Танбал миннатдорона бош иргаб, майни сип-
қарди-ю, кейин дастурхондаги тандиркабобга қўл чўзди.

— Мана энди Самарқанду Бухорони олгунча етади-
ган заҳирамиз бор! — деди ширақайф Дўстбек. — Муҳо-
рабани тезлатмоқ керак.

Аҳмад Танбалнинг ўнг томонида Узун Ҳасан ўтирган
эди. Гуриб юрганда жуда новча кўринадиган бу озғин
одам ўтирганда гўё қатланиб, кичкина бўлиб қолар эди.

— Шайбонийхон Дашиби Қипчоқдан Самарқандга
бўйин чўзармиш, — деди Узун Ҳасан.

— Тушини сувга айтсин! Самарқанд бизники бў-

¹ Ҳафткор — етти хил ранг.

лур!— деди майдан бадани қизий бошлаган Аҳмад Танбал овозини хиёл кўтариб.

Унинг бу сўзлари Бобирнинг қулоғига ҳам чалинди. Бугун тофдан ҳайдаб тушилган беҳисоб қўй ва йилқилар сарой аҳлининг Самарқандга юриш қилиш иштиёқини яна ҳам ошириб юборгани Бобирга тобора аниқ сезилмоқда эди. Илгари ҳам уларнинг бу иштиёқларига қарши бориш қийин эди. Аммо ҳозир бек ва навкарларнинг Самарқандга интилиши — тоғ дарёснинг юқоридан пастга қараб отилишига ўхшарди. Бу дарёни орқага қайтариш ҳеч кимнинг қўлидан келмасди...

6

Оқиш сувли жўшқин Бурасой Уш қалъасининг тош ётқизилган пойдеворига бош уриб, кўпириб ўтади. Сойнинг ўнг бетидаги сердараҳт маҳаллада Мавлоно Фазлиддин бултурдан бери истиқомат қилаётган пешайвонлик мўъжаз бир уй бор. Унинг олдидағи беш-олтита ноќ ва беҳи дараҳтлари ҳозир оппоқ бўлиб гуллаб турипти. Ҳовлининг четидаги бостирмага иккита от боғлаб қўйилган. Бериги ёқдаги оёқлари узун тўриқ қашқа отни анжомлари билан Бобир мирзо инъом этган эди. Мавлоно Фазлиддин подшоҳнинг хос меъмори қилиб тайинланган, унга яхшигина улуфа¹ белгиланган эди. Бунинг ҳаммасидан Мавлоно Фазлиддин ўзида йўқ хурсанд бўлиб юрган эди. Бироқ кейин баъзи бир нохуш хабарларни эшишиб кўнгли ғаш торта бошлади.

Мавлоно Фазлиддин Андижонда қурмоқчи бўлган катта иморатларини шу бу йил ёздаёқ бошлаш орзусида эди, Бобир мирзо кўрсатган марҳаматлар бу орзунинг рўёбга чиқишига йўл очгандай бўлган эди. Ҳатто Бобир мирзонинг ўзи уни боргоҳда қабул қилиб, қанақа мадраса, қандай хонакоҳ ва кутубхоналар қуриш ҳақида гаплашган, мавлононинг бу ҳақдаги таклифларини маъқуллаган, «Хонзода бегим биз йўғимиизда мутасадди бўлурлар, режаларни бутун тафсилотлари билан тузиб, бегимга кўрсатурсиз», деган эди. Иш устида яна Хонзода бегим билан учрашишини ўйлаганда мавлононинг ҳалбида қўрқув аралаш ширин бир ҳаяжон қўзғалар эди.

¹ Улуфа — маош ва тураржой.

Бироқ Бобир яқинда яна Самарқандга қўшин тортиб бормоқчи эканлиги, давлатнинг бутун кучи шунга кетиб, қурилишлар номаълум вақтга кечиктирилиши маълум бўлди. Агар Бобир Самарқандни ололмай, урушда енгилса, унда мавлононинг барча орзулари ўз-ўзидан пучга чиқади. Агар Бобир Самарқандни олса, табиий, ўша ерда подшоҳ бўлиб қолади. Кейин у Фаргона воийисида катта қурилишлар қиласадими, йўқми? Одатда, подшоҳлар қаерни пойтахт қиласалар, ўша ер кўпроқ обод бўлади. Андижон яна пойтахт бўлиши гумон. Демак, мавлононинг бу ерда қиммоқчи бўлган ишлари, барча режалари қум устига қурилгандай омонат.

Ҳозир айвонда эски ҳандаса ва риёзиёт китобларини титкилаб, керакли бир жадвални ахтараётган мавлоно мана шу нарсаларни ўйлаб, таъби тирриқ бўлмоқда эди.

Бир пайт дарвоза устма-уст тақиллади. Бостиридада отларнинг тагини тозалётган кекса хизматкор ёғоч кургини деворга суюб қўйиб, дарвозага қараб ўтди. Бир-пастдан сўнг хизматкор айвоннинг олдига қайтиб келди-ю:

— Мавлоно, бир кимса ҳузурингизга кирмоқчи.

— Ким?

— Кийими увада, ўзи баҳайбат бир йигит. «Жиянлари бўламен», деди, аммо мен сиздан берухсат киргазмадим.

— Жияним? Шошманг-чи!— деб, мавлоно ўрнидан турди. Яланг оёғига чарм кавуш кийиб, ярим очиқ дарвозанинг олдига борди.

Олача тўни ҳам, оёғидаги чанг босган чориғи ҳам йиртилиб кетган новча бир йигит кўзлари ялтираб, кулимсираб, унга қараб юрди. Қадам олиши, қараши жуда таниш. Йигит:

— Мулла тоға!— деб қучоқ очганда мавлоно унинг овозини таниди-ю:

— Тоҳир! Тоҳиржон!— деб у билан қучоқлашиб кетди.— Шунча ўлимлардан омон қолган жияним, сени зўрга танибмен. Бу қадар ўзгариб кетибсен! Юзингга не бўлди?

— Э, сўраманг, мулла тоға...

— Майли, юр, аввал дамингни ол. Кейин айтиб бе-рурсен...

Улар айвонга чиқар эканлар, Мавлоно Фазлиддин бундан салкам уч йил олдин Қувасой бўйида бўлиб ўтган қонли воқеаларни яна бир эслади. Ӯшанда Тоҳирга

найза санчган самарқандлик босқинчи уни ўлдирганига шубҳа қилмай кетган эди. Онаси ёлғиз ўғлиниң қонига беланиб, жонсизланиб ётганини кўриб, уни «ўлди» деб ўйлаган ва шайтонлаб йиқилган эди; бечора она шу ётганича қайтиб туролмай, эртаси куни вафот этди. Тоҳир эса отаси толиб келган табиблар ва дору дармонлар таъсирида уч кундан кейин ҳушига келди. Найза ўпканинг бир четини кесиб ўтган бўлса ҳам юрак ва жигар каби нозик аъзоларга тегмаган, Тоҳирнинг ёшлиги ва баъзувватлиги устун келиб, аста-секин тузалиб кетган эди. Қўни-қўшнилар «Тоҳирга келган ўлимни онаси ўзига олди-ю, бу тирик қолди», дейишарди. Мавлоно Фазлиддин ўшандада опасининг қирқини ўтқазиб келганича қайтиб Қувага бормаган эди.

— Отанг қалай, бардамми? — сўради Мулла Фазлидин Тоҳирни юқорига таклиф қилиб.

Тоҳир чанг босган чориғи билан кўрпачага чиқишидан ибо қилди-ю, пойгаҳдаги шолча устига ўлтириди.

— Отам сизга салом айтиб юбордилар. Мен бир йилча қишлоқда бўлмадим... Қариндошлар «чолнинг иссиқсовуғидан хабар олиб турсин» деб бир бева кампирни олиб берибдилар... Онам раҳматлик эсимга тушди-ю, уйда тургим келмади.

Фақат онасининг мусибати эмас, босқинчилар боғлаб олиб кетаётгандарига Тоҳирдан нажот кутиб қичқирган Робия ҳам унинг хаёлидан нари кетмайди. Қизнинг ўшандаги нидоси ҳали ҳам Тоҳирнинг қулогига эшитилиб тургандай бўлади. У бурноғи или Самирқандгача пиёда бориб келди, ўйларда ўроқчилик қилиб, карвонларга қўшилиб юриб, иложи бўлган жойдан Робияни қидирди, «синглим эди, Султон Аҳмад мирзонинг навкарлари олиб қочиб кетган эди», деб сўроқлади. Аммо ҳеч қаердан дарагини тополмади.

Султон Аҳмад мирзо ўша йилиёқ ўлиб, қўшини тарқаб кетган, бир йил давомида Самарқанд тахтида икки марта подшоҳ алмашинган, кўп тўполонлар бўлиб, ит эгасини танимайдиган аҳволга келган эди. Жиззахлик бир киши Тошкент томонларга чўрилар кўп сотилганини айтиб қолди. Бултур кузда Тоҳир пиёда Тошкентгача борди, яна ҳар жойларда мардикорлик билан кун ўтказиб Робияни сўроқлади, аммо ҳеч натижа чиқмади. Замона нотинч, юрт алғов-далғов, ҳаёт ҳамма жойда худди лойқалатилган дарёга ўхшаб оқади. Робияни топиш —

лойқа дарёга тушиб кетган гавҳарни топишдек қийин эканини Тоҳир ич-ичидан сезар эди-ю, барибир умидини узолмас эди. Мавлоно Фазлиддин Тоҳирнинг гаплари-дан шуни пайқаб:

— Жияним, сен ўша бечора қизни ҳали ҳам унотолмай икки йил излаганинг — жуда ажойиб бир дилинг борлигидан далолат берур. Мен сенинг садоқатингга тан бердим! Аммо сен энди ўзингга ҳам жабр қилмаслигинг керак. У қиз тақдирида борини кўргай. Агар тирик бўлса, балки... бирор унга уйлангандир. Балки фарзандлик ҳам бўлгандир. Ахир уч йил уни тек қўйишлари мумкинми? Сен ўзинг бир ўйлаб кўргин...

— Мен бунинг ҳаммасини аллақачон кўнглимдан ўтказганмен, мулла тоға...Faқат мен у қизнинг олдида ўз гуноҳимни ювмоқчимен, холос.

— Қайси гуноҳингни?

— Ўшанда Робияни Андижонга қочирмоқчи бўлгандарида мен Қувада олиб қолганмен. Агар Андижонга кетганда бу фалокатлар бўлмас экан.

— Сен нима бўлишини қайдан билибсан, жияним?

— Ҳар қалай, мен уни топиб, шу гуноҳимни ювмагунимча тинчиёлмаймен. Робия сиз айтгандек уйликжойлик бўлиб, тинчиб кетган бўлса, унда... майли... Тақдирга тан берурмен. Агар ҳали ҳам најот излаб мени кутиб юрган бўлса-чи? Ахир мен уни унотолмай юриб-мен-ку? Унга ҳам мен керак бўлсам-чи?

Мавлоно Фазлиддин бош чайқаб:

— Дил дардига даво йўқ экан-да,— деди ва мавзуни ўзгартириди:— Йўқлаб келибсан, энди меҳмон бўл. Қани, дастурхонга қара...

Тоға-жиян бирга ўлтириб ширчой ичдилар. Қейин Мулла Фазлиддин Тоҳирнинг кийим-бошларига яна бир кўз югуртириди-ю:

— Жияним, тоғанғ ҳозир хийла бадавлат,— деди қўйнига қўл солиб, боячи попукли қора чарм ҳамён олди, У ҳамённи очиб, жиянига бир нечта олтин танга олиб бермоқчи эди. Ҳамён тезда очилавермагач, мавлоно уни очмасдан жиянига узатди:— Ма, Ўшнинг расталарига чиқ, бугун жума, мол кўп, ўзингга кераклик кийим-кечак ол.

Тоҳир ҳамённи олмай туриб деди:

— Йўқ, мулла тоға, менга ўзингиз санаб, қарз беринг.

— Ҳа, хўп, қарз! Ўзинг керагича ол, пулдор бўлганнингда қайтарурсен.

— Ундай бўлса, майли.

Тоҳир ҳамённи қўйнига солиб чиқиб кетганича пешин кечроқ оёғига янги аскарий этик, бошига мўгулча бўрк кийиб, чакмонга ўхшаш дағал юнгли дагалани елкасига ташлаб келди. Ўнинг қўлида қини эскириб кетган арzon бир қилич ҳам бор эди. Мавлоно Фазлиддин ҳайрон бўлиб:

— Нечун бундай кийимлар олдинг? — деди. — Қиличи не қилурсен?

— Мулла тоға, ёлғиз саргардон бўлиб юриш менинг жонимга тегди. Энди Самарқандга Бобир мирзонинг қўшини билан бирга бормоқчимен.

— Сарбоз бўлибми?

— Ҳа, тавочилар аскарликка одам олаётган эмишлар...

Жияни Ўшга ҳам шу ният билан келганини Мавлоно Фазлиддин энди сезди-ю, ундан қаттиқ ранжиди.

— Жинни бўлибсен, Тоҳир! Ҳамма урушдан қочса, сен бу аждаҳонинг комига ўз ихтиёринг била бормоқчисен! Бир марта найза еб, ўлимдан қолганинг озмиди?

— Мулла тоға, ундан кейин мен яна неча ўлимлардан қолганимни сиз билмайсиз. Тошкентда бир мўғул беки бечора косибнинг қизини зўравонлик билан тортиб олмоқчи бўлганда мен чидаб туролмадим. Орага тушганим учун мана, юзимда ўша бекнинг ханжаридан чандиқлар қолди.

— Замона зўрникилигини ҳали ҳам билмайсанми?

— Билганим учун мен ўшандай зўрлар билан зўр қўшиннинг сафида туриб олишмоқчимен, мулла тоға. Мен кўп юртларни кўрдим, турли одамлар билан бирга ишлаб, бирга юрдим. Бобир мирзонинг табиати покиза, кўнгли тийрак эканини кўп одам билар экан. «Атрофдаги подшолардан яхшилик чиқмаса ҳам Бобир мирзодан бир ёруғлик чиқар», деб умид қиласен.

Мавлоно Фазлиддин ерга қараб:

— Қайдам, — деди. — Бобир мирзо ҳали ёшлар. Мен ҳам шу зотга умид боғлаган эдим... Лекин яна уруш, қон... Ҳаммамиз тун зулматидай интиҳосиз бир қоронғилек ичидан юрибмиз. Мамлакат пароканда, золим тож-

дорлар қон устига қон тўкурлар. Бобир мирзонинг атро-
фидаги беклар ҳам раҳм-шафқатни унумишлар. Муҳит
шундоқ ғаддор бўлгач, сен ҳам ёмон беклар хизматида
юриб, ўзингга ўхаш жабрдийда заҳматкашларнинг
кушандасига айланмасмикинсан, жияним?

— Ишонинг, мулла тоға, мени ёмон бекларнинг зулми-
га иложим борича қарши тургаймен!

— Бобир мирзо ҳукмдор бўла туриб даф қилолмаган
адолатсизликларни сен нечук даф қилурсен?

— Балки Бобир мирzonинг мендек навкарлари бўл-
магани учун даф қилолмагандирлар? Балки у зотга мен
керакдурмен, мулла тоға? Мен ўзим учун шундан маъ-
қул йўл тополмадим. Ёлғиз яшашимнинг маъноси қолма-
ди. Не қиласай?

Мавлоно Фазлиддин жиянининг юзига тикилиб қара-
ди-ю, уни ниятидан қайтариб бўлмаслигини сезди. Тоҳир
бундан уч йил олдин Қувасой кўпригини бузиб, ёв қўши-
нига катта талафот келтирган пайтларда тарих дарёси-
нинг қудратли оқимига тортилганми? Энди умрбод
ўша оқимдан чиқолмасдан, тарихий воқеаларнинг ичи-
да юришга маҳкум этилганмикин? Ҳар қалай, жияни-
нинг сўнгги гаплари мавлонони ўйлантириб қўйди. У
бирпас жим тургач:

— Тавочига учрадингми? — деди.

— Учрадим. «Оting йўқ экан, пиёда қўшинга ола-
миз», деди. Мен пиёда юриб ўрганиб қолганмен, мулла
тоға.

— Аммо жангда энг кўп талафот пиёдалар орасида
бўлур, буни билурсенми?

— Майли-да, қирқ йил қирғин бўлса ҳам ажали ет-
ган ўлгай.

— Бас!

Мулла Фазлиддин бу ҳақда бошқа гаплашмади. Эр-
талаб нонуштадан кейин хизматкорига айтиб, бостири-
мада турган ҳар иккала отни ҳам эгарлатди. Тоҳирга
оёқлари узун жийрон отни кўрсатиб:

— Сен мана шуни мин, — деди. — Мен сенинг пиёда
аскар бўлишингни ўзимга муносиб кўрмасмен!

Мулла Фазлиддиннинг ўзи Бобир инъом қилган тў-
риқ қашқани минди. Сўнг икковлари Бобирнинг қарор-
гоҳига отлиқ йўл олдилар.

Одатдагидай, Бобир ҳузурига кириш учун эшик оға-
дан рухсат олиш керак. Тоға-жиян саккиз бурчакли ул-

кан оқ ўтовдан берироқда отлиқ келаётган Қосимбекни кўрдилар ва унинг ҳурматига отдан тушиб қўл қовуштирилар.

— Жаноби амирул умаро, жияним ҳам Бобир мирзога содиқ хизмат қилиш орзуисида келди,— деди Мавлоно Фазлиддин.— Ижозат берсангиз, амирзоданинг ҳузусларига кирсак.

— Амирзодам ҳозир беҳад бандлар, мавлоно. Балки илтимосингизни менга айтурсиз?..

— Жияним Тоҳир... амирзодамнинг хос навкарлари қаторига олинишини ўтиниб сўрамоқчи эдим.

Қосимбек Тоҳирнинг барваста гавдасига ва юзидағи чандиққа қаради-ю:

— Йигит, аскарий хизматда бўлганмисен?— деди.

Қосимбекнинг «сенсираб» гапиргани Тоҳирга унча ёқмади. Лоқайд товуш билан:

— Ҳали бўлган эмасмен,— деди.

Мавлоно Фазлиддин орага тушди:

— Жаноби амирул умаро, жиянимиз асли деҳқон бўлса ҳам, лекин табиатида жанговарлик бор. Эсингизда бўлса, Қуванинг кўпригига ёғийларимиз жуда катта талафот кўриб, ўзлари сулҳ таклиф қилган эдилар. Ушанда бизга ғалаба келтирган азамат йигитларнинг бири — мана шу Тоҳир!..

— Ғалаба келтирган?!— ишонқирамай сўради Қосимбек.— Қандай қилиб?

Мавлоно Фазлиддин Қувада ўз кўзи билан кўрган воқеаларни Қосимбекка қисқача сўзлаб берди. Унинг ҳикоясига қараганда, жанговар беклар ва навкарлар эплий олмаган ёвнинг белини оддий «ялангоёқлар» синдириган бўлиб чиқарди. Қосимбек бунга ишонгиси келмади.

— Қувада ғалабани тангрим ўзи бизга инъом қилган, мавлоно!— деди Қосимбек.

Бу гапга қарши чиқиб бўлмас эди.

— Албатта, буларнинг кўнглига шу ишни худо ўзи солган. Лекин ўшандаги жасорати учун ёғийлар Тоҳирга найза санчиди, уни оғир ярадор қилдилар. Жияним нақ бир ўлимдан қолди, жаноб Қосимбек!

— Шундоқми?— деб Қосимбек энди Тоҳирга илиқроқ назар билан қаради.— Самарқанддаги ёғийларимизда қасдинг борми, йигит ?

— Ҳа, ўчим бор.

Қосимбек кетида сукут сақлаб турган тавочига ўғирилди:

— Бу йигитни Чилмаҳрам тоги этагида аскарий машқ ўтказаётган навкарлар қаторига қўшинг!— Сўнг у Мулла Фазлиддинга изоҳ берди:— Жиянингизнинг машқи етилсин, ҳарбий муомалани ўргансин. Ундан сўнг амирзодам лозим кўрсалар, хос навкарлари қаторига олурлар.

Тоҳир Мавлоно Фазлиддин билан қучоқлашиб хайрлашди-да, отига минди ва тавочининг кетидан Чилмаҳрам тогига қараб йўл олди.

7

Бекларнинг машваратида Самарқанд юришини размазон ойида бошлишга, тайёрлик ишларининг асосий қисмини Ўшнинг ўзидаёқ битириб кетишга қарор қилинди.

Бобир онасининг сўзини ерда қолдирганидан хижолат бўлиб, Қутлуғ Нигор хонимнинг кўзига ташланмасликка тиришарди. Сафар тайёргарликларидан бўшаган пайтларда ўз чодирида ёлғиз ўтириб китоб ўқирди.

Бугун намоздигар кечроқ Бобир «Вақоиъ»¹ номли дафтарга отасининг ўлими ҳақида ёзаётган эди, ясовул кириб, Қутлуғ Нигор хоним билан Али Дўстбекнинг чодирга киришга ижозат сўраётганларини айтди. Бобир дафтарини ёпиб, онасини эшик олдида қарши олди ва тўрга ўтқазди.

Қутлуғ Нигор хонимнинг ранги хиёл ўчган. Унинг пешонасидан юқорида — сочининг фарқ очилган жойида Бобир бир тутам оқарган соч толаларини кўрди. Энди қирқ ёшга кирган онаизор кампирлардек одми кийинар ва қаддини эгиброқ юрар эди. Бобир онасига алланечук раҳми келиб, паст товуш билан гапирди:

— Онажон, сўзим ерда қолди, деб куюнманг. Насиб бўлса, Самарқанддан қайтганда ҳамма айтғанларингизни қилурмен.

— Худонинг хоҳиши шундай бўлса, биз бандалар қаноат қилғаймиз. Илоҳо яхши ниятларингизга еting, шоҳ ўғлим!

¹ «Вақоиъ»—«Чиндан юз берган воқеалар» демакдир. «Бобир-нома» энг аввал шундай деб атаглан.

Али Дўстбек бақувват қўлларини фотиҳа учун очиб:
— Илоҳи омин! — деди.

Сўнг каттә-катта панжаларини қоп-қора силлиқ юзи-
га, соқолсиз узун иягига суртди.

Юзи мў-улча бўртган бу чайир кўса одам Бобирнинг
бувиси Эсон Давлат бегимга амакивачча бўлади. Шу
сабабли ўз номига «тогойи» деган сўзни унвондек қўшиб
айтади ва Қутлуғ Нигор хонимга акаларча меҳрибончи-
лик кўрсатиб юради. Ҳозир ҳам кўрпачалар устига ўтира-
нларидан кейин Али Дўстбек Қутлуғ Нигор хонимга
«Гапни очайми?» — дегандай бир қараб олди. Хоним тас-
диқ маъносида бош иргағач, Али Дўстбек томоқ қириб,
сипориш билан сўз бошлади:

— Амирзодам, волидангиз икковимиз нозик бир му-
аммода сизнинг маслаҳатингизни олгали келдик. Мұҳта-
рама эгачингиз Хонзода бегим ҳозир йигирма ёшдалар.
Айни узатиладиган пайтлари. Бегим ой деса ойдек, кун
деса кундек, оқилаю фозиладирлар. Шу вақтгача муно-
сиб куёв учрамай доғда эдик. Волидангиз ҳам, тогойин-
гиз ҳам вақт ўтиб кетаётганидан изтиробда эдик.

— Яна бир-икки йил уйда ўлтириб қолса, «қари қиз»
деб кулурлар,— деди Қутлуғ Нигор хоним.

Опасининг тақдирига оид бунаقا гапларни Бобир ил-
гарилари ҳам эшитган эди. Аммо бугун Дўстбекнинг гап-
ларига қараганда, қандайдир куёв топилганга ўхшарди.
Бобир шуни билгиси келиб, ўсмирларча қизиқиши билан
сўради:

— Ким бизга почча бўлмоқчи?

Рўйирост берилган бу савол, Дўстбекни шошириб
қўйди. У яна гапни айлантириди:

— Сиздек олий зотга «муносиб почча бўлурмен», деб
ҳеч ким журъат қилиб айтольмас. Аммо умароларингиз
орасида аслзода беклар бор. Чунончи, Султон Аҳмадбек.
Йигирма беш ёшга кирган норғул йигит. Чопқунга бо-
риб, баҳодирона зафар билан қайтди. Беклар орасида
обрўси баланд. Енида уч забардаст иниси бор. Уч юз
навкари билан ҳаммаси сизга то ўлгунча содиқ хизмат
қилмоқчилар.

Бобир ҳали оила нималигини, куёв-келин қандай бў-
лишини билмаса ҳам, опаси Хонзода бегимни Аҳмад
Танбалнинг ёнига қўйиб тасаввур қилди-ю, икковини
бир-бираига тўғри келтиролмади. Сўнг онасига қараб:

— Сиз розимисиз? — деди.

Қутлуғ Нигор хоним оғир тин олиб:

— Начора!— деди.— Хонзода бегим тождор, тахтдор күёвларга муносиб қиз. Аммо ҳозирги нотинч замонада қани биз истаган күёв? Биз тоғойингиз билан суринтириб билдик. Султон Аҳмадбекнинг авлод-аждоди асл-зодалардан экан. Бобокалонлари Жўжихон, Чингизхонларга қон-қариндош бўлган султонлар экан. Ҳозир Тилба Султон номлик оғаси Тошкентда тоғойингиз Маҳмудхонда соҳибихтиёр эшик оға экан. Энди бу Аҳмадбек күёв бўлса, орага оғаси тушиб, тоғойингиз Маҳмудхон билан сизни яқинлаштиармикин? Шундай нафузли бек қизга күёв бўлиб, бутун уруғлари-ю, навкарлари билан қанотингиз тагига кирса, ишингизнинг ривожи яхшироқ бўлурмикин?

— Шубҳасиз, шундай бўлур!— деди Дўстбек чуқур эътиқод билан.

Бобир нима дейишини билмай елка қисди:— ёш ўсмир ўзидан катта опасини кимга эрга бериш ҳақида ўйлашдан ҳам тортинар эди. Аммо онаси ва тоғаси бу ишни унинг подшоҳлик ҳукми билан амалга оширишни истардилар.

— Бегимнинг ўзлари учун ҳам яхши бўлур,— деб давом этди Дўстбек.— Агар бошқа бир юртдаги тождорга тушсалар, оналиридан йироқда бўлурлар, амирзодамдай суюкли иниларининг ҳимояларидан узоқлашурлар.

— Ҳа, ундан кўра ёнгинамда бўлгани афзал,— деди Қутлуғ Нигор хоним.— Хонзода менинг тўнғич қизим, маслаҳатгўйим, Аҳмадбекка берсак, кўз ўнгимда менинг ёлғизлигимни билинтирмай юур.

Бобир бу борада ўзи билмайдиган кўп нарсаларни онаси яхши билишини ўйлади-ю:

— Онам рози бўлсалар, бўлди,— деди.

Дўстбек қувониб кетди:

— Ҳақ гапирдингиз, амирзодам, жуда ҳақ! Она рози — худо рози, деб бежиз айтмаганлар!

Қутлуғ Нигор хоним ҳамон хомуш эди. Бобир бунинг сабабини сезгандай бўлиб:

— Бегимнинг ўзлари нечук?— деб сўради.

Қутлуғ Нигор хоним оғир тин олиб:

— Бегим рози эмаслар,— деди.— Эшишиб кўп йиғладилар.

— Бундай пайтларда йиғлаш қизларнинг азалий одати,— деб кулиб қўйди Дўстбек.

— Аммо Хонзода бегимнинг аҳволидан мен хавотир-
дамен, амирзодам,— деди Қутлуғ Нигор хоним.— «Ўзим-
ни ўлдирамен», деган сўзларини эшитиб қолдим.

— Наҳот?— деди Бобир ҳам бирдан хавотирга ту-
шиб.

— Эгачингиз сизни жондан азиз кўурлар, мирзо
ҳазратлари, сўзингизни икки қилмаслар,— деди Дўст-
бек.— Волидаи муҳтарамангиз билан иккаламиз сиздан
ильтимос қилгани келдик. Хонзода бегимни ҳузурингизга
чорлаб насиҳат қилинг. Давлатингизнинг манфаатлари
учун эгачингиз ризолик бермоқлари керак. Султон Аҳ-
мадбек орага одам қўйган. Бутун уруғлари билан сиз-
нинг марҳаматингизга мунтазир. Рад жавоби уларни сиз-
дан... совитиб қўйиши мумкин. Сўнгра, агар Хонзода
бегим ризо бўлмай, яна уч-тўрт йил уйда ўлтириб қолса-
лар, «куёв топилмабдир, қари қиз бўлибдир», деб ёғий-
ларингиз маломат қилурлар. Бундай гаплар подшоҳ ои-
ласининг шаънига мутлақо тўғри келмас. Агар Хонзода
бегим сизга яхшилик истасалар, ризо бўлмоқлари ке-
рак. Буни энди бегимга фақат сиз тушунтиурсиз, мир-
зо ҳазратлари!

Бобир бошини чанглаб бир лаҳза жим қолди. Бун-
дай нозик, бундай чигал ишга умрида биринчи дуч ке-
лиши. Бегона бўлса ҳам бир сари эди, гаплашиши осон-
роқ бўларди. Ўзининг жонажон опаси. Бобир Хонзода
бегим билан бу тўғриларда гапиришишдан ҳам иймана-
ди. Лекин бу ёқда онаси мушкул аҳволга тушиб, ёрдам
кутиб ўтирибди. Бу ёқда опаси жонига қасд қилмоқчи
эмисш.

— Майли,— деди Бобир онасига маъюс кўз ташлар-
кан,— бегим келсинлар, ўзим бир сўзлашай.

Қутлуғ Нигор хоним тез ўрнидан қўзғалиб:

— Ҳозир... ҳозир бориб айттириб юборурмен,— деди
ва ҷодир эшигига йўналди.

Дўстбек йирик тишларини очиб мамнун кулимсира-
ди-ю, ҷодирдан орқаси билан юриб чиқа бошлади. Эшик
олдида таъзим қилди-да:

— Амирзодам, сиз шоҳсиз, сизнинг ҳукмингиз во-
жиб,— деб Бобирни дадилроқ бўлишга ундан кетди.

* * *

Бобир қатор шамлари липиллаб ёнаётган иккита ол-
тин қандил оралиғида садаф билан безатилган бежи-

рим мизга кўкрагини тираб китоб варақлаб ўлтирганда Хонзода бегим чодир эшигидан секин кириб қелди. Эгнида сидирға сариқ атлас кўйлак. Ҳазин товуш билан саломлашиб, Бобир таклиф қилган зарбоф кўрпача устига хасталардек бўшашиб ўлтирди. Унинг қовоқлари шинқираганини кўрган Бобир:

— Мунча ғамгинсиз, бегим? — деди.

— Амирзодам, мен ҳузурингизга нажот излаб келдим!

Хонзода бегимнинг сўлғин юзига кўзларидан ёш сирғалиб тушди. Бобир яқиндагина яйраб-яшнаб юрган опасини ҳозир бу аҳволда кўриб, юрагини бир нарса тимдалаб ўтди. Онаси унинг зиммасига юклаб кетган вазифа қанчалик мушкул эканини у энди астойдил ҳис қилди. Тақдир унинг бошига солаётган мушкулотлар озмиди, устига бу ҳам қўшилди? Бобир куюнуб гапира бошлади:

— Мен ўзим бу фалакнинг дастидан нажот излаймён, бегим. Ечилмас муаммолар бири устига бири қўшилур. Шу аснода наҳотки сиз ҳам менинг мушкулларимни кўпайтироқчи бўлурсиз?

Хонзода бегим укасининг ўзи чиндан ҳам ёрдамга муҳтоҷлигини, ёшига номуносиб ишлар уни жуда қийнаб юрганини сезди-ю, кўзини тез артди. Боягидан тетикроқ оҳанг билан гапира бошлади:

— Амирзодам, мен бир гап эшитдим. Ростмикин?

— Қайси гап?

— Аҳмад Танбал тоғдан бир хуржун одам калласини олиб тушганмиш...

Бобир ўтган куни кўрган кесик каллаларни, хусусан, ҳали соқоли ўсиб улгурмаган ёш йигитнинг гўшти чиқиб ётган қонли бўйнини эслади-ю, бирдан сесканиб тушди.

— Жанг ўлимсиз бўлмас,— деб Бобир гўё ўзини-ўзи босмоқчи бўлди.— Ёғий ҳам бизникиларни ўлдирмишдир. Бу — эски одат. Сиз буни унутинг, бегим.

— Бунисини унутсан омилиги, жоҳиллиги бор. Мен умримни фозил киши билан ўтказиш орзусида эдим. Аҳмад Танбал қўли қон, бераҳм одам. Амирзодам, наҳотки сиз мени унга муносиб кўрурсиз?

— Сизга муносиб йигит, балки етти иқлимда ҳам йўқдир. Аммо... сабабларини онам айтгандирлар... Мен ҳам... мажбурмен!

Хонзода бегим қандилда липиллаб ёнаётган шамларга қараб туриб, Аҳмад Танбални кўз олдига келтирди-ю,

ўша бадқовоқ йигит билан бир ёстиқقا бош қўйишини ўйлаб, эти жунжикиб кетди:

— Мен бу бекдан қўрқамен!

— Биз бор эканмиз, сиз ҳеч кимдан қўрқманг, бегим. Мен сизга заррача зулм ўтказишларига йўл қўймасмен.

— Мени маъзур тутинг, амирзодам. Аммо эгачингизни хоҳламаган одамига зўрлаб узатсалар, шунинг ўзи катта бир золимлик бўлмагайми?

Бу мантиқли сўзлар Бобирни довдиратиб қўйди:

— Золимлик... Ҳа, фалакнинг ўзи золим! Мен ҳам ҳар куни сўймаган одамларим билан муомала қилурмен. Хоҳламаган ишларимга мени аралаштирурлар. Давлат манфаатларини ўйлаб ўзимни-ўзим мажбур қилурмен. Бошқа иложим йўқ!

Бобир ўз ёшига ярашмайдиган бў сўзларни қанчалик қийналиб айтатётган бўлса, кўнглига ёқмайдиган, аммо муҳит, вазият талаби билан мажбуран адo этадиган ишларни ундан ҳам ортиқ азоблар билан қилиши сезилиб турарди. Бобир бу мушкул аҳволдун чиқишининг йўлини тополмай ич-ичидан эзилиб юрганини Хонзода бегим энди пайқади-ю, укасига раҳми келди. Бобирнинг подшоҳлигини унугиб, уни кичиклигида эркалатиб суйган пайтларини эслади.

— Бобиржон,— деди,— сиз ёлғиз иним, пушти-паноҳимсиз, мен сиз учун жонимни ҳам аямаймен! Агар сизга чиндан шу зарур деб ишонсан, ҳозирги гапингизга ҳам ризо бўлур эдим. Лекин мен сизнинг куйрак кўнглигини билурмен. Агар мен умрбод бебаҳт бўлиб қолсан, кейин сиз ҳозиргидан ортиқроқ изтироб чекурсиз!

— Худо хоҳласа, бебаҳт бўлмассиз.

— Кўнглим сезиб турибдир, агар шу одамга тушсан бебаҳт ўтурмен. Бобиржон, эгачингизнинг сўзига ҳам ишонинг. «Давлат манфаатлари» деб ўзингизни кўп эзманг. Сиз билан биз учун ҳам бу умр ганимат. Ўз кўнглимизга ҳам ишонишимиз керак! Кўнгил тоза бўлса, кишини алдамайдир!

Хонзода бегим шундай бир самимият билан ёниб гапирмоқда эдики, унинг қалбидаги олов гўё Бобирнинг қалбига ҳам ўтди. Шафқатсиз беклар муҳити ва подшоҳлик мажбуриятлари ёш Бобирнинг қалбини қаҳратон қишининг музларидай сиқиб ётар эди. Хонзода бегим эса ўзининг оловли нафаси билан гўё шу музларни эритар, Бобирнинг қалбига баҳор майинлиги, ёшлиқ эркин-

лиги яна қайтиб келаётгандай, эти жимир-жимир қиласди. Хонзода бегим яна кўэларига ёш олди:

— Бобиржон, сизнинг дилингиз беғубор, сиз нодир истеъодли фидокор йигитсиз! Бу беклар ўз манфаатларини ҳам «давлат манфаатлари» деб кўрсатишга ўрганиб қолганлар. Булар сизнинг ёшлигингидан фойдаланурлар. Аммо сиз сўймаган ишни «давлат манфаати учун» деб қилдирмоқчи бўлганларида кўнглингизга ҳам бир қулоқ солинг. Энг маҳрам дўстингиз — сизнинг мусаффо қалбингиздир. Сиз бу дўстингизга ишонинг, жоним!

Хонзода бегим ўтирган кўйича укасига қўл чўзиб, йиғи аралаш илтижо қилди:

— Мен сизнинг пок қалбингиздан адолат излаймен! Қалбингиз нима буюрса, сиз менга шуни буюринг! Мен розимен!

Бобир сакраб ўрнидан турди-ю, опасининг қўлларидан олиб, уни ўрнидан турғазди:

— Иифламанг, бас! — деди. Аммо Бобирнинг ўзи ҳам, кўнгли эриб, кўз ёшини зўрға тутиб турарди: — Сиз менга барча бекларимдан яқинроқсиз. Бир туғишган ягона эгачимсиз. Сиз туфайли не оғирлик келса майли, кўрай! Хотиржам бўлинг! Токи бормен, сўймаган одамингизга узаттирмасмен!

Хонзода бегим азбаройи қувонганидан укасини маҳкам қучиб, пешонасидан, кўэларидан ўпди.

САМАРҚАНД. Зафар ва кулфат

1

Бобирнинг қўшини Самарқандни бутун ёз ва куз бўйи қамал қилди. Бойсунқур мирзо етти ой шаҳар дарвозаларини беркитиб ётди-ю, ахири очлик ва танқисликка бардош беролмай, совуқ қиши кечаларидан бирида яқин одамлари билан Самарқанддан яшириқча чиқиб, Ҳисор томонга қочди.

Шаҳарда қолган беклар бундан хабар топганларидан кейин қалъа дарвозаларини очтиридилар. Бобирнинг уч мингга яқин қуролли кишилари зафар куйини чалиб, қўш нақоралар ва карнайлар садоси остида шаҳарга кира бошладилар.

Бобир беш яшарлигида кўрганилари яхши эсида

қолмаган экан. Самарқанднинг ҳар ер-ҳар еридан мөвий тоглар каби кўкка бўй чўзиб турган улуғвор гумбазларнинг қайсиси Улугбек мадрасасиники эканини, қайсиси Бибихоним мадрасасига мансублигини ёнида бораётгац Қосимбекдан сўраб билди. Фақат аркка яқинлашганда чап томонда кўринган улкан обиданинг Гўри Амир эканини жангчининг дубулғасига ўхаш гумбазнинг афсонавий гўзал тарам-тарамларидан таниди. Қанча даврлар ўтса ҳам, бўёқлари худди бугун сурилгандай яп-янги турган бу ажойиб бинолар, уларнинг тантанавор кўрниши ва офтобда галати товланиши Бобирнинг қалбидағи зафар завқига яна завқ қўшарди.

Арк жойлашган баландликка кўтарилаётганларида Бобир ўнгу сўлда кўринган айвонли уйлар ва ҳовлиларга кўз ташлади-ю, бирдан ўзининг асира қаллиғи Ойнша бегимни эслади. Ажаб эмаски, бегим мана шу уйлардан бирида дарча тирқишидан ғолибларга қараб турган бўлса. У бечора энди барча азоб-уқубатлардан қутулиб, Самарқанд қизлари орасида энг мўътабари бўлишини, ҳамма уни «ёш подшоҳимизнинг қаллиғи», деб эъзозлашини билармикан?

Бобир отини Қосимбекнинг отига яқинлаштириб, паст овоз билан сўради:

— Асирлардан хабар олишга одам тайинландими?

Қосимбек бу саволнинг яширин маъносига тезда тушунолмади:

— Амирзодам, қайси асирларни айтурсиз?

Бобир отаси тенгли Қосимбекнинг олдида қаллиғини тилга олишдан уялар эди. У алланечук ийманиб қоғонини солганидан Қосимбек гап нимадалигини фаҳмлади-ю:

— Ҳа, асиralарми?— деб, Бобир айттолмаган сўзни ўзи айтди.— Бу ишга Нўён Кўкалдошни тайин этганимен. Аввало Султон Аҳмад мирзонинг фарзандларидан хабар олинур. Қулингиз айтганмен. Қечқурун • Нўён сизга ахборот берур.

Арк ичига кирдилар. Бу ердаги энг улкан ва салобатли бино — тўрт қаватли Кўксарой эди. Кўксаройда жуда кўп фожиалар бўлган, талай шаҳзодалар шу ерда ўлдирилган. Шунинг учун Самарқанднинг сўнгги тождорлари Кўксаройда турмас эдилар, фақат машҳур Кўктош устига чиқиб, тантана билан тахтга ўтириш

маросимини ўтказар эдилар. Бобир ҳам аркнинг ўнг томонида жойлашган Бўstonсаройга тушди.

Оқшом Бўstonсаройда қандиллар ёндирилганда Бобир ўтирган хонаи хосга Нўён Кўкалдош кириб келди. Зар билан нақшланган бу хона ҳозир жуда совуқ эди. Улар иккови пўстинларини ва телпакларини ечмасдан кўрпача устида ўтириб гаплаша бошладилар.

Нўён Кўкалдошнинг овозида илиқ бир ҳаяжон сезилди. Бобир подшоҳ бўлганидан бери улуғ беклар атрофини ўраб олиб, Нўён Кўкалдошдай тенгдошлари анча четга чиқиб қолган эди. Бугун оралари яна илгаригидай яқин бўлиб қолганидан қувонган Нўён тўлқинланиб сўзлай бошлади:

— Амирзодамнинг номларидан олтин билагузуклар, асл матолар, субҳони ўриклар¹, лавзиналар² олиб бордик. Улуғ холангиз Меҳр Нигор хоним пешвоз чиқдилар...

Бобир ўз онасини эслади. Меҳр Нигор хоним—Қуттулғ Нигор хонимнинг туғишган опаси ва Султон Аҳмад мирзонинг катта хотини эди. Ойиша бегимнинг онаси ёшлигида ўлиб кетган, уни фарзандсиз Меҳр Нигор хоним тарбиялаб ўстирган, ҳозир ҳам унга она ўрнида ғамхўрлик қилар эди. Шунинг учун Меҳр Нигор хоним Бобирга ҳам хола-ю, ҳам бўлажак қайнана эди.

— Озиб кетибдилар,— деб давом этди Нўён.— Ошлиқдан³ жуда қийналмишлар. «Қаҳатчилик бўлиб, пулга ошлиқ топилмай қолди», дейдилар. «Зогора нонга ҳам зор» бўлдик, деб йиғлаб юбордилар. Утин-чўплари ҳам йўқ экан. «Совуқда дийдираф ўлтирибмиз», дейдилар.

— Бойсунқур мирзо шу қадар ноинсофлик қилибдирми, а?!

— Мирzonинг ўзи ҳам охирги пайтларда қорни тўйиб таом емаган бўлса керак, амирзодам. Етти ой қамалда ётиш осонми? Кўчаларда очдан ўлган одамларнинг ўликлари ётибди. Фақиру бечоралар очдан ўлмаслик учун эшак гўштини, ит гўштини ейишгacha етиб бормишлар... Биз бундан бехабар эканмиз. Дарҳол қайтиб келиб, Қосимбек қавчинга учрадим. Бир арава ун, гу-

¹ Субҳони ўрик — данаги ўрнига магиз солинган ўрик.

² Лавзина — бодом қўшиб ишланган ширинлик.

³ Ошлиқ — бу ерда дон, ун маъносида.

руч; бир арава ўтин, ўнта қўй олдик. Кейин ҳаммасини яна ўзим элтиб топширдим. Шунда мени ичкари уйга таклиф қилдилар.

Нўён Кўкалдош сирли кулимсираб, бир лаҳза тараддуланиб турди. Бобир унинг ҳозир Ойиша бегим ҳақида галирмоқчи эканини сезиб сабрсизланди:

— Сўзланг, Нўён, сўзланг!

— Тиллакори уйда Ойиша бегим юзларига оқ ипак парда ёпиб қаршимдан чиқдилар...— Нўён бир тўхтаб олди. Ойиша бегим унинг кўзига жуда кичкина норасида ўсмир қизчадек кўринган эди. У буни Бобирга айтишга журъат этмади:— Жуда нозик кўриндилар. «Хуш келибсиз» дедилар. Овозлари шундай майнин, шундай соғ.

Бобир Андижондан Ойиша бегимни ўйлаб келиб, энди уни кўролмаслиги, кўришса одатга хилоф иш қилиб, маломатга қолиши, балки сабрсизлик қилган каби қиз томонни ҳам ранжитиши унга бедаво бир дард бўлиб туюлди.

Нўён Кўкалдош бу дардга дори топмоқчига ўхшаб қўйнига қўл солди-ю, жажжигина оқ ипак халтача олди.

— Ойиша бегимнинг номидан сизга буни Мечр Нигор хоним бериб юбордилар.

Бобир халтачани қўлига олганда ичида ҳеч нарса йўқдай туюлди. Бофичини очиб халтачани кафтига секин ағдарган эди, икки дона гавҳар тушди. Ҳар бири гуручдан сал каттароқ, аммо хийла салмоғи бор. Жилоси нафис ва улуғвор.

— Сиртига ҳам қаранг,— деди Нўён.

Нозик мунчоқлар билан безатилган халтачанинг сиртига каштага ўхшатиб тикилган чиройли ипак ёзувни Бобир энди кўрди. «Нажоткоримизга» деган биргина сўз унга бутун бир муҳаббатномадек ширин туюлди. Ойиша бегим бу ипак ёзувни олдиндан тика бошлаган бўлса керак. Акс ҳолда Нўён борган заҳоти тикиб улгурмас эди. Демак, у Бобирнинг нажот келтиришига ишонгани!

— Амирзодам, қўлингиздаги гавҳарларнинг тарихини эшитинг,— деб давом этди Нўён.— Булар Султон Аҳмад мирзонинг саллаларига қадалган асл гавҳарлардан экан. Унинг мунглиқлари тилак билдириларки, Султон Аҳмад мирзонинг шу гавҳарлари сиз билан

бирга яна Самарқанд таҳтига чиқсину, сизнинг азиз бошингизда юз йил безавол порлаб турсин!

Султон Аҳмад мирзо тилга олинганда Бобирнинг кўнгли бир хира тортди. Аммо унинг қўйидаги гавҳарлар шундай мусаффо товланар эдики, уларда порлаган гўзал нур қайлигининг кўзларидан нишона бериб турганга ўхшарди.

— Майли, мунглиқлар тилагандек бўлсин! — деди Бобир Нўёнга.

Сўнг секин қарсак чалиб, дасторпечни чақиртирди. Дасторпеч бу гавҳарларни Бобирнинг тантанали маросимларда ўрайдиган салласига қадаб қўйди.

Шу оқшом Бобир ғойибона меҳр қўйган қаллигини кўргиси келиб ғазал ёза бошлади:

Жамолинг васфини, эй ой, неча элдан эшигтаймен,
Не кун бўлғай висолингга мени дил хаста етгаймен?

2

Қишилласи авжида. Изғиринли еллар эсади. Қўл-оёқларига кишин солинган, кийимлари йиртиқ маҳбуслар Самарқанднинг Регистон майдонида совуқдан қалтираб, шаҳар қозисининг ҳукмини тинглайдилар.

Ишончли амалдорларнинг аниқлашларига қараганда, булар Бобир мирзога хиёнат қилганлар: қамал пайтида унга маҳфий одам юбориб, «кечаси келинглар, дарвозани очиб берурмиз», деганлар. Бобирнинг бир ласти ботир навкарлари Фори Ошиқон олдидан қалъага ошиб ўтганда, хиёнатчилар уларни душманларига тутиб берганлар.

— Биз эмас! Тутиб берганлар қочиб кетмишлар! — инғламсираб қичқирди маҳбуслардан бири.

Аммо унинг сўзига ҳеч ким эътибор бермади. Фармони олийга биноан жаллод уларнинг қўлларини орқаларига боғлаб, маҳсус чуқур олдига чўккалатиб қўйдида, бўғизларига ханжар тортди. Қатл этилганларнинг иссиқ қони майдоннинг тошлирига сачраб, совуқда ҳовур чиқариб буғланар эди...

Кечаси бўралаб ёққан қор бунинг ҳаммасини бекитиб, борлиқни оппоқ қилиб кетди. Эртаси куни тушдан кейин ҳаво юмшаб, гумбазларнинг қорлари эриб туша бошлади.

Пешин намозидан кейин Бобир мирзо отланиб Самарқанд расталарини айланишга чиқди. Ёнида эшик оға Қосимбек, Аҳмад Танбал ва Хонқули деган яна бир бек орқароқда навкарлар билан келишмоқда. Шаҳарнинг қаерида нима борлигини яхши биладиган самарқандлик кекса шоир Жавҳарий уларга йўл кўрсатиб, олдинда боряпти.

Улугбек қурдирган улкан гумбазли хонақодан ўтганларидан кейин Жавҳарий кунчиқиш томондаги кўчани кўрсатди.

— Амир Алишер Самарқандга келганларида мана шу кўчадан кўп ўтар эдилар. Мазкур кўчанинг охирида Алишербекнинг устозлари фақиҳ Абдуллайс истиқомат қилур эди. Уйлари ҳали ҳам бор.

— Сиз Мир Алишернинг суҳбатларида бўлганмисиз? — сўради Бобир.

— Ҳа, ёшимиз Алишербек била тенг эди, аммо фақир у зотни устоз ўрнида кўрур эдим, мудом ашъорларимни ўқиб бериб, маслаҳат олур эдим. Унутмаган эканлар, «Мажолисун нафоис» номли китобларида фақирни ҳам тилга олмишлар.

Соқоллари оппоқ, қошлирига ҳам оқ тушган Жавҳарий ҳозир Бобирнинг ҳавасини көлтирди. Қани у ҳам Навоийнинг назари тушган шоирлардан бўлса! Аммо Бобир ҳали машқ шеърлар ёзишдан нарига ўтган эмас, уларни бирорга кўрсатишга уялади. Шундай бўлса ҳам катта шоир бўлиш орзуси уни ҳеч тарк этмайди. Мана шу орзунинг таъсирида бугун Бобир ўзига йўл кўрсатувчиликка Самарқанднинг машҳур бекларини эмас, Навоийни кўрган мўътабар шоирни талкиф қилган эди.

Жавҳарий уларни нонвойлар маҳалласига бошлади. Қўчалар алланечук ҳувиллаган. Босилмаган қор отларнинг тиззасига чиқади. Соя жойларда изғирин юзни ялаб ўтса ҳам офтоб тушиб турган пахса деворлар ва том бўғотлари эриган қордан ҳўл бўлиб борар эди.

Бобир томларга қаради. Бирортаси куралмаган. Том кураётган бирорта одам кўринмайди. Нонвойлик растасига келсалар, қатор дўконларнинг ҳаммаси ёпиқ. Бобирнинг таажжуби ортиб, Жавҳарийга қаради:

— Мавлоно, нонвойлар кўчиб кетганилар?

— Мирзо ҳазратларп, уч ойдирки, растага нон чиқмайди. Чунки ун йўқ. Қамалда кўп нонвойлар очдан

ўлиб кетди. Одамлар ҳолдан тойган. Томга чиқиб қор курашга ҳам мадорлари йўқ.

Бобир бунга сабабчи бўлган одамдек ўнғайсизланиб Қосимбекка қаради. Қосимбек эса шоирга кесатиброқ гапидри:

— Нонвойларнинг тирик қолганлари ҳам бордир, мавлоно?

— Албатта, бор. Лекин ёрдамга муҳтож. Қани, энди амирзодам буюрсалару ионвойларга ун берилса. Расталар яна очилса, Самарқанднинг машҳур нонларидан одамлар тўйиб еса.

Бобир Жавҳарийнинг айтганини қилмоқчи бўлаётганини сезиб, Қосимбек бунинг олднин олишга интилди:

— Амирзодам, бизда ҳам ошлиқ оз қолди. Қўшинга заҳира керак. Расталарга ҳозир ун беролмасмиз. Балки кейинроқ...

Кекса шоир Бобирга умид билан қараб турибди.. Шу пайт унинг қора мовут чакманими, хиёл эгик елкасими, калта қирқилган соқолими,— нимасидир Бобирга Навоийнинг Беҳзод чизган расмини эслатди. Бобир мавлонони ноумид қилса, Навоийнинг умидини ҳам оқлолмайдигандай бўлди. У Қосимбекка буйруқ оҳангода гапидри:

— Биз унни расталарга эмас, нонвойларга бермоғимиз керак. Ишончли бир киши назорат қилсин, нонвойлар нон ёпиб, бизнинг номимиздан очларга тарқатсинлар. Беш-олти қоп ун билан қўшин заҳирасиз қолмас. Жиззахга юборилган карвон эрта-индин ошлиқ олиб қайтфуси!

— Саховатингизга офарин, мирзо ҳазратлари!— деб Бобирнинг сўзларига фақат Жавҳарий қувонч билдириди.

Семиз тўриқ айғирнинг жиловидан тортиб турган Аҳмад Танбал мавлонога қараб пўнғиллади:

— Амирзодам Бойсунқурдан қолган очларнинг қайси бирига ошлиқ етказсинлар? Биз буларни боқишига келдикми?

Аҳмад Танбал, «амирзодам» деб, гўё Бобирга жон куйдириб гапирган бўлса ҳам аслида Бобирнинг ҳозирги буйруғидан норозилиги сезилиб турарди.

Аҳмад Танбал Ўшда Хонзода бегимга одам қўйиб ниятига етолмаганидан бери Бобирга қарши адовати

аввалгидан ўн ҳисса ортиқ бир куч билан ҳуруж қилмоқда эди.

— Жаноб Аҳмадбек,— деди Бобир.— Биз Самарқандни боқиши учун келмаган бўлсак, талаш учун ҳам келган эмасмиз!

Танбал кечада заргарларни талатганини эслаб, кўзлари бир бежо бўлди. Аммо ўзини осойишта кўрсатиб:

— Сўзингиз тўғри, мирзо ҳазратлари,— деди.— Бироқ шунча жанг жадал билан олган шаҳримиздан озгина ўлжадор бўлишга наҳотки ҳаққимиз йўқ? Ахир фолибларнинг ўлжа олиши ота-боболаримиздан қолган русум-ку!

Танбалнинг гапи навкарлар орасида турган Хонқулибекка жуда ёқиб тушгани унинг кулимсираб бош ирганидан билинди. Кўпчилик навкарлар ҳам Аҳмад Танбални ҳақ деб билар эди, Самарқанддан дуруст ўлжа ололмаган бекларнинг барчаси норози бўлиб юргани маълум эди.

Шу топда Бобир ўзини икки ўт орасида қолгандай сезди. Беклару навкарларнинг кўнглига қарай деса бу ёқда раият очарчиликдан ўляпти. Раиятни очлик чангалидан қутқазай деса, беклару навкарлар: «Булар нега бизнинг насибамизга шерик бўлади?»— деб дод солади.

Бобир Қосимбекка умид билан кўз тикди-ю:

— Очарчиликка фақат Бойсунқур мирзо сабабчими?— деди.— Агар биз шаҳарни етти ой қамал қиласак, бу баҳтсизлик бўлмаслиги мумкин эди-ку!

Қосимбек Бобирнинг Танбал қаршисида яккаланиб қолишини истамади-ю, мунозарани тезроқ тутатишга тиришди:

— Амирзодамнинг сўзлари қулингизга сари тож бўлсин! Эртагаёқ нонвойларга ун бериб, очларга нон ёптириб тарқатишни мен ўз зиммамга олурмен!

Бобир Қосимбекка миннатдорона кўз ташлаб:

— Гап тамом,— деди. Сўнг Жавҳарийга юзланди:— Қани энди саҳҳофлар¹ растасига ўтайлик.

Жавҳарий уларни қинғир-қийшиқ бир кўчага бошлар экан, Аҳмад Танбал, қовоқ-тумшуғи осилиб, Бобирнинг кетидан эргашди. Кенг бир саҳнга чиқдилар. Ёпиқ турган саҳҳофлик дўконлари кўринди. Икки дўкон ора-

¹ Саҳҳоф — муқовачи. Китоб савдоси билан саҳҳофлар шуғулланган,

лиғидаги икки тавақалик дарвоза ичидан аввал қандай-дир шовқия эшитилди, сўнг оёқ яланг, бош яланг бир кампир дод солиб чиқди:

— Вой боламни ўлдирган худонинг ўзи ўлсин! Оч қолиб шишиб ўлсин!

Кампирнинг кетидан ўрта яшар озғин бир эркак югуриб чиқди-ю, отлиқларни кўриб, қўрққанидан бирлаҳза ағрайиб туриб қолди. Кампир ҳамон бор овози билан бақириб худони қарғарди:

— Худонинг ўзи қамалда қолиб ўлсин! Илоё менинг боламдай очдан ўлсин! Ўлсин!!!

Жавҳарий отини эркак киши томонга буриб:

— Мулла Қутбиддин, нима бўлди? — деб сўради.

Мулла Қутбиддин энди ҳушини йиғиб, кампирга қараб чопди. Озғингина мадорсиз кампирни судраб ҳовлига олиб кириб кетди-да, энтикиб қайтиб чиқди. Қўл қовуштириб отлиқлар томонга келар экан:

— Афв этгайсизлар,— деди.— Оғамнинг заифаси фарзанд доғидан телба бўлиб қолди. Бечоранинг ўғил-часи очликдан кунжара еган экан, шишиб ўлди.

Оғир сукунатда Бобирнинг:

— Яна бу шўрликлардан ўлжа олмоқчи бўлурлар! — деган кинояли сўзлари эшитилди-ю, Аҳмад Танбал билан Хонқулибекка ўқдай тегди.

► Мулла Қутбиддин Самарқанднинг таниқли саҳдофларидан эди. Мавлоно ким келганини саҳдофга секин айтди. Мулла Қутбиддин кўпдан бери очилмаган дўконини шоша-пиша очди. Бобир отдан тушиб, мавлоно билан бирга дўконга кирди. Мулла Қутбиддин бисотида бор энг нодир китобларни бир-бир олиб, чангларини артиб, Бобирга кўрсата бошлади. Қимматбаҳо зарҳал муқовалар ичиди Маҳмуд Кошғарий, Абдураҳмон Жомий... Шарағиддин Али Яздийнинг Беҳзод суратлари билан безанган «Зафарномаси»... Абдураззоқ Самарқандий... Ҳа, мана, Навоийнинг «Мезонул авзонӣ». Бу китобни Бобир кўпдан бери сўроқлаб юрган эди. У олинга топилмайдиган ажойиб китобларнинг кўплигини кўриб, афсонавий хазинага кириб қолгандай ҳаяжонлар, нуқул:

— Яна не бор? Яна? — деб сўрарди.

Мулла Қутбиддин ҳам бири биридан ноёб китобларни унинг олдига қалаштириб ташлади. Машҳур хаттолар катта пуллар эвазига кўчирган, ҳар бир варагига

нафис безаклар ишланган бу қўлёзма китобларнинг ҳар бири бир неча минг динор туришини Бобирнинг ёнида турган Қосимбек ҳам билар эди. У Самарқанд хазинаси шипшийдам эканини, Андижондан олиб келган олтинлари эса кўпга бормаслигини ўйлаб, Бобир танлаётган китобларга ташвишланиб қараб турарди. Ниҳоят, Бобир ажратиб олган китоблар ўндан ошганда, Қосимбек секин шипшиди:

— Амирзодам, ҳозир хизоначи йўқ...

Китоблардан бошқа нарсани унуган Бобир Қосимбекнинг шамасини тушунмади.

— Хизоначини юборурмиз,— деди ва танлаган китобларини саҳҳофга кўрсатди:— Ҳаммасини ҳисоблаб қўйинг. Китобдор билан хизоначи пулинни тўлаб олиб кетурлар.

Мулла Қутбиддин қўл қовуштириб:

— Бош устига!— деди-ю, аммо унинг ниманиндири айттолмай тараддуланаётгани Бобирга сезилди.

— Не тилагингиз бор, мулло? Айтинг, тортишманг. Китобларингиз бебаҳо!

Бобир бу китоблар учун молу дунёсини аямайдигандай кўринди. Саҳҳоф дадилланиб:

— Мирзо ҳазратлари,— деди.— Ҳозир пулга ошлиқ топилмайди. Болаларим «нон», деб йиғлаб, ҳар куни юрак-бағримни эзурлар. Агар иложи бўлса, озгина ун...

Бобирнинг кўз олдига бояги телба кампир келди-ю, саҳҳофнинг муҳтоҷлигини олдинроқ сезмагани учун ўзидан койинди. Қосимбекнинг нонвойлик растасидаги эътиrozлари эсига тушиб, унга ҳеч нима демади. Яна бекларнинг жинини қўзғамаслик учун саҳҳофга керакли нарсани сарой ошпазидан бериб юбёришни қўнглига тугди. Саҳҳофга паст товуш билан:

— Фам чекманг,— деди.— Тилагингиз амалга ошур. Хайр!

Бобир ташқарига чиқди. Аҳмад Танбал ҳамон отидан тушмай ўшшайиб турар эди.

Шу куни шомда китобларни олиб кетишга келган китобдор ва савдарлар саҳҳофга сўраган пулинни беришид-ю, унинг уйига бир қоп ун ва битта семиз қўй тушириб кетишиди.

Эртаси куни нонвойлик растасига Қосимбекнинг навкарлари бир арава ун олиб келганликлари, қор тагида совиб ётган тандирларга ўт қаланиб, иссиқ нон ҳиди

атрофга таралгани, отлиқ жарчилар подшо номидан очларга нон улашилишини эълон қилгани ҳамманинг қулогига бориб етди. Нонвойлик растасига келиб, хушбўй буғдой нонининг таъмидан кўзи чарақлаб очилаётган очлар Бобирдан нечоғлиқ мамнун бўлсалар, тамагир бек ва навкарлар: «Бизнинг оғзимиздан олиб, авбошларга берди!»— деб, ёш подшоҳдан шунчалик норози эдилар. Самарқанддаги очлик ва танқисликдан безган бир қисм жангчилар Андижонга қайтиб кетишга интила бошлидилар.

3

Тандирдан узилган нонларни қопга солиб чиқиб очларга улашаётган навкарлардан бири—Тоҳир эди. Аввал у ҳам «менга найза санчиб, онамнинг ўлимига сабаб бўлган ёғийларга хизмат қилгани келганми мен?!»— деб аччиқланди-ю, лекин увада кийинган, бўйинлари қилириқдай бўлиб қолган оч ўсмирларга, чолларга, аёлларга кўзи тушганидан кейин ҳовури босилди. Ичкаридан ола қопда иссиқ нон кўтариб чиқар экан: «Балки бу аёлларнинг орасида Робия ҳам бордир?— деб ўйланди.— Еки Робияни кўрган-билганлар учраб қолар?»

Тоҳирнинг бошида тулки телпак, эгнида почапўстин, сўнгги ойларда мудом отлиқ юриб, қадам олиши хийла ўзгарган. Узангига ўрганиб кетган оёқлари ерда аввалидай равон одимлай олмайди. Аммо қўллари чавандозча бир чаққонлик билан қопга тез тушиб-чиқади.

Кўзлари лўқ очлар Тоҳирнинг ўзини эмас, нон улашаётган қўлларини кўришади, холос. Уларнинг кўпиги имиллаб, кичик-кичик қадам ташлаб жуда секин ҳаракат қилишади. Йўлларида кичкина ариқ ёки дўнглик учраб қолса, ўтолмай тўхтаб қолишади. Бақувватроқлари суюб, кўмаклашиб ўтказиб қўйишади.

Тоҳир одамларнинг ҳар бирини синчиклаб қўздан кеширади. Наҳотки уларнинг орасида Робияни кўрган-билган бирорта одам бўлмаса?

Ана, бир аёл тўн ёпиниб, ярим ўгирилиб турибди. Тоҳир унинг ёнидаги кампирга қараб:

— Холалар, ораларингда андижонлик ёки қувалик аёллар борми?— деб сўради.

Кампир тоҷикча талаффуз билан:

— Ундоқлар йўқ, айланай,— деди.

Тоҳир юзлаб марта айтган сўзларини такрорлаб:

— Синглимни излаб юрибмен,— деди.— Султон Аҳмад мирзонинг аскарлари Қувадан олиб қочиб кетганига тўрт йил бўлди.

— Бечора!— деб қўйди кампирнинг ёнидаги аёл.

Нарироқда нонга кўз тикиб турган бир киши сабрсизланиб йўталди. Тоҳир нон улашишда давом этар экан, ўттиз беш ёшлардаги, сийрак малла мўйловли новча бир кишининг қаршисида тўхтади.

— Сиз илгари навкар бўлганмисиз?

Юзи шишинқираган бу одам хавотирли товуш билан:

— Ҳа,— деди.

— Қачон?

— Кўп жил бўлди.

— Андижонга боргандикисиз?

— Жўқ... берироғидан қайтқанмиз.

Бу одамнинг талаффузи ўшанда Робияни қопга солиб олиб кетган «жўқ»чи йигитларни эслатди-ю, Тоҳирнинг вужуди қалтираб кетди. Эҳтимол, бу ўша босқинчиларнинг биридир?

Тоҳир орқасига ўгирилиб, нонвойхона томонда турган шеригини чақирди. Қопнинг тагида қолган нонларни унга берди-ю, малла мўйловли кишини билагидан олиб бир четга бошлади. У одам қўрқувдан бўшашиб, каловланиб, тўхтаб қолди:

— Укажон, мен бир бечора одамман! Мени қўйиб жубаринг! Нонға келиб эдим... Нонға!..

Тоҳир калаванинг учини шу одам топиб бериши мумкинлиғини сезиб мулойимроқ гапиришга тиришди.

— Нон оласиз. Сизга кўпроқ нон берамен. Менга ростини айтинг. Султон Аҳмад мирзода навкар бўлганмисиз?

— Бўғанмен.

— Андижондан беридаги Қуванинг кўпригидан ўтганмисиз?

— Қайси кўприк? Синиб кетиб, бизни хароб қилған кўприкма?

— Худди ўзи!— деди Тоҳир ғазаб аралаш қувонч билан. Мана, ўша босқинчи! Тоҳир унга ҳозир ханжар урса бир аламдан чиқар эди. Аммо Робия нима бўлади? Буни ўлдирса, Робияни кимдан сўроқлаб топади?

Тоҳир малла мўйловли йигитни ёқасидан олиб қаҳр билан силкитди:

— Робия қани? Айт тезроқ!

Очликдан дармони кетиб, зўрға юрган йигит Тоҳирнинг силталашидан тўкилиб, парчаланиб кетадиганга ўхшарди. У нафаси ичига тушиб:

— Қа-қайси Рокия? — деди.

— Рокия эмас, Робия! У қизни Қувадан олиб қочиб қаёқса олиб бордиларинг? Ҳозир қаерда? Ростини айтмасанг каллангни оламен! Айт!

— Ука! Укажон! Мен Робия деган қизни кўрганим жўқ. Үлдирсанг, майли ўлдир, лекин мендан бекорга гумонсирама, ўшандা мен қиз обқочадиган аҳволда эмас эдим. Туғушган укам кўприкдан жиғилиб, сувға оғиб ўлди. Қамишларнинг орасидан уч кун қидириб ўлигини тополмадим. Балчиқ жутиб кетган экан.

Тоҳир ўша кўприкни ўзи бузганини эслади, малла мўйловли йигитнинг кўзлари ёшланганини кўрди-ю, унинг ёқасини қўйиб юборди.

Робияни қопга solaётган «жўқ»чи йигитлардан бири иккинчисини «Жуман» деб атагани Тоҳирнинг ёдида қолган эди. У қаршисида кўзлари мўлтираб турган одамга тикилиб:

— Отинг нима? — деди.

— Отим Мамат.

— Маматми ё Жуманми?

► — Ука, ишонмасангиз мана шу маҳалланинг одамларини чақириб сўранг. Отим Маматлигини ҳамма билади. Ўзим кўнчи косибман.

Тоҳир ўзича ўйланди: «Агар укаси Қувада балчиқса ботиб ўлган бўлса, бу ҳам менинг гирибонимдан олишга ҳаққи бор!» Шу ўй таъсирида Тоҳир жаҳлидан тушди. Маматга яна «сиз»лаб гапира бошлади:

— Жуманни билармидингиз?

Мамат пешонасини ушлаб, ниманидир эслашга тиришиди:

— Тўхтанг, тўхтанг, Жуман маймоқ деганимиз бўлар эди. Шериклари билан ўша ёқдан иккита қиз обқочиб келган деб эшитиб эдим.

— Самарқандга олиб келганми?

— Қизларними? Бунисини билмадим. Үратепанинг нарёғида Оқсув деган сой бор. Оқсувга жетганимизда подшомиз ўлиб қолди. Ушанда бир алғов-далғов бошланди, мана, ҳалигача босилмайди. Навкарлик ҳам жонимга тегди, бўшаб кетдим.

— Жуман маймоқ ҳозир қаерда?

— Билмадим-ов. Уч-тўрт жилдан бери кўрган эмасман. Баттарин жигит эди, ўлиб кетдима ё бошқа, подшонинг хизматига ўтиб кетдима. Подшо ҳам кўп-ку. Тошкентда Маҳмудхон дегани, Туркистонда Шайбонийхон дегани. Ҳисорда яна бирори.

— Бу подшоларнинг уруш-жанжаллари бошларидан қолсин! — деди Тоҳир куюниб. — Сиз бир косиб бўлсангиз. Мен бир деҳқон эдим. Келиб-келиб биздай заҳматкашларни бир-бirimizга душман қилиб қўйган замона-нинг уйи куйсин!

Мамат Тоҳирнинг ханжар изи қолган юзига энди ботиниброқ қаради:

— У қиз кимингиз бўлар эди, ука? Синглингизми?

— Қўзимнинг оқу қароси эди!

Мамат гап нимадалигини фаҳмлаб, Тоҳирга хиёл ҳафратланиб тикилди. Сўнг унинг армон тўла кўзларини кўриб, бу йигитга ўзини алланечук яқин сезди ва унга тасалли бергиси келди:

— Худо хоҳласа товилади! Менинг таниш-билишларим кўп, ука. Сўроқлайман. Хотинимга айтаман. Аёллардан суриштиради.

Маматнинг астойдил ёрдам бермоқчи эканини сезган Тоҳир уни енгидан олди-ю:

— Бу ёққа юринг, — деди. Маматни нонвойхонанинг йўлагига олиб кирди-да, ичкаридан тўртта нон олиб чиқди.

— Олинг! Сиз бу ерга нонга келган эдингиз.

Мамат нонларни титроқ қўллари билан олиб, қўйнига тиқди. Иссиқ буғдой ноннинг ҳиди ва тафтидан оғир-оғир нафас олиб, устма-уст ютинди. У ҳар қанча оч бўлса ҳам Тоҳирнинг олдида дарҳол нон кавшашдан ўзини тутди. Фақат ноннинг ҳидидан маст бўлгандай эзмаланиб гапира бошлади:

— Нондай азиз бўлинг, ука. Биз кўрган кунларни ҳеч кўрманг. Қўлдан бергәнга қуш тўймас. Жотиб жесанг бу нон икки кунга ҳам жетмайди. Лекин мен шунинг кучи билан қишлоғимга жетиб оламан. Ана у товнинг орқасида оға-иниларим бор. Биз ўзбекнинг қўянқулоқ уруғиданмиз. Қишлоғимга жетиб борсам бир-икки қоп ғалла товиб келаман. Лекин бўш қоп тикка турмас экан, ука. Битта чўбир отим бор эди, кузда сўйиб жеб қўйдик. Пиёда кетай-десам, оч одам товда жигилиб со-

вуқда қотиб ўламан деб қўрқдим. Мана энди қўрқма-
сам бўлади..

— Мен сизни қаердан топамен? — деди Тоҳир унга
аввалги ваъдасини эслатиб.

— Кўнчилик гузаридаги йийм бор. Мамат полвон де-
сангиз, ҳамма билади. Бир вақтлар полвон эдик, ука.
Мана энди гавдамизни зўрга кўтариб журибмиз.

— Эсингизда бўлсин, қизнинг оти Робия.

Мамат полвон бу номни бир-икки такрорлаб — хоти-
расига жойлагач:

— Агар хабари чиқса, сизни қаердан товаман? —
деди.

— Қосимбекнинг навкаримен. Отим Тоҳир.

— Хўп, Тоҳирбек, мен сизни қидириб товаман. Биз-
нинг одамлар сизга жаманлиқ қилган бўлса, сиз менга
жахшилиқ қилдингиз. Бу жаҳшилиғингизни албатта
қайтараман. Хайр!

Тоҳир унинг орқасидан қараб қолди. «Қувада укаси-
нинг балчиққа ботиб ўлганига мен сабабчи бўлганимни
бўлса нима қиласкин?» — деб ўйланди.

Мамат эса нарироққа бориб шоша-пиша қўйнига қўл-
тиқди-ю, иссиқ иондан бир бурда узиб олиб, тез оғзиға
солди.

4

Андижонлик бек ва навкарлар «Самарқандни олсак
ҳамма мушкулларимиз осон бўлади», деб ўйлаган эди-
лар. Бироқ энг катта ишқаллар Самарқанд олинган-
дан кейин бошланди. Уч минг кишилик қўшиннинг беш-
олти минг от-улови бор. Қаҳратон қишида қамалдан
абгор бўлиб чиққан шаҳарда на очларни тўйдириб бўла-
ди, на қўшинга озиқ-овқат етказиб бўлади, на отларни
ем-хашак билан таъминлаб бўлади. Шаҳар дарвозалари
очилган, бу ёфи Ўратепагача, бу ёфи Қаршигача барча
томонларга тия карвонлари жўнатилган, бозор ва раста-
ларни тирилтириш учун турли чоралар кўрилаётган
бўлса ҳам пойтахтда ҳаёт ҳали-бери изга тушадиганга
ўжшамас эди. Самарқанд сўнгги йилларда кўп марта
қўлдан-қўлга ўтиб, даҳшатли талон-торожлардан қаш-
шоқланиб қолган эди.

— Бу мушкулотлар кўз очиб-юмгунча ўтиб кет-
гай, — деб, машваратларда Бобирнинг устози Хўжа Аб-

дулла андижонлик бекларни сабр-қаноатга чақирап эди:— Баҳор яқин, пишиқчиликка етсак оғир кунларни кўрмагандек бўлиб кетурмиз. Танқисликлар ўтур, аммо бу ёғи Қарши-ю, Шаҳрисабзгача, у ёғи Ўшу Ўзгантигача — шундай улуг мамлакат қолур.. Тангirim бизга шундай катта кишварни иноят қилгани учун, биз Самарқандай оламшумул доруссалтанага мұяссар бўлганимиз учун шукроналар айтмоғимиз керак. Бобир мирзонинг орзулади шулким, Мовароуннаҳр яна Улуғбек давридаги каби бирлашса, пойтахт аслига қайтса, ҳамма вилоятлар ҳамжиҳату обод бўлса. Амирзодамнинг бу орзулари сизу бизнинг муқаддас мақсадимиздир. Илоҳи омин, парвардигори олам бизни бу мақсадимизга ҳам етказсин!

Бу гаплар Хонқулибек ва Аҳмад Танбалга ўхшаган бекларнинг ғашига тегса ҳам улар машваратга тўпланган бошқа беклар қатори:

— Илоҳи омин!— дейишиб, юзларига фотиҳа тортадилар. Чётдан қараган одам буни яқдиллик белгиси деб ўйлайди.

Аммо беклар машваратдан янги бир вазифани зиммаларига олиб, уй-уйларига тарқалганларидан кейин хилватда иккита-учтадан бўлиб олиб, ғийбатга тушиб кетишиади:

— Хулласи калом, Бобир мирзонинг Улуғбекдек улуг одам бўлмоқчи эканлар-да, Аҳмадбек?— сўрайди Хонқулибек истеҳзо қилиб.

Улар баҳмал кўрпа ёпилган иессиқ сандалнинг иккичетида ўтириб кечки таомни бирга емоқда эдилар. Аҳмад Танбал қазидан бир парра олиб, киноя билан кулди:

— Ҳа, Бобир мирзонинг улуг одам бўлишлари учун яна биргина нарса етмай турганмиш.

— Ҳўш?

— Бугун машваратда айтдилар-ку! Самарқанд деҳқонлари очарчиликда уруғлиқ донларини еб қўйган эмишлар. Биз Қаршига карвон юбориб олиб келган донларимизни деҳқонларга қарз берур эмишмиз.

— Дард устига чипқон!

— Илож қанча, Хонқулибек! Еш подшоҳимиз улуг бўлишлари учун ҳаммасига чидайсиз. Яна бу кишим Самарқандга куёвлар, қайлиқлари бор. Домод раиятга ўзларини яхши кўрсатмоқлари зарур. Бу ҳам етмагандай,

ёш подшоҳимиз ҳар ҳафтада шоирларни тўплаб мушо-
ира ўтказмоқдалар.

— Шоир ҳам бўлмоқчилар шекиллй-да!

— Ҳа, бизнинг насибамизга қаёқдаги шоирларни
ҳам шерик қилганлари ана шу сабабдан! Хазинадаги
олтинларни совуриб, қатор-қатор қимматбаҳо китоблар
олишлари ҳам ана шундан!

Хонқулибек соқолини рижимлаб:

— Этак силкиб Андижонга кетай десам рухсат бер-
майдир,— деди.— Тангри ҳаққи, Бобирингиздан тўй-
дим, Аҳмадбек!

Аҳмад Танбал заҳарханда қилиб кулди-да, ўрнидан
турив эшикни зичлаб ёпди. Жойига келиб ўтиргач:

— Хонқулибек,— деб товушини пасайтириб гапира
бошлиди,— беклар бўлмаса, подшоҳларнинг илкидан ҳеч
иши келмайдир. Навкарнинг кўпчилиги бизники. Жанг-
ни биз қилдик. Азобни биз тортдик. Энди бундай муте
бўлиб, ёш йигитчадан рухсат сўраб ўтиromoғимиз не ке-
рак?

— Гапингиз рост!— шивирлади Хонқулибек.— Под-
шо бўлса ўзига! Рухсат бермаса бермасин, мен барибир
кетурмен!

— Мен ҳам бу ерда хор бўлиб юрмоқчи эмасмен.
Омон бўлсан, подшоҳ топилур. Аҳсида Жаҳонгир мирзо
бор. Бухорода Султон Али мирзо бор. Буларнинг уруғи
кўп. Ҳаммасига сизу биздек беклар керак. Сизга менинг
маслаҳатим — Андижонда кўп турманг. Иликка тушиб
қолурсиз.

— Аҳсида борайми?

— Ҳа, Аҳсида Узун Ҳасанга учранг. Сизни Жаҳон-
гир мирзонинг хизматига олур.

— Олурмикин? Балки Жаҳонгир мирзо Бобирга қар-
ши беролмас?

— Сизу биздай беклари кўпайса борур! Жаҳонгир
мирзо Андижон таҳтига ишқибоз...

„Икки бек шу куни гапни бир жойга қўйдилару эрта-
си куни кечаси Аҳмад Танбалнинг ишончли одамлари
Феруза дарвозасида соқчилик қилаётган пайтда Хонқу-
либек элликтача навкари билан секин шу дарвозадан
чиқиб қочди. Орадан бир ҳафта ўтгач, Аҳмад Танбал-
нинг ўзи Зоминга карвонни кузатиб бориш баҳонаси би-
лан навкарларини эргаштириб кетди-да, Самарқандга
қайтмай, тўғри Аҳсида йўл олди. Шундан кейин шаҳар-

дан ташқарига зарур иш билан юборилган бек ва шавкарларнинг қайтиб келмаслик ҳоллари тобора кўпая бошлади. Кечалари қалъа деворларидан ошиб тушиб қочаётганлар бунинг устига қўшилди. Қишининг охирига бориб Самарқандга Бобир билан келган бек ва шавкарларнинг ярми ҳам қолмади. Одами жуда сийраклашиб қолган Бобир кетганларни қайтариб келиш учун энг содиқ беклардан бирини Андиконга юборди. Бироқ орадан йигирма кун ўтгач, бу бекни Аҳмад Танбал ва унинг тарафдорлари Андикон билан Аҳси оралиғида тутиб олиб ўлдирганлиги ҳақида хабар келди. Фарғона водийисида ёмон бир фитна бошланганига энди шубҳа йўқ эди.

Фитначи бекларнинг бир қанчаси Хўжа Абдуллага қўй берид, унга мурид бўлганликлари маълум эди. Бобир Қосимбек билан маслаҳатлашиб, охири Хўжа Абдуллани Андиконга юборди. Бобир тахтга ўтирган кезларда Хўжа Абдулланинг гапига кирган Узун Ҳасан ва бошқа фитначи беклар бу гал унинг насиҳатлари-ю, вайдаларига мутлақо қулоқ солмадилар. Ниҳоят, фитначилар Андиконга ҳужум қилдилар, Хўжа Абдулла бошлиқ содиқ беклар шаҳар дарвозаларини беркитиб, қамалда қолдилар.

* * *

Бу мудҳиш хабар Самарқандга келганда Бобир қаттиқ бетоб бўлиб, Бўстон саройнинг иккинчи қаватидаги хобгоҳда иситмалаб ётган эди. Андикондан келган чопар ўрам қилиб сўргичланган мактубни ясовулга кўрсатди-ю, аммо бермади:

— Ҳазрати хоним «амирзоданинг ўз илкларига беринг», деб буюрганлар!

Бобир ҳар куни неча қайта «Андикондан чопар борми?»— деб сўрар эди. Ясовул чопарни дарҳол юқорига бошлади.

Хобгоҳ эшиги олдида уларни Бобирнинг шахсий табиби бўлган кичик жуссали мўйсафид тўхтатди:

— Бу китобатни аввал Қосимбек ўқимоқлари керак. Агар хушхабар бўлса, кейин амирзодамга берурсиз.

— Оналари буюрганлар, устодлари Хўжа Абдулла ҳам тайинлаганлар, амирзодамнинг ўзлари ўқимоқлари керак.

— Ёмон хабар мирзо ҳазратларини хароб қилиши

мумкин!— деди табиб куюниб.— Асли ўзлари тумовлаб тузалиш арафасида эдилар. Ташвиш устига изтироб, изтироб устига кулфат, ҳаммаси қўшилди-ю, муолажани охирига етказмай туриб кетдилар. Мана бугун узликиб аҳволлари оғирлашиб ётибдилар!

— Андижон хавф остида. Агар тезроқ билдирамасак, кейин кеч бўлур, биздан норози бўлурлар!

— Йўқ, мен ҳозир ижозат бермайдирмен!

— Жаноби табиб...

— Йўқ, йўқ!

Бу баҳс ичкарида ётган Бобирнинг қулоғига чалинди. У баланд товуш билан:

— Чопар бўлса кирсинг!— деб буюргандан кейин, табиб чопарга йўл берди.

Бобир катта танобий хонанинг тўрида ердан бир газча баланд қилиб солинган парқу тўшакда ётган эди. Чопар тўшакдан анча берида юкунди-да, тиззасида сирғалиб бориб, мактубни Бобирга икки қўллаб узатди.

Иситманинг зўридан бўғриқиб ётган Бобир ёнбошга туриб, мактубни титроқ қўллари билан очди. Ичма-ич иккита хат. Бирида Хўжа Абдулланинг имзоси. Бирини Кўтдуғ Нигор хоним ёзган. Улар иккови ҳам Андижоннинг даҳшатли аҳволи, қамал тафсилотлари ҳақида ёзишган, Бобирдан бошқа нажоткорлари йўқлигини айнишиб, тезроқ этиб келишини илтижо қилишган эди.

Андижон қуршовда! Фитначи беклар Андижон тахтига Жаҳонгир Мирзони ўтказмоқчилар. Аҳмад Танбални лашкарбоши қилишиб, Бобирдан ота юртини тортиб олмоқчилар! Бобир уларни бунчаликка боради, деб ҳеч ўйламаган эди. Тўсатдан унинг устидан бир чеълак совуқ сув қўйилгандай бўлди-ю, аъзори бадани музлаб, бўшашиб, боши ёстиққа «шилқ» этиб тушди. Тামом!

Танбал билан Жаҳонгир ғалаба қилса, уларнинг томонига қочиб ўтувчилар яна кўпаяди. Бобир ким билан қолади? Балки ҳозир ҳам Танбал томонга қочиб ўтаётгандар бордир? Балки Қосимбекнинг ўзи ҳам... Кутимаганда хаёлига келган бу ўйдан Бобир шундай даҳшатга тушдик, бутун кучини тўплаб, ўрнидан сапчиб турди:

— Қосимбек қани?!

— Ҳозир келурлар, одам юбордик,— деди табиб мулоим товуш билан.— Амирзодам, ётинг, сизга ором керак!

Бобирнинг хаста хаёлида бирдан қилич тутган Тан-

бал гавдаланди. Бобир бу қилични таниди. Ўшда Танбал шу қилични ўпид, «то ўлгунимча содиқ қулингизман», деган эди. Танбал ўша қилични ҳозир гўё Бобирнинг боши устида ўйната бошлади... Танбалнинг оёғи остида тоғдан хуржунга солиб келинган каллалар юмалаб ётипти. Уларнинг бири танишга ўхшади. Қутлуғ Нигор ҳонимнинг боши... Бобир алаҳсираб кўз олдига келтирган бу қўрқинчли хаёл уни гўё тўшакдан отиб юборди. У гўлам устида ички кийимда оёқ яланг турганича:

— Шамширни беринг! — деб қичқирди.— Менга шамиримни беринг!

Табиб ўни маҳкам қучоқлаб олди:

— Амирзодам, хастасиз, ётмоғингиз керак... Амирзодам! — Табиб Бобирни гўё Танбалнинг қиличига тутиб бермоқда эди. Бобир унинг қучоғидан юлқиниб чиқиб, эшикка интилди:

— От келтиринг! Мен Андижонга борамен! Шамшир қани? Бекларга хабар беринг! Тезроқ тайёрлансинтар!

Табиб унинг кетидан югурди. Дасторпеч Бобирниң кимхоб тўнини олиб бориб елкасига ёпди, оёғига кавушни берди. Бобир кавушнинг бир пойини кийди-ю, иккичисини кийишга тоқати етмади. Унинг боши гир-гир айланар, ҳаво етишмай, нафаси қисилар эди. Кўз олдида ҳамон ўша қонли қилич ва кесик каллалар.

— Ҳоин! — деди у Танбалга қарата.— Қонхўр!

Бобир айвон эшигига қараб чопди. Лекин эшик олдида гандирлаб йиқилди. Табиб билан дасторпеч уни бехуш аҳволда тўшакка кўтариб келиб ётқизишиди.

Сўнг у ярим кечага бориб сал ҳушига келди. Қўзини очиб, оғзига пахтадан сув томизаётган табибни кўрди. Назарида, тили шишиб, шундай катта бўлиб кетган эдикни, бутун танасини тоғдай босиб ётарди. Бобир кўзини очганини сезиб, Қосимбек унинг тепасига келди:

— Хайрият-е!.. Амирзодам, бизни мунча қўрқитдингиз?

Бобир кўзлари мўлтираб нимадир демоқчи бўлди, аммо беҳад оғирлашиб кетган тилини қимиrlатомлади.

— Энди яхшимисиз, амирзодам?

Бобир жим. Қарайди-ю, гапиролмайди. Унинг тилдан қолганини сезган Қосимбек кўзидан тирқираб чиқсан ёшни кўрсатмаслик учун юзини четга бурди.

АНДИЖОН. Увол бўлган орзулар

I

Туп қоронғиси устига осмонни қуюқ булат қоплади-ю, қалъа ичини зулмат босиб кетди. Андижон кўчалари таҳликали бир сукутга чўмган. Жим-жит кечада арк дарвозасининг фийқиллаб очилгани узоқларга эшитилди. Дарвазахонадан тушган хира ёруғда аркдан чиқиб келаётган бир тўп қуролли отлиқлар кўринди. Олдинда эрекча тўн ва бўрк кийган, белига камар боғлаб, ханжар осган Хонзода бегим. Унинг навкарлари орасида келаётган Мавлоно Фазлиддин ҳам тўнининг устидан ҳарбийча камар боғлаб, белига қилич тақиб олган.

Самарқанддан қайтган чопар Бобирнинг ҳаёт билан ўлим орасида беҳуш бўлиб ётганини айтиб бергандан кейин қалъа ҳимоячиларининг бир қисми фитначиilar томонга қочиб ўтиб кетди. Қўрғон деворларининг ҳар бир газини қўриқлаб туришга одам етишмай қолди. Қоронғи тунда душманнинг деворга нарвон қўйиб, ошиб тушиш хавфи кучайди. Ўн олти ёшида шўхлик билан йигитча кийиниб, чавғон ўйнаб юрган Хонзода бегим энди чинакамига қуролланиб, ҳаёт-мамотлари қил устида турған қалъа ҳимоячиларига кўмакка боряпти.

◀ Қуюқ қоронғиликда отларнинг тақалари кўча тошлирига урилиб учқун чиқаради. Ҳаводан ёмғир ҳиди келади, майнин шабада эсади. Мавлоно Фазлиддин баҳор кирганини, қалъа ичидаги боғчаларда ўрик ва бодом гуллаганини эслади ва атрофига синчиклаб қаради, аммо биронта оқарган нарса кўзига чалинмади. Тун бутун борлиққа қоп-қора парда тортиб қўйган эди.

Мавлоно Фазлиддин мана шу шаҳарда қурмоқчи бўлган мадраса ва сарой тарҳини Хонзода бегимга кўрсатиб, унинг мақтовини эшитган ёруғ кунларини эслади-ю, юрагини армон фижимлаб ўтди. Бобир Самарқандни олгани ҳақида хабар келгандан кейин Мавлоно Фазлиддин орзусини энди амалга ошишига астойдил ишонган эди. Хонзода бегим ҳам уни бир неча марта ўз ҳузурига ҷақириб, бўлажак қурилишларга қаердан ўрин танлаш ва тайёрлик ишларини қандай бошлаш ҳақида узоқ-узоқ гаплашган эди.

◀ Аркдан чиқсан отлиқлар қоронғида тусмол билан

қалъаининг Мирзө дарбозаёси томонига борар экайлар. Мавлоно Фазлиддин олдинда хомуши кетаётган Хонзода бегимнинг ўшаш сұхбатлар пайтидаги мавсум ва шод қиёфасини эслай бошлади.

Одатда Хонзода бегим уни канизлари билан истиқомат қиласидиган олти хоналик сиркор уйнинг ташқи бўлмасида қабул қилар эди. Бегим эркаклар билан гаплашгандага маҳсус ишланган ипак парданнинг ортида ўлтиради. Лойиҳанинг баъзи жойларини сўз билан изоҳлаш мушкул бўлиб қолса, Хонзода бегим орадаги пардан очиб:

— Қани, гумбаз била минорлар орасида нелар бўлур? — деб сўрайди.

Улар иккови икки томондан қофоз устига энгашгандарида гоҳ нафаслари бир-бирларини киға қўшилиб кетгандай бўлади. Мавлоно Фазлиддин Ўшда, қоятош устидаги биринчи марта бошдан кечирган ажойиб туйғу яна борлиғини маст қиласиди. У ишдан бошқа нарса ҳақида гап очишга қўрқади, атрофларида юрадиган канизларга ҳаяжонини сездирмасликка тиришади, Қутлуғ Нигор хоним дуч келиб қолса, эгилиб таъзим қилиш билан кўзини ундан яширади. Бироқ сўнгги марта учрашганларида Хонзода бегимнинг ўзи тўсатдан:

— Мавлоно, нечун шу ёшгача уйланмагансиз? — деб сўраб қолди.

Қиз аслзодаларга хос бир назокат билан ўзини эркин тутиб кулимсираётган бўлса ҳам кўзининг ҳаёдан ялтиллаб кетганини Мавлоно Фазлиддин пайқади. Мавлоно сири очилиб қолишидан қўрқиб, ҳазил билан қутулмоқчи бўлди:

— Бегим, фақир дунёдан тоқ ўтмоқчимен.

— Менга ўхшабми?

— Йўқ, бегимнинг тоқ ўтишларига ақлим бовар қилмайдир.

— Не сабабдан?

— Ахир сиз... бу дунёда... не-не шаҳзодалар, аслзодалар бор.

— Бўлса бордир. Аммо мавлоно ўзлари билган шаҳзода-ю, аслзодаларнинг қайси бирига... мени муносиб кўрурлар?

— Агар бўлса, фақат Фарҳодни сизга муносиб кўрур эдим.

— Нечун фақат Фарҳодни?

Мавлоно жавоб тополмай тараддудланган эди, Хонзода бегим яна савол берди:

— Фарҳод ҳам сиздек меъмору бинокор бўлгани учундир?

— Бундай дейишга фақирнинг ҳаддим сиғмайдир.

Мавлоно маъюс бўлиб айтган бу сўзлар Хонзода бегимни ҳам маъюслантириб қўйди. У оғир тин олди-да:

— Худойим мени нега шоҳ қизи қилиб яратди экан?— деди.— Мен ҳам фақир бир қиз бўлсанам, баҳтими ни топишим балки осонроқ бўлур эди...

Мавлоно Фазлиддин бегимнинг бу сўзларини ҳар эслаганда кўнгли бир даража кўтарилади. Демак, Хонзода бегим унинг муҳаббат дардии билади. Биладигина эмас, балки ўз қалбида унга ҳамдардлик ҳам сезади. Шоҳ қизи билан оддий меъмор орасидаги тоғдай фарқлар бегимни ҳам эзади. Агар Хонзода бегим унга астойдил кўнгил берса, мавлоно бу тўсиқларни енгиб ўтиши мумкин эмасмикан? Ўшда қурган кичик бир ҳужраси учун Бобир мирзо уни шунчалик эъзозлаган эди. Энди агар бу водийда катта обидалар қурса, мавлононинг обрўси баъзи аслзодаларнидан кам бўлмаслиги мумкин. Бобир тантини йигит, опасини яхши кўради. Балки уларга марҳамат кўрсатар. Бундан қатъи назар, мавлононинг меҳрига Хонзода бегимнинг қарши эмаслиги, у билан учрашиб туришга майли борлиги,— мана шунинг ўзи ҳам мавлононинг қалбини ҳароратли, ёруғ туйғуларга тўлдириб юрар эди.

Бироқ Андижон қамалда қолгандан кейин мавлононинг орзу-умидларини мана шу тун каби қоронғи зулмат ўз қаърига тортиб кетди. Барча лойиҳалари кераксиз қофозга айланди. Мавлоно Фазлиддин урушни ҳам, навкарликни бутун вужуди билан ёмон кўрар эди. Бироқ бугун аркка бориб Самарқанддан келган ёмон хабарни эшилди ва Хонзода бегимнинг қуролланиб чиқаётганини кўрди-ю, лоқайд қараб туролмади. Бу мушкул вазиятда титраб-қалтираб, тақдир зарбасини кутиб ўтиргандан кўра, қурол билан ҳимояга чиқиши яхшироқ эканини сезиб, умрида биринчи марта белига қилич тақди. Мана, ҳозир ваҳимали қоронғилликда сув қўйгандай жимиб ётган шаҳарни оралаб борар экан, бир неча қадам олдинда Хонзода бегим ҳам кетаётгани, мавлоно уни шу навкарлар қатори ҳимоя қилиши мумкинлиги кўнглига бир қадар таскин берарди.

Улар Мирзо дарвозасига яқинлашганларида қалъа ташқарисида бирдан карнай ва нақора чалингани, юзлаб навкарларнинг қичқириқлари эшитилди. Хонзода бегим орқага ўгирилиб:

— Ёғий дарвозани очмоқчи! — деди-ю, отининг бошини қўйди. Бошқалар унинг кетидан от чоптиришди.

Ёвнинг бир қисм кучлари Мирзо дарвозаси қаршисида ғавғо кўтариб, қалъага ёниб турган ўқлар отаётган пайтда бошқа бир гурӯҳ навкарлар қалъанинг паҳа томонига нарвон қўйиб, секин чиқиб келмоқда эдилар. Девор шинакларида бирида ўтирган қоровул йигит буни сезиб қолди-ю, дарвозахона тепасида машъала ёруғида одамларга иш буюриб турган Хўжа Абдуллага қичқириди.

— Пирим, ёғийлар бу ёқда нарвон қўйиб чиқмоқдалар! Нарвон!!

Хонзода бегим навкарлари билан ўша қоровул турган жойга бориб отдаҳ тушди. Навкарлардан бири машъала ёқди. Унинг ёруғида деворга чиқиладиган зинапоя кўринди. Мавлоно Фазлиддин девор тепасидаги хатарга Хонзода бегим ҳаммадан аввал рўбарў бўлишидан қўрқди-ю, зинапояга биринчи бўлиб қадам қўйди. Шинакка етганларида бегимнинг қўлидаги машъаласини олди:

— Эҳтиёт бўлинг, бегим, ёғийга кўринманг!

Деворга ташқаридан қўйилган кенг нарвонларнинг учлари хиёл чиқиб турар эди. Ердамчидар етиб келганидан дадилланган бояги қоровул йигит нарвонлардан бирини икки қўллаб итариб, ағдариб ташлаётган пайтда пастдан зарб билан отилган ёй ўқи унинг кўкрагига қадалди. Бечора йигитни ушлаб қолишга улгуролмадилар — нарвон билан бирга қалъадан ташқарига учуб кетди.

Шинак әтрофига қиррали тошлар тайёрлаб қўйилган эди. Хонзода бегим шу тошлардан бирини икки қўллаб олди-ю, пастга отди. Бошқа навкарлар ҳам нарвон қўйилган жойнинг пастини мўлжаллаб тош ота бошлади. Пастда эшитилган дод-войлар ва инграшларга қараганда, бу тошлар мўлжалга тегмоқда эди.

Шу пайт қалъанинг нариги четида — Хакан дарвозаси томонда қўшкарнайларнинг ғат-ғати, табл ва нақора товушлари, аллакимларнинг ғолибона қичқириқлари эшитилди. Мавлоно Фазлиддин шовқин келаётган томонга қулоқ солиб туриб қўрқиб кетди. Бу галги ғавғо шадар ичида кўтарилмоқда эди.

— Бегим, қулоқ солинг! Ёгий қалъага кирганми?

Шаҳар ичидан бу томонга ёпирилиб келаётган шовқиндан Хонзода бегим ҳам сесканиб кетди. Пастдан Нўён Кўкалдош жон жаҳди билан қичқирди:

— Бегим, хиёнатчилар Хакан дарвозасини ёғийга очиб бермишлар. Тезроқ аркка қайтинг! Аркка!

Нўён от чоптирганча Мирзо дарвозаси томонга ўтиб кетди. Хонзода бегим зинапоядан пастга чопиб тушар экан, Мавлоно Фазлиддин қўлидаги машъала билан унинг изидан югорди. Отга мингандаридан кейин Хонзода бегим:

— Машъални ташланг! — деб буюрди.

Машъала мавлонони ёв ўқига нишон қилиб бериши мумкин эди. Мавлоно Фазлиддин ёниб турган машъалани ерга ташлади-ю, бегим билан бирга аркка қараб от чоптириб кетди.

Аммо улар аркка яқинлашганларида бир неча юз отлиқлар олдиларидан қирқиб чиқдилар ва дарвоза йўлини тўсиб қўйдилар. Қуролли отлиқлар орасида машъала кўтарган навкарлар ҳам бор эди. Машъала ёруғида белига олтин камар боғлаган, дубулға ва жиба кийган Аҳмад Танбал кўринди-ю, Мавлоно Фазлидиннинг борлиги музлаб кетгандай бўлди. Танбалнинг қўшини Хонзода бегимни ва унинг навкарларини дархол қуршовга олди. Аҳмад Танбал ёнидаги навкарга шўх товуш билан гапирди:

— Машъалани яқинроқ тут! Ие, Хонзода бегиммилар? Кўзларимга ишонмаймен! Бегим, бу не ҳол? Нечун мардона кийим кийисиз?

— Номардлар кўпайиб кетгани учун мардона кийиндим!

Танбал бу истеҳзони ўзига олгиси келмай кулди:

— Кўргонда мардлар қолмаган бўлса, мана, биз келдик, бегим!

Танбалнинг кетида турган Ўзун Ҳасан бу гапни ёқтириб хохолади. Машъала ёруғи беклар орасида аянчили кулимсираб турган кўсанамо Али Дўстбекка тушкиди. Бобир Андижонни мана шу одамга ишониб топшириб кетган эди. Али Дўстбек эса Бобирни ўлим тўшагида ётилти, деб эшишиб ундан умидини узган эди. Бөя Танбалнинг қўшини Мирзо дарвозасининг олдида жўрттага ғавғо кўтарган, деворга нарвон қўйиб чиқмоқчи бўлганлар ҳам ҳимоячиларни атайлаб чалғитган эди. Аҳ-

мад Танбал билан тил бириктирган Али Дўстбек бугун мана шу тўполон пайтида қалъанинг нариги четидаги Хакан дарвозасини ёвга секингина очиб берган эди. Хонзода бегим буни энди фаҳмлади-ю, Дўстбек билан Аҳмад Танбалга нафрати ошиб, жирканиб кўз ташлади:

— Сизларми мардлар?! Сизлар учун мардлик билан хоинликнинг фарқи қолмадими?! Кечагина Бобир мирзога содиқмиз, деб қасамёд этганлар бугун унга шунчалар ёмонлик қилмоқдасиз! Мен аминман: эртага сиз Жаҳонгир мирзога ҳам хиёнат қилурсиз!

Аҳмад Танбал қиличининг сопини чанглалаб:

— Ҳаддингиздан ошманг, бегим!— деди.— Бобир мирзо адолатсизлик қилди. Самарқанд олингандан кейин Андижон Жаҳонгир мирзога берилимоғи керак эди. Бобир мирзо бермади! Биз адолат учун жанг қилиб, мана бугун ғалабага эришдик! Аммо сиз шарму ҳаёни унутиб, нечун бизни бунчалик ҳақорат қилмоқдасиз? Шоҳ қизига ярашмайдиган бу қилиқни сизга ким ўргатдими?

Аҳмад Танбалнинг ғазабли кўзлари Мавлоно Фазлидинга қадалди. Мавлоно Фазлидин ҳам унинг кўзларига кўзини қадаб гапирди:

— Бегим шарму ҳаёдан сизу бизга сабоқ беришга қодирлар! Бегимнинг ҳақ сўзларини фақат қаллоблар ҳақорат деб тушунурлар!

— Ким қаллоб?— деб Аҳмад Танбал қиличини суғуриб, мавлонога қараб от чоптириди. Шунда Хонзода бегим отини ниқтаб унинг йўлини тўсиб чиқди:

— Илму ҳунар аҳлига тиф тортиш уят!

Икковининг отлари бир-бирига урилиб, айқашиб кетди. Аҳмад Танбал қиличини ҳавода ўйнатар экан:

— Бегим, бу муллочани маъшуқалардек ҳимоя қилишлари уят эмасми?— деди.— Биз маҳфийлардан эшитган эдик, аммо лойиҳа чизиш баҳонаси билан у муллоча бегимни не чоғлик ром қилганини билмас эканмиз!

Кўпчилик олдида Аҳмад Танбал Хонзода бегимнинг номига доғ туширмоқчи бўлгани Хонзода бегими шунчалик ғазаблантиридики, у белидан ханжарини суғурди:

— Мени бадном қилолмайсен, аламзада хоин!— деб, бор кучи билан Танбалнинг кўкрагига тиф урди.

Ханжар Аҳмад Танбалнинг тўни тагидан кийган зирхли жибасига тегди-да, жаранглаб, сирғаниб кетди. Аҳмад Танбал қиличини Хонзода бегимнинг тепасида сермади. Қилич зарбидан Хонзода бегимнинг бошидаги бўрки учиб кетди-ю, узун соchlари ёйилиб елкасига тушди.

Шу пайт орқадан ўн тўрт ёшли Жаҳонгир мирзо бир тўп мулозимлари билан келиб қолди. Буни қўрган Дўстбек Аҳмад Танбални огоҳлантириди:

— Аҳмадбек жаноблари, бас, бўлди!

Хонзода бегим ўгай бўлса ҳам, ҳарқалай, Жаҳонгир мирзонинг опаси эди, шоҳ қизини кўпчиликнинг олдида сазойи қилишга йўл қўймас эди. Аҳмад Танбал Жаҳонгир мирзо томонга отини бурди ва ўзини оқламоқчи бўлиб гапирди:

— Бу қандай ҳол, амирзодам? Наҳотки эгачингиз сизга қарши қурол кўтариб чиқса? Енларидаги фитначи меъмор эгачингизни йўлдан урмиш, амирзодам!

— Мавлоно Фазлиддин сиздек хиёнатчи бекдан минг ҳисса софдил, минг ҳисса олижаноб! — деди Хонзода бегим.— Мавлононинг меъморлик санъати Андижоннинг ифтихори бўлиши мумкин эди. Аммо сиздек қонхўрлар унинг орзуларини увол қилдиигиз! Илоҳим шу орзуларнинг уволи тутсин сизни!

Хонзода бегим сўнгги сўзларини йиғлаб айтди-ю, отини қамчилаб, арк дарвозасига қараб интилди. Бироқ дарвозани девордек тўсиб турган навкарлар унга йўл бермадилар. Бегим ёшли қўзлар билан орқага — Мавлоно Фазлиддинга ўғирилиб қаради.

Мавлоно Фазлиддин белини пайпаслаб, қиличининг сопини топди-да, уни қинидан уқувсизлик билан суғуриб олиб, Хонзода бегимнинг йўлини тўсган навкарларга қараб интилди. Аммо Аҳмад Танбалнинг отлиқ навкарлари Мавлоно Фазлиддиннинг йўлини тўсиб чиқдилар. Иккитаси мавлоно минган отни жиловидан ушлаб тўхтатди. Бири оғир чўқмор билан мавлононинг билагига уриб, қиличини қўлидан тушириб юборди.

Бу орада Жаҳонгир мирzonинг ишораси билан нариги. навкарлар Хонзода бегимга йўл берган эдилар. Бегим ёлғиз ўзи арк дарвозасидан от қўйиб ўтар экан, яна орқага ўғирилиб қаради. Навкарлар яна девордек

бўлиб, дарвозда йўлини тўсиб олган эдилар. Мавлоно Фазлиддин ёв қўлида қолганини сезган бегим ўкириб йиғлади.

Унинг йиғисига фақат дарвозахона шифти бўғиқ бир нидо билан жавоб берди, холос.

Танбалнинг одамлари Мавлоно Фазлиддинни отдан тортиб туширдилар ва қўлини орқасига боғлаб, пиёда ҳайдаб кетдилар.

2

Чўқмор зарбидан жароҳатланган билаги қаттиқ оғриётганини Мавлоно Фазлиддин қоронғи бир ҳибсонада ёлғиз ўзи қолганда сезди. Уни Андижоннинг Чақаридаги тош истеҳком ичига, ўлим жазосини кутадиган маҳбуслар ҳўжрасига қамаб, эшигини ташқаридан қулфлаб олдилар. Бу билан ҳам қаноат қилмай, эшик олдига иккита сокчи қўйиб қўйдилар. Боя арк дарвозаси олдида Аҳмад Танбал билан Жаҳонгир мирзонинг ўзаро гапларидан Мавлоно Фазлиддин шуни аниқ сездики, уни шоҳ қизига тами қилишда ва олий зотларга беадабона мўносабатда бўлишда айблаб, эртага тошбўрон қилиб ўлдиртиromoқчилар. Шу билан Аҳмад Танбал Хонзода бегимни ҳам бадном қилиб, бир аламдан чиқса керак. Вобир ва унинг тарафдорлари ҳалқ орасида ёмонотлиқ бўлишларидан Жаҳонгир мирзо ва унинг онаси Фотима Султон бегим ҳам манфаатдор эдилар, бу билан улар Андижон таҳтини нағигилардан тортиб олиб тўғри иш қилганларини исботлағандай бўлардилар.

Рутубатли зах ҳужрада қоронгиликка тикилиб ўтирган Мавлоно Фазлиддин орқасига боғланган қўлларини белига босиб, билагининг оғригини тўхтатмоқчи бўлар, лекин оғриқ пасайиш ўрнига тобора зўраяр эди. Бу ҳали биргина чўқморнинг зарби... Эртага унинг устига дўлдай ёғиладиган тошларнинг оғриғи қанчалик даҳшатли бўларкин? Мавлоно буни кўз олдига келтирганда эти жунжикиб, ўрнидан туриб кетди. Гўё у ҳозир ҳибсонада эмас, бир-бирига қараб қулаётган икки тоғнинг оралиғида турибди-ю, энди ҳар икки тоғмондан учиб тушган қоятошлар уни эзиб мажақлаши керак. Мавлоно бу балодан қутулмоқчи бўлгандай

эшикка томон интилди. Елкасини ёпиқ эшикка уриб, жон-жаҳди билан қичқирди:

— Очинг! Очинг дейман! Очинг!

Кутилмаган бу қичқириқдан чўчиб тушган бир соқчи қаҳр билан сўради:

— Жин урдими? Не гап?

— Илкимни ечинглар! Жоним керак бўлса эртага олурсиз! Илким жароҳатланган! Ечиб қўйинглар!

Соқчилар бу ерда пойлоқчи бўлиб ўтирганидан жуда асабий эдилар. Чунки ҳозир бошқа ғолиблар Бобир тарафдорларининг молу мулкларини талон-торож қилиб бойимоқда эди. Тун ярмидан оққан бўлса ҳам Андижоннинг кўчалари ва ҳовлиларидан отларнинг дупури, итларнинг вангиллаши, аёлларнинг дод-войи, бемаҳал қўзғатилган сигир ва қўйларнинг маъраши эшитилмоқда эди. Бу ерда қолган соқчилар қанчалик кўп ўлжалардан маҳрум бўлаётганларини мана шу товушлардан пайқаб, ич-этларини еб ўтирас эдилар. Бунинг устига маҳбуснинг асабий гаплари қўшилиб, уларнинг жаҳлини чиқарди. Хириллаган овозга қараганда ёши анчага бориб қолган бир соқчи:

— Илки жароҳатланган эмиш-а! — деди. — Эртага асфаласофилинга кетадиган ҳароми бугун илкингни ўйлаб нима қиласен?

► Эшик ортидаги маҳбуснинг нафрат билан:

— Жаллодлар! — дегани эшитилди.

Хириллоқ соқчи ўрнидан сапчиб туриб дўқ қилди:

— Жим ёт, ўлакса! Ҳозир кириб, бир жароҳатинингни ўнга етказамен!

«Қандай кунларга қолдим?» — деди мавлоно ўзига-үзи. — Одамзод шунчалик шафқатсизми?» Үлим шунчалик нақд экан, бугун мана бу маҳлуқлардан гап эшитиб, эртага тошбўронда хор бўлиб ўлгандан кўра, Танбал билан олишиб, қўлида қиличи билан жон бергани яхши эмасмиди? Боя Хонзода бегимнинг олдида мавлоно шунга қодир эди-ку! Нега тақдир уни шундан ҳам маҳрум қилди?

Ташқарида от тақасининг ҳовли тошларига урилиб қарсиллагани эшитилди.

— Ким келди? Тўхта!

Ҳовлига кириб келган уч отлиқдан бири:

— Хўжа Абдулла мавлоно қози ёш подшоҳнинг фармойиши билан келдилар! — деди.

Келганлар бирин-кетин отдан тушдилар. Икки соқчи узун найзаларини уларга тўғриладилар:

— Фармойишни аввал ўнбошига кўрсатмоқ керак!— деди хириллоқ соқчи.

Унинг тепасида хирагина фонус ёниб турар эди. Малла чакман кийган Хўжа Абдулла соқчиларнинг найзасига қараб келар экан:

— Ўнбошини тополмадик!— деди.— Нечун бу ерда сизлардан бошқа ҳеч ким йўқ?

Ёшроқ соқчи аламли отвуш билан:

— Бошқалар ўлжанинг кетидан қувиб кетгандира, — деди.

Хўжа Абдулла қўлида ўрам қилинган қоғоз билан икки соқчининг найзалари қаршисига келиб:

— Ундай бўлса фармойишни сиз бажармоғингиз керак,— деди.— Олинг, ўқинг!

Нариги икки навкар отларини девор тагидаги устунга боғлаб, ўзлари Хўжа Абдулланинг кетидан келмоқда эдилар.

— Сизлар ўша жойда тўхтангиз!— деди хирри соқчи. Навкарлар тўхташди. Хириллоқ соқчи найзасини кўтариб, Хўжа Абдуллага йўл берди, сўнг унинг қўлидаги қоғозни очиб кўрди. Қимматбаҳо қоғоздаги қисқагина ёзув тагига шоҳона муҳр босилган эди. Хириллоқ соқчи муҳрни чироқ ёруғига солиб кўрди, аммо ўқиёлмади. У чаласавод эди.

— Қани, сен ўқи-чи,— деб ёшроқ соқчига берди. Бироқ униси бутунлай саводсиз эди. Қоғозни қўлида айлантириб, Хўжа Абдуллага қаради:

— Пирим, бу қанақа фармойиш?

— Бу ерда ётган нобакор жуда хатарли маҳбус. Уни аркка олиб кетмоғимиз керак.

— Орқада турган навкарлардан бири қўшимча қилди:

— Мавлоно қози аркда у ҳаромини сўроқ қилмоқлари зарур!

Хўжа Абдулла Андижоннинг энг машҳур қозиси ва жуда қўп мўътабар одамларнинг пири эканини соқчилар ҳам билар эдилар. Улар Хўжа Абдуллани бир кўришдаёқ таниган эдилару, аммо унинг Бобир тарафидаги турлиб жанг қилганини эслаб иккиланар эдилар.

— Бу ўзи Жаҳонгир мирзонининг фармойишлари ми?— сўради хириллоқ соқчи.

— Шубҳалансангиз, ўқиб кўринг!

— Маҳкам сақланглар, деб буюрган әдиларда, пирим.

— Маҳкам сақлаганларинг шуми? Юзбоши қани? Нечун фақат икковлон қолмишсиз? Бу нобакорнинг тарафдорлари кўплашиб ҳужум қилса қандоқ қилурсиз? Йўқ, буни тезроқ аркка олиб кетмоқ зарур! Эшикни очинг!

Ёш соқчи кексасига қараб: «Бу қози ҳам энди Жаҳонгир мирзо томонига ўтибди-да, бўлмаса бунчалик жон куйдирармиди?»— демоқчи бўлди. Бироқ униси ҳамон иккиланарди:

→ Биз кейин не деймиз?

— Сиз икковингиз ҳозир биз билан бирга кетурсиз!— деди Хўжа Абдулла.— Буни кўплашиб қўриқлаб бормасак олдириб қўйишимиз мумкин!

Шундан кейин хириллоқ соқчи ҳам бўшаши. Найзасини деворга тираб қўйиб, эшикни очди. У ичкарига қадам қўйиши билан Хўжа Абдулланинг ҳамроҳларидан бири ёш соқчининг бошига қора бир нарсани ёпиб, ўзини ерга ағанатди. Иккинчи навкар хириллоқ соқчининг бошидаги дубулғасига чўқмор билан қарсиллатиб уриб, уни ичкарига қулатди-да, устидан босиб тушди.

Хўжа Абдулла ҳамроҳларига шивирлади:

— Үлдирманглар, уволларига қолмайлик!

— Үлдирмасак кейин булар сизни тутиб берурлар!

Мавлоно Фазлиддин жияни Тоҳирнинг овозини таниб:

— Жияним! Тоҳиржон!— деб қичқирди.

Қора парда ичидаталваса қилаётган ёш йигит эса:

— Пирим, шафқат қилинг!— деди.— Пирим! Сизга зинҳор ёмонлик қилмаймиз! Қутқаринг, пирим!

— Бас!— деб шивирлади Хўжа Абдулла Тоҳирга.— Оёқ-қўлларини боғласаларинг бўлди!

Мавлоно Фазлиддин Тоҳир билан Хўжа Абдуллага томон отилди:

— Устод!.. Жияним!.. Нажоткорларим!..

Тоҳир нариғиларнинг қўл-оёғини боғлаш билан овора эди.

— Мавлоно Фазлиддин, қанисиз?— деди Хўжа Абдулла.

Хўжа Абдулла мавлонони бағрига босар экан, унинг қўли боғлиқ эканини сезди-ю, қучоғидан қўймай эшикдан ташқарига олиб чиқди. Фонус ёруғида бели-

дан ханжарини олиб, мавлононинг қўли боғланган ола чилвирни кесиб ташлади.

Тоҳир шериги билан нариги икки соқчини ичкарига қамаб, эшикни қулфлади-да, тоғасининг қучоғига отилди.

— Жияним, худо сени қайдан етказди?

— Боя Самарқанддан чопар бўлиб келдим!

— Бобир мирзо соғмилар?

— Ҳа, тузалиб қолдилар. Ёрдамга етиб келмоқчи-лар!

— Андижон қўлдан кетганини билурларми?

— Ҳали билмайдилар-да!..

Хўжа Абдулла уларга шипшиди:

— Энди жим!

Тоҳир тоғасини отига мингаштириб олди. Чақардан секин чиқиб, қалъанинг овлоқ бир четига қараб кетдилар. Фолиблар ҳовлиларда ҳамон талон-торож билан банд эдилар. Тўртовлон уч отда қалъа деворининг тагига келдилар. Энди ҳамма ҳимоячилар тарқаб кетиб, девор атрофи ҳувиллаб қолган эди.

— Мана шу ерда ошиб ўтишга қулай жой бор,— деди Хўжа Абдулла.

Ҳаммалари отдан тушдилар. Тоҳирнинг шериги хуржунидан ўрам қилинган арқон олди. Тўртовлон махсус зинапоядан девор тепасига чиққанларида Хўжа Абдулла Мавлоно Фазлиддинга ёндашди:

— Мавлоно, сизни дарвозадан отлиқ чиқариш хатарли. Таниб қолурлар.

— Миннатдормен, устод!

Хўжа Абдулла қўйнидан бир нарса олиб, мавлононинг қўлига тутқазди. Бу — ичи олтинга тўла оғиргина чарм ҳамён эди.

— Буни сизга хоним ҳазратлари бериб юбордилар,— деди Хўжа Абдулла.

— Воқеадан хоним ҳазратлари ҳам хабар топдиларми?

— Ҳазрат хоним йиғлаб мендан илтимос қилдилар. Аҳмад Таңбал сиз орқали бегиму хонимларни шармисор қилмоқчи экан. Аммо биз тирик бўлсак, Бобир мирзонинг оиласига ҳам, муборак номига ҳам доғ ту шурмагайми!

Мавлоно ҳамённи олиб қўйин чўнтағига солар экан:

— Мен тўғри Бобир миғонинг ҳузурларига йўл олурмен! — деди.

— Мавлоно,— деди Хўжа Абдулла маъюс товуш билан.— Биз хоним ҳазратлари билан сизга бошқа бир маслаҳат бермоқчи эдик.

Андижонда араб тилини Хўжа Абдуллачалик яхши биладиган одам йўқ эди. Бир вақтлар Мавлоно Фазлиддин ҳам шу одамдан араб тилидан сабоқ олган эди ва шундан берি уни устод деб атар эди:

— Қандай маслаҳат бўлса бош устига, устод!

— Самарқандга Тоҳирбек борурлар.

— Мен тоғамни бирга олиб кетсан-чи? — деди Тоҳир.

— Йўқ, Тоҳирбек, сиз чопарсиз. Балки Бобир мирзо Самарқандни ташлаб чиққандирлар... Мавлоно, сизнинг ноёб истеъдодингиз бор. Сиз ўзингизни эҳтиёт қилмоғингиз керак. Мовароуннаҳрдаги бу фаторатлар¹ ҳали-бери босилмаса керак. Мавлоно, сиз бир вақтлар Ҳиротга кетиш фикрингиз борлигини айтган эдингиз. Энди шу фикрни амалга оширадиган пайт келди.

Ҳиротга бир марта бориб келган Мавлоно Фазлиддин нотинч ўлкалардан ойлар давомида юриб ўтиладиган беҳад мاشаққатли йўлларни кўз олдига келтириди-ю, юрагини ғам босди. Жароҳатли қўлининг оғриғи боя эсидан чиққан әкан, энди бу оғриқ янги бир куч билан қайтиб келди. Мавлоно оғриётган билагини чангallab:

— Мен ватанни қандай тарк этай, пиrim? — деди.

— Ҳозир Алишер Навоий яшаб турган Ҳурросон ҳам бизга ватан эмасми, мавлоно?

— Ватан, албатта... Аммо мен... балки қайтиб келломасмен. Кулбамда китобларим, лойиҳаларим қолган. Тоҳир жиян!..

— Ҳозироқ қайтиб бориб, барчасини яширтириб қўюрмен, хотиржам бўлинг, мулла тоға!

Мавлоно Фазлиддин Хонзода бегимни энди умрбод кўролмаслигини олдиндан сезаётгандай юраги увшуди. Хўжа Абдулла билан Қутлуғ Нигор хоним уни Ҳиротга жўнатаётгандарининг бир сабаби мавлоно билан Хонзода бегим орасидаги нозик муносабат ва шунга оид пасту баланд гаплар эди.

¹ Фаторат — алғов-далғов.

Мавлоно Ҳиротга кетиши билан Хонзода бегим атрофида бўлаётган гаплар тезроқ босилиши мумкин эди. Мавлоно шуни ўйлади-ю:

— Майли, устод,—деди.—Мен Бобир мирзонинг номларини пок тутиш учун ҳар ишга тайёрмен. Аммо бир илтимос: хоним ҳазратларига айтинг, ёлғон овозаларга ишонмасинлар. Хонзода бегим ҳалолу покизаликда беназирлар!

— Сиз ҳам шундайсиз, мавлоно, мен билурмен. Биз бунга ишонмаганимизда, жонимизни гаровга қўйиб, бояги соқчиларни алдаб юрмас эдик. Мен умримда шундай ишлар қилурмен, деб ҳеч ўйламаган эдим. Мана Тоҳирбек менга далда берди. Аммо ёғийларнинг ғаламислиги ҳам кишини мажбур қиласр экан!

— Сизлар менга янгидан жон ато қилдиларингиз, устод! Энди ўзингиз ҳам эҳтиёт бўлинг! Жияним, сен ҳам!..

— Рост, • пирим ҳам Андижондан узоқроқ кетсалар, бехавотир бўлур эдик!— деди Тоҳир.

— Ҳаммамиз кетсанк, хониму бегимларга ким маддад берур?— деди Хўжа Абдулла.— Шўрлик муштипарлар ҳозир мени кутуб ўтирган бўлсалар керак.

Осмоннинг шарқ томонидан бир парчаси хиёл оқариб келмоқда эди. Мавлоно Фазлиддин шуни кўриб, арқонни белига боғлай бошлади.

— Насиб бўлса ҳали яна кўришурмиз, мулла тоға!

— Тоҳир, жияним, менинг тарҳларим... чизган суратларим йўқолиб кетмасин. Сен ҳарбий одамсен, асраринг қийин. Шунинг учун иложи бўлса ҳаммасини Хонзода бегимга бергин.

— Бажонидил!

— Мен бу илтимосингизни Хонзода бегимга ҳам етказурмен!— деди Хўжа Абдулла.

Улар қучоқлашиб хайрлашдилар. Сўнг мавлонони белига боғланган арқон ёрдамида ўн бир газли девордан пастга туширдилар.

Мавлоно тонг ёришганда Қуванинг йўлига чиқиб олди.

Аммо қўрғон ичида қолган Хўжа Абдулла эртаси куни чошгоҳ пайтида Ҳакан дарвозасининг яқинида турдиган бир муридининг ҳовлисида яшириниб ўтирганда Аҳмад Танбалнинг одамлари уни қўлга туширдилар. Чақарда қўли боғлиқ ётган соқчилар қаттиқ си-

қувостида Мавлоно Фазлиддинни ким озод қилганини
Аҳмад Танбалга айтган эдилар.

Аҳмад Танбал Хўжа Абдулла тутилган жойга от чоптириб келганда кўчани одам тутиб кетган эди. Қўли орқасига боғланган кўйлакчан Хўжа Абдулла қуролли навкарлар қуршовида секин юриб бормоқда эди. Унинг оёқларидан мадор кетган, ранги ўчган. Оқ салласи ва кўйлагининг оқлиги ўсиқ соқолини одатдагидан қора-роқ кўрсатар эди.

Халойиқ Аҳмад Танбалга йўл бериб четланди. Хў-
жа Абдуллани ҳайдаб бораётганлар тўхтадилар. Аҳ-
мад Танбал ҳам отини жиловидан тортиб тўхтатди:

— Ҳа, алдамчи пир! — деди. — Бизга шунча ёғий-
ликлар қилганингиз озими, энди соқчиларни алдаб,
ҳароми муллочани ҳам қочирибсиз!

— Мен бир бегуноҳ ҳунарпешани адолатсиз ўлим-
дан қутқардим, холос!

— Соқчиларга ёлғон муҳрлар кўрсатишга уялма-
дингиэм, алдамчи пир?

Ўнлаб кўзлар Хўжа Абдуллага тикилди. Агар Хўжа
Абдулла Танбалдан қўрқиб, саросимага тушса, ўзини
йўқотиб қўйса, гуноҳи бўйнига тушгандай кўриниши
мумкин эди. Шуни ўйлаб, Хўжа Абдулла иложи бори-
ча дадил гапиришга тиришди:

— Мен соқчиларга Бобир мирзонинг муҳрларини
кўрсатдим. Чунки Бобир мирзои Андижоннинг ягона
подшоси деб билурмен!

— Сен, имонсиз, муридларингни яна алдамоқдасен!
Бобир мирзо Самарқандда вафот этган. Ҳозир тожу-
тахт Ҷаҳонгир мирzonики!

— Мусулмонлар, бу гапга ишонманг! Алҳамдулил-
лоҳ, Бобир мирзо тириклар! Андижонга яна келурлар!

— Ёлғон! Халойиқ, сиздек муридларини алдаб юр-
ган, айини яшиromoқ учун ифлос бир ҳаромини биздан
қочирган бу имонсиз пир тошбўрон қилиб ўлдирилиши
керак! Тош отинг бунга! Савобталаб бўлсангиз тош
отинг!

Аҳмад Танбал эгар устидан улоқчиларга ўхшаб
пастга энгашди-ю, узун қўли билан ердан муштдай
бир тошни олди. Сўнг қаддини тиклаб, тошни Хўжа
Абдуллага қараб отди. Хўжа Абдулланинг кенг кўк-
рагига «тўўп» этиб теккан тош оқ кўйлакда чангли
из қолдириб, ерга юмалаб тушди. Оғриқдан Хўжа Аб-

дулланинг кўзлари ёшланди, нафаси қайтди. Навкарлардан баъзи бирлари ҳам ерга энгашиб тош қидираётганини кўрган Хўжа Абдулла нафаси титраб:

— Мусулмонлар!— деди ва ҳамон жим турган ҳалойиқа тикилди. Уларнинг орасида йигирма беш ёшлардаги гардани йўғон бир йигитни кўрди-ю, бир вақтлар ёлғон овоза тарқатишда айбланиб ўлдирилган мироб Дарвеш говни эслади. Бу йигит ўша миробнинг ўғли эди. Хўжа Абдулла ўшанда ёш Бобирга бир оғиз: «Буни қатл эттираманг!»— деса, эҳтимол мироб ҳали тирик юрар эди. Хўжа Абдулла ўшанда Аҳмад Танбалга ўхшаш бекларнинг кўнглига қараб Дарвеш говни қутқарib қололмагани әнди қалбida армон қўзғалди. Ҳозир ўзи ҳам ўша миробнинг аҳволига тушдику! Нечун ўшанда лоқайдлик қилди? Миробнинг ўғли отасининг қасди учун Хўжа Абдуллага тош отса, балки ҳақли бўлар!.. Лекин бегуноҳ меъморни қутқарib, ўзи балога қолаётган Хўжа Абдуллага ҳеч ким тош отмади.

— Мусулмонлар!— куюниб тақрорлади Хўжа Абдулла.— Мен адолат йўлида жон беришдан қўрқмаймен! Адолат ким томонда — шуни бир ўйлаб кўринглар. Инини оғага душман қилганлар кимлар? Яхшиларга баҳиллиги келиб, пойига болта ураётганлар кимлар? Бу қора кунларни бошимизга солгандар кимлар?!

— Сен ўзинг!— деб қичқирди Аҳмад Танбал.

— Мен Бобир мирзога кичиклигидан илм ўргатдим, лисон ўргатдим, мен уни одил подшоҳ бўлишга унададим, Мовароуннаҳ яна бирлашсину, юрт ички урушлардан қутилсин, дедим. Бобир мирзо мардона ишлар қилиб, Самарқанд билан Андижонни бирлаштирганда мен эзгу орзуларимга етгандай суюнган эдим. Ҳайҳот, мамлакат яна парчаланди. Юрт вайрон бўлди! Ҳалойиқ, агар мени ўлдириш билан мушкулингиз осон бўлса, майли, ўлдиринг!

— Тошбўрон қилинг!— буюрди Аҳмад Танбал ҳалойиқа.

Одамлар тўпининг орқароғидан йиғламсираган товуш эшитилди:

— Шайхулислом фатво бермагунча тошбўрон қилишга ҳаққимиз йўқ!

Кекса бир киши:

— Пирнинг қарғишидан қўрқамиш!— деди.

► Навкарлар ҳам қўлларидағи төшларини Хўжа Абдуллаға отишга журъат этолмай, Аҳмад Танбалга қардилар. Аҳмад Танбал юзбошига буюрди:

— Үндай бўлса қиличингни ол, калласини кес! Бўйнига тиф ур!

Барзангидай қоп-қора ўрта яшар юзбоши кумуш сопли қиличини қинидан имиллаброқ суғурди. Хўжа Абдулла унга тикилиб, паст товуш билан деди:

— Мирбадалбек, хушёр бўлинг, менинг қоним етти пуштингизга сачрайди!

Халойиқ орасидан қўрқув аралаш нидо эшитилди:

— Пирнинг қони тутади ҳаммамизни!

Юзбошининг қўлидаги қиличи қалтирай бошлади. У Аҳмад Танбалга қараб ёлинди:

— Ўтинамен, бу ишдан мени озод қилинг!

Аҳмад Танбал унга ғазаб қилиб елкасига қамчи урди.

— Сени юзбошиликдан озод қилурмен, қўрқоқ!

Аҳмад Танбал бошқа навкарларига буюрди:

— Бу имонсизни дарвозахонага ҳайданг! Халойиқ шурда қолсин! Ким бизга эргашса қилич билан чопинг! Аяманг!

Навкарларнинг бир қисми Хўжа Абдуллани дарвозахонага ҳайдаб кетди. Қолган навкарлар ҳалойиқнинг йўлини тўсиб, Хўжа Абдулланинг кетидан боргани қўймади.

Орадан ярим соат ўтгандан кейин Аҳмад Танбал одамлари билан аркка томон от чоптириб қайтиб кетди. Шундан сўнг дарвозахонага борган одамлар Хўжа Абдулланинг шифтдаги йўғон тўсинга осиб ўлдирилганини кўрдилар. Марҳумнинг оқ салласи оёғи тагида чувалиб ётарди, бўйи эса тириклик пайтидагидан хийла узайган эди. Одамлар уни дордан секин тушириб олдилар. Кафан ўрнига салласига ўраб, шаҳидлардек кўмдилар.

3

Устма-уст ёқсан баҳор ёмғирлари йўлларни балчиқ қилиб юборган. Андижонда юз берган ваҳшатлар хабарини тезроқ Самарқандга етказиш учун лой сачратиб, от чоптириб бораётган Тоҳир энди Қувागа яқинлашди. Агар Бобир мирзо тузалган бўлса-ю, Андижонга ишо-

ниб, Самарқандни ташлаб чиқса, аҳвол ҳозиргидан баттар бўлиши мумкин. Тоҳир шуни ўйлаб, тагидаги бедовни қистайди. Аммо от қанчалик зўр ва чопқир бўлмасин, тиззага чиқадиган лой унинг йўлини боғлайди, тинкасини қурилади. Чопиб келаётган от балчиққа йиқилиб тушади-ю, қайтиб туролмасдан, бурнидан қон келиб, жон беради. Тоҳир уни йўл устида қолдириб, эгар-юғанларини олади-ю, Қувадан бошқа от топади. Аммо бир кун юрмасдан бу от ҳам ҳолдан кетиб йиқилади. Нарёқда Хўжанд, Жиззах — яна ўн кунлик йўл... Тоҳир осмонда учиб бораётган қушларга ҳавас ва армон билан қарайди.

* * *

Бироқ Тоҳир қуш бўлиб учганда ҳам энди Бобирни Самарқанддан тополмас эди. Бобир хасталик тўшагидан турган заҳоти онаси ва устозини қутқаришга шошилиб, Самарқандни аллақачон ташлаб чиққан эди. Унга келган ахборотларга биндан, Андижон қамали ҳали узоқ давом этиши керак эди. Андижонда бир йилга етарли заҳира бор эди. Шўнчалик абгорлигӣ билан Самарқанд етти ойлик қамалга чидаганда ўн икки минг қўйи бор Андижон қўргони Хўжа Абдулладай довюрак одам раҳбарлигига ҳали беш-олти ой «қилт» этмай туриши шубҳасиз туюларди. Шу туйғу билан мингга яқин одамларнинг ҳаммасини Самарқанддан олиб чиқиб келаётган Бобир Булунғур ва Халилия¹ қишлоқларидан ўтиб, Санѓзор дарёсига яқинлашиб қолган эди.

Оғир хасталикдан яқинда турган Бобир яна узликиб қолмаслиги учун уни тўрт отлиқ маҳофага ўтказганлар, тагига юмшоқ парқулар солганлар. Маҳофанинг эшик ва деразаларига осилган қизғиши ипак пардалар йўлнинг ўнқир-чўнқирларида аланга тилларида мутта-сил силкиниб ўйнаб боради. Пар ёстиққа ёнбошлаб ўтирган Бобир ҳар замонда бир ўрнидан қўзғалиб, маҳофанинг орқа томонидаги пардани кўтаради-ю, узоқларга тикилиб қарайди.

Унинг қўшинидан беш-олти чақирим орқада яна бир маҳофа келмоқда эди. Бир талай отлиқлар қўриқлаб

¹ Ҳозирги Фаллаорол яқинидаги қадимий қишлоқ.

Сораётган бу кўркам маҳофада Бобирниг холаси Меҳр Нигор хоним ва қайлиги Ойиша бегим сафар қилмоқдалар. Бобир Самарқандни ташлаб кетмоқчи эканидан Бухородаги Султон Али мирзо аллақачон хабар топган ва пойтахтни дарҳол эгаллаш учун Шаҳрисабзга келиб шайланиб туарар эди. Бобир ўз рақиби Султон Али мирзодан яхшилик кутмас ва қайлигини унинг қўли остида қолдиргиси келмас эди. Бир вақтлар Бойсунқур мирзодан қаттиқ жабр кўрган Меҳр Нигор хоним ва Ойиша бегимлар ҳам эндиғи хавф-хатарлардан тезроқ қутулгилари келар эди. Ҳозир улар учун энг бехатар жой — Тошкент эди. Тошкент хони Маҳмудхон — Меҳр Нигор хонимнинг акаси, Ойиша бёгимнинг опаси Розия Султон бёгим ҳам Тошкентга, Маҳмудхонга тушган. Тошкент йўли Жиззахгача Андижон йўли билан бир. Мана шу сабабларга кўра Бобир холаси ва қайлигини бутун одамлари-ю, кўч-кўронлари билан бирга қўриқлаб олиб кетмоқда эди. Фақат урф-одатни бузмаслик учун куёв билан қайлиқ орасида беш-олти чақиримлик масофа қолдириб, икки тўп бўлиб бормоқда эдилар. Кечқурун Сангзордан ўтиб, кўм-кўк адирларда тунаш учун тўхтаганларида ҳам ўша масофани сақлаб, икки жойга чоидир ва ўтов тикдилар.

Ёнбағирларда лолалар очилган. Ҳаво ниҳоятда ёқимили. Бобир майнин кўкат устига қадам қўйганда ўзини хийла енгил сезди.

Самарқанддан чиқаётганда вужудини зилдай босиб ётган ғам-ғуссалар энди аста-секин тарқаб кетаётгандай туюлди. Пойтахтни шунча машаққатлар билан олиб, охири ўз ихтиёри билан бошқага қолдириб кетиши унга сўнгги йилларда қилган барча ҳаракатларини беҳуда кўрсатиб, таъбини тирриқ қилган эди. Ҳозир мана бу кўқалам адирларда яйраб нафас олар экан, у онаси ва устозини қутқариш ниятида кетаётганини, бунда бир олижаноблик борлигини, қайлигини асоратдан қўриқлаб олиб бораётгани ҳам мардликдан эканини ўйлади-ю, кўнгли бир қадар таскин топди.

Темур дарвозаси деб аталган улуғвор тангидан ўтганларидан кейин Бобир маҳофанинг эшигини очиб, мироҳўр¹ни чақирирди.

¹ Мироҳўр «амири-охур» дегани. Мироҳўр — пёдшоқ отбоқарларининг бошлиғи.

Мирохўр маҳофага жипс келганда:

— Б-б-бўз о-о-отимни кел-т-т-тилинг;— деб буюрди.

У соғайиб кетгандай кўринса ҳам, аммо ҳали тилида ўша оғир хасталикнинг асорати бор эди. Унинг дудуқланиб гапиришидан хавотирланган Қосимбек:

— Амирзодам, от нечук керак?— деди.— Минмоқчиларми?

Бобир яна тили тутилиши мумкинлигини сезиб, тасдиқ маъносига сўзсиз бош иргади-ю, мирохўрга «айтганини қилинг!»— дегандек қаради.

Маҳофа юриб бормоқда эди. Мирохўр:

— Бош устига!— деб отга қетди.

Қосимбек орқароқда келаётгац табибни чақиртириди. Калта оқ соқолли ўша жиккак табиб маҳофага ёндашиб, Бобирдан ҳали яна уч-тўрт кун от миннамасликни илтимос қилди. Аммо Бобир ўзини яхши ҳис қилмоқда эди:

— Б-б-ир-пас отл-лик юрай!

— Тилингиздан калолат кетмагунча сабр қилинг, амирзодам!

Эгар жабдуқларидағи олтин безаклари қуёш нурида ялт-ялт қилаётган бўз отни жиловдор етаклаб келди.

Қосимбек унга:

— Қайт!— деди-ю, Бобирга маҳофада тинчгина кетаверишни маслаҳат берди.

У билан табиб Бобирнинг яна узликиб қолишидан астойдил қўрқмоқда эдилар. Аммо Бобир отни орқага етаклаб кетаётган жиловдорга кулиб қаради-ю:

— Йў-йўқ, отни к-келл-тилинг!— деди.

Сўнг Қосимбекка ҳам кулимсираб гапирди.

— Х-ха-во-отир олм-мангиз!

Жиловдор отни яна маҳофа олдига етаклаб келди. Маҳофа тўхтади. Бобир унинг зиннасига оёқ қўйиб, бўз отнинг эгаридан олди-ю, бир сакраб отга минди. Жиловдор бундан завқи келиб жилмайди ва жиловнинг учини Бобирнинг қўлига тутқазди.

Қосимбек Бобирни ортдан синчиклаб кузатиб боради, агар унинг беҳол бўлгани сезилса дарҳол ёрдамга стмоқчи бўлади.

Аммо Жиззахга етиб бордилар ҳамки, от устидаги Бобирнинг беҳол бўлгани сезилмади.

Кичиклигидан от миниб суяги қотган чавандоз сўнгги кунларда сувориликни жуда соғинган эди. Маҳофа-

нинг юмшоқ парқулари унга ҳасталик түшагиий эслатарди. Тагидаги бўз отнинг шўх қадам олиши ва соғлом бир қудрат билан ўйноқлаши эса Бобирнинг аъзоларида анчадан бери мудраб ётган ёшлик кучларини уйғотган дай бўларди. У отлиқ юрган сари бадани яйраб, баҳри дили очилиб борарди.

Жиззахдан наридаги кўкалам адирларга ўтиб тунаш учун тўхтадилар ва икки жойга чодир тикдилар. Бобирнинг бугун отлиқ юргани ва ўзини жуда соғлом сезаётгани ҳақидаги хабар холаси билан қайлиғига ҳам етиб борган эди.

Меҳр Нигор хонимнинг куёвга хола, айни чоқда, қизга она экани совға-салом юбориш ва борди-келди қилиш учун қулай эди. Намозшом пайтида Меҳр Нигор хонимнинг эшик оғаси Бобир мирзога совға олиб келди: чиройли зарбоф тўн, олтин камар, кумуш дастали қимматбаҳо қамчи. Тўн — Бобирнинг тузалиш шодиёнаси. Камар — «куёвнинг бели яна ҳам бақувват бўлсин», деган тилакни билдиради. Қамчи — бугун Бобир отлиқ юргани туфайлимикин? Ёки «Подшоҳ отини қамчилаб, тезроқ Андижонга етсину ёғийларни саваласин!»— деган маъноси ҳам бормикин? Нима бўлганда ҳам Бобир бу совғалардан жуда таъсиrlаниб кетди.

Эртага улар хайрлашишлари керак. Тошкент йўли мимолга бурилиб кетади. Бобир томонидан ҳам совға юборилиши лозим. Бироқ аёлларга ёқадиган қимматбаҳо матолару тақинчоқларни улар қаердан топишади? Ҳаммалари эркаклар. Қўнган жойлари ҳам чўл. Қосимбек шуни Бобирга айтib:

— Кумуш лаганларда олтин пул юбора қолсамикин?— деди.

Бобир эса шу лаган ва олтинларни бугун бўш қолган маҳофага солиб юборошни тақлиф қйлди.

— Мажбӯға ҳам совға бўлсинми? Балки эртага ўзингиз маҳофада юурсиз, амирзодам?

— Ху-худоҳоҳл-лаҳа, юр-масмен. З-заифалар юрсинглар.

Сўнгги гапни Бобир буйруқ оҳангига айтди, шунинг учун Қосимбек бошқа эътиroz қилолмади.

Эртаси куни эрталаб икки муҳташам маҳофа кўч бортилган туялару аравалари билан бирга шимол томонга бурилиб, Мирзачўл орқали Тошкентга йўл олди.

Бобир ўз қўшинидан юз кишини қўриқчиликка аж-

ратган эди, улар ҳам маҳофалар билан бирга узоқлашиб кета бошладилар.

Андижон йўлидан четроқда катта бир қоровултепа кўринди. Бобир ёлғиз ўзи шу тепанинг устига от қўйиб чиқди-да, эгардан тушди. Отининг жиловидан тутганича чексиз чўлда тобора кичрайиб бораётган маҳофаларга анча вақт тикилиб турди. Гўё у шу туришда қаллифи билан хайрлашди, унга ўз эҳтиромини билдириб, оқ йўл тилаган бўлди.

Бобир юз кун Самарқандда туриб Ойиша бегим билан бирор марта юзма-юз кўришган эмас. Бунга урфодат ҳам йўл бермади, ёшлик ҳаёси ҳам монелик қилди. Кўксаройда ёза бошлаган ғазалининг «Не кун бўлғай висолингга мени дил хаста етгаймен» деган сатри эсига тушди. Сўнг от устида кун бўйи йўл юриб бораётниб хаёлан ўша ғазалини давом эттирди:

Муяссар бўлмаса бошимни қўймоқлик оёғига,
Бошимни олиб, эй Бобир, оёқ етгунча кетгаймен.

Кечқурун тунаш учун Қўштегирмон деган жойда тўхтаганларида Бобир бу сатрларни қофозга ёзиб қўйди. Ғазал — шу сатрлар билан тугалланиши керак. Лекин ўртада яна уч-тўртта байт бўлиши керак. Уларни кейинчалик хотиржамроқ пайтда топмоқчи бўлди.

* * *

Андижонда бўлган воқеалар даҳшати Тоҳир қиёфасига кириб Бобирга тобора яқинлашиб келмоқда эди.

Бобир одамлари билан Новдан ўтганда Тоҳир Қўқондан ўтиб, Ходарвиш чўлига кирди. Бобир чўлларда олти марта тунаб, еттинчи куни кечки пайт Хўжандга етганда қора оти лойга беланганд, ўзи таниб бўлмас дарражада қорайиб, озиб кетган Тоҳир унинг қаршисидан чиқди.

Бобир ҳамма бек ва навкарлари билан келаётганини кўрган Тоҳир отдан ўзини ерга ташлаб, дод солиб йифлаб гапирди:

— Нечун Самарқандни ташлаб келдингиз, амирзодам?!

Бобир Андижон қўлдан кетганини эшилди-ю, назарида, бутун борлиқ зилзила ичиди қолди, еру кўк чай-

қалиб, силкиниб кетди. Чапда ялтираб кўринган Сирдарё қирғоқларидан тошиб чиқа бошлагандай туюлди.

Дарёдан нарида Хўжанд тоғлари, Бу ердан Андижон нақадар узоқ! Самарқанд нақадар узоқ! Ўгай тақдир Бобирни бу ерга гўё алдаб олиб келгану бирвакайига Самарқанддан ҳам, Андижондан ҳам маҳрум қилган! Энди унинг ора йўлда муаллақ бўлиб қолганини Андижондаги Аҳмад Танбал ҳам, Самарқанддаги Султон Али мирзо ҳам, Туркистондаги Шайбонийхон ҳам гўё узоқдан кўриб турар эдилару «Боладай алданнибди!»— деб қаҳ-қаҳ уриб кулар эдилар. Уларнинг кулгилари атрофдаги тоғлардан акс садо бўлиб қайтаётгандай туюлар эди.

Тоҳир Али Дўстбекнинг хиёнат қилиб, дарвозани кечаси очиб берганини, Хўжá Абдулла эса Бобирга са-доқати туфайли шу дарвозахонага осиб ўлдирилганини айтганда Бобир ортиқ бардош қиломай отига қамчи босди. Қаёққа кетаётганини ўзи ҳам билмас эди. Чанқаган от уни дарёнинг жар бўлиб ётган баланд қирғоғига олиб келди. Бирдан Бобир Аҳсида жар қулашидан ҳалок бўлган отасини эслади. Назарида, у турган замин ҳам ҳозир қулаг тушмоқда эди. Бобир отини орқага бурди. Лекин орқадаги пасту баланд ерлар ҳам жаҳаннам қаърига қулаг тушаётгандай лопиллаб кўринди.

Бобир отининг бўйнидан қучоқлади-ю, елкалари силкина-силкина йиғлаб юборди.

Қосимбек билан табиб чол унинг ёнига келдилар. Қосимбек қайғу тўла товуш билан йиғламсираб гапирди:

— Амирзодам, ҳаммамиз ҳам хонавайрон бўлдик. Менинг молу мулкимни талатибдилар. Ўғлим оғир ярадор эмиш...

Бобир бошини кўтарди. Кўз ёшидан юзи нам. Табиб унинг елкасини силади.

— Амирзодам, шукур, онангиз, эгачингиз саломат эканлар. Кўп куюнманг, бошингиз омон бўлса, давлат топилур... Ўзингизни эҳтиёт қилинг, яна хасталаниб қолманг!

Бобир дарвозахонага осилган устозини эслади-ю, кўзига яна ёш қуйилиб келди:

— Пийрим, мени кимларга ташлаб кетдингиз? Шундай одамни осиб ўлдирсалар?! Мен устозим учун қасос олмогим керак! Қасос!

Уртаниб гапираётган Бобирнинг тили тутилмаётганидан табиб чол ҳайратга тушиб, унга тикилиб қолди.

— Охирги нафасим қолгунча олишурмен!

Бобирнинг юзи қаҳру ғазабдан бир оқарид, бир қизарип кетаётган бўлса ҳам сўзлари равон эди. Самарқандда Бобирни тилдан қолдирган қасаллик — фоят кучли бир руҳий ларзанинг оқибати эди. Энди ундан ҳам кучлироқ руҳий ларза Бобирнинг тилида қолган дудуқликни бирдан йўқ қилиб юборди. Душманларига қарши чексиз бир нафрат ва ғазаб унга куч-қувват бермоқда эди.

— Хоинлар жазосини олур! Чекиниш йўқ! Одамларни тўпланг! Ҳаммага айтинг! Андижонга борурмиз!

Бобир отини кескин бурди-ю, паришон бўлиб тарқаётган одамларига қараб кетди.

4

Уша йили Бобир Аҳмад Танбал аскарлари билан олишиб, Марғилон ва Ӯшни қўлга киритди, Андижон яқинидаги Ҳоқонариқ бўйида очиқ жойда қоровул қўймай ухлаб қолишиди. Тонг отганда кимдир: «Егий босди!» — деб қичқирди-да, тура қочди. Уйқусираган одамлар ваҳима ичидаги тумтарақай бўлиб кетди. Бобир ён-верига қараса, ўнтача навкари қолибди. Нарироқда ёвнинг беш-ўнта жангдовуллари қочганларнинг кетидан ўқ отяпти. Бобирга ёв оз кўринди. У тез отланди-ю, қолган навкарлари билан ёв жангдовулларига ҳамла қилди. Улар орқага бурилиб қочди. Бобир уларни қувиши билан бўлиб, дараҳтлар панасидан чиқиб келаётган юзга яқин отлиқни анча кеч кўрди.

Тонг ёришиб қолган эди. Ҳаммадан олдинда бошдан-оёқ зирҳли кийим кийиб, қўлида қалқон тутган Аҳмад Танбал келмоқда эди. Бобир уни танигач, отининг жиловини тортиб, орқасига қаради. Йигитларидан фақат учтаси қолибди, бошқалари қочиб бўлибди. Агар Бобир ҳам шу заҳоти орқага бурилиб қочса, балки соғ қутуларди.

Лекин унга шунча аламлар ўтказган, шунча хиёнат-

лар қилган Аҳмад Таңбал энди биринчи марта жанг майдонида юзма-юз дуч келди. Бундай фурсатни бой бериш мумкинми? У дарҳол жиловни қўйиб юбориб, камонига ўқ ўрнатди. Аҳмад Таңбал қиличини суғураётганда Бобир унинг ёғоғи бўртган юзини өа қисик кўзларини мўлжалга олиб ўқ отди. Ўқ Таңбал кийган дубулғанинг пешонасига тегиб сирпаниб ўтди. Бобир иккинчи ўқни унинг бўйнига тўғрилаб отди — дубулға ва жиба кийган одамнинг юзи билан бўйнига сал очик қолар эди. Лекин Таңбал қалқони билан бўйнини бекитишига улгурди. Бобир отган иккинчи ўқ қалқонга урилиб қапчиб кетди. Бу орада Таңбалнинг ёнидаги кишилар Бобирга ҳам ўқ ёғдирдилар. Бир ўқ унинг тиззасидан пастроқ болдирини тешиб ўтди. Аҳмад Таңбалнинг ўзи отини «чу-чулаб» қўлида қиличи билан Бобирга бақамти келди. Бобир ярадор оёғининг «жизиллаб» куйиб оғриганини ва Аҳмад Таңбалнинг қўлидаги қилич алланечук таниш эканини бир вақтда ҳис қилди. Бу — Бобирнинг номидан Аҳмад Таңбалга Шуда инъом қилинган олтин сопли бағдодий қилич эди. Бу қиличини ўпиб, Бобирга садоқатли бўлиш ҳақида қасамёд қилган Аҳмад Таңбал наҳотки энди уни эгасига қарши кўтарса? Бобир буни ўйлашга ҳам улгурмасдан олтин сопли қилич унинг бошидаги дубулғага келиб тушди. Бобирнинг кўзларидан гўё оловли учқунлар сочилиб кетди, боши бирорнинг бошидек ҳиссиз бўлиб қолди. Қиличининг тифи дубулға кийгизини кесиб ўтолмаган бўлса ҳам бош яраланган эди. Бобирнинг бўйнига дубулға четидан қон сирқиб тушди. Болдиридаги ярадан этиги иссиқ қонга тўлмоқда эди.

Аҳмад Таңбал ғолибона ҳайқириб қиличини яна кўтарди. У энди ўткир қиличини Бобирнинг зирҳли кийимлари орасидан сал-пал кўриниб турган бўйнига урмоқчи ва бошини кесиб туширмоқчи эди.

Шу пайт ортдан Тоҳир етиб келди-ю, Бобир минган бўз отнинг жиловидан силтаб тортди. Бедов от ўрнидан қакраб қўзгалар экан, Аҳмад Таңбал бўйинни мўлжаллаб урган қилич Бобирнинг ёй-ўқлари солинган садогига тегиб, уни шарт кесиб тушди.

— Амирзодам! Жиловни олинг! — қичқирди Тоҳир.
Узи эса Бобирнинг отига қамчи босди.

Қамчи еб ўрганимаган учқур бедов олдинга ўқдай отилиб, эгасини бало-казодан олиб чиқиб кетди.

Ярадор Бобир Ўшга қайтди, анча кунгача боши ғувиллаб, оёғи чўлоқланиб юрди.

Уни яра оғриғидан ҳам ортиқ қийнаган дард — Аҳмад Танбалга берган қиличининг айланиб келиб ўз бошига тушгани эди. Қотилга ким қилич берса, бу қилич охири келиб ўз эгасини чопар эканми? Бироқ дунёда адолат бўлса, шунча ёмонликлар қилган Аҳмад Танбалдан ҳаёт нега қасд олмайди? Шундай разилликлар қилган одам... Бобир билан юзма-юз тўқнашганда нега унинг қўли баланд келди?

Кутлуғ Нигор хоним ўғлига тасалли бериб:

— Омон қолганингизга минг шукур! — деди. — Сиз ҳали ўн олти ёшдасиз, жоним. Танбалнинг ёшига етгунча кўп ғалабаларни кўрурсиз. Ҳолбуки бу урушлардан эл-улус беҳад толиқди. Тошкентлик тогойингиз Маҳмудхон орага тушиб, сизни Жаҳонгир мирзо билан ярашириб қўймоқчилар. Майли, Аҳси Жаҳонгир миризоники бўлсин. Андижон сизга қолур.

— Энди Фарғона водийсидаги битта кичик давлат ҳам иккига ажралиб, парчаланиб кетсинми, а? Бутун Мовароуннаҳрни бирлаштириб, қудратли давлат тузиш ўрнига баттар майдалашиб, заифлашиш!.. Тақдир кинояси бунча аччиқ?!

— Ҳозир бу кинояга чидашдан бошқа чора қолмади, жоним! Тошкентда қайлиғингиз бизга мунтазир экан... Менга хабари келди. Эгачиси «келинларингни тезроқ тушириб олинглар» деган мазмунда китобат йўлламишлар.

Бобир ҳали ўзи кўрмаган, лекин хаёлида афсонавий гўзал қиз деб тасаввур қилиб юрган қаллиғининг энди ўн тўртга тўлиб, ўн бешга қадам қўйганини эслади. Онасиға: «Ҳали ўшмиз-ку!» — деб эътиroz қилгиси келса ҳам, лекин бундай дейиншга тили бормади. У шунча вақтдан бери бир кўришга муштоқ бўлиб юрган қизига етишишин ич-ичидан истаб турарди... Онаси ҳам Бобирни суйганига уйлантириб сал тинчитмоқчи эди.

* * *

Орадан икки йил ўтди.

Жавзо ойининг илиқ оқшомларидан бирида, Андижон арқидаги ҳарамда икки ойлик келинчак Ойища бегимнинг хобгоҳида канизлар шоҳона дастурхон тузадилар.

Олтин-қумуш буюмлар ва йпак гүламлар билан безатилган танобий уйнинг даҳлизига гулдор пойандоз тўшалди. Ойиша бегимнинг қошига қўйилган ўсма ҳали қуриб улгурмасидан кимдир ҳаяжой билан шивирлади:

— Келдилар!

Айвонда бошига олтин жиға кийган Бобир кўринди, Сўнгги йилларнинг тинимсиз олишувлари уни хийла лишитган. Елкалари тўлишиб, ўн саккиз ёшли дуркун йигитга айланган.

Хобгоҳ олдида Бобирни таъзим билан қутиб олған ўн олти ёшли Ойиша бегим куёвга нисбатан кичкинағина, ингичкагина кўринади. Унинг бошига кийган сербезак баланд тоқиси, бўйнига тақилган зебигардон ва маржонлар нозик қоматига оғирлик қилаётгандек туюлади.

Каниздар таъзим қила-қила чиқиб кетдилар. Бобир улардан баъзиларининг кўзлари шўх чақнаганини пайқаб ўнғайсизланади. Куёв ҳарамда тунайдиган тунни канизлару савдарлар олдиндан билиб, маҳсус тайёргарлик кўриши, хобгоҳга шунча одамнинг кириб-чиқиши унга ноxуш туюлади.

Бунинг устига Ойиша бегим ҳаддан ортиқ уятчан. У Бобирни:

— Марҳабо, ҳазратим! — деб тўрга таклиф қилгандада овози ҳаёдан титраб зўрга эшитилди.

Уйнинг тўрида ҳарир парда ортида икки кишилик баланд тўшак бор. Ойиша бегимнинг уятчанлиги Бобирни баттар ўнғайсизлантирди. У юқорига ўтиб ўтираётгандада тўрдаги тўшакка қарамасликка тиришди. Кўзини дастурхонга тикиб:

— Хушвақт юрибсизми, бегим? — деб сўрашди.

— Шукур.

Ойиша бегим азбаройи тортиганидан дастурхоннинг Бобирдан энг узоқ четига ўтирди. Сўнг орага ноқулай жимлик чўкди.

Ойиша бегим хушсурат бўлса ҳам ҳали етилмаган норасида қиз эди. Ота-онасидан эрта ажралган бу қиз кўп касалга чалиниб озиб кетган.

Бир вақтлар Бобир уни кўрмасдан олдин хаёлида тасаввур этиб юрган афсонавий паризод бутунлай бўшқа эди. Хаёл билан ҳаёт орасидаги фарқ қанчалик катта бўлишини Бобир энди билди.

Урф-одатга биноан улар бир-бирлағини тўйдан сўнг гўшангода биринчи марта кўрдилар. Улар ҳали бирор

марта ҳамсуҳбат бўлмасларидан ва руҳан яқинлашишга улгурмасларидан олдин бошланган жисмоний яқинлик Бобирга уят ишдек туюлар ва унинг илгариги мусаффо туйғуларини поймол қилаётгандай бўларди. Шунинг учун кечалари давлат ишлари билан бўлиб, кўпинча ўзининг хобгоҳида тунаб қоларди... Ҳукмдорлик удумига биноан унинг фақат баъзи тунларни хотини билан ўтказиши расм-русумга хилоф ҳисобланмас, Бобиринг отаси Умаршайх мирзо ҳам шундай қиларди. Лекин ёш келинкүёв орасида аввалги хаёлий орзу билан ҳозирги аҳволнинг кескин фарқидан келиб чиққан нохуш бир муракаблик борлигини Ойиша бегим ҳам пайқар ва ўзини Бобирга номуносиб сезиб, ич-ичидан изтироб чекарди.

Ойиша бегим орага тушган ноқулай жимликда қирмизи чойнакдан олтин пиёлага чой қўйиб, тавозе билан Бобирга узатди.

Бобир пиёлани олаётганда Ойиша бегимнинг ҳали унча тўлишмаган озғин қўллари титраб кетганини кўрди.

— Раҳмат,— деганда, унга ўз овози ҳам гуноҳкорона товланиб эштилди.

Бобир бир вақтлар хаёлида ардоқлаб, оёғига бош қўйгиси келиб ғазал ёзган қаллифини энди бунчалик уялтираётгани учун ўзини ҳам гуноҳкор сезарди.

Чошнагир аёл олтин лаганда зира ҳиди келаётган кабоб кўтариб кирди. Ёши элликка борган бўлса ҳам дуррани чаккасига қия қилиб ўраган бу шаддод аёл кўёв-келиндаги уятчанликни сезиб, ҳазил қилди:

— Амирзодам,—йигит киши ёш келинчакни гапга солиб ўтириши керак эмасми? Қизиқ-қизиқ ҳангомалардан сўзлаб беринг. Самарқанддан элчилар келган эмиш. Қандай хушхабарлар бор?

Чошнагир аёл лаганни куёв-келиннинг ўртасига қўйиб, кумуш соврини¹ очди. Оқ кийикнинг гўштидан тайёрланган тоза кабобнинг ҳиди зира ҳидига қўшилиб атрофга таралди.

— Бегим, сиз ҳам очилибина ўлтиринг. Бундай баҳтли ёшлик бир марта келадир. Завқини суриб қолинг, айланай бегим, бизга ўхшаб кексарганингизда эслаб юарарсиз!

¹ Со ври — овқат совиб қолмаслиги учун устига ёпиладиган маҳсус идиш.

Чошнагир кулиб чиқиб кетди. Унинг «завқини суреб қолинг» деган сўзлари Ойиша бегимдаги уятчанликни камайтириш ўрнига баттар оширган эди. Бобир эса бир оз дадилланиб:

— Қани, бегим,— деди. Лаган устига қўл чўэди-ю, лекин Ойиша бегим кабобга қўл узатишини кутди.

— Сиз бошланг,— шивирлади келинчак,

— Хўп, мана. Қани, энди, сиз..

Шу тарзда бир оз кабоб еганларидан кейин яна чойга ўтдилар.

— Бегим, шаҳрингизни соғинганингиз йўқми?

Ойиша бегим энди Бобирнинг юзига ботиниброқ қарди:

— Самарқандними?.. Соғиндим.

— Агар насиб қилса, ёзда Самарқандга қайтурсиз.

— Кошки эди... Бироқ мен... ўзим кетурменими?

— Йўқ, Самарқанд насиб бўлса, бу өрдан ҳаммамиз кўчиб кетурмиз.

— Кўчиб?.. Андижон кимга қолур?

Бобир ҳорғин товуш билан:

— Ҳозирча Аҳмад Танбал билан Жаҳонгир мирзога,— деди.

Ойиша бегим ҳеч нарсага тушунолмай таажжубланиб қолди. Бобир Андижонни қайта қўлга киритгунча озмунча азият чекдими? Энди нечук Андижонни ихтиёрий равишда ташлаб кетмоқчи?

— Мен Самарқандни соғинган бўлсан ҳам,— деди Ойиша бегим,— лекин сизнинг ота юртингизда осуда яшашни афзал кўурмен!

Ойиша бегим бояги уятчанлигини унутиб, очилиб гапира бошлаганида Бобирга унинг юзи аввалгидан жозабалироқ кўринди.

— Сиздан ҳам ўтинамен, ҳазратим,— давом этди Ойиша бегим,— кўп азоб тортгансиз. Самарқанд сизга жангсиз дарвоза очмас. Энди ўзингизга раҳм қилинг. Урушга борманг, ўтинамен!

— Бегим, бу ердаги ҳозирги аҳволимиз сизга ҳам муносиб эмас, менга ҳам.

— Нечун бундай дедингиз? Ахир сиз ўз юртингизда подшоҳсиз-ку.

Бобир кинояли кулимсираб, бош чайқади:

— Ҳозир фақат номим подшоҳ,— деб қўйнидан бир варақ букланган қофоз олди-да, Ойиша бегимга узатди.

Сўнгти ойларда Бобир кўнгил дардларини қоғозга туширишга кўп эҳтиёж сезар ва деярли ҳар куни ўзъер машқ қилас эди. Бу қоғозда унинг шу бугун ёзган бир қитъаси бор эди. Ойиша бегим қоғозни очиб сатрларга кўз юргуртирди:

Қолмади ҳурмат аҳли оламда,
Оlamу олам аҳлидан юв илик.
Бобиро, икки подшоҳлиғдин
Яхшироқ бу замонда бир беклик.

- Ҳазратим, шеърингиз муборак бўлсин!
- Қуллуқ. Энди менинг дардимни тушунғандирсиз?
- Тушундим. Сиз Жаҳонгир мирзонинг Аҳсида иккинчи подшоҳ бўлиб олганидан дард чекмоқдасиз. Илгариги ягона давлат иккига бўлинган...
- Бегим, гап фақат Жаҳонгирда эмас. Жаҳонгир мирзо ҳали бола. Гап Аҳмад Танбал билан Али Дўстбекда.

Бобир шундай деб, Али Дўстбек билан ўзининг орасидаги чигал ва мураккаб муносабатлар ҳақида гапира бошлади.

Бобир бултур бир даста навкари билан Ўратепанинг жанубидаги тоғлар орасида жуда қийин аҳволда юрганда Али Дўстбекдан чопар бориб қолди. Ушанда Али Дўстбек Марғilon ҳокими эди ва Аҳмад Танбал билан ораси бузилган эди. «Агар Бобир мирзо Андижон дарвозасини Аҳмад Танбалга очиб бериб қилган гуноҳимдан ўтсалару илгаригидай яхши муомалада бўлсалар, Марғilonга келсинлар, шаҳарни берурмен», деди. Бобир дарҳол Марғilonга етиб келди. Али Дўстбек ҳам сўзининг устидан чиқди. Қейин унинг ёрдамида Бобир Андижонни ҳам олди.

Қўнглида кек сақламайдиган Бобир Али Дўстбекнинг бу ёрдамларини тантилик деб билиб, ўзи бундан ҳам катта бир тантилик қилди: Али Дўстбекнинг гуноҳидан кечибгина қолмай, уни Қосимбекнинг ўрнига соҳибихтиёр эшик оға қилиб кўтарди.

Лекин яхшиликни билмайдиган Али Дўстбек барча бекларни ўз томонига оғдириб олиб, Бобирдан ҳам юқори туришга интила бошлади. Бунга монелик қилмоқчи бўлган Қосимбекни Али Дўстбекнинг тарафдорлари туҳматкашликда айбладилар. Ҳозир агар Бобир Али

Дўстбекка қарши кескин бир чора кўрадиган бўлса, ичкарида унинг ҳамма тарафдорлари бош кўтаради. Ташқарида Аҳмад Танбал қиличини қайраб тўрибди. Андижонга бостириб келиш учун баҳона излаяпти. Агар шундай баҳона топилса, ички-ташқи кучлар бирлашиб, Бобирнинг бошига яна қора кунларни солишади. Шу сабабларга кўра Бобир тишини-тишига қўйиб, ҳаммаси-га бардош қилишга мажбур.

— Ҳозир Али Дўстбек билан Аҳмад Танбал бизни ўргумчак тўридай чирмаб келурлар,— деди Бобир Ойиша бегимга.— Агар биз шу ўргумчак тўрини ёриб чиқиб кетмасак, кейин буларга емиш бўлурмиз!

— Ҳазратим, Самарқандда ҳам ёгийларингиз беҳисоб. Яна уруш бўшлансан...

— Самарқандда ҳозир дўстларимиз ҳам оз эмас.

— Келган элчи сизни пойтахтга чорладими?

Бобир элчи билан бўлган гапларни ҳозирча жуда маҳфий тутиши зарур эди.

Самарқанд беклари билан Султон Али мирзо орасида нифоқ кучайган. Мазид тархон бошлиқ беклар мингдан ортиқ навкарлари билан шаҳарни ташлаб чиққанлар. Улар Ургутда Бобирга мунтазир турган эмишлар. Яқинда Бухорони забт этган Шайбонийхон энди Самарқандга кўз тиккан эмиш. Агар Бобир тезда етиб бормаса, Султон Али Мирзо пойтахтни Шайбонийхонга бериб қўйиши аниқ. Шайбонийхоннинг бераҳмликлари-ни кўп эшитган одамлар ундан қўрқиб, энди шаҳар дарвозаларини Бобирга пинҳона очиб бермоқчи эмишлар. Бобир мана шу қулай пайтдан фойдаланиб қолишни истайди.

— Элчи бизни чорлагани рост,— деб, у Ойиша бегимга умумийроқ жавоб қилди:— Аммо Султон Али мирзо тахтни бизга осонликча бермас.

— Демак, яна уруш! Яна хавфу хатар!..

— Бегим, тоғнинг боши қорсиз бўлмас, йигитнинг боши — хатарсиз.

— Ҳазратим боя ўргумчак тўридан гап очган эдилар. Агар сиз кетсангиз, ўргумчак тўрида биз қандай қолурмиз?

— Истасангиз сизни бирга олиб кетурмен!

— Жанг майдонигами?

Ойиша бегимнинг саволида озгина киноя ҳам борди. Буни сезган Бобир хижолатдан хиёл қизарди.

— Уруш тугагунча онам билан Хонзода бегим учоे ларингиз Үратепада туришларингиз мумкин. Баҳавожой. Шаҳар ҳокимининг хотини онамнинг туғишган синглиси. У ердан Самарқандга боришлиарингиз ҳам осон.

— Үратепа тоғлиқ жойми? Йўллари жуда ёмондир? Мен отлиқ юролмаймен.

— Маҳофада боришингиз мумкин.

Шаҳар қизи бўлган Ойиша бегим бир жойда муқим яшашни яхши кўради, йўл азобини кўтаролмас эди.

Бобирнинг сўнгги гапига бош ҷаёнаб:

— Маҳофадан қўрқамен,— деди,

«Угай тақдир менга бу борада ҳам киноя қилмиш!— деди Бобир ичидা.— Мендек қўнимсиз сайёҳтабиат кишига бунингдек нозигу муқим табиат рафиқа бермиш!»

Ойиша бегим ҳозир ҳимояга муҳтоҷ бир муштипар қиз бўлиб кўринди. Бобир унинг кўнглини кўтаргиси келиб, қувноқ оҳангда гапирди:

— Отда юролмассангиз, бегим, маҳофадан қўрқсангиз, унда мен сизни... кафтимда олиб юрурмен!

— Кулманг, мирзо ҳазратлари! Мен кафтингизда юришга муносиб эмасмен...

Ойиша бегимнинг сўнгги сўзлари Бобирга алланечуширин туюлди. Унинг йигитлик қони кўпирғандек бўлиб ўрнидан кўтарилди-ю:

— Йўқ, муносибсиз!— деди.

— Кулманг...

— Муносиблигингизни исбот этайми?

Ойиша бегим ҳуркович кийикдек чаққонлик билан ўрнидан турди ва қочишга ҳозирланди. Бобир тўй кечаси уни маҳофадан қандай озод кўтариб туширган бўлса, ҳозир ҳам ўшандай кўтариб олди. Уни тўрдаги тўшак томонга олиб ўтаётуб, пастки қандилда ёниб турган шамларни пуфлаб ўчирди.

Ҳозир шу дақиқаларда Ойиша бегим Бобирнинг кўзига оловли жозибага тўлиб кўринди, Ўзининг бу хобгоҳда уч-тўрт кунда бир марта тұнаши энди тушуниб бўлмайдиган англашилмовчиликдай туюлди. «Минбаъд ҳар куни шу хобгоҳга келурмен!— деб ўзича аҳд қилиди.— Мен Самарқандга кетсам, неча ой, неча ҳафталар айрилиқда ўтгай. Ундан кўра Андижонда муроса-ю, қаноат билан яшайверсаммикин?»

* * *

Тонг отди. Қечаси Бобирнинг режаларини ўзгартири-
моқчи бўлган сеҳрли туйғулар эрталаб офтобдан қоч-
ган юлдуздай қаёққадир яширинди. Эр хотин нонушта
қилиб ўтирганларида Аҳмад Ганбал билан Али Дўст-
бекнинг ўргумчак тўрлари яна унинг хаёlinи чирмаб
олди. Бобир кеча элчига «Самарқандга албатта борур-
миз», деб ваъда берган, Қосимбек бошлиқ содик киши-
лар янги юриш тайёрлигини бошлаб ҳам юборишган
эди. Бобир ваъдасидан қайтиши мумкин эмаслиги эр-
талабки ёруғликда аниқроқ кўринаётганга ўхшади.

Ойиша бегим ундаги хомушликни сезиб, сукут сақлаб
ўтирибди. Бобир унинг юзига ботиниб қарай олмай
кўкрагидаги олтин баргакларига кўз ташлади:

— Бегим, Уратепага борадиган бўлдингизми?

Бобирнинг Самарқандга яна юриш қилиши қатъий
экани унинг гап оҳангидан сезилди. Олдиндаги бир не-
ча ойлик ҳижрон Ойиша бегим учун беҳад оғир эди. Бу
оғирликни Бобир унчалик сезмаётгани Ойиша бегимга
худди бемеҳрлик нишонасидек туюлди-ю, бирдан ала-
мини келтирди.

— Ҳазратим, аввал Самарқанд сизга мұяссар бўл-
син. Кейин борсам биратўла шаҳримга борурмен. Ура-
тепага эмас!

Бобирнинг назарида, Ойиша бегим унинг Самар-
қандни қайта эгаллашига кўп ҳам ишонмаётгандай кў-
ринди. Шунинг учун Бобир ҳарамдан чиқиб кета туриб:

— Майли, бегим,— деди совуқ оҳангда:— худо хоҳ-
ласа, шаҳрингизда кўришганда бу гапларни яна давом
эткарurmiz.

САМАРҚАНД. Ҳал қилувчи олишув

I

Бўстон саройининг бир четида ранг-баранг тошлар
билан сангфарш¹ қилинган мармар ҳовузли ҳаммом бор
эди. Қечки пайт шу ҳаммомга Султон Али мирзонинг
ҳарамидаги энг чиройли қизлар чўмилишга келдилар.
Ҳаммомнинг ичидагилар ва кўрпачалар тўшал-

¹ Санғфарш — гўзал тошлардан гул ясаш.

ган, шоҳона дастурхон тузаб қўйилган маҳсус бир хона бор эди. Бир вақтлар Султон Маҳмуд миrzо тириклигида шу хонадан қизлар чўмиладиган бўлмага маҳфий бир туйнук очилган эди. Шаҳвонийпарамстлик билан донг чиқарган Султон Маҳмуд миrzо ўша туйнукдан қизларнинг чўмилишини томоша қилар эди.

Султон Маҳмуд миrzо ўлиб кетганига беш йил бўлди. Ҳаммомда маҳфий туйнук борлигини унинг ўн етти яшар ўғли, ҳозир Самарқанд тахтида ўтирган Султон Али миrzо яқинда билиб қолди. Уни бу сирдан воқиф қилган Абу Юсуф Арғун ҳарамга бир қанча чиройли қизлар келтириб бериб, ёш подшонинг соҳибихтиёр, сирдош бекига айланди.

Ҳозир Султон Али миrzо қўлида май тўла биллур қадаҳ билан маҳфий туйнук олдида ўтирибди, Мармар ҳовузда қий-чув қилиб чўмилаётган яланғоч қизлар унинг кўзларини ёндириб, вужудини жингак қилаётгандай бўлади. У томоги қуруқшаганда май ҳўплаб қўяди-ю, аммо кўзини туйнукдан олмайди.

Бир пайт унинг бу томошасига кимдир ҳалақит берди.

— Мирзо ҳазратлари, маҳфийлар фавқулодда ҳабар келтирмишлар.

Султон Али Мирзо Абу Юсуф Арғуннинг майин овозини танийди-ю, аммо унга ўгирилиб қарагиси келмайди:

— Нима ҳабар бўлса онамга айтаверинг.

— Бегим ҳазратлари мени сизга юбордилар, амирзодам!

Султон Али миrzо энди Абу Юсуфга ўгирилиб қаради.

Унинг қуюқ таъзими ҳам, пастки тишлари тушиб кетган кемшик оғзининг табассуми ҳам кўзига жуда ёмон кўринди:

— Жаноб бек, ўзингиз-ку, бизга мёҳрибончилик кўрсатиб гўзал қизлар пешкаш қилдингиз... Энди нега ором олгани қўймайсиз?

— Мирзо ҳазратлари, салтанатингиз хавф остида! Мен шунинг учун оромингизни бузишга журъят этдим!

— Яна қандай хавф? Онам қаердалар?

— Девони хосда сизга мунтазирлар.

Султон Али миrzо кайфини бузглаларидан ачиги келиб, қўлидаги қадаҳни майи билан мармар деворга отиб уриб чил-чил синдириди. Сўнг барвақт семирган

йўғон гавдаси кайфдан хиёл чайқалиб, ташқарига чиқди.

Қоронги тушиб қолган эди.

Девони хоснинг кираверишида эллик ёшлардаги қо-воқлари қалин, жингалак соқолли бир бек қўл қовуштириб, бош эгиб турибди. Уй тўрида тикка турган Зуҳра бегимнинг юзи қаҳрданми, қўрқувданми оқариб кетган:

— Амирзодам, сиз айшу ишрат билан бандсиз. Хиёнатчилар пойтахтни ёғийга пинҳона топширмоқчилигидан бехабарсиз!

Султон Али мирзодан норози бўлиб шаҳарни ташлаб чиққан мингдан ортиқ бек ва навкарлар Андижондан қўшин тортиб келган Бобир билан бирга Дарғом бўйларида фурсат кутиб юрганлари маълум эди. Аммо Султон Али мирзо барча дарвозаларга энг ишончли кишиларини қўйиб, шаҳарни маҳкам беркитиб ётар эди. Шунинг учун онасига зарда қилиб:

— Яна нима ваҳима?— деди.

— Менга ишонмасангиз, мана Мұҳаммад Султон-жанобларидан сўранг. Бу бек ҳозиргина Бобирнинг қароргоҳидан қочиб келмишлар. Шаҳар ичидаги фитначилар бугун кечаси Сўзангарон дарвозасини Бобирга яшириқча очиб бермоқчи эмйшлар. Пирингиз Хўжа Яҳё ҳам сиздан юз ўгириб, Бобирга тарафдор бўлган эмйшлар.

— Ишонмаймен!— деб Султон Али мирзо қўл қовуштириб турган Мұҳаммад Султонга тикилди.

— Амирзодам, гапим ёлғон бўлса бугун кечаси текшириб кўринг! Мен ёғийларингиз билан Дарғом бўйида икки ҳафта юрдим. Хўжа Яҳёнинг ризолигини Бобир роса ўн бир кун кутди. Ниҳоят, бугун эрталаб Мамадали китобдор хўжанинг ризолигини олиб борибдир. «Тун ярмида келсинлар, шаҳарга киритгаймиз», деганиш. Бобир бугун пешинда ишонган бекларини тўплаб, машварат ўтказди, шаҳарга кирганда ким қандай иш кўришини тушунтирди. Хайриятки, унинг ишонган бекларидан бири, мен — сизнинг содиқ қулингиз эдим!..

Султон Али мирзо қовоғи қалин бекка энди мамнун назар ташлади-ю:

— Ўғрини қароқчи ургандай бўлибдир!— деб хохолаб кулди.

Унинг кайф билан бепарво кулиши Зуҳра бегимнинг ғашини келтирди:

— Амирзодам, ҳар бир дақиқа ғанимат. Хос нав-
карларингиз отланган. Ҳаммаси фармойишиңгизга мун-
тазир.

— Фармойиши? — деб Султон Али мирзо бир лаҳза
ўйланиб олди: — Майли, Бобир дарвозадан кирсин. Қе-
йин туттириб кўзига мил тортиримоқ керак! Токи бизга
қаёд қилгани учун абадий кўр бўлиб қолсин!

Абу Юсуфбек оқ оралаган қалин соқолининг учини
тутамлаб бош чайқади:

— Туттиrolсак яхши эди-ю, аммо бу режа анча
қалтис, амирзодам. Дарвозани очсак, сўнгра ёпиб бўл-
мас. Бобирнинг улкан қўшини бор. Қалъя ичида ҳам
тарафдорлари кўп. Ўтган сафар Самарқандга кирганда
очларга нон улашиб, деҳқонларга уруғлик қарз бериб,
авомнинг кўнглини овлаган экан. Бир ёқдан Хўжа Яҳё-
нинг фатвоси билан авом кўтарилса, ташқаридан қўшин
кирса...

— Иўқ, бу — жуда хатарнок! — деди Зуҳра бегим.

— Ҳа, ундан кўра тезроқ Сўзангарон дарвозасига
бориб, у ердаги соқчиларни алмаштириш лозим,— деди
Абу Юсуф ва зарҳал жилдга солинган бир қофоз кел-
тириди: — Амирзодам, мана бу — сизнинг муборак но-
мингиздан ёйилган нишон¹. Бунда фитначи бекларнинг
номлари ҳам кўрсатилган. Шулар бугун кечаси қўлга
олинмоғи лозим.

— Фитначиларнинг молу мулклари мана бу Муҳам-
мад Султон каби садоқатли бекларга олиб берилсин! —
деб қўшимча қилди Султон Али мирзо.

Қовоғи қалин бекнинг жосуслик қилишдан мақсади
ҳам шу эди. У Султон Али мирзога икки букилиб таъ-
зим қилди:

— Ўлгунимча хизматингиздамен, амирзодам. Ижо-
зат беринг, мана бу муборак фармойишиңгизни бажо
келтиришда фақир ҳам навкарларим билан иштирок
этай.

Бу бек фитначиларнинг ҳовлиларини талашда бево-
сита иштирок этса кўпроқ ўлжа олиши мумкинлигини
сезиб шундай демоқда эди.

— Ижозат бердик.

Муҳрдор чақирилди ва қоғоздаги фармойишига
подшоҳнинг муҳри босилди.

¹ Н и ш о н — фармон, буйруқ.

— Қолган ишни биз бажо әтурмиз,— деди Абу Юсуф.

Султон Али мирзо тил учиды:

— Мен ҳам бирга борай,— деди.

— Иўқ, иўқ!— деди Зуҳра бегим тез. У ёлғиз фарзандини қоронғи тунда душман кўпайиб кетган шаҳарга чиқаришни истамас эди. Мирзо онасиининг юзидан ўтолмагандай бўлиб саройда қолди.

Сўнг она-бала Бўстон саройнинг иккинчи қаватидаги очиқ айвонга чиқиб, Сўзангарон дарвозаси томонга қулоқ сола бошладилар.

Тун сукунатида отларнинг дупури қулоққа баралла чалинарди. Гўри Амирдан сал нарироқда жойлашган Сўзангарон дарвозаси Бўстонсаройга кўп ҳам узоқ эмас эди.

Ярим кечада Бобирнинг илфорлари дарвозага секин яқинлашганда Абу Юсуф ва Мұҳаммад Султоннинг навкарлари дарвозахона устидан уларга камондан ўқ отиб, бир қанча кишини ярадор қилди.

Қоронғида девор тепасидан туスマл билан отилган баъзи ўқлар отларга ҳам теккан эди — оғриқдан асабийлашган отларнинг қаттиқ кишинагани Бўстонсаройга ҳам эшитилди.

Дарвозахона устидаги қўриқчилар Бобирнинг одамларини масхара қилиб кулишарди:

— Мирзоларинг барак¹ни хом санабдир!

— Ха-ха-ха!

— Самарқандни энди тушларингда кўринглар!

— Кейин тушларингни сувга айтурсанлар!

— Хо-хо-хо!

Бобирнинг қўшини орқага қайтиб кетиши билан дарвоза олдида шовқин тинди-ю, кейин шаҳарни у ер-бу ерида итларнинг жон-жаҳд билан ҳургани, одамларнинг аччик фарёди эшитила бошлади. Абу Юсуф бошлиқ хос навкарлар дарвозани тинчтиб, энди фитначиларни овлашга киришганини айвонда ўлтирган Султон Али мирзо шу узуқ-юлуқ дод-войлар товушидан сезди.

— Энди тинч ухласак бўлур,— деб хобгоҳига кириб кетди.

Аммо Зуҳра бегим қандиллар ёниб турган ўз хонасига келиб, тонг отгунча ухламай ўтириди.

¹ Барак — чучвара.

Ҳозиргина бир фалокатнинг олдини олинган бўлса ҳам, аммо келажакдаги мушкулотлар унинг уйқусини қочирмоқда эди. Бобир Самарқандни яна қамал қилиши мумкин. Унинг ўтган галги қамали ҳали кўпчиликнинг эсидан чиққан эмас. Ичкарида Зуҳра бегим ишонадиган одамлар тобора камайиб боряпти. Бугун фитначи беклар жазоланса ва таланса, Султон Али мирзодан норози бўлувчилар яна кўпаяди. Уларнинг бошчиси — Хўжа Яҳё жуда нуфузли руҳоний. Султон Али Мирзо Хўжа Яҳёга қарши кескин чора кўролмайди. Чунки бутун диндорлар Хўжанинг томонида. Агар Хўжа авом ҳалққа фатво бериб, бутун муллоларни ишга солса, гулу кўтарилиб кетиши мумкин.

Зуҳра бегим хаёлан ўзига таянч излар экан, яқинда Бухорони олган, энди Самарқандга қўшин тортиб келиши кутилаётган Шайбонийхон эсига тушди. Бундан уч кун бурун нақшбандий дарвишларидан бири Зуҳра бегимга Шайбонийхондан маҳфий бир хат келтириб берган эди. Бегим пардали маҳсус токчада турадиган олтин сандиқчасига калит солиб, очди-да, ўша хатни олиб, қандил ёруғида қайта ўқий бошлади.

Зарвараққа битилган чиройли ёзувда Зуҳра бегимнинг ақли ва ҳусни усталик билан таърифланган, ёш умрини ўғлига фидо қилиб эрсиз юргани алоҳида эҳтиром билан тилга олинган эди. Хатнинг энг ғалати жойи — Шайбонийхоннинг Зуҳра бегимга фойибона кўнгил қўйиб, унга уйланмоқчи эканини шеър билан айтгани эди:

«Ўғлингиз ўғлиму ўзингиз ёrim,
Дилбару ҳамнафасу дилдорим».

Ҳозир шу сатрларни ўқиётганда Зуҳра бегим забардаст бир эркакнинг ўтли нафасини ўз юзида ҳис қилгандай бўлди. Зуҳра бегим олти йилдан бери мана бу тўшакда ёлғиз ётади. Унинг гулдай умри беваликда сўлиб боряпти. Зуҳра бегим тегаман, деса уни оладиган зодагонлар топилар эди. Ахир у таърифи кетган гўзал қиз бўлгани учун Султон Маҳмудхондай подшоҳнинг суюкли хотинига айланган эди. Бироқ ўғли тахтга ўтирган Зуҳра бегим фақат ўзига муносиб подшоҳга тегиши мумкин, удум шундай.

Мана энди унга харидор подшоҳ ҳам топилди. Бегим Шайбонийхоннинг шеъридаги иккинчи сатрни яна бир ўқиганда хаёлий бир эркак уни қучиб, «Дилбар ёrim,

дилдорим!»— деб эркалаётгандай бўлди-ю, бадани қизиб кетди.

У ўрнидан туриб, катта тошойна олдига борди-да, ўзининг аксига тикилиб қаради.—Ўйқусиз тундан кўз остилари хиёл кўкариб салқиган. Аммо қошлар — қалдирғоч қаноти. Қора кўзлари учқун сочиб порлайди. Кўкраклар баланд. Бўйни оқ мармардай силлиқ, лаблари эҳтиросли.

Шайбонийхоннинг ёши элликка яқинлашган, хотинлари ва болалари бор, Зуҳра бегим буни билади. Аммо бегим ўзининг ойнадаги аксига мамнун тикилиб турган шу дақиқаларда «Шайбонийхоннинг саҳрои хотинлари нима бўлипти?— деб ўйланди.— Мен хонни ўзимга шундай ром қиласки, ҳаммаси оғзини очиб қолсин!»

Эртага ўша дарвеш келиб, бегимнинг жавобини олиб кетиши керак. Бегим Шайбонийхонга хат ёзиш учун қоғоз-қалам олди.

Бироқ қандилларда кўпдан бери ёнаётган шамларнинг тутунидан уй сал хира тортиб қолган эди. Зуҳра бегим ҳаворанг барқут дарпардаларни очди-ю, саҳар салқинига юзини тутиб, айвон эшиги олдида бирпас турди.

Шунда аркка яқин бир маҳалладан эр кишининг жон аччиғи билан қичқиргани эшитилди. Аёл кишининг ўкириб йиғлагани унга жўр бўлди.

Абу Юсуф билан Мұҳаммад Султон ҳамон фитначиларни овлаб юргани, уларнинг уйларини талаб бойиётгани, аллакимлар ўқ ёки тиф зарбидан жон бераётгани Зуҳра бегимнинг кўз олдига келди. Шунда хаёли бирдан бошқа ёққа бурилди.

Шайбонийхон Самарқандни жангсиз олиш учун Зуҳра бегимга ёлғондакам ишқ изҳор қилаётган бўлса-чи? Самарқандни олгандан кейин сўзидан қайтса-ю, Зуҳра бегимни мана бу қоронғи тунда ўкириб йиғлаган аёлнинг аҳволига солса-чи?

Бу шубҳадан бегимнинг борлиғи музлаб кетди. У орқасига қайтиб Шайбонийхоннинг мактубини яна қўлига олди. Хон унинг шундай шубҳаларга боришини олдиндан сезгандай, мактубнинг яна бир жойида шеър айтган эди:

«Мен Самарқандни сенсиз нетайин,
Жасади тийрани жонсиз нетайин?»

Бу сатрларнинг тафтидан Зуҳра бегимнинг қалбига юна илиқлик югурди. Шу топда бегимнинг ўзига ҳам ёрсиз Самарқанд — жонсиз танадай совуқ туюларди. Шайбонийхон унинг бевалик ҳаётига иссиқ жон бўлиб кириб келиши кўз олдида гавдаланди-ю, қаламни қўлиға олиб, хонга жавоб ёзишга кириши. Сатр бошидан хоннинг таърифини юксакларга кўтариб:

«Ҳазрати имоми замон, халифати раҳмон», деб ёза бошлади...

2

Самарқанд қалъасининг ташқарисидаги боғ кўчалар, Улуғбек расадхонасининг атрофлари, Обираҳмат аригининг бўйлари беҳисоб қўшинга тўлиб кетган. Чўпонота тоғининг этакларида, нарёғи Зарафшон соҳилида юзлаб ўтовлар ва чодирлар пайдо бўлган.

Бу қўшиннинг саркардаси Шайбонийхон Бони Майдонга, Улуғбек қурдирган машҳур Чилсутун кўшкига келиб тушган эди. Шайбонийхон кўшкнинг юқориги қаватида тўрт тарафи айвонлик катта уйда пешин намозини ўқиб бўлган ҳам эдики, ясовул кириб, Султон Али мирзо бир неча ичкилари билан қалъадан хон ҳузурига келганини айтди.

Шайбонийхоннинг кичик-кичик кўзлари қувончдан ялтиллаб кетди.

— Султонларни бу ерга чорланг. Кейин мирзони бошлаб киринг.

— Ҳазратим, тахтингиз пастки ошиёнда.

— Жойнамозим тахтимдан баланд!

— Лутф қилдингиз, ҳазратим!

Ясовул икки букилиб таъзим қилганича орқаси билан юриб чиқиб кетди.

Шайбонийхон бўталоқ жунидан тўқилган майин мала жойнамоз четига қайтиб ўтириди.

Ясовул пойгаҳдаги эшикдан Султон Али мирzonи бошлаб кирганда Шайбонийхон ҳали ҳам шаҳнишинда ўша жойнамоз устида ўлтирган эди. Шаҳнишин пастида унинг ўн чоғли султонлари чўккалаb ўлтиришибди.

Шайбонийхон безаксиз жўн кийинган эди. Султон Али мирзо эшикдан кирган заҳоти унинг салласига қадалган дурру гавҳарлар, тўнига тикилган олтину марваридлар дабдаба билан ялтираб кўзга ташланди. Аммо мирzonинг кўзлари бесаранжом, семиз гавдаси бўшаш-

ган. У онасининг ва Абу Юсуф аргуннинг гапига кириб, қалъадан қўшинисиз чиқиб келган эди. Бу ерда хоннинг беҳисоб қўшинини кўриб, юраги така-пука бўлиб кетди.

Шайбонийхон билан аввалдан тил биритириб юргаи Абу Юсуф Султон Али мирзони хон ҳузурига авраб олиб келиш учун боя тушки овқат пайтида мирзога яхши кўрган майларидан анча ичирган эди. Ҳозир Султон Али мирзо Шайбонийхонга томон таъзим билан бораётганда оёқлари гиламда қоқиниб, гавдаси гандираклаб кетди. Абу Юсуф суюб қолмаганда йиқилиб тушарди.

Шайбонийхон ўрнидан туриб, мирзо билан кўришар экан, хушбўй май ҳиди димогига урилди. У мирзонинг кайфи борлигини дарров сезди-ю, уни ўғли Темур Султон ва куёви Жонибек Султондан қўйироққа ўтқазишни ясовулга имо қилиб буюрди.

Шайбонийхон бошига қизил бўрк устидан оқ салла ўраган, кўк мовутдан або кийган. Олтин тутмали або тагидан кийган яшил кўйлаги мусулмон байроғининг рангини эслатади. Жойнамоз устида ўлтиргани ҳам уни художўй бир одамга ўхшатиб кўрсатар эди. Бунинг ҳаммаси Султон Али мирzonинг ваҳимасини сал босди-ю, аммо қўйидан жой кўрсатилгани унинг иззат-нафсига тегди. Бошқа Султонлар Шайбонийхоннинг олдида чўйкалаб ўтирганда, Султон Али мирзо атайлаб чордана қуриб олди. Шайбонийхоннинг ўғли унга ғаши келиб қараб қўйди.

— Сиз менга фарзанддек яқин бўлмоқчимисиз, мирзо? — сўради Шайбонийхон мулоим товуш билан.

— Хон ҳазратлари иттифоқ тузиш учун чорлабдирлар....

- Волидаи муҳтарамингиз келмадиларми?
- Онам мени юбордилар.
- Аммо ўзлари ҳам келмоқчи эдилар.
- Аёл киши, тортинурлар.
- Одам юборинг, мирзо, онангиз ҳам келсинлар.

Султон Али мирзо ёнида чўйкалаб ўтирган Абу Юсуфбекка қаради. Абу Юсуф дарҳол ўрнидан туриб, Шайбонийхонга таъзим қилди:

— Ижозат беринг, хон ҳазратлари, мен ҳозир бориб Зухра бегимни айтиб келай.

Бу нозик ишларнинг ҳаммаси Абу Юсуфнинг ҳаракатлари билан битаётганини яхши биладиган Шайбонийхон ясовулга буюрди:

— Абу Юсуфекка менинг энг чопқир отларимдан бирини инъом қилинг!

— Миннатдорман, ҳазратим!

— Бек, қайтишда Хўжа Яҳёга ҳам хабар қилинг. Султон Али мирзо келган жойга Хўжа келмаса ора узилур.

— Ҳақ ғапни айтдингиз, хон ҳазратлари!

Абу Юсуф бу топшириқни бажариш учун кетгандан кейин Шайбонийхон ўрнидан турди-ю, султонларига қараб:

— Мирзо билан суҳбатлашиб ўтирглар,— деди, ўзи эса орқа эшикдан айвонга чиқиб, пастга тушиб кетди.

Султон Али мирзо атрофидаги султонларнинг адочватли юзларига қараб, улар орасида ёлғиз қолишга қўрқди ва ўрнидан туриб, ён эшикка қараб йўналди. Шунда туркистонлик султонлардан бири ўрнидан сакраб туриб, унинг йўлини тўсди.

— Амирзода, буйруқ бўди¹, энди бизинг янимиздан кетмайсиз!

Барваста бир навкар қўлини ханжарининг сопига қўйиб, эшикка кўндаланг бўлиб олди. Султон Али мирзо қопқонга тушганини энди сезди-ю, кайфи бирдан тарқаб кетди. Юзи бездек бўлиб, бояги жойига қайтиб ўтиреди.

Орадан бир-икки соат ўтгандан кейин Зуҳра бегим ҳам тўртта канизи билан Боги Майдонга кириб келди. Унинг бошида келинчакларни эслатувчи оқ ҳарир рўмол, пешонасига эса тиллақош тақилган. Эгнида хипча белли гулгун қабо. Унинг тагидан кийилган оқ атлас қўйлагининг этаги шунчалик узунки, икки каниз икки томондан кўтариб келяпти.

Зуҳра бегимни Чилсутуннинг пастки ошиёнида маҳсус безатилган хонаи хосга бошлаб ўтаётгандарини Шайбонийхоннинг қирқ ёшлардан ошган катта хотини кўриб қолди:

— Бу не деган юзсиз хотин?— деб ёнидаги аёлга шипшиди:— Эрсираган мегажин иззатини билиб уйида ўтирмайдими? Совчи бориб ишни битирганча шошмай турмайдими? Илойим касофати ўзидан берига келмасин!

Зуҳра бегим хонаи хосга кирганда Шайбонийхон таҳт устида ўтирас эди. Зуҳра бегим икки букилиб таъзим қи-

¹ Бўди — бўлди.

лар экан, Шайбонийхон у билан тахт устидан тушімасдан сұрашди.

— Хуш келдингиз, бегим.

Хондан бошқача мұомала күтган Зухра бегим тұсатдан күнгли бузилиб күзига ёш олди.

— Хон ҳазратлари, мен ўзимни сизга қурбон қилдим. Фарзандимни, хону монимни,— ҳаммасини марҳаматтін гизга ишониб топширдім!

Зухра бегимнінг юзи оқ ипак түр ортидан аниқ күрінімас эди. Хон унинг гавҳар күэли олтын узуклар тақылған құлларига қаради. Томирлари бүртиб турған бу титроқ құллар бегимнінг анча ўшга борганидан далолат берарди. Шайбонийхон яқында Бухорода никоҳлаб олған ўн түккіз ёшли кичик хотинини эслади. Сүңг Зухра бегимнінг каттагина ўғли Султон Али мирзо күз олдидан ўтди.

— Хотиржам бўлинг, бегим. Сизнинг мақсадингиз бизга маълум. Худо ҳоҳласа муродингиз ҳосил бўлмай қолмас.

Шайбонийхон бошқа ҳеч нарса демади. Ясовул Зухра бегимни хонаи хосдан олиб чиқиб кетди. Уни канизлари билан бошқа бир кичикроқ ҳонага киритиб, эшикларини ташқарисидан ёпиб олдилар.

* * *

Шайбонийхоннінг нима құлмоқчи эканини ҳеч ким тушунмас, аммо бугун Боги Майдонда фавқулодда бир ҳодиса бўлаётганини сезган барча лашкарбошилар ва аъёнлар Чилсутун кошонасининг ён-верида икки-учтадан бўлиб айланиб юришар эди. Уларнинг орасида шоир Мұҳаммад Солиҳ ҳам бор эди. Унинг ипак салласи нозик қилиб ўралган, калта енгли ипак абоси ўзига жуда ёпишиб туради. Ёзда ҳам телпак кийиб юрадиган, урушдан бошқа нарсани билмай қўполлашиб кетган кўчманчи султонлар унинг зиёлича нозик кийинишини ёқтирумайдилар, темурийлар хизматидан ўтган оғир ўтмишини эслатиб туришни яхши кўрадилар.

Найман уруфининг бошлиғи Қамбарбий боғда Мұҳаммад Солиҳга тегиши:

— Ҳа, жаноб шоир, Самарқанддан мирзонгиз минан чечангиз¹ келиб, суюниб турибсизми?

¹ Чечә — бу ерда келинойи, янга маъносида.

— Қамбарбий жаноблари, Зуҳра бегим асли ўзбекнинг найман уруғидан бўлурлар. Бегимни мендан олдин сиз чечча дейишингиз лозим.

Мангит, дўрмон ва қушчи уруғининг султонлари бу гапни ёқтириб хохолаб кулдилар. Қамбарбийнинг аччиғи келди. Мұҳаммад Солиҳга ўшқириб:

— Сиз-чи? — деди. — Сиз барлос туркиданмисиз?!

Темур ва темурийлар чиққан барлослар Шайбоний-хоннинг энг ёмон кўрган уруғи эди. Мұҳаммад Солиҳ Хусайн Бойқаро саройида хизмат қилган, Султон Али миrzога ҳам мулозим бўлган, ахийри миrzолардан айниб, Шайбонийхон томонига қочиб ўтган эди. У Султон Али миrzонинг ҳарбий сирларини Шайбонийхонга 'айтиб бериб, Бухоро ва Дабусия қалъасининг олинишига кўмаклашгани учун хон уни ёқтириб қолган эди. Аммо Қамбарбий ичидаги уни «Хиёнат йўли билан обрў орттирган бекарор турк!» — деб ёмон кўрар эди.

Мұҳаммад Солиҳ Қамбарбийнинг бу нафратини ўзига олгиси келмай, гапни ҳазилга бурди:

— Жаноб Қамбарбий, мен ҳозир — ўзбек туркиданмен!

— Қувлик қилманг ўзбек бошқа, турк бошқа!

— Лекин ўзбекда «ота юртим Туркистон» деган нақл бор-ку, бунисига не дейсиз?

— Вой-бўй, — деди Қўпакбий, — манав шоиринг бизнинг Туркистонни ҳам туркларга бериб жубормоқчи-фу!

Дашти Қипчоқдан чиққан оми Қўпакбий Туркистондай маданий шаҳарни ўзиники қилиб гапирганидан Мұҳаммад Солиҳнинг кулгиси келди:

— Жаноб Қўпакбий, сиз аввал Туркистон деган сўзниңг маъносини тушунинг! Туркистон — турклар макони дегани-ку!

— Не демоқисан? Биз Рум¹ туркидан тарқағанмиз-ма?

— Иўқ, Рум турклари бошқа, биз бошқамиз! Чунки Мовароуннаҳр халқи Рум туркларидан неча асрлар аввал мана бу водийларни обод қилмишлар. Самарқанд қўргонидан берида турган ҳу ана у тепаларга бир қаранг. Ана ўша ерда бундан минг йил аввал Афросиёб деган улкан шаҳар бўлган. Афросиёб эса Мовароуннаҳр туркларининг афсонавий қаҳрамони эди. «Унинг асли

¹ Рум — Туркия.

оти Алп Эр Тўнга бўлган» деб, «Қудатғу билик»да Юсуф Хос Ҳожиб ёзмишdir.

— Бу шоир ўзбекнинг ионини еб, нуқул туркни мақтайди-я!

— Жаноб Қамбарбий, ўзбек, қозоқ, туркман, қирғиз — барчаси ҳам туркий улуслардир. Бир отанинг боалалиридек еrimiz бир, тарихимиз бир. Сизлар ўзбек уруғларининг тарихини Узбекхондан¹ бошлайсизлар. Бу тўғри эмас.

— Нега тўғри бўлмас экан? — ўшқирди Кўпакбий. — Биз Узбекхондан тарқаган эмасмизма?

— Жаноб Кўпакбий, сизнинг қипчоқ уруғингиз Узбекхондан беш юз йил олдин машҳур бўлган. Кўнғирот уруғининг тарихи ҳам олти-етти асрга боради. Мангит, найман, дўрмон, қушчи уруғлари ҳам қадимдан бери бор. Бу уруғлар ҳаммаси ҳозир онҳазратим Шайбонийхон қўл остига бирлашиб, «ўзбек улуси» деган умумий ном олган экан, сизлар бу улуснинг тарихини эсдан чиқармангизлар. Узбек деган исм туркий халқларда Узбекхондин неча юз йил олдин ҳам мавжуд бўлган. Мен Хоразмда ўсмишмен. Қадимий китоблардан ўқидимким, Чингизхондан олдин шоҳ бўлган Хоразмшоҳ Муҳаммад ўз ўғилларидан бирига Узбек деб ном қўймишdir. Шундан маълумки, бу ном юртимизда Чингизхон келмасидан олдин ҳам мўътабар бўлган. Узбек номини бизнинг улусимиз Узбекхондан олган эмас. Аксинча, бу қадимий номни Узбекхон бизнинг туркий улуслардан олмишdir!

— Яна туркий дейди-я! Оббо сарттинг боласи-е!

— Тарих шундай бўлса мен не қилай, жаноб Қамбарбий? Минг йиллардан бўён Xуросондан нарёғи Эрону бериги ёғи Турон деб юритилур... Хон ҳазратлари буни яхши билурлар. Имоми замон Бухоро мадрасасида таҳсил кўрганларида жуда кўп туркий шеърларни ёд оланлар. Узлари ҳам туркий тилда ғазаллар ёзганлар. Мен онҳазратнинг ғазалларидан бир байт келтирай, эштинг:

«Фирқат отидин йиқилдим, ёр келди сўрғали
Эй Шайбоний, ёр дардингга даво қилди яна».

¹ Узбекхон — Олтин Ўрда хони, 1312—1342 йилларда ҳукмронлик қилган, унинг пойтахти Сарой Берке Волга бўйида, ҳозирги Волгоград яқинида бўлган.

— Хон ҳазратларининг бу шеърлари туркийча эмас, ўзбекча! — деди Қамбарбий.

— Лекин барча туркигўй шоирлар худди шу тилда шеър ёзганлар-ку! Агар бу — ўзбек тилида бўлса, демак, Навоий ҳам ўзбек тилида ёзган. Демак, камина ҳам ҳозир сизлар билан ўзбек тилида сўзлашмоқдамен. Демак, Мовароуннаҳрнинг туркий тили-ю, ўзбек тили, аслида бир тил. Жаноблари, энди дилимиз ҳам бир бўлмоғи керак. Темурийлар турку ўзбек деб улусни улусдан ажратиб, халқни пароканда қилдилар, мамлакат парчаланиб, хароб бўлди. Энди имоми замон, Искандари соний¹ яна шу улусни бирлаштириб, мамлакатга ягона жон ато қилмоқчилар. Илоҳим ҳазрат хонимиз шу мақсадлариға етсинлар!

Мұхаммад Солиҳнинг бу гапига энди ҳеч ким эътиroz қилолмади. Мунозарада усталик билан ғолиб чиққан шоир кўшкка қараб кетди.

Кўпакбий Қамбарбийга қараб:

— Сарттинг боласини кўрдингизма? — деди. — Буларни гап билан женгиб бўлмайди!

— Гап билан енгмасак қилич билан енгамиз! — деди Қамбарбий. Ҳаммалари хохолаб кулдилар.

* * *

Кўшкда ясовул чиқиб, боғда мунтазир турган лашкарбоши ва аъёнларни хон ҳазратлари юқориги қаватга кенгашга чақирганини айтди.

Боғдаги аркони давлат кўшкнинг тўрт бурчига миорага ўҳшатиб ишланган ва торгина йўлак ичидан ўтган зинапоялар билан юқорига кўтарила бошладилар.

Хоннинг ўзи ҳали ҳам пастдаги хонаи хосда яна ниманидир кўтмоқда эди.

Кечки пайт Самарқанддан беш-олтита муридини эргаштириб, Хўжа Яҳё ҳам чиқиб келди. У Боғи Майдонга кириб отдан тушаётганда саросима бўлиб, оёғи узанги қайишига ўралиб қолди. Муридлари уни суяб туширдилар.

Қатта оқ салла, малла сақарлот делагай кийган Хўжа Яҳё Шайбонийхон ўтирган тахтнинг олдигача таъзим

¹ Искандари соний — Иккинчи Искандар. Шайбонийхонга берилган юксак таърифлардан бири.

қилиб борди. Қироатга ўрганган жарангдор товуш билан:

— Ассалому алайкум, хон ҳазратлари,— деди.— Самарқанд дарвозалари сиз улуғ зот учун очиқдур!

Шайбонийхон Хўжа Яҳё билан ўрнидан турмай сўрашди-ю, киноя қилиб деди:

— Самарқанд қопқаларини биз учун сиз очиб келдин-гизми?

— Ҳазратим, ҳар иш худонинг хоҳиши билан бўлур.

— Бироқ сизинг хоҳишингиз — Самарқандни Бобирга бериш эди-ку?

— Осий бандалармиз, хон ҳазратлари. Хатолик ўтган бўлса, афв этинг, ҳузурингизга бош эгиб келдим...

Хўжа Яҳё кўзига ёш олди.

Шайбонийхон ясовулга буюрди:

— Юқорига олиб чиқиб мирзосининг далласига¹ ўтиргизинг!

Хўжа Яҳёни олиб чиқиб кетганларидан кейин Шайбонийхон ўзининг энг яқин маслаҳатгўйи бўлган олтмиш ёшли мўйсафи Мулла Абдураҳимни чақирди ва у билан нима ҳақдадир яккама-якка гаплаша бошлади.

Хоннинг шошилмаётгани баъзи сultonларни таажжубга солмоқда эди. Самарқанд дарвозалари очиқ пайтда нега пойтактга от қўйиб кирмасдан, бу ерда имиллаб ўтиришибди?

3

Шайбонийхон тўрдаги эшикдан кирганда ҳамма ўтирганлар ўринларидан сапчиб туриб, хонга эгилиб таъзим қилдилар. Хон шаҳнишинга тўшалган кимхоб кўрпача устуга чордана қуриб ўтирди. Ўнинг ўнг ёнига чўкка тушган мулла Абдураҳим қуръондан қисқа бир оят ўқиб, хон ҳазратларига энг олий тилаклар билдири-ю, ниҳоят, мақсадга ўтди:

— Имоми замон, халифаи раҳмоннинг ниятлари фақат шаҳр олиш эмас, дину миллат душманларини фош этиб, сизу бизни Муҳаммад алайҳиссалом юрган муқаддас йўлга етаклашдир. Агар фақат молу мулкни ўйлайдиган подшоҳ бўлса, Самарқанд қопқалари очилган за-

¹ Далласига — қаватига, соясига дегани.

ҳоти урҳо-ур, деб қалъага от қўйиб кирур эди, карнай-сурнай чалдириб, ўз ғалабасини тезроқ ҳалқа ошкор қилур эди. Аммо бизнинг улуғ хонимиз доноликда Искандари замон Шайбонийхон молу мулкдан аввал инсофу имонни ўйлаюрлар.

— Барҳақ! —деб қўйди Мулла Абдураҳимдан пастроқда ўтирган Мұҳаммад Солиҳ.

— Подшоҳ инсофу имонни унутса не ҷоглиқ мурдорликлар юз бериши, мамлакат не ҷоглиқ ҳароб бўлиши темурийларниг кирдикорларидан бизга аён. Абдуллатиф мирзо ўз отаси Улуғбек мирзони ўлтирирди. Ҳиротда Ҳусайн Бойқаро ўз невараси Мўмин мирзони ўлтирирди. Мана ҳозир биз билан ўлтирган Султон Али мирзо ўз оғаси Бойсунқур мирзони туттириб ўлдирмоқчи бўлганда, оғаси қочиб қутилди. Кейин Бойсунқур мирзо бу инисини туттирганда кўзини кўр қилмоқчи бўлди. Аммо жаллодни олтинга сотиб олиб, бу мирзо ҳам қочиб қутилди. Мирзоларнинг саройида сотқинлик, хиёнат, бузуқлик авж олди. Қуръони шариф майни макруҳ деб қатъий тақиқлаган. Аммо даврамиэда ўлтирган мана бу ёш мирзо жойнамоз устида ўлтирган имоми замон ҳузурига май ичиб ширакайф келмиш! Бу мирзонинг шаҳвонийпарастлиги, шу ёшдан ҳаром йўлга юришлиги имоми замон хонимизга аввалдан аён эди!

Кўпакбий ғазабланиб гап қўшди:

— Осиб ўлдириш керак бундай мирзонни!

— Айб фақат бу навжувон мирзода эмас, —деб Мұҳаммад Солиҳ унга эътиroz қилди. — Бунинг отаси Маҳмуд мирзо бағоят имонсиз бузук одам эди. Самарқандда подшоҳлик қилганда хотинбозликка қаноат қилмай, баччабозликни ҳам авжига чиқарган эди. Бечора ҳалқ чиройли ёш ўғлонларини кўчага чиқартиришга кўрқиб, қизларни яширгандек ичкарига яширап эди.

— Уғли отасига тортибдир-да?

— Онаси-чи? Мирzonинг онаси қалай?

Бу қалтис саволдан ҳамма бир лаҳза жим бўлиб қолди. Чунки «Шайбонийхон Зухра бегимни никоҳлаб олмоқчи эмиш», деган овоза кўпчиликнинг эсига тушди. Хон бу аёлга уйланса обрўси тушишини бояёқ сезган ва уйланмоқчи эмаслигини Мулла Абдураҳимга айтган эди. Ҳозир Мулла Абдураҳим мишишларни бартараф қилишга шошилди:

— Мирзоларнинг касофати хотинларига ҳам урмиш. Бу мирзонинг онаси ўз нафси учун ёлғиз ўғлини қурбон қиласидиганга ўхшайди!

Мулла Абдураҳимнинг бу гапидан кейин хоннинг Зуҳра бегимга муносабати ҳам кўпчиликка аён бўлди. Султонлардан бири:

— Қутурган бияга судратиб ўлдириш керак ундаи хотинни! — деди.

Яна бири:

— Қопга солиб энг баланд минорадан ташлаш керак! — деди.

Шайбонийхон мунозарага эрк бериб, ўзи ҳамманинг гапига зидан қулоқ солиб ўлтиради. Бир-биридан қўрқинчли таклифлар кўпайиб кетгандан кейин Шайбонийхоннинг ишораси билан Мулла Абдураҳим ҳаммани жим қилди.

Хон гапирав экан, ўнлаб кишилар унинг салмоқдор, вазмин овозидан, дона-дона қилиб айтиётган сўзларидан сеҳрлангандай қотиб қулоқ сола бошлади. Шайбонийхон мирзоларнинг инсофни, имонни унугланлари, эл-улусни вайрон қилганларига яна бир талай мисоллар келтири-ю, бирдан Ҳўжа Яҳёга юзланди:

— Бу мирзоларнинг пири — сизинг отангиз Ҳўжа Аҳ-рор эди. «Мен валийман» деб, подшоҳларга ҳукмини ўтказиб, жуда қатта бойлик орттирган эди. Бизнинг хабаримиз бор, отангиздан сизга жуда кўп олтин қолған. Отангиз ўлгандан кейин, мана, ўн бир йилдан бери сиз Самарқандга руҳоний ота бўлиб юрибсиз. Сиз ҳам нафса берилиб, жуда кўп сийму зар тўплағансиз. Балиқ босидан бузилади. Пир қандай бўлса, мурид ҳам шундай бўлади. Далдангизда ўтирган мана шул шаҳвонийпараст ёш мирзо сизнинг муридингиз, худо олдида сиз шунга жавоб бераман деб қўлини олғансиз!

Шайбонийхон шаҳодат бармоғини бигиз қилиб, аввал мирзони, сўнг Ҳўжа Яҳёни кўрсатди-да, кейин ўша бармоғини пастга қаратиб силкитди:

— Сизинг яна бир муридингиз аёл боши билан эр истаб келиб, пастда ўтирипти. Сизинг қандай пирлигинизни мана шулар кўрсатиб турипти! Сиз аввал муридларингизга хиёнат қилиб, Самарқандни Бобирга бермоқчи бўлдингиз: Кейин булар пирларига хиёнат қилиб, менинг олдимга келди. Хиёнат устига хиёнат! Бири у ёқقا тортса, бири бу ёқقا тортади! Подшоҳ ўзича-ю, дин раҳна-

моси ўзича! Бири бирини алдайди. Бири бирининг гўштини емоқчи бўлади! Муҳаммад алайҳиссалом ҳам пайгамбар эдилар, ҳам подшоҳ эдилар, ҳам лашкарбоши эдилар. Ким шунга қодир бўлмаса, ким пайғамбаримизнинг муқаддас йўлидан юрмаса, мана шу пир билан муридга ўхшаб коғирлик жарига йиқиласди!

Шайбонийхон бу гапларни ўзининг қўл остидаги аъёнларига ҳам тегизиб гапирмоқда эди. Чунки уларнинг баъзиси «хонимиз тахту тожга қаноат қилмай имоми замон, халифаи раҳмон ҳам бўлиб олдилар», деб шивирлашар эди. Темурийларнинг ишини кўпдан бери кузатиб юрган Шайбонийхон уларнинг салтанатларида Хўжа Аҳрор каби диний раҳбарлар ўзларича мустақил ҳукмдор бўлиб олиб, мирзоларнинг ҳокимиятини ичдан заифлаштирганини яхши билар эди. Шайбонийхон хонлик ҳокимияти билан диний ҳокимиятни ўз қўлида бирлаштириб темурийларга нисбатан катта бир устунликка эришмоқда эди. У Бухорода мадрасада ўқиб юргандага шариат ва тариқат илмини яхши ўрганган, қуръонни ёд билар эди. Ҳозир Шайбонийхоннинг қароргоҳида ислом динини ундан яхши биладиган, қуръонни қироат билан ўқишида ундан ўтадиган одам йўқ эди. Унинг имомлик ва халифалик унвонлари шундан ҳам келиб чиқсан эди. Шайбонийхон марказлашган улуғ бир давлат тузишга интилар экан, бу мақсадга тезроқ етиш учун қўл остидаги одамларнинг ихлос ва эътиқодини ҳам қозоёнишга, уларнинг мағкурасини ўзига бўйсундириб ҳаммасини бир доҳий атрофига жипслаштиришга алоҳида эътибор берар эди. У ўз даврининг энг зўр мағкураси — диний мағкура эканлигини яхши биларди. Шунинг учун ҳозир ўзи эришаётган муваффақиятларни ҳам динга ва илоҳий кучларга боғлаб гапира бошлади:

— Бизнинг Самарқанддаги душманларимиз етти бошлиқ аждарҳодай зўр эди. Бу аждарҳо не-не қўшинларни комига тортиб ютиб юборган. Аммо бизнинг имонимиз пок, ниятимиз холис. Олло таоло ўша аждарҳони инидан тортиб чиқариб, бизинг ҳузуримизга олиб келди, «Нима қиссанг қил!» — деб қўлимизга берди. Худонинг қудрати билан Самарқанддек шаҳарнинг қопқалари бизга жангсиз очилди!

Самарқанд урушсиз таслим бўлаётганлиги, унинг подшоҳи ва диний раҳбари ўз оёқлари билан Шайбонийхон ҳузурига кириб келганлиги нақадар улкан бир зафар

аканини барча аъёнлар гўё энди астойдил ҳис қилдилар. Бу зафарнинг худо томонидан берилганлиги эса Шайбонийхонни уларнинг кўзига худонинг назари тушган бир авлие қилиб кўрсатар эди. Шайбонийхон нафаси ўткир валий бўлмаса, бу қадар мураккаб, бу қадар қийин ишни шунчалик донолик ва усталик билан амалга оширо-лармиди?

Мулла Абдураҳим ўрнидан сакраб туриб:

— Имоми замонимиз минг йил умр кўрсинглар! — деб олқиш айтди.

Бошқалар ҳам оёққа қалқдилар. Устма-уст олқиш янгради:

— Искандари сонийга офарин!

— Ҳазрати валийга минг раҳмат!

— Халифаи раҳмон, дунё тургунча турсинглар!

Ҳамма аъёнлар ўринларидан турғанларидан кейин Султон Али мирзо билан Хўжа Яҳё ҳам жойларидан кўтарилидилар. Аммо улар тирик мурдадек оёқда зўрға туришар эди. Агар ҳозир Шайбонийхон мана бу олқиш айтиётганларга бир оғиз буюрса, улар мирзо билан хўжани тилка-пора қилиб ташлашлари аниқ эди.

Хоннинг ишораси билан олқишлар тинди, ҳамма жойига қайтиб ўтирди.

— Манави хўжа билан мирзоға, — деди Шайбонийхон. — минг азоб бериб ўлдирсан ҳаққимиз бор. Бироқ инсоғу имон қанчалик бўлишини буларга яна бир кўрсатиб қўяйик. Майли, қонларидан кечайник, жонлари омон қолсин!

Боятдан бери ўлимни бўйинларига олиб, жонларидан умид узиб ўтирган мирзо билан хўжа энди бирдан эгилиб, хонга миннатдорчилик билдирилар. Хўжа Яҳё нинг кўнгли юмшаб, кўзига ҳатто ёш келди:

— Худо умрингизни берсин, хон ҳазратлари!..

— Бироқ, — деди хон овозини кўтариб, — жаноб Хўжа Яҳё молу дунёга ҳирс қўйиб, тавфиқни ўнугтган. Имонларини поклаш учун Маккан мукаррамага сафар қиласинглар. Хўжага эрталабгача муҳлат берамиз. Керакли нарсаларини йиғиштириб, икки ўғиллари билан бирга ҳажга жўнасинлар. Кўпакбий!

— Лаббай, хон ҳазратлари!

— Хўжа Яҳёни ўғиллари билан эрта эрталаб Самарқанддан чиқариб қўйишни сизга топширдик!

— Бош устига, хон ҳазратлари!

— Мана бу ёш мирзо, — деб Шайбонийхон Султон.
Али мирзога қараб давом этди, — бизга ўғил тутингиси
келибди. Майли, диндан қайтганни яна дин йўлига со-
лиш — савоб иш. Шаҳзода Темурхон уни ўз өдамлари
қаторига олсинлар.

Отасига яқин ўтирган йигирма ёшли хушбичим Темурхон семиз мирзога нафратли бир назар ташлади-ю,
аммо хонга таъзим қилиб, буйруқни бажаражагини
айтди.

— Яхши бўлса ошини ер, — қўшиб қўйди Шайбоний-
хон, — ёмон бўлса бошини!

Султон Али мирзо вақтнинча тирик қолаётганини кўп
одам шу сўзлардан сезди. Энди пастки қаватда ўтирган
Зуҳра бегимнинг тақдирини ҳал қилиш керак эди.

Шайбонийхон бир вақтлар Зуҳра бегимни жуда гў-
зал деб эшитиб, «ўзимга ғунчачи¹ қилиб оларман», деб
ўйлаган эди. Шунинг учун бегимга ёзган хатига бир не-
ча сатр шеър қўшган эди. Аммо уни бугун ўз кўзи билан
кўргандан кейин бегимдан ихлоси қайтди. Тўғри, шеър
ёзиб бегимни алдагани кўнглининг бир четини хира қи-
либ турар эди. Аммо бу ерда Зуҳра бегимдан нафратла-
ниб гапирган аъёнлар у хотиннинг бузуқлигига хонни
ҳам ишонтириди-ю, кўнглидаги бу хиракини тарқатиб
юборди. «Ўзи шундай алданишга муносаб хотин экан, —
деб ўйланди хон. — Агар ҳозир қўйиб берсам, султонлар
уни қутурған бияга судратиб ўлдиради. Лекин мен «Му-
родингизга етасиз!» — дедим. Муроди — эрга тегиш экан.
Зўр бир эр топиб бериб, сўзимнинг устидан чиқайин!»

Хоннинг кўзлари даврада ўтирган султонларни ора-
лаб ўтиб, пойгакроқда ўтирган йўғон гавдали чўтири қора
кишида тўхтади. Мансур бахши деб аталадиган бу одам
табиблик қиласи қилинганни ҳам билар эди, «кўчириқ» қи-
лишни ҳам билар эди, «кўтарувчи» деган лақаби бор
эди. Унга хотин чидамас эди — олган хотинлари ё бир-
икки йил умр кўрмай ўлар, ёки қочиб кетар эди.

— Мансур бахши, сиз хотинга ёлчимай юрибсиз, —
деди Шайбонийхон.— Пастдаги бегим келинчак ёнглиқ
ясаниб келибди. Шуни сизга узатайикми?

Мансур бахши ўрнидан сакраб турди, қувонганидан
оғзи қулоғига етгудай кулиб таъзим қилди:

¹ Ғунчачи — муваққат хотин.

— Марҳаматингиздан айланайин, ҳазратим, жон дейман!

Ҳамма кулиб юборди. Шайбонийхон бу тугунни ҳам сұлтон ва аъёнларга ёқадиган бир усталик билән ечғанидан күпчилик мәмнүн эди:

— Хон ҳазратлари доно йўл топдилар!

— Мансур кўтарувчи энди бегимиң қучоғидан қўймай роса кўтаради.

— Бири бирига муносиб!

— Бироқ, — Шайбонийхон яна сўз бошлагай эди, ўзаро гаплар ва кулгилар дарҳол босилди,— баҳшининг тўйини Самарқандда қиласиз. Ҳаммамиз шаҳарга тартиб билан кирамиз...

Самарқандда бир неча марта бўлган ва қаерда нима борлигини яхши биладиган хон қўшинларнинг шаҳарга кириш ва жойлашиш тартибини олдиндан ўйлаб қўйган эди. Ҳозир шуни буйруқ шаклига келтириб, лашкарбосилларга аниқ кўрсатмалар бера бошлади.

Шайбонийхоннинг беш минг кишилик қўшини Чорраҳа дарвозасидан Самарқандга кириб борганда шаҳарнинг нариги томонидаги Сўзангарон дарвозасидан юзлаб одамлар қочиб чиқиб кетмоқда эдилар. Бобир ҳозир Шаҳрисабзда эди. Самарқанддан қочиб чиқсан уннинг тарафдорлари Шаҳрисабзга қараб шошилмоқда эдилар.

Аммо Шайбонийхоннинг қуюндай югурик отлиқлари уларнинг кўпини қувиб етиб, кўчларини талашди, кўпларини аёвсиз ўлдириши.

Кечаси шаҳарда талончилик авжига чиқди. Фақат Хўжа Яҳёнинг ҳашаматли уйига ва кенг ҳовлисига талончилар йўлатилмади. Қўпакбийнинг юзтacha навкари Хўжа Яҳёнинг ҳовлисини қўриқлаб турди. Бироқ Қўпакбий қўйган маҳсус одамлар Хўжа Аҳрордан қолган бойликлар, олтин ва жавоҳирларнинг қайси сандиқларга жойлаштирилаётганини пана-панадан кузатиб, кўз тагига олиб қўйдилар.

Хўжа Яҳё икки ўғли, уч хотини, ўн бештacha хизматкори ёрдамида туни бўйи кўч йигиштирди. Тонг отганда барча сандиғу бўғчаларини, кўч-кўронини тўртта аравага ва ўн икки туяга юклатди. Аёлларни соябон аравага чиқариши, Хўжа Яҳёнинг ўзи, икки ўғли ва ўнта қўриқчи хизматкор йигити энг яхши отларини миндилар, Самарқанд билан ғамгин хайрлашиб, қалъадан чиқдиар. Қўпакбий ўз навкарлари билан бирга Хўжа Яҳёни

Оҳаклик төғигача кузатиб қўйди. Термиз йўлига тоғ ошиб ўтиш керак эди. Бир тоғ дарасининг ичидаги Кўпакбий Хўжа Яҳёга қараб:

— Биз онҳазратимнинг буйруғини бажардик, энди у ёғига ўзингиз кетаверинг! — деди-ю, навкарлари билан орқага бурилди.

У кўринишдан Самарқандга қайтмоқчига ўхшарди. Аммо дарадан чиққандан кейин йўлни ўнгга бурди, бошқа бир дара орқали Хўжа Яҳёнинг ўнг томонидан айланаб ўтди.

Фира-шира қоронғилик тушиб, одам одамни яхши танимайдиган пайт бўлганда Кўпакбий барча аскарлари билан юқоридан кўчкидай ёпирилиб тушди. Қий-чув, дод-войларга қарамай, Хўжа Яҳёнинг ўзини ҳам, икки ўғлини ҳам, қўриқчи йигитларини ҳам қиличдан ўтказишди. Тирик қолган гёллар Кўпакбийнинг ўнбошиларига бошқа ўлжалар қаторида улашилди. Сандиқдаги жəвоҳирлар ва олтин-кумушларнинг ярми кечаси хоннинг хазинасига элтиб топширилди. Чунки Кўпакбийнинг Хўжа Яҳёни хажга жўнатиш баҳонаси билан тоғ ичидаги ўлдириши ва бойлигини мусодара қилиши Шайбоний-хоннинг имо-ишораси билан қилинган эди.

Бу воқеадан хабар топган Султон Али мирзо ўлим хавфи ўзига ҳам яқинлашиб келаётганини сезди-ю, қандай қилиб бўлса ҳам қочиб қутулишнинг пайига тушди. Қуюқ туман тушган куни аzonда икки навкари билан Феруза дарвозасидан яшириқча чиқиб, Панжакент томонга қочди. Бироқ Темур султон унинг кетига қўйган хуфялар бу воқеадан хабардор эдилар. Султон Али мирзо қалъадан қочиб чиққунча уни атайлаб қўйиб берган эдилар. Чунки унинг айбини бўйнига қўйиб қочиб кетаётган пайтида тутиб ўлдиromoқчи эдилар. Султон Али мирзо Сиёб бўйларига бормасданоқ кетидан Темур султон икки юз навкари билан уни қувиб етди ва дарҳол ўраб олиб, бир қилич зарби билан бошини танасидан жудо қилди.

Мансур бахшига никоҳлаб берилган Зуҳра begim ёлғиз ўғлининг тобутда бошсиз ётган танасини кўрганда ўзининг калласига муштларини уриб дод солди, юзини қўли билан тирнаб қонатиб юборди, кўйлагининг ёқасини йиртиб чинқирди. Лекин голиблар бунинг ҳаммасига: «Баттар бўл, ўзинг сабабчисан!» — дегандек бир заҳарханда билан қарашди.

Сувларнинг юзи ҳазонларга тўлиб оқадиган сершамол куз кунлари бошланди. Самарқанддан ўттиз чақиримча шарқ-жануб томонда, Панжакентдан қўйида Зарафшон дарёсини кечиб ўтган икки юздан ортиқ қуролли суворийлар қоронғи тушганда Сиёб бўйига яқинлашдилар. Улар йўлларида учраган қишлоқларни четлаб ўтишар, ҳеч қаерда тўхтамасдан, шовқин-сурон кўтармасдан мумкин қадар сукутсақлаб келишар эди. Уларга бирда яrim дуч келиб қолган дехқонлар қўрқиб ўзларини четга олар эдилар. Шайбонийхоннинг аскарлари ҳамманинг юрагини олиб қўйган эди. Ҳозир Самарқанд атрофларида хоннинг беш мингдан ортиқ қўшини бор эди. Одамлар ма-на бу отлиқларни ҳам шу қўшиннинг бир бўлаги деб ўйлаб, улардан балодан қочгандай қочар эдилар.

Бироқ отлиқларнинг ўзлари алланарсадан хавотири бордай эҳтиёт билан бормоқда эдилар. Қороғида Сиёбдан ўтаётганларида, отларнинг беш-олтитаси балчиқقا тиқилиб қолди. Уларни балчиқдан чиқаришга уриниб, ўзлари ҳам лойга ботган, юзларини қамишлар тирнаган навкарлар аччиқ устида баланд овоз билан сўзлашган эдилар, таниш овоз уларни уришиб берди:

— Мунча додлайсиз? Ёйига хабар бермоқчисиз?

Бобирнинг овозини таниган бир навкар:

— Маъзур тутинг, амирзодам, — деди. — Ҳаром ўлгур от ёмон тиқилди!

Булоқ сувларидан йигилган Сиёб совуқ куз кечасида буғланиб оқмоқда эди. Тун қоронғиси устига сўв буғлари ҳам қўшилиб, балчиқни қуруқ ердан ажратиб бўлмас эди. Лойга ботган отлар анча одамни йўлдан тутиб қолаётганини кўрган Бобир:

— Бас, чиқариб бўлмаса, қолсин! — деди.

Қосимбек дарҳол унинг сўзини қувватлади:

— Пиёда қолганлар менинг отларимдан олсинлар!

Оти лойга тиқилган навкарлардан бири Тоҳир эди.

— Тоғларда қанча оту тевалар қолди, учмалардан ўтиб келган отим энди шу балчиқда қолсинми-а? — деди Тоҳир отига ачиниб.

— Үзимизнинг жонимиз ҳам қил устида! — деди Бобир.

Тоҳир Қосимбек учун етаклаб келинаётган отлардан бирига минди. Яна икки навкар лиёда қолган

эди. Уларга Бобир ўзининг тўртта отидан иккитасини берди.

Хозир унинг кўзига от-улов кўринмас эди. Энг муҳими, унинг Самарқандга яқинлашаётганини Шайбонийхон мутлақо сезмаслиги керак.

Бобир ёзи билан тоғларда юрди, Шаҳрисабздан Ҳисорга, ундан Фондарё бўйларига ошиб ўтди. Самарқанд беклари бутун навкарлари билан ҳисор ҳокими Ҳисравшоҳ томонига ўтиб кетди, Андижондан Бобир билан келган одамларнинг кўпчилиги Искандаркўл бўйларидан Уратепа орқали Фаргона водийсига қайтилар.

Жанг-довуллар бу хабарларнинг ҳаммасини Шайбонийхонга аллақачон етказган эдилар. Бобирнинг бир неча юз киши билан тоғ орасида қийналиб юрганини аниқ биладиган Шайбонийхон энди унинг Андижонга қайтиб кетишига ёки Ўзгантдан нарида хонлик қилаётган тоғаси Олачахон олдига боришига шубҳа қилмас эди. Шайбонийхон ёв ҳужум қилишини кутмас, шунинг учун шаҳарда беш юз кишилик қўшин қолдириб, ўзи асосий лашкари билан шаҳардан наридаги Хўжа Дийдор деган жойни қароргоҳ қилган эди.

Шайбонийхоннинг бехавотир юрганидан хабар топиб, Самарқандга таваккал қилиб бораётган Бобир жуда қалтис бир ишга бел боғлаганини сезарди. Шайбонийхоннинг жосуслари кўплиги унга маълум эди. Хон ўзини сезмаганга солиб, Бобирни шаҳарга яқин келгунча қўйиб бериши, кейин қуршовга олиши мумкин эди. Шаҳар пчидаги қўшин ҳам Бобирнинг одамларидан икки-уч баробар кўп. Бобир Шайбонийхоннинг қўлига тушса тирик қутуломаслигини билди. Навкарлар, беклар омон қолиши ва хон аскарлари сафида хизмат қилиб кетиши мумкин — Султон Али мирзонинг кўпчилик бек ва навкарларини хон ўз лашкарига қўшиб олгани ҳаммага маълум. Аммо янги бир сулолага асос солмоқчи бўлган Шайбонийхон темурийларни аёвсиз ўлдиришга қасд қилганини Бобир билар эди. Шунинг учун агар бирон фалокат бўлса-ю қутулиб кетолмаса, охирги нафасигача жанг қилишга, хоннинг қўлига тирик тушмасликка аҳд қилиб бормоқда эди.

Қоронғида яна бир талай ариқлардан ўтдилар, куз кириб, эгалари кўчиб кетган кимсасиз боғотларни оралаб бориб, Самарқанддан берироқдаги Тули Мағоҳ кўпраги олдида тўхтадилар. Бундан икки кун олдин тўртта

ишенчли навкар дәхқон кийимида шу ерга юборилган, улар қалъя деворига қўйиб чиқиши учун улкан шотилар тайёрлаган, шу билан бирга, вазиятни ўрганган эдилар. Олдиндан тузилган режага биноан, навкарлардан етмиш саксонтаси шу ерда отдан тушдилар ва шотиларни кўта-ришиб, секин Фори Ошиқон деб аталадиган баланд жарликка томон пиёда кетдилар.

Бобир қолган навкарлар билан Феруза дарвозасига яқин бориб, дараҳтзор тепалик панасида тўхтади.

Атроф жимжит. Узоқдан хўрознинг биринчи қичқириғи эшитилди. Осмон ола булут. Қорайиб турган баланд қўрғон кўзга зўрга чалинади. Бобир ёнидаги Қосимбекнинг ютоқиб, титраб нафас олганини сезди-ю, ўзининг ҳам эти уча бошлади.

Қалъадан ажал совуғи эсаётгандай туюларди. Бундан тўрт ой олдин мана шундай қоронғи тунда Хўжа Яҳе шаҳар дарвозасини яшириқча очиб беришига ишониб борган Бобирнинг сири фош бўлгани, йигитлари ўқ еб, душманнинг масҳарасини эшитиб қайтгани эсига тушди. Ундан олдин Фори Ошиқонга кечаси борган йигитларнинг алданиб, қўлга тушиб ҳалок бўлгани кўз олдига келиб, қалбига таҳлика солиб ўтди. Бобир бу гал яна алданмаслик учун шаҳар ичидаги тарафдорларининг ҳеч бирига хабар бермасдан, фақат ўз кучига ишониб, таваккал қилиб келди. Аммо унинг икки юз қирқ кишилик бир даста қўшини Шайбонийхоннинг беш-олти минг кишилик лашкарига қандай бас келиши мумкин? Яна хон қўшини мустаҳкам қалъя ичиди. Тарихда бунчалик таваккалчилик бўлганмикин?

Қўрғонга пинҳон етиб олдилар. Агар Шайбонийхон ичкарига «қопқон» қўйган бўлса-чи? Бобир бу «қопқон»га ўз оёғи билан кириб борадими?

Баъзи беклар мана шу андишаларни айтиб, Бобирни қалтис ниятидан қайтармоқчи ҳам бўлдилар.

Аммо бу ниятдан қайтиш — Андижонга шумшайиб бориб, яна Али Дўстбекка муте бўлиш деган сўз эди. Еки уйсиз, жойсиз, куз изфириллари-ю, қиш совуқларида хору зор бўлиб юришлари керак эди. Бобир мутелигу хор-зорликдан кўра бир ўлимни бўйинга олиб Шайбонийхонга йўлбарсдай дадил ташланишини афзал кўрган ва бекларини ҳам шунга кўндирган эди.

Агар ишлари чаппасидан келса-ю, Шайбонийхоннинг қопқонига тушсалар, ажал сиртмоғи энг аввал Бобир-

нинг бўйнига тушишини ҳаммадари билардилар. Бобир нинг барча ҳаракати — ёв «қопқони»нинг қопадиган жойига тегмасдан ўтишга қаратилган эди. Шу ергача шарпаларини ёвга сездирмай келдилар. Энди бу ёғи қандоқ бўларкин?

Бобир бутун вужуди билан атрофга қулоқ солар экан, тун сукунатида ўз юрагининг дукиллаб уришини баралла эшилди. Бу дукиллашда гўё тақдир отининг дукури ҳам бор эди.

* * *

Оғир шотиларни секин кўтариб, қадимий Чақардиза¹ қабристонини айланиб ўтаётган навкарларнинг бири — Тоҳир эди. Улар қоронгида туртина-туртина Шоҳи Зиндининг орқа томонидаги баҳайбат бир ўнгирга яқинлашдилар. Ўнгирнинг тепаси баланд жар. Унинг этагида гор ҳам бор. Бу ваҳимали жойларга кундузлари ҳам ҳеч ким келмайди. Оёқ ости чакалакзор. Қўрғоннинг девори мана шу жар устидан ўтади. Шотиларни девор тагига кўтариб боргунча йигитлар қора терга ботиб кетишиди.

Уларга бошчилик қилаётган Нўён Кўкалдош девор тепасига тикилиб бирпас кутди. Терак бўйи келадиган гиштин девор жуда энли эди, унинг тепасидан бир неча киши bemalol юриб ўтиши мумкин эди. Бироқ тепада ҳеч бир шарпа сезилмас, қоровуллар совқотиб пастга тушиб кетганга ўхшарди.

Шотиларни секин тикладилар, учини девор қиррасига тираб қўйдилар.

— Қани, чиқинглар! — шивирлади Нўён Кўкалдош гуж бўлиб турган навкарларга. Аммо ўн уч газ баландликдаги девор жуда ваҳимали, ундан йиқилган одам тирик қолмаслиги аниқ эди. Эҳтимол, қоровуллар сезиб қолишар-да, чиқаётгандарга тош отар, ўқ ёғдирар? Салитариб юборса ҳам тамом. Шуни сезган навкарларга бириичи бўлиб чиқиш жуда даҳшатли туюларди.

Охири Нўён Кўкалдош ўзи шотининг поясига оёқ қўйди-ю:

¹ Ч а қ а р д и з а — кейинчалик «Шакаржиза» деб айтиладиган бўлган

— Бир ўлим бўлса ҳамма вақт бор, мардона бўлинглар, қани! — деди.

Тоҳир иккинчи шотидан чиқа бошлади. Шотилар кенг, мустаҳкам қилиб ишланган, ҳар бири олти-етти кишини бемалол кўтарар эди.

Йигитлар олдинма-кейин юқорига чиқар эканлар, Нўён ҳаммадан олдин девор тепасига етди. Деворнинг усти йўлкадай кенг, отлиқ юрса ҳам бўладиган. Яқин-орада ҳеч ким йўқ.

Тоҳир ҳам чиқиб, ўзини девор кунгурасининг пана-сига олди ва пастдан чиқсан навкарни қўлидан тортиб шивирлади:

— Болта қани?

— Мана.

Иккинчи навкар белига қистирилган болтани Тоҳирга олиб берди.

— Шинакка бекин! — шивирлади Нўён кимгадир.

Кунгура ва шинаклар бўлмаса, девор устидаги одамнинг қораси пастдан кўриниб қолиши мумкин эди. Шунинг учун пастдан чиқсан навкарлар шинакларга бекиниб турдилар. Ҳамма чиқиб бўлгандан кейин секин-секин юриб, энгашиб, девор усти билан Феруза дарвозаси томонга бора бошладилар.

Деворнинг маълум бир жойларида қоровулхоналар бор эди. Бир қоровулхонага яқин келганларида ичкаридан кимдир найманча талаффуз билан уйқу аралаш:

— Ирисбай, келдингма? — деб сўради.

Девор устидан келаётганлар таққа тўхташди. Тоҳир қўлидаги болтанинг сопини икки қўллаб қисди-ю:

— Ҳа, — деди.

Аммо ичкаридаги қоровул унинг овозини танимай ҳадиксиради шекилли, уйқуси бирдан ўчиб:

— Кимсан? — деди.

Нўён Кўкалдош қоровулхонага қараб отилди. Қоровул ичкаридан шошиб чиқаётгандага кўкрагига фарчилатиб ханжар санчди. Қоровул жон аччиғида чинқириб юборди. Пастдаги қоровулалр ҳам уйғониб кетди.

— Тоҳир, тўхтамасдан дарвозага югар! — деди Нўён Кўкалдош. У йигитларнинг беш-ўнтасини пастда уйғонган қоровулларни бир ёқли қилиш учун қолдирди-ю, ўзи бошқа навкарларни эргаштириб, Феруза дарвозасига томон югурниб кетди.

Шайбонийхон бу дарвозани қўриқлашни Фозил тар-

хон билан унинг юз эллик йигитига топширган эди. Ҳозир бу йигитларнинг кўпчилиги уй-уйига тарқаб кетган, дарвоза қоровулхонасида йигирматача одам ухлаб ётар эди. Улар то уйғониб, қурол-яроғларини қўлларига олганларича болта кўтарган Тоҳир дарвоза қулфига яқинлашди. Отниг калласидай келадиган қулф бир-икки зарбани писанд қилмади. Уйи бу ерга яқин бўлган Фозил тархон машъала кўтарган йигитлари билан дарвозахонага етиб келди. Уларнинг бири дарвоза қулфига болта ураётган Тоҳирга қараб найза отди. Найза Тоҳирнинг дубулғасига ёнлама тегиб сирғалиб ўтди-ю, дарвоза ёғочига қадалди. Дарвозахонада найзабозлик ва қиличбозлик бошланди. Нўён Кўкалдош бошлиқ йигитлар кўпчилик эди. Фозил Тархон бўйнидан қилич еб, отдан ийқилиб тушди.

Тоҳир болтани икки қўллаб кўтариб, гоҳ қулфга, гоҳ дарвоза занжирининг зулфига урар, темирдан учқун сачрар, аммо зўр қулф, «қилт» этмас эди. Ниҳоят, зулфин синди-ю занжир шарақлаб тушди.

Қўрғон атрофида сув тўлдириб қўйилган энли чоҳ бор эди. Ҷоҳдан дарвозага ўтиладиган кўприк ҳам махсус занжир билан дарвоза томонга кўтариб қўйилган эди. Тоҳир дарвозани очаётгандан йигитлардан бири кўпrikнинг занжирини ҳам бўшатди.

Бобир ва Қосимбеклар ичкаридаги олишув шовқинини эшитиб, чоҳ лабига келиб турган эдилар. Дарвоза очилиб, кўпrik тушиши билан улар ичкарига от қўйиб, қилич яланғочлаб кирдилар. Фозил Тархоннинг тирик қолган навкарлари шаҳар ичига қараб қочдилар.

Қосимбек бошлиқ отлиқлар уларни қувиб кетди. Нўён Кўкалдошга отини келтириб бердилар. Тоҳир ҳам бошқа пиёдалар ҳам яна отландилар. Бобир навкарларнинг бир қисмини Нўён Кўкалдош билан бирга Чорраҳа дарвозасини эгаллашга юборди. Узи қолган навкарлар билан Сўзангарон дарвозасига қараб от чоптириб кетди. Агар дарвозалар тезроқ эгалланмаса, ташқаридан Шайбонийхон бутун қўшини билан кириб келиши мумкин эди.

Феруза дарвозаси олдидан бошланган жанг шовқини бирпастда бутун шаҳарни қамраб олди. Шаҳар доруғаси Жонвафо Шайхзода дарвозаси томонда — Хўжа Яҳёдан тортиб олинган ҳашаматли ҳовлида ухлаб ётган эди. Тўполондан чўчиб уйғониб, бор навкарлари билан

ховлидан отланиб чиқунича, Қосимбекнинг йигитлари Фозил тархоннинг одамларини қувиб келди. Чоррача дарвозасидан қувилган Кўпакбийнинг навкарлари ҳам доруға ётган жойга қочиб келмоқда эдилар. Қоронғуда ёв қайси-ю, ўзининг одамлари қайси,—доруға ажратолмай қолди. Унинг кўзига ҳамма чопиб келаётган ёв бўлиб кўринди. Назарида, Самарқандга бир неча минг кишилик ёв бостириб кирганга ўхшади.

Доруға «беҳисоб ёвга бас келолмайман», деб ўйлаб, отини Шайхзода дарвозаси томонга бурди. Бобирнинг одамлари ҳали бу дарвозага етиб келмаган эдилар. Доруға ўз навкарларига буюриб, дарвозани очдирди-ю, юзатча одами билан хон қароргоҳига томон от чоптириб кетди.

Саҳар палла маст уйқудан қўрқиб уйғонган кўпчилик самарқандликлар хон навкарларини Бобирнинг одамлари қувиб юрганини тонг ёришганда фаҳмладилар. Шайбонийхондан норози кишилар жуда кўп эди. Қосиблар таланган, дехқонларнинг экинларини кўчманчи қўшиннинг беҳисоб моллари топтаб ташлаган. Ҳаж йўлида икки бегуноҳ ўғли билан ваҳшийларча ўлдирган Хўжа Яҳёнинг тарафдорлари қотиллардан қасд олиш учун косиб ва дехқонларни қўзғатдилар. Ҳокимият ўзгаргандан кейин амалидан ажралган илгариги амалдорлар «Шайбонийхоннинг одамлари Султон Али мирзони ҳам номардларча ўлдирдилар»,— деб хун талаб қилиб чиқдилар. Бобирнинг икки юзу қирқ кишисин ёнига беш олти минг кишилик қасоскор оломон қўшилди. Селдай даҳшатли оломон хоннинг одамларини яширинган жойларидан топиб чиқар, кўчада қочиб бораётгандарнинг олдини тўсиб қуршаб олар, пичоқми, болтами, таёқми, тошми, фиштми, қўлларига нимаини тушса, ҳаммаси билан золимларни ура-ура ўлдириб, янчиб ташларди. Оломон орасида аввалги мирзолар ва беклардан жабр кўрган одамлар ҳам кўп эди, улар беш-ўн йил олдинги қасосларини ҳам энди мана бу золимлардан олмоқда эдилар.

Кун чиқаётганда шаҳар ташқарисида бир қисм қўшини билақ Шайбонийхон пайдо бўлди, аммо сув тўла чоҳдан берига ўтолмади. Барча дарвозалар Бобирнинг одамлари томонидан бекитиб олинган, чоҳларнинг кўпrikлари кўтарилиган, ичкарида интиқом давом этмоқда эди.

Тоҳир кечаси билан ухламай югуриб-елиб юрган бўлса ҳам ғалабанинг шодлигидан чарчаганини сезмас, фақат қорни очқаб, Самарқанднинг нонвойлик ва ошпазлиқ расталари дам-бадам эсига тушар эди. Эрталаб ҳамма дарвозаларга қоровуллар тайин бўлгандан кейин Қосимбек Тоҳирга жавоб берди, Тоҳир отига миниб, яна иккита отлиқ ўртоғи билан нонвойлик растасига келди. Бу ерда ҳам бир неча юз кишилик издиҳом беш-олтита хон навкарларини ўраб олиб, тошбўрон қилмоқда эди. Навкарларнинг баъзилари йиқилиб, тошкесаклар остида жон берган, бир-иккитаси қўли билан юзини тўсиб дод солар, инграр эди. Яланг бошидан қон оқаётган, йиртилган қўйлаги орасидан моматалоқ бадани кўриниб турган, ўзи чўкка тушиб, одамлардан шафқат сўраётган йигирма ёшлардаги йигитга Тоҳирнинг раҳми келди. У оломон орасига от солиб:

— Халойиқ, Бобир мирзо фармон бердилар! — деб қичқирди. — Таслим бўлганларни асир олмоқ керак! Булар ҳам мусулмон! Халойиқ, бас қилинг! Биз ҳам навкармиз! Навкар айбдор бўлмаслиги мумкин! Ҳамма айб буларнинг хонларида! Халойиқ, тўхтанг! Бобир мирзонинг фармонини бажаринг!

Одамлар Бобирнинг номини эшитиб отлиқ йигитнинг гапига қулоқ сола бошладилар. Шунда нариги икки отлиқ ҳам оломон орасига ёриб кирди. Учовлашиб, тошбўронни тўхтатдилар.

Тоҳир бу ерга нега келганини ҳам унуди. Чала типик йигитлардан учтасининг қўлинин орқасига боғлатиб, асир қилиб олиб қетмоқчи бўлди.

Шунда оломон орасида турган сарғиш мўйловли, баланд бўйли бир киши:

— Тўхта, йигит сен... Тоҳир эмасмидинг? — деб қолди.

Тоҳир йўғон сўйил кўтариб олган бу одамга тикилиб қаради-ю, бундан уч йил олдин мана шу кўчада очларга нон улашган пайтини эслади.

— Мамат оға! Сиз нега сўйил кўтариб юрибсиз? Узингиз ҳам ўзбек уруғидан эмасмисиз?

— Э, ука, булар ўзбекка кўп жаманлиқ қилди. Менинг бечора хотиним шулардинг дастидан ўлиб кетди!

Маматнинг кўзларida ёш йилтиради. Тоҳир бу одам

билан Робия ҳақида гаплашганини эслади-ю, унуглилган аламлари бирдан янгиланди. У асиirlарни нариги икки шеригига ҳайдатиб юборгач, ўзи отини етаклаб, Маматни четга бошлаб чиқди.

— Мамат оға, мен тайинлаб кетган гап эсингиздами?

— Қайси?.. Ҳа, ҳа... Айтмоқчи, бечора хотиним тириклигига бир гап эшитиб келган экан... Сиз айтган қиз андижонликмиди?

— Қувалик.

— Билмадим, ишқилиб, ўша төмондан обқочиб келишган экан.. Кейин туркистонлик бир савдогар тархон сотиб олиб кетган экан.

— Туркистонгами?

— Ҳа, кейин шу тархон Шайбонийхон билан бирга Самарқандга кўчиб келипти.

— Қиз биланми? Қиз тирикми, йўқми?

— Тирик!

Тоҳир Маматнинг сўйил тутган қўлларидан маҳкам ушлади-ю, шошилиб сўради.

— Оти Робиями, а, Робиями?

— Раҳматлик хотиним отини билмас эди.

— Ўзини кўриптими? Қаерда кўрипти?

— Фозил тархоннинг уйида.

— Қайси Фозил тархон?

— Бугун кечаси уни ўзларинг ўлдирибсизлар-ку?

— Уйи қаерда, уйи?

— Журинг, мен кўрсатиб қўяйин!

Тоҳир бир сакраб отига минди-ю, Маматни орқасига мингаштириди. Мамат сўйилини ташлади, Тоҳирнинг қўлтиғи тагидан ушлаб, уни қинғир-қийшиқ кўчалардан бошлаб бора бошлади.

Отини йўрттириб бораётган Тоҳир: «Илоҳим ноумид қилмагин-да парвардигор! — дерди ичидা.— Илоҳим Робия бўлсин-да! У олти йилдан бери Робияни қидира-қидира, ахийри, энди топилмайди, деган фикрга келган ва бу фикрга кўника бошлаган эди. Ҳозир чақмоқдай чақнаган умид унинг важоҳатига момақалдироқ ларзасини соляпти. Бу умиднинг чақиндай тез сўниши мумкйнлиги юрагини така-пука қиласи, аъзойи баданини зир титратади.

— Ана ўша уй! — деб Мамат орқасида катта боғи бор икки қаватлик ғиштин иморатни кўрсатди.

Дарвоза ланг очиқ, қуролли йигитлар ичкаридан

жимжимали сандиқлар ва чўғдай гиламлар кўтариб чиқмоқда эдилар. Яқинроқ бориб, Тоҳир Қосимбекнинг навкарларини таниди. Уларга катта сағдогар бой ва Шайбонийхоннинг яқин кишиси Фозил тархоннинг молмулкини мусодара қилиш топширилган эди,

Тоҳир дарвоза олдида отдан тушди-ю, таниш навкарларнинг ҳайҳайлашларига эътибор бермай, тўғри ичкари ҳовлига йўналди. Равонда Фозил тархоннинг қонга беланган мурдаси ётипти. Юқориги қаватдан аёлларнинг йифи-сифиси эшитилди. Фозил тархоннинг хотинлари эрлари учун аза очган, баъзилари бойлик тўла сандиқлардан ажралаётганлари учун ҳам додлашар, баъзилари эса ёвдан қўрқиб йиглаётган эди.

Тоҳир пастки қаватдаги очиқ эшикларга бош тиқиб қаради. Ҳеч ким йўқ. Фақат аёлларнинг кийимлари-ю, безаклари турипти. Бу тархоннинг нечта хотини бўлганикин? Робия шунга тушган бўлса, уни ҳам хотин қилиб олганмикин? Тоҳирнинг хаёлига тўсатдан келган бу фикр қалбини ўртаб ўтди. У айвондан пастга сакраб тушиб, ҳовлиниң ўртасига келди-ю, юқорида йиглаётган аёлларга қаратса қичқирди:

— Ҳей, Робия борми? Роби-я! Қувалик Робия шу ерда борми?

Хотинларнинг йифиси бирдан тинди. Юқориги қаватнинг айвонидан яшил дуррали бир жувоннинг боши кўринди. Унинг қош-кўзи Робияникига ўхшарди. Тоҳир юқорига талпиниб, қалтираб:

— Робия!— деди,— Робия!

Яшил дуррали жувон уни кўрди-ю, ўзини орқага олди, сўнг яна айвон четига чопиб келди. Тоҳир энди унинг баҳмал нимчасини, бўйнидаги маржонларини ҳам кўрди. Жувонга йигитнинг товуши таниш туюлар, аммо қилич ва ханжар таққа, юзида катта чандифи бор, соқол-мўйлови ўсиқ баҳайбағ навкар унинг ваҳмини келтиради. Жувон алданишдан қўрқиб яна орқага қочди. Тоҳир юқориги қаватга қараб чопди, аммо саросима бўлганидан, айвон четидаги зинапояни тополмади. Негадир ўпкаси тўлиб кўзига ёш қелди:

— Робия, мен Тоҳирман! Тоҳир!

Юқоридан жувоннинг чинқирифи эшитилди:

— Тоҳир оға!!

Сўнг яшил дуррали жувон чочпопугини шилдиратиб, зинапоядан ўзи чопиб туша бошлади. Юз-кўзи Робияни-

ки, аммо маржонлари, кийимлари, яна нимасидир бегона. Тоҳир уни кўриб жойида қотиб қолди. Робия ҳам зинапоя олдида тўхтади, кўзларини чақчайтириб, қўрқув аралаш шивирлади:

— Сиз Тоҳир оғамнинг арвоҳисиз!

Робия Тоҳирни ўша найза зарбидан ўлиб кетган деб ўйлар, унинг арвоҳига бағишилаб дуолар ўқир эди. «Энди тирик кўрмаймен, арвоҳини кўрсам ҳам рози эдим», деб худодан астойдил сўраган пайтлари кўп бўлар эди. Унинг шу илтимосига фаришталар омин деган эканми?

— Арвоҳингиз ҳам жонимдан азиз, Тоҳир oғal!

— Мен тирикмен, Робия! Сени олти йилдан бери излаб юрибмен!

— Тириксиз?— деб Робия Тоҳирга яқин келди. Унинг чакмонини, қиличини, қўлларини бир-бир ушлаб кўрди. Тоҳир уни елкасидан қучиб бағрига босган эди, Робия унинг арвоҳ эмаслигига энди ишониб, йиғлаб юборди:

— Тирик! Тирик! Худога шукур, тирик!

Тоҳир унинг сариқ атлас кўйлаги устидан елкасини силаб:

— Робиям, жоним!— деди.— Хайрият ўзинг ҳам тирик экансан! Мен сени олти йил изладим, қаерларда юрдинг? Нима бўлди?

Робия Фозил тархоннинг еттинчи хотини бўлиб ўтказган йилларини эслади-ю, бирдан орқага силтаниб, Тоҳирнинг қўлларидан юлқиниб чиқди:

— Мени қучманг, Тоҳир oғa! Мен сизга муносиб эмасмен!

Робия аламли кўзлар билан айвонда ётган ўликка қараб қўйди. Фозил тархон уни ўша босқинчилардан бир ҳамён олtinga сотиб олган эди. Робия элликдан ошган бу чолдан ҳазар қилас эди. Фозил тархон Туркистоннинг Яssi шаҳрида уни никоҳлаб олгандан кейин беш-үн кун турар-турмас, савдо иши билан Бухорога жўнади, у ердан бошқа бир кўхлик қизни олиб қайтиб, кейин ўша билан бўлиб кетди. Робия олти йилдан бери унинг ҳарамида бевадай яшайди. Лекин буни энди Тоҳирга қандай тушунтиради? Тоҳирга фотиҳа қилинган Робия кейин бирорвга хотин бўлган,— бунинг доғини қандай ювиш мумкин?

Робия юзини қўллари билан тўсиб юм-юм йиғлай бошлади. Унинг бўйнидаги маржонлари, сочига тақилган

чиройли кумуш чочпопуклари, эгнидаги атлас кўйләти
ҳаммаси ўша бой савдогарнинг пулига келган. Тоҳир
шуни ўйлади-ю, унинг назарида, Робия ўлган эрига кую-
ниб йиғлаётгандай кўринди.

— Робия, ростини айт, сен эрингга... содиқмисен?!

— Мени пулга сотдилар! Зўрлаб никоҳладилар!

— Бўлмаса иечун мунча куюниб йиғлайсен?

— Мен сизга вафо қилолмаганимга куюнамен! Сиз-
ни унутганим йўқ эди, Тоҳиржон оға! Мана, тепамиэда
худо турипти! Бу савдогар сизнинг тирноғингизга ҳам
арзимас эди! Лекин мени унга қул қилиб бердилар.

Тоҳир тишини-тишига босиб сўради:

— Боланг борми?

Робия йифи аралаш бош чайқади:

— Мен номига хотин эдим... Аслида бева...

Бир вақтлар гулдай қиз бўлган Робиянинг ўзини
«хотин», «бева», деб аташи Тоҳирнинг борлигини қақша-
тиб юборди. Робиядай қизга олти йилдан бери «ит тег-
май» юриши мумкин эмаслигини у илгари ҳам хәёлдан
кўп ўтказарди, «Фақат тирик топсам бас!»— деб қиди-
рарди. Бироқ Робияни топгани билан ёшлиқдаги беғу-
бор, содда баҳти энди абадий топилмаслигини у илгари
билмас эди. Бадандаги оғир жароҳат тузалганда ҳам
чандиги умрбод қолганидай, бошларига тушган савдо-
нинг даҳшатли изи кўнгилларидан осонликча кетмасли-
гини Тоҳир энди сезмоқда эди. Робия ҳам абадий йўқол-
ган беғубор ёшлиқига куюниб йиғламоқда эди.

— Робия, бас! Омон қолганимизга шукур қил, қани,
юр!

Тоҳир Робиянинг билагидан олиб ташқарига бошла-
ди. Қиз йиғидан тўхтаб:

— Қаёққа?— деди.

— Сен ҳали ҳам менинг қайлиғимсен. Юр, тезроқ!

— Ахир мен... мен... нарсаларимни олай!

— Ҳеч нарса олмайсен. Ҳаммасини унут. Иккинчи
ёдимга солма!

Ташқи ҳовлига чиққанларида Робия юк ташиётган
навкарларни кўрди-ю:

— Кўчада... уяламен!— деди. Ёпинчиғим йўқ.

Тоҳир чакмонини ечиб берди. Робия товонига туша-
диган узун симоби чакмонни бошига ёпинди-ю, Тоҳир-
нинг отига мингашиб чиқиб кетди.

Кейин Тоҳир Қосимбекка арз қилиб, Фақиҳ Абуллайс

маҳалласидан Шайбонийхоннинг одамлари ташлаб кетган дурустгина бир ҳовлини олди. Робиянинг иддаси ўтгач, маҳалла имоми уни Тоҳирга никоҳлаб берди.

6

Кечаси ёққан қалин қор ҳар бир томни, деворни, ҳар бир дараҳт ва гумбазни майин оқ ҳошия билан безабчиқкан.

Бобир Бўстонсаройнинг юқориги қаватидан шаҳарга қараб турибди. Тоза қор орасидан жимжима бўлиб кўринаётган дараҳт шоҳлари ҳозир унинг назарида худди оқ қофозга битилган настаълик¹ хатига ўхшаб кетади. Бугун Ҳиротдан, Алишер Навоийдан келган хат ҳам настаълик билан ёзилгани эсиға тушди-ю, қалбидаги қувонч ва фахр туйғуси янги бир куч билан мавжлана бошлайди.

Бобир Самарқандни Шайбонийхондан тортиб олгандан бери унинг жасоратига тан бериб шеър ёзганлар, сатрлардан абжад ҳисоби билан ғалабанинг аниқ санасини чиқарган тарихнавислар кўп эди. Алишер Навоийдан Бобирга келган табрик эса ҳаммасининг гултожи бўлди. Ҳирот Самарқанддан қанчалик узоқ, Навоийнинг диққат-эътиборини банд қиласидиган машҳур одамлару, муҳим ишлар қанчалик кўп! Шунга қарамай, Навоий Бобирни ҳам билар экан, унинг тақдирига узоқдан қизиқиб қарап экан, Самарқандни аввал бир марта олганидан хабардор экан. «Бу дафъа Самарқандни ўзномингизга муносиб ҳамла билан олмишсиз», деб, Бобирнинг номи йўлбарс сўзидан олинганига ишора қилибди. Балки бу сўзларда бошқа бир ишора ҳам бордир? Навоийнинг халқпарварлиги маълум. Бобир ўтган дафъа Самарқандни етти ой қамал қилганда, шаҳар халқи очикдан нечоғлиқ азоб тортганини Навоий ҳам эшишган бўлса керак. Бундай қамалларни у Бобирга муносиб кўрмагани учун шундай деб ёзганмикин?

Бобир қимматбаҳо жавонларига китоблар териб қўйилган хонаи хоснинг тўрига ўтди. Хушбўй сандал дараҳтидан ишланган миз устида Навоийдан келган олтин боғичли хат турипти. Бобир миз олдига тўшалган зар-

¹ Настаълик — араб ёзувидаги ҳусниҳатнинг кенг тарқалган бир тури.

боф кўрпачага ўлтириб, хатни бошқатдан ўқишга тушди.

Ҳар бир сатр туркий тилнинг гўзал жилвалари билан тўлган. Бобир биринчи ўқишида унча эътибор бермай ўтказиб юборган бир неча жумлага бу гал қайта-қайта тикилди. Навоий Бобирнинг шоирлик орзуси борлигини андижонлик бир меъмордан эшишиб, уни дадилроқ ёзишга ундаган эди. Бу меъмор Мавлоно Фазлидин бўлса керак. Агар мавлоно Ҳиротга етиб бориб, Навоийнин ҳузурига кирган бўлса, бошқа кўп нарсаларни ҳам айтиб берган бўлиши керак. Бобир Навоийга йўлламоқчи бўлган жавоб мактубига яхши бир шеърини ҳам қўшиб юбормоқчи бўлди-ю, машқлари ёзилган қалин дафтари ни олиб варақлай бошлади.

Кўпчиллиги йўлда, от устида хаёлига келган, жанг жадаллар орасида дафтарга узуқ-юлуқ ёзисб қўйилган, аммо ҳали тугалланмаган шеърлар. Хиёнат устига хиёнат бўлган, Бобир хонумонидан айрилган, атрофида биронта сирдош дўст тополмай ўзини ниҳоятда ёлғиз сезган оғир кунларда бир ғазал бошлаган эди:

«Жонимдан ўзга ёри вафодор топмадим,
Кўяглимдан ўзга маҳрами асрор топмадим».

Аммо бу ғазал чала ётипти. Балки шуни битириб юбориш керакдир? Алишер Навоий ҳам атрофидаги кишилардан кўп бевафолик кўрганини, ҳатто яқин дўсти Ҳусайн Бойқаро ҳам унинг сирру асрорига маҳрам бўлодмаётганини Бобир ишончли бир одамдан эшиштан эди. Қани Бобир Навоийнинг кўнглидагини ҳам топиб айтольса!

Бу ғазал Навоийга ёқиши мумкин. Уни тезроқ тугаллаш керак. Бобир қоғоз-қалам олди.

Шу пайт савдарбоши эшикдан ҳовлиқиб кириб, таъзим қилди:

- Мирзо ҳазратлари, қулингизни маъзур тутинг.
- Хўш?— деди Бобир норози бўлиб.
- Хоним ҳазратлари қабулингизга мунтазирлар.
- Онамилар?— деб Бобир сакраб ўрнидан турди.—
Келдиларми?
- Бегимлар ҳам келдилар!
- Во ажаб!— деб Бобир қувониб эшикка томон шошилди.

* * *

Улар салкам олти ойдан бери кўришмаган эдилар. Қутлуг Нигор хоним, Ойиша бегим ва Хонзода бегимлар билан Ўратепада қолган эдилар. Қейин Самарқанддан Бобир юборган ишончли одамлар уларни Ўратепадан бу ерга кўчиритириб келдилар.

Бобир улар билан Бўстонсаройнинг биринчи қаватидаги катта танобий уйда кўришиди. Онаси уни бағрига босгандана, Бобир онасининг озиб, қўллари енгиллашиб қолганини сезди. Опаси Хонзода бегим эса совуқдан киргани учунми, юzlари чўғдай ёниб, кўзлари чақнаб турипти. Узоқ йўл уни ҳеч қанча қийнамагандек қувноқ. Аввалгидан ҳам чиройли. Бобир унга ўнг елкасини тутиб сўрашар экан:

— Нечун бу қадар ҳаял қилдиларинг? — деди. — Неча ҳафтадан буён мунтазирмиз!

— Э, сўраманғ, амирзодам; узрлик сабабларимиз бор, — деб Хонзода бегим нарироқда иссиқ жун рўмолга ўраниб, ерга қараб турган Ойиша бегимга кўз ташлаб қўйди.

Бир вақтлар Ойиша бегимни кўрмасдан севиб юрган пайтларида унинг оёғига бош қўйгиси келиб ғазал ёзганилари энди Бобирга таъбири хато чиқсан бир тушдай туюларди... У Ойиша бегимни ойлар давомида кўрмаса ҳам соғинмасди...

Шундай бўлса ҳам у Ойиша бегимга иложи борича яхши муомала қиласа эди. Ҳозир ҳам кичик жуссали қотма келинчакка яқинлашиб:

— Хуш кўрдик, бегим! — деди-да, унга ўнг елкасини тутди.

Ойиша бегим озгин қўлинни унинг елкасига қўйиб кўришар экан:

— Ҳазратим, ғалабангиз муборак! — деди.

Ҳамма Бобирни «амирзодам» деса, Ойиша бегим уни яна ҳам улуғлаб «ҳазратим», дерди.

— Сизга она шаҳрингиз муборак, бегим!

— Қуллуқ, — деб Ойиша бегим таъзимга бош эгди.

— Келинимиз йўлда кўп азоб тортилар, — деди Хонзода бегим.

Бобир хотинининг бели йўғонлашиб, қорни дўппайиб қолганини кўрди. Ажабо, Бобир ота бўладиганми? Кў-

ришмаганларига олти ой бўлди. Демак, камида олти ойлик...

Ойиша бегимнинг озғин юзида ҳомиладор хотинларда бўладиган доғлар пайдо бўлган эди. Илгари ҳам отда юролмайдиган, маҳофада боши айланадиган бегим энди оғироёқлигида қанчалик қийналганини, унга қараб қанчалик секин йўл босганларини Бобир ўзича тасаввур этди.

— Худо ҳоҳласа, энди барча машаққатлардан халос бўлдиларингиз,— деди.— Ҳаммаларингиз учун маҳсус жойлару жихозлар тайёрланмишdir. Яна ётеки даркор бўлса буюурсиз. Бўстонсаройда кимки бор, ҳаммамиз хизматларйнгизда бўлурмиз!

Хонзода бегим қувноқ кўлиб:

— Миннатдормиз!— деди.— Амирзодам билан дийдор кўришиб бошимиз осмонга етди. Энди шу осмонда суҳбатингиздан баҳраманд қилсангиз бас.

— Камиён ҳам суҳбатларингизни соғинганмен. Сизлар жойлашгунларингизча осмонда дастурхон ҳозирланнур,— деб, Бобир қўли билан юқориги қаватга ишора қилди.

Унинг осмонни пайров қилиб ҳазиллашганидан ҳаммалари куллаб олдилар.

Бобир юқориги қаватга қайтиб чиқар экан, қалбини тўлдирган шодликлар орасида сурнай навосидек жарангли ва ёқимли бир туйгу янграб эшитилаётганини сезди. Бу унинг дилида бирдан уйғониб кетган оталик түйгуси эди. Унинг бўлажак фарзандини бағрида кўтафиб юрган Ойиша бегим юзидаги қўнғир доғлари билан Бобирга аввалгидан қадрдонроқ туюларди.

Буни сезган Ойиша бегим аввалгидан дадилроқ муомала қиласар эди. Эр-хотин хобгоҳда чироқни ўчириб ётганларидан бегим кўрпани юзига тортиб:

— Мен фахрланамен,— деб шивирлади.

Бобир ўз сўзининг устидан чиққанлиги учун, «энди Самарқандда учрашамиз», деб кетиб, ахир шу айтганини қилгани учун хотини ундан ифтихор қилмоқда эди.

У Бобирнинг бўлажак фарзандига она бўлиш билан фахрланишини ҳам айтмоқчи эди. Бобир буни тушунди-ю, ҳомиланинг неча ойлик бўлганини билгиси келди, аммо рўй-рост сўрашга тили бормай гапни айлантириди:

— Энди... шодиёнаси қачон?

— Салкам уч ой бор... Ўйласам, ваҳмим келур.

— Ваҳмни қўя туринг. Ҳозир фахрдан гап оғдин-гиз-ку.

— Ҳа, агар худо ўғил берса, исмини Фахриддин қўй-юрмизми?

Ойиша бегим Бобирнинг номи Заҳириддин эканини ўйлаб, шунга оҳанѓдош ном топган эди. Бобир, мамнун товуш билан:

— Хўп, ўғил бўлса, Фахриддин,— деди.— Агар қиз бўлса, Фахринисоми?

Ойиша бегим қиз бўлишини истамас эди, чунки ўғил туғиб, таҳт ворисига она бўлишни орзу қиласарди. Шундай бўлса ҳам Бобирга:

— Майли,— деди.— Лекин мен худодан ўғил тила-ганмен.

— Айтганингиз келсин!

Фахриддин... Фахринисо... Шу кунларда Бобирнинг кўнглини тўлдириб, тоширган ифтихор туйғусига бу номлар жуда мос эди.

* * *

Омад ҳам бир келса, қўша-қўша бўлиб келишини Бобир энди билмоқда эди. Самарқанд унинг қўлига ўтгандан кейин бу ёфи Ургут, у ёфи Суғд ва Дабусия қалъаси бирин-кетин Шайбонийхоннинг ихтиёридан чиқиб, Бобирнинг ҳокимиятини тан олди. Мана бугун Қарши ва Гузордан хушхабар келди — бу шаҳарлар Шайбонийхон қўйган доругаларни қувибди, Бобирга совфа-саломлар юбориб, унинг ихтиёрига бир неча юз навкар ҳам йўллабди. Бобир бу навкарларни бошлаб келган бекларни девони хосда қабул қилиб, ҳаммасига сарпо кийдирди ва улуфа тайинлади.

Сўнг кечак тамомланмай қолган мактубининг давомини ёзиш учун иккинчи қаватга кўтариilar экан, кенг мармар зинапояда опаси Хонзода бегимга дуч келди.

— Амирзодам, Ҳиротдан китобат келгани ростми?

Бобир тўхтаб, опасининг юзига синовчан кўз билан қаради-ю:

— Рост, ҳазрат Алишербекдан,— деди.

— Муборак бўлсин!

— Қуллуқ.

Хонзода бегим инисидан яна қандайдир мураккаб бир хабар кутиб, унинг юзига термилиб қаради. Бобир опа-

сининг кўнглидаги дардни сезиб, бир лаҳза тараддулданди. Сўнг рост гапни яширса ёлғон гапиргандаи бўлишини ўйлади-ю:

— Юринг, китобатни кўрсатай,— деди.

Хонзода бегим хонаи хосда Бобирнинг қаршисида ўтириб, Алишер Навоийнинг мактубини ўқир экан, андижонлик меъмор тилга олинган жойига етганда кўзида ёш йилтиради.

— Нечун кўзингиз ёшланди, бегим? Мен сизни суюнтиromoқчи эдим-ку!

— Қандоқ қиласай, толеим паст экан.

— Йиинингиз подшоҳ бўла туриб, наҳотки сизга ёрдам беролмаса?

— Сиз ҳали ҳам мени деб кўп жафо чекдингиз. Агар ўша йили... Ўшда мен рози бўлсан, эҳтимол кейин Аҳмад Танбал сизга бунча ёғийлик қилмас эди.

Опасининг бунчалик тантилик билан айтган сўзлари гёё Бобирни яна ҳам танти бўлишга ундар эди. Кўнгли яхши туйғуларга тўлиб юрган шу кунларда наҳотки тушган эгачисига катта бир яхшилик қиломаса?

Мана, ҳозир улар Самарқанднинг муҳташам бир кошонасига кўчиб келишди. Бу ерда қанча аслзода-ю, шаҳзодалар яшаган. Аммо кўпчилиги из қолдирмай кетган. Фақат меъморлар яратган гўзалликлар ҳали ҳам кўрган кўзни қувонтириб, ял-ял ёниб турибди. Яхши бир меъмор — ҳунарсиз аслзоданинг юзтасидан афзал эмасми?

— Бегим, сиз Танбалнинг ёғийлиги учун хижолат чекманг. Илон барибир илонлигини қилур эди.

— Миннатдормен, амирзодам.

— Ҳазрати Алишербек ҳам биздан улуғ ишлар кутиб китобат юбормишлар. Насиб қилса, биз ҳам умрбоқий обидалар қурурмиз, ҳунарпешалар яна йигилиб келурлар. Мен бу муборак китобатнинг жавобини маҳсус элчидан бериб юборурмен. Агар Ҳиротга борган ўша андижонлик меъмор — Мавлоно Фазлиддин бўлсалар, элчи уни топиб, Самарқандга таклиф қилур.

Хонзода бегимнинг ҳали ёши қуrimаган кўзларида энди шодлик учқунлади. У инисига завқ билан тикилиб шивирлади:

— Сиз Мовароуннаҳр осмонида бизнинг ягона умид юлдузимизсиз!

— Энди парвардигор Шайбонийхонни тезроқ даф

— қилсину, юрт тинчисин, денг. Ушанда нафасий роствлаб, ўшда қилган орзуларимизнинг ижросига киришурмиз.

Мавлоно Фазлиддин Андижонда қурмоқчи бўлган меъморлик обидаларининг тарҳларини, лойиҳаларини Хонзода бегим онасидан олиб, ҳамон асрраб юрар эди. Ҳозир буни Бобирга айтишдан ийманди-ю:

— Амирзодам, мен энди кечаю кундуз худога илтижо қилурмен,— деди,— илоҳим шу орзуларимиз рӯёбга чиқсин!

Хонзода бегим руҳи кўтарилиб чиқиб кетганидан кейин Бобир сандиқчадан шеър дафтарини олди-ю, кечаги машқини давом эттиromoқчи бўлди. Дафтардаги бир матлаъ унинг ҳозирги руҳига мосроқ эди:

«Ҳар кимки вафо қилса вафо топқусидир,
Ҳар кимки жафо қилса, жафо топқусидир...»

Алишер Навоийга шу шеърни битириб юборса яхшироқ бўлармиди? У яна бир сатр ёэди, ўзига ёқмагандан кейин ўчириб, яна ёэди, яна ўчирди, ниҳоят учинчи уринишда:

«Яхши киши кўрмагай ёмонлик ҳаргиз»

деган сатрни топди-ю, уни ич-ичидан ёқтириб, илҳом ҳаяжонидан нафасида титроқ пайдо бўлди. Назарида, Навоий унинг елкаси оша бу янги сатрни ўқиётгандек эди. У одамларга Навоийдек кўп яхшилик қилган сиймонинг ҳеч қачон ёмонлик кўрмаслигини истар, энди шу истагини шеърига ҳам сингдирмоқчи бўларди.

Бобир тўртинчи сатрни бошлаганда савдарбоши эшикдан бош эгиг кириб, қўрқа-писа:

- Мирзо ҳазратлари,— деди.
- Мени тинч қўйинг демабидим?
- Қулингизни афв этинг...
- Яна не ташвиш?
- Амирзодам буюрган эдилар. Агар Мулла Биноийни келтирсалар, дарҳол хабар беринг, деган эдингиз.
- Шоир Биноий Шаҳрисабздан келибдирми?
- Қосимбек жаноблари келтиришилар.

Бобир бу хабарни эшитди-ю, ёзишдан тўхтаб, қалами миз четига қўйди. Пастдаги қабулхонага тушиб бораётган Биноийнинг тақдирига оид мураккаб воқеалар хаёлидан такрор ўта бошлади.

* * *

Бобир ҳиротлик машхур шоир Камолиддин Биноий билан бундан уч йил олдин Самарқандга биринчи гал келган пайтларида танишган эди. Биноийнинг санъаткор хаттотлар томонидан кўчирилган нодир бир қўллёзма китоби бор экан. Китоб йиғишга ҳавасманд Бобир бу китобга жуда ҳаваси келди. Биноий китобини унга совфа қилмоқчи бўлди. Бобир Биноийнинг Самарқандда мусоғир эканини, танқислик тортиб қийналганини билар эди. Шунинг учун Бобир саҳдофларни чақириб, бу китобнинг энг баланд нархи қанча бўлишини сўради. Саҳдофлар «энг баланд баҳоси беш минг дирҳам», дейишиди. Бобир бу пулни Биноийга юборишга улгурмай қаттиқ бетоб бўлиб ётиб қолган эди.

Кейин у касалликдан туриб, Андижонга жўнаш учун йўл ҳозирлигини кўраётганда «Мажмуати Рашиди» деб аталадиган ўша китобни кўрди-ю, Биноийга ҳали ҳақини бермагани эсига тушди. Дарҳол хазиначини чақириб, беш минг дирҳам олтинни санатди, сўнг пулни китобдорга бериб, Биноийга юбортирди.

Бир вақт китобдор Биноийни тополмай қайтиб келди. Мусоғир шоирнинг Самарқандда муқим турадиган уйи йўқ, у бугун қаёққадир меҳмонга кетган эди. Бобирнинг одамлари Андижонга тезроқ жўнаш ва куч йиғиш ташвиши билан ниҳоятда банд бўлганликлари учун ҳозир Биноийни қидириб юриш уларга жуда малол келди. Лекин Бобир:

— Шу қиёматлик қарзни узмагунча Самарқанддан қўзғалмаймен! — деб туриб олди.

Шундан кейин савдару навкарлар шаҳарнинг ҳар тарафига от чоптиришиб, ниҳоят Биноийни топдилар, унга бўлган воқеани айтиб, беш минг динор пулинни топширдилар.

Киши молига суқ подшоҳларни кўп кўрган Биноий ўн олти ёшли Бобир мирзонинг бунчалик ҳалоллигидан жуда қаттиқ таъсирланди-ю, унга атаб бир шеър ёзди. Бу шеърдан бир нусхасини хаттотга кўчиририб, Бобир жўнаётганда унга эсадалик қилиб бериб юбөрди.

Қирқ тўрт йўллик бу шеърда у Бобирни кўп мақтаган:

«Шоҳ сўлтони Заҳириддин Бобир,
Ки жаҳон шуд зи сити адлаш пур!» —

деб, гўё жаҳон Бобирнингadolat бобидаги шуҳратидан тўлғанини айтган эди. Бобир, «Жаҳон қайда-ю, менинг шуҳратим қайда!»— деб, бу сатрлардаги муболагадан кулган бўлса ҳам, лекин замонадан қўп жабр кўрган Биноий учун шу кичик яхшилик туфайли, эҳтимол, бутун жаҳонadolatга тўлиб кўрингандир, деб ўйлади.

Бироқ кейинчалик Самарқандга Шайбонийхон хон бўлди ва шаҳар шоирларини йиғиб бир мушонра ўтказди. Бу мажлисга Биноий ҳам қатнашиб, шеър ўқиди. Ҳен унинг шеърини ёқтиради-ю, Биноийни ўзига мулозим қилиб олади ва эришган ғалабаларининг тарихини ёзишини топширади. Биноий «Шайбонийнома» деган асарини энди ёза бошлаган пайтда Самарқанд яна қайтадан Бобирнинг қўлига ўтади. Шайбонийхон атроф туманлардан ҳам қувилиб, Бухорога қараб чекинган кунларда Биноий унинг қароргоҳидан қочиб, Самарқандга келади. У Бобир билан учрашмоқчи бўлади, лекин Қосимбек уни Шайбонийхон тарафдори деб, Бобирнинг ҳузурига кирилтмай, Шаҳрисабзга жўнатиб юборади. Бобир бу ҳодисадан яқинда хабар топиб, Қосимбекка:

— «Чакки қилибсиз,— деди.— Мулла Биноий — катта шоир. Ўзи келган бўлса рухсат бермоқ керак эди». Қосимбек важ кўрсатди:

— Катта шоирингиз Шайбонийхонни мақтаб шеър ёзган.

Бобир кўлди:

— Бизни мақтаб шеър ёзганини билмасмисиз? Тождорлар мақтовни суйсалар, шоир не қилсин!

Қосимбек жиддий туриб эътиroz қилмоқда эди:

— Амирзодам, бу одам Шайбонийхоннинг хуфяси бўлиши мумкин.

Бобир ўйлаб туриб:

— Йўқ,— деди.— Ҳиротда Ҳусайн Бойқародай шоҳга хуфя бўлмаган киши Шайбонийхонга хуфя бўлмас.

— Аммо бу шоир Ҳўжа Яҳёнинг ҳовлисида туриб, унинг тузини ичган, кейин Ҳўжа Яҳёни ноинсофларча ўлдиртирган Шайбонийхонга мулозим бўлган. Шу яхшими?

— Бу яхши бўлмаса, яхшилик қандай бўлишини биз кўрсатмогимиз керак. Одам юборинг, Мулло Биноийни Самарқандга бешикаст олиб келсинлар.

Сўнгги сўз фармойиш тарзида айтилгани учун Қосимбек уни бажаришга мажбур бўлган эди.

...Бобир паастга тушиб девони омга тўрдаги эшикдан

кирди. Қўп ўтмай пойгাখдаги эшикдан Қосимбек Биноийни бошлаб кирди.

Биноийни Бобир бундан икки-уч йил олдин ҳам бир кўрган эдӣ. Ӯшанда у жуда салобатли эди. Ҳозир эса жуда озиб, гавдаси алланечук кичрайиб қолган. Тўнн ҳам, салласи ҳам эскириб кетган. Фақат йирик-йирик кўзлари аввалгида мағрур чакнаб турибди. Бобир унга пешвоз чиқиб, уй ўртасида қўл бериб кўришди. Ӯнг ёнига Қосимбекни, чап ёнига Биноийни ўтқазиб ҳолаҳвол сўради. Шунда Биноий ёдаки бир рубоий айтиб, егулик ғалласи йўқлигини, кияй деса ғалланинг қопи ҳам топилмаслигини айтди:

Не ғалла мароказ тавонам нўшид,
Не муҳмали ғалла то тавонам пўшид —

деган сатрлардаги нозик сўз ўйинини сёзиб, Бобир беихтиёр жилмайди. «Муҳмал» аслида ноаниқ деган маъноди билдиради. Бу сўз билан Мулла Биноий ўз аҳволининг ноаниқлигига ишора қилмоқчи эди. Айни вақтда, «муҳмали ғалла»— яъни қоп қиядиган даражага етганини ҳам айтиб, ўз аҳволига киноя қилмоқда эди, «Хон ҳувурида топган мартабамиз шу бўлди!»— демоқчи эди.

Бобир бунинг ҳаммасини тушунган маънода бош иргади-ю, панжасини пешонасига тираб, бир лаҳза жим қолди. Унинг авзойидан шеърга шеър билан жавоб бермоқчи эканлигини сезган Қосимбек Биноийга «Шошмай туринг!»— дегандай ишора қилди. Ниҳоят, Бобир қўлини пешонасидан олди-ю, Биноийга кулимсираб қаради:

Инъому вазифа бори буйрулғусидир,
Муҳмалга бўю ғаллага уй тўлғусидир.

Бобирда бунчалик шеърий истеъдод бор деб ўйламаган Биноий бир лаҳза ҳайратланиб турди-ю, сўнг тожиқча талаффуз билан:

— Яна бир такрорланг, амирзодам, фақир радифини уқиб олмоқчиман!— деди.

Бобир шеърни иккинчи айтишда баъзи жойларини силлиқлаб, «ғаллага уй» жумласини «ғалладин уй тўлғусидир», деб тўғрилади. «Бўй» ва «уй» деган ички қофиялар ўзига ҳам ёқимли туюлиб, завқини келтирди.

— Табъи назмингиэга тан бердим, амирзодам!— деди

Биноий. Сўнг у оқ оралаган қалин соқолининг учларини тутамлаб бирпас жавоб қидирди. Топди шекилли, бошини тез кўтариб, қаддини тиклади:

Бир муҳмал учун мунча иноят бўлдъ,
Мустаъмал агар десам нелар бўлғусидир!

Бинойнинг туркий шеърга ҳам бунчалик усталиги энди Бобирни ҳайратга солди. Бу ерда «муҳмал» сўзи учинчи бир маънода ишлатилгани — Биноий аввалги рубойисига камтарона баҳо бериб, уни «муҳмал», яъни «хом» деб атагани ҳам ажойиб эди. «Муҳмал»га «мустаъмал», яъни «пишиқ», «мукаммал» сўзининг ички қофия қилингани ҳам Бобирга жуда ёқди. У муншийни чақириб, Мулла Биноий айтган рубойиларни ёзib олишга буюрди.

Икки орада бўлиб ўтган мушоирдан Қосимбек ҳам хийла таъсиrlанган эди, У ўша куниёқ Биноийни яхши бир ҳовлига жойлаштириди, Бобирнинг буйруғи билан аравада ун, гуруч, бир қўй, иссиқ барра пўстин бериб юборди, Биноий подшоҳ мулозимлари қаторида улуфа ола бошлади.

Орадан икки кун ўтгач, янги зира беқасам тўн устидан барра пўстин кийган Биноий яна Бўстонсаройга келди. Бобир бу гал уни иккинчи қаватдаги меҳмонхонада қабул қилди.

Бу гал улар дастурхон атрофида яккама-якка суҳбатлашдилар. Биноий Бобирнинг Шайбонийхон ҳақида савол беришини кутиб, хон саройида кўрганларини киноя билан гапириб беришга тайёрланиб келган эди.

Лекин Бобир Биноийни ўнғайсизлантирмаслик учун ўтган гал ҳам, бугунги суҳбатда ҳам, Шайбонийхонни атайлаб тилга олмади. Сўнгги кунларда Навоийдан келган хатнинг таъсирида юрган Бобир Ҳиротдан гап очди. У Навоий билан Биноийнинг ўзаро муносабатлари ҳақида баъзи бир гаплар эшигтан, энди бунинг тафсилотларини билгиси келар эди.

Шайбонийхон тилга олинмаганидан енгил тортган Биноий кулиб гап бошлади:

— Алишербекнинг қулоқлари оғригандага кўк қийик боғлаган эканлар. Буни бazzоз эшитиб, кўк рўмолнга «Нози Алишерий» деб ном қўйиб сотадиган бўлдилар. Алишербек — улуғ сиймо, номларига ярашадиган улуғ

ихтиrolар қилганлар. Бачкана кишилар арзимаган нар-
саларга ҳам «Алишерий» деб ном қўйиб, пул ишлашлари
фақирнинг ғашига тегди. Эшагимга ғаройиб бир эгар
ясатдиму бунга ҳам «Алишерий» деб от қўйдим. Кейин
шу эгар ҳам машҳур бўлди! Мен бу билан савдогарлар-
нинг бачкана гапларига киноя қилган эдим. Аммо ифво-
гарлар буни «Алишербекка беҳурматлик» деб овоза қил-
дилар, икки орага ғубор солдилар.

Мулла Биноий ҳазиломуз бошлаган гапини ҳасратли
товуш билан тугатди:

— Амирзодам, менинг Алишер Навоийга эҳтиромим
чексиз! Фақир у зотнинг суҳбатларидан баҳраманд бўл-
ган пайтларимни эсласам юрагим эзилур.

— Ёмон одамлар солган ғуборни орадан олиб таш-
лаш мумкин эмасмикин?

— Мен ҳозир шу ғуборни тарқатиш ҳаракатидамен.
Мусофиrotда юриб, Алишер Навоийга атаб бир қасида
ёздим. Жоиз бўлса, баъзи жойларини амирзодамга ўқиб
берай.

— Марҳамат!

Мулла Биноий ўзи ёзған шеърий асарларнинг ҳамма-
сини ёдан билар эди. Ҳозир ҳам бир бурчакка тикилиб,
«Мажмаъул ғаройиб» деган қасидасини ёдаки айта бош-
лади. Мулла Биноий Навоийдан узоқда унинг суҳбатини
соғиниб:

Бе ту чун оби Дарғамам дар ғам,
Бе ту чун руди Кўҳакам гирён!¹—

деганда Бобир завқдан бош ирғаб:

— Уҳ!— деб қўйди.

Қасида ўқиб тугатилганда Бобир таъсирланганидан
қасарда ўтирганини ҳам унугтан эди. У атрофига қараб,
гўё меҳмонхонага узоқлардан қайтиб келгандай бўлди.

— Мавлоно, бу қасидани Алишербекқа нега юбор-
майсиз?

— Ҳиротга борадиган тайинлик одам йўқ, амирзо-
дам.

— Биз яқинда Ҳиротга элчи юбормоқчимиз. Қамина-
га Алишербекдан китобат келган эди. Жавобини ёзиб
юбормоқчимен.

¹ Сенсиз Дарғам сувидек дарду ғамдамен,
Сенсиз Кўҳак (Зарафшон) дарёсидек гирёнман.

— Амирзодам, қани эди, қулингизнинг бў қасидасини ҳам....

— Марҳамат, хаттотга бериб кўчирилмоқ зарур бўлса, мен буюурмен. Сўнг элчидан бериб юборурмиз.

Гап шунга қарор топди-ю, мулла Биноий хурсанд бўлиб чиқиб кетди.

Бобир яна хонаи хосга кириб, чала қолган шеърини қўлига олди. Бироқ энди катта шоир билан бўлган узоқ сухбатдан сўнг, аввалги шеърлари Навоийга юборишга муносиб эмасдек туюлди. Унга илгари жўн туюладиган нарсалар ҳам аслида жуда мураккаб экани ҳозир жуда аниқ сезилаётгандай бўларди. Ҳамма нарсани муҳит, аҳли жаҳон мураккаблаштиради. Ҳиротда яшаётган Алишер Навоий ҳам, ҳозир Бобирга кўп нарсаларни куюниб айтиб берган Биноий ҳам муҳитдан, замона аҳлидан норози бўлганларича бор эди. Бобирнинг ўзи бу замонадан озмунча жабр кўрдими?

Ким кўрибдир, эй кўнгил, аҳли жаҳондин яхшилик!

Бу ҳароратли сатр қофозга тез ва равон тушди. Бобир ўз зеҳнининг гўё қайралиб, ўткирлашиб қолганини сезиб турарди. У ҳозир хаёл кўзи билан Ҳиротдаги Алишер Навоийни аниқ кўраётгангага ўхшарди. Бобир муҳитдан, замонадан, фақат ўз манфаатини кўзлайдиган жаҳон аҳлидан яхшилик кутган одам алданиши муқаррарлигини Навоийга айтиб дардлашгиси келарди:

Кимки андин яхши йўқ, кўз тутма андин яхшилик.

Яъни, ўз муҳитидан баланд туролмайдиган одам бирорвга яхшилик қилолмайди. Алишер Навоийнинг одамларга шунча кўп яхшилик қилаётгани — Бобирга унинг жаҳон аҳлидан беқиёс даражада юксак эканини яқол кўрсатаётгандай бўларди. У ўз кўнглини ҳам мана шу юксакликка ундан яна бир байт ёзди.

Бори элга яхшилик қилғилки, мундин яхши йўқ,

Ким дегайлар даҳр аро қолди фалондан яхшилик.

Шу куни кечаси Бобир Навоийга аталган мактубини ҳам, шеърини ҳам ёзиб тугатди. Орадан икки кун ўтгач, бу мактуб маҳсус элчи билан Самарқанддан Ҳиротга

жұнатилди. Бобир Навоийдан қишиң чиққунча жавоб олиш умидида әди. Бироқ қишиң чиқиб, әнді бойчечак очилған күнларда Ҳиротдан мусибатлы хабар келди: қишиң чилласи пайтида ҳали Бобир юборған әлчи йўлда эканида Алишер Навоий вафот этган әди. Бобир ўзига улуғ бир мурраббий топдим, деб суюниб юрганда ўгай тақдир уни бу мададкоридан ҳам жудо қилган әди.

7

Тепаликка учиб чиқаётган чопқир отнинг туёғи ердан бош күтариб, бугун-эрта очилай деб турган лолағунчасини эзиб-янчиб ўтди. Бу от устида ўтирган Шайбонийхоннинг кўзлари эса пастдаги кенг текисликда чукурчукдай ёпирилиб пойга ўтказаётган отлиқларда әди.

Тиник баҳор осмонининг бир четида Самарқанд билан Бухоро оралиғининг энг машҳур қўргони бўлган Да-бусия¹ қалъаси савлат тўкиб турибди. Кеч кузда бу қалъа ҳам Шайбонийхоннинг қўлидан чиқиб, Бобирга ўтиб кетганда хон қўшини Бухорога чекиниб, оғир аҳволга тушиб қолган әди. Руҳи тушган баъзи саркардалар «Эсимиз борида этак ёпиб, Туркистонга қайта қолайлик!»— дейишган әди. Аммо Шайбонийхоннинг Самарқанддаги хуфялари Бобирнинг шоирлар ва олимлар суҳбатига берилиб, янги жангларга суст тайёрланаётганини билдириб турар әдилар. Қўлдан-қўлга ўтиб, жуда кўп таланган Самарқанд баҳорга чиқиб яна очлик ва қашатчилик балосига йўлиққан әди. Бунинг ҳаммаси Шайбонийхонни дадиллантирди. Яқинда у Бухородан Дабусияга қўшин тортиб келди. Қалъанинг баланд деворларига улардан ҳам баланд шотилар қўйдирди. Қалъа ҳимоячилари тепадан ўқ ва тош ёғдиришаётган бўлса ҳам хон ўз аскарларига тап тортмай чиқаверишни буорди. Одамлар ўлган-қолганига қарамай чиқиб келаётганини кўрган ҳимоячилар тепадан катта ёғоч болорлар отишди, ёниб турган ёғларни чиқаётганларнинг бошидан қўйишиди. Девор таглари ўликларга тўлиб кетди. Хон навкарлари қўрқиб чекина бошладилар. Шунда Шайбонийхон ўзининг туғишган укаси Маҳмудхонни

¹ Да бу сия —«Темир қўргон» демакдир. Зиёвиддин деган жойда ҳозир бу қалъанинг харобалари бор.

— ба суюкли ўғли Темурхонни бутун навкарлари билан жангга солди. Хон укаси ва ўғлини ҳам аямаётганини кўрган жангчилар яна шолиларга ёпишдилар. Юқоридан ёғилаётган ажал шотига чиққанларни тутдай тўқаётган бўлса ҳам бир неча юз киши шовқин-сурон билан девор тепасига чиқиб борди. Девор тепасидаги жангда икки томондан ҳам жуда кўп одам қирилдэ, ўликлар туйнукларни бекитиб қўйганидан пастга ўқ отиш мумкин бўлмай қолди. Хон қўшини сон жиҳатдан бир неча баробар кўп эди ва шотилардан орқама-орқа чиқиб бормоқда эди.

Бобирдан ёрдам сўраб кетган чопари Самарқандга етиб боргунча бўлмай Шайбонийхон Дабусияни қонга белаб ахiri олди-ю, ҳимоячиларни битта қолдирмай қиличдан ўтказди.

Бу зафар хон қўшинининг руҳини кўтарди.

Энди Шайбонийхон Дабусияни тоғдай бир таянчга айлантириб, ундан Самарқанд устига сакраш тайёрлиги-ни кўряпти.

Ҳозир пастда ўтказилаётган пойга ҳам — шунчаки кўнгил очиш учун эмас. Бобир билан бўладиган ҳал қиувчи жангларда Шайбонийхонга энг зўр, энг чопқир отлар керак.

Куни кечадан келгайн дарвиш кийимдаги бир маҳфий Бобирнинг хотини қиз туққанини, отини Фахринисо қўйганларини айтиб берган эди.

Шайбонийхон пойгада бир-биридан ўзиб, сор бургутлардай учиб бораётган йигитларига завқ билан тикилди-ю, ўзича деди: «Майли, Бобир куздаги ғалабасидан фахрланиб, қизига Фахринисо деб от қўйсин, керилиб, шеърини ёзиб ётаверсин! Унгача мен бургутларимнинг ҳаммасини овга ўргатаман».

Шайбонийхон ҳали ҳеч қайси жангда бунчалик жонжаҳди билан тайёрланган эмас. У Бобирни енгиш осон эмаслигини сезарди. Бобир энди ўн тўққизга кирган ёш йигит бўлса ҳам ниҳоятда истеъодли, ниҳоятда довюрак саркарда эканини Шайбонийхон амалда кўрди. Ҳозир бу атрофдаги шаҳару қишлоқларнинг кўпчилиги Бобирга ён босади. Шайбонийхоннинг душманлари эса беҳисоб. Султон Али мирзонинг кўпчилик бек ва навкарлари бултур Шайбонийхонга қўшилган эди, Бобир Самарқандни олгандан кейин ҳаммаси унинг томонига қочиб ўтиб кетди. Бобирнинг қўшини кун сайин кўпайиб боряпти. Ҳат-

то Андижондаги Аҳмад Танбал ҳам укаси Султон Халилни икки юз наввари билан Бобирнинг ихтиёрига юборипти. Шайбонийхон шуни эшитгандан кейин, ҳозир Бобирнинг обрўси жуда баланд эканини, ундан ҳатто Аҳмад Танбал ҳам қўрқиб қолганини сезди. Бу кетишда ёзга бориб Бобирнинг қўшини яна ҳам кўпаяди. Шайбонийхон ҳал қилувчи жангни тезлатмаса, кейин ютқизади.

* * *

Шайбонийхон султонлари билан кенгашиб, эрта баҳорда Бухоро ва Дабусия қалъасини ишончли одамларига қолдирди-ю, ўзи Самарқанд томонга қўшин тортиб кела бошлади. Шундан сал олдин Шайбонийхон Бобирга мактуб йўллаб, уни масоф урушга¹ чақирган, «Мардлар майдонда синалгай, қалъада бекиниб ётиш ёш боланинг ҳам қўлидан келур!»— деган мазмунда аччиқ киноялар қилган эди.

Нихоят, Бобир ҳам Самарқанддан қўшин билан келди-ю, Сарипулда² Шайбонийхон аскарларидан бир тош берида тўхтаб, жангга тайёрлана бошлади. Бобир Зарафшон дарёси кўриниб турган бир жойни ўрда қилиб, атрофига чуқур хаңдақлар қазитди, шох-шаббалардан ўқ ўтмайдиган иҳоталар ясатди.

Шунга қараганда Бобир масоф урушга унча тез киришмоқчи эмас эди, орқадан яна янги кучлар етиб келишини кутмоқчи эди.

Бироқ Шайбонийхоннинг йигиладиган аскарлари йиғилиб бўлган, энди узоқ Туркистондан янги кучлар етиб келолмаслиги аниқ. Шаҳрисабздан келган махфий хабар хонни изтиробга солиб қўйди. Уша ёқда Боқи тархон икки минг қўшин тўплаган эмиш, яна мингта аскар йиғиб, кейин ҳаммасини Бобирга ёрдам бергани олиб келмоқчи эмиш. Агар бу қўшин ҳам Бобирга келиб қўшилса, Шайбонийхон енгилиши мумкин. Хон урушни тезроқ бошлишнинг чорасини излаб, Бобир қароргоҳида мунажжимлик қилиб юрган яширин кишисига хабар юборди. «Осмондаги юлдузларга қараб, Бобирни тезроқ жанг қилишга кўндирысин, агар ишни чўэса, жосуслигини фош

¹ М а с о ф у р у ш — очиқ жойда юзма-юз олишиш.

² С а р и п у л — ҳозирги Каттақўрғон шаҳри яқинидаги бир қишлоқ.

килиб бошини кестиргаймен!»— деб мунажжимга таҳдид қилди.

Бу мунажжим ҳам шоир Бинойга ўхшаб, хон қароргоҳидан Бобир ҳузурига қочиб борган эди. Хон Бобирнинг раҳмини келтириш учун мунажжимни Бобир ҳузурига қочиришдан олдин калтаклатиб, оғиз-бурнини қон қилган, кийимларини йирттирган эди. Мавлоно Шаҳобиддин исмли бу мунажжим ҳозир Бобир саройида иззат-икромда экани ҳам Шайбонийхонга маълум эди. Хоннинг яширин топшириғи қаландар кийимидағи киши орқали мунажжимга етказилган куни кечаси Шайбонийхон ўн минг қўшини билан Бобир ўрдасига бостириб борди, нақоралар, карнайлар чалдириб, истеҳком деворлари орқали ўқлар ёғдириди.

Отлар хандақлардан ўтолмас, аммо хон аскарларининг ҳақоратомуз қичқириқлари ўрдада ўтирган Бобирга ва унинг одамларига барадла эшитиларди:

— Жонинг бўлса майдонга чиқ!

— Қўрқоқлар, курк товуқдай мояқ босиб ўтира берсанми?

— Бобирингда юрак бўлса улуғ хонга ўзини кўрсатсин!

— Мард бўлса чиқсин майдонга!

Ҳимояда ётган одамларга тунги ҳужум ва шовқин-сурон оғир таъсир қилишини Шайбонийхон яхши билар эди. Бобирнинг ўрдаси атрофида унинг юзлаб отлиқлари уrrа-ур қилишиб, бўрлиқни ларзага келтиришди, иҳота қилинган шоҳ-шаббаларга ёниб турган ёй ўқларини отишиб, бир-икки жойини ёндириб юборишиди. Ичкаридан ҳам ўқлар отилди, аччиқланган навкарларнинг ҳақоратлари эшитилди, аммо хон қўшини билан олишиш учун ҳеч ким юрак ютиб чиқолмади.

Шайбонийхон Бобирнинг кечаси қўйқисдан майдонга қўшин тортиб чиқолмаслигини олдиндан биларди, чунки ҳеч бир ақлли-ҳушли саркарда бу қоронғи тунда селдай ёпирилиб келган лашкар қаршисига тайёргарликсиз бетартиб отилиб чиқмаслиги ўз-ўзидан аён эди. Бу тунги шовқин-сурон Шайбонийхонга ўз лашкарининг руҳини кўтариш учун керак эди. У ўзининг ҳеч нарсадан қўрқмаслигини, Бобир эса гўё тиззаси қалтираб, истеҳкомдан берига чиқолмаётганини ҳар икки томонга намойиш қилмоқчи, шу билан ёш душманнинг иззат-нафсини қўзғатмоқчи эди. Айни вақтда, бу тунги ҳужум — Бобир қа-

роргоҳида иш олиб бораётган мунажжимни ҳам дадил—
лаштиришга қаратилган эди.

Чиндан ҳам бу тунги ҳужум Бобирнинг иззат-нафси-
га қаттік тегди. Мунажжим эса осмондаги юлдузлар
тартибини мураккаб бир тарзда унга тушунтириб: «Хо-
зир саккиз юлдуз сиз томонда рост турур,— деди.— Яна
икки кун ўтгач, бу саккиз юлдуз ғанимингиз томонига
оғиб кетгай. Агар эрта-индин жангга киришсангиз ғала-
ба сизники бўлишидан бутун фалакиёт далолат бермоқ-
да!»

Ахири шу сабаблар бир бўлиб, Бобир Шаҳрисабз ва
Тошкентдан келадиган катта кўмакни кутиб ўлтирмас-
дан, индин чоршанба куни жанг майдонига чиқишига қа-
рор берди. Мунажжим буни ўша алоқачи қаландар ор-
қали Шайбонийхонга етказдириди.

Шайбонийхон чоршанба куни ҳаёт-мамоти ҳал бўли-
шини сезиб, бор истеъодини, бутун тажрибасини ишга
сола бошлиди. Куни бўйи бўлажак жанг майдонининг
ҳар бир пасту баланд жойини кўздан кечириб чиқди,
офтоб қаёқдан чиқиб, шамол қаёқдан эсишига эътибор
берди. Кечаси эса отларни эгарлатиб, ҳамма нарсани
тахт қилиб ётишни буюрди, ёв майдонга чиқсан заҳоти
дарҳол қулай томонни эгаллашнинг режасини тушиб
қўйди. Икки кеча деярли ухламади. Ярим тунда ҳам, са-
ҳар паллада ҳам унинг оқ ўтовидан кучли овоз ва катта
ихлос билан ёдаки қироат қилинаётган қуръон товуши
эшитилиб турди. Шайбонийхон жойнамоз устида саждага
бош қўйиб, худога муножот қилас, кўзларига ёш олиб
«Шарманда қилма, парвардигор!»— деб пичирларди.

Жангдовуллар аzon палла Бобир қўшинининг шоши-
линч сафланаетганини ва туғ тикаётганини айтиб келган
заҳоти Шайбонийхон ҳам бор аскарларини оёққа тур-
ғизди. Чавкар отда сафларни айланиб чиқди.

— Шунқорларим!— деб жарангли овоз билан қўшин-
га мурожаат қилди.— Бу атрофда бизнинг худодан
бўлак суюнчиғимиз йўқ. Ота юртимиз узоқ, енгилсак
етолмаймиз. Бирдан-бир нажот — енгиш! Менинг пар-
вардигордан умидим катта. Тушимда аён бўлди — насиб
қиласа, ғалаба бизники!

— Иншолло!— деди ўнлаб овоз бирдан.

Шайбонийхон қуръондан қисқа бир сурани оҳангдош
товуш билан таъсирли қилиб ўқиди-ю, диний раҳбарлар-
га хос сирли ва салобатли тарзда фатво берди:

— Омин, оллоҳу акбар!

Минглаб одам бирдан:

— Оллоҳу акбар! — деб такбир туширганда осмон титраб кетгандай бўлди. Шайбонийхоннинг валийлигига ишонадиган, унинг фатвосидан руҳланган қўшин аввалдан йланган аниқ режа билан ёв томонга йўналди.

Ўзоқ машқлар бекор кетмаган эди. Хоннинг қўшини гўё бир тан-бир жон бўлиб ҳарекат қилас, худди таранг тортилган ёйдай ўртаси хиёл олдинга чиқиб борар эди.

Чап томон дарё. Шайбонийхон қўшинини ўнг томондаги кенгликлардан дарё томонга қиялатиб йўналтириди. Чунки дарё томон нишаброқ эди, бугун шамол ҳам жа-нубдан эсмоқда эди. Иўл нишаб бўлса-ю, шамол орқадан эсса, чопқир отлар янада тезроқ учиси мумкин. Шайбонийхон бугун қўлламоқчи бўлган тўлғама усули — яшин тезлигида ҳаракатланишни талаб қиласди. Шунинг учун у отларнинг чопқирини аввалдан танлаб қўйган, бугун эса шамолнинг йўналиши-ю, ернинг нишаблигини ҳам ҳисобга олган эди.

Шайбонийхон қўшинининг жанубдан қиялаб яқинлашашётганини кўрган Бобир қўшини ёв билан юзма-юз тўқнашиш учун ўнг қанотини олдинроқ чиқариб, дарёга орқа ўғирди-ю, жанубга томон бурила бошлади.

Орада икки-уч чақиримча масофа қолғанда Шайбонийхон хос навкарлари, ичкилари ва түғбардори билан бирга баланд бир тепаликда тўхтади. Бобир ҳам шунаقا бир тепаликда отлиқ турар, унинг орқасидаги дарёнинг суви эрталабки қуёш нуридан товланиб кўринарди.

Бобирнинг қўшинлари орасида тўра¹ кўтарган, дастаси узун найзалар ва ойболталар билан қуролланган пиёдалар ҳам кўп эди. Агар отлиқлар уларга тўғридан рўпара бўлса узун найзалар отга ёки отлиқка санчилади. Шайбонийхон пиёдаларнинг марказда келаётганини кўриб, ўзининг қўшинига ёв марказини очиқ қолдиришни, ёвнинг икки қанотини айланиб ўтиб, икки биқинидан ва орқадан зарба беришни буюрган эди.

Ўнг қанотдаги Маҳмуд Султон, Жонибек Султон ва Темур Султон хоннинг буйруғига амал қилишиб, ёвга бир чақирим қолганда отларини тўsatдан ўнг томонга

¹ Тўра — қалқоннинг бир тури. Отлиқларнинг қалқонидан каттароқ бўлади.

буришди ва Бобир қўшинининг чап қанотини айланиб ўта бошлашди. Шайбонийхон қўшинининг чап қанотидаги машҳур лашкарбошилар Ҳамза Султон ва Мадҳи Султон ҳам марказга тегмай, Бобирнинг ўнг қанотини айланиб ўтмоқда эдилар.

Энг зўр кучларини марказга қўйган Бобир аввал тузган режасини шошилинч равишда ўзгартира бошлади. Бобир марказга қўйган қўшинининг бир қисми ўнг қанотга қўшилиб, Шайбонийхоннинг чап қанотига ташланди.

Тўлғаманинг бир қалтис жойи шунда эдики, марказга тегмай ўтган икки қанот бир-биридан ажralиб қолиши мумкин эди. Ёв уларни иккига бўлиб ташлаши, сўнг орқадан ҳужум қилиб тўлғама ишлатмоқчи бўлганларнинг ўзларини тўлғаб, қуршаб олиши мумкин эди. Ҳозир Шайбонийхон қўшинининг чап қаноти худди мана шу аҳволга туша бошлади.

Аммо мана шу ерда энг югурик отларнинг танлангани иш берди. Бобирнинг отлиқлари олдиндан қирқиб чиқишига улгурмадилар. Маҳмуд Султон бошлиқ уч-тўрт юз чавандоз ёв қўшинининг орқасига ўтиб олишга муваффақ бўлди. Ўнг қанотдан Ҳамза Султоннинг икки юз отлиғи ҳам чопқир отларда ёвни айланиб ўтиб келиб, Маҳмуд Султоннинг йигитларига қўшилди. Бобир қўшини кутилмаганда ҳам икки ёндан, ҳам орқадан зарба еб, эсанкираб қолди. Жон аччиғида бақираётган, қилич ва ўқ зарбидан йиқилаётган, оёқ остида мажақланиб чинқирган ваҳимали қозозлар, тиф, найза зарбалари, «Ур-ҳо, ур!»— деган нидолар отларни ҳам қутуртириб юборган эди. Бобир қўшинининг дастлабки ясоғи бузилиб кетди, икки томоннинг отлиқлари аралаш-қуралаш бўлиб, пиёдаларнинг устига отда бостириб келди. Пиёдаларни энди ўз қўшинининг отлиқлари ҳам босиб, янчиб кета бошлади.

Очиқ қолган марказдан Бобир аскарларининг бир қисми аланга тилидай отилиб чиқди-ю, Шайбонийхон турган тепаликка ҳамла қилиб кела бошлади. Ўнг қанотдаги Темур Султон билан Жонибек Султоннинг йигитлари ҳали ҳам қуршовдан чиқолмас эди. Шайбонийхон томонга бостириб келаётган икки юздан кўпроқ отлиқнинг рафтори жуда ваҳимали эди. Кўпакбийнинг уч-тўрт юз йигити қирғин бўлаётган жойдан чиқиб, ёв отлиқларининг кетидан тушди. Аммо орадаги масофа анча узоқ, Кўпакбий етиб келгунча беригилар Шайбонийхонни бу-

тун ичкилари билан янчиб ўтйиши мумкин эди. Буни сезган хоннинг ичкилари саросимага тушиб қолишид. Ювошгина от миниб чиққан Мулла Абдураҳим:

— Ҳазрати имоми замон, вақт ўтди, бехатар жойга чекинайлик! — деди.

Шайбонийхоннинг рангида қон қолмаган. У ҳам бехатар жойга кетишни истарди. Аммо бу тепаликда у туғлар билан турибди. Агар пастгә тушиб кетса-ю, аскарлари ўгирилиб қараб, уни ва туғларни кўрмаса, «Енгили-миз!» — деб ўйлашади. Хоннинг чекиниши — енгилиш аломати бўлади.

Шунинг учун Шайбонийхон титраб-қақшаб:

— Улим бор, чекиниш йўқ! — деб қичқирди. Сўнг у юз қадамча нарида турган хос навкарларига буюорди:

— Чиқ ҳамманг! Ана у келаетган отлиқларнинг йўлини тўс!

Бу хос навкарлар хоннинг энг сўнгги таянчи ҳисобланар, улар одатда енгилиб қочиш керак бўлганда хонни қўриқлаб олиб кетиш учун сақланар эди. Хон буйруқ бергандан кейин улар ёпирйлиб келаётган нариги ёвнинг қаршисидан чиқиб, ёйлардан ўқ ота-ота уларга яқинлашдилар. Хос навкарлар наригиларга қараганда икки баробар оз бўлсалар ҳам дадил саваша бошладилар. Нарёқдан Кўпакбий ҳам уч-турт юз отлиғи билан етиб келди. Энди ёв илғорлари қуршовда қолди. Бир вақт шу қуршовни ўнтача отлиқ йигит ёриб чиқди. Худди кўпкари пайтида улоқ талашиб тўсатдан томошабин устига бостириб келиб қоладиган улоқчиларга ўхшаб, Шайбонийхон турган тепаликка чиқиб борди. Мулозимлардан бир нечаси «гур» этиб орқага қочди. Аммо Шайбонийхон ўз навкарларининг қўли баланд келаётганини кўриб турар эди. Қамонга ўқ ўрнатиб, тепани қиялаб қочиб ўтаётган ёв отлиқларига қараб отди. Ўқ ҳеч кимга тегмаган бўлса ҳам хон шахсан ўзи жангга қўл урганини кўрган навкарлар аввалгидан ҳам қаттиқроқ қичқиришиб, ёв илғорини битта қўймай қириб ташладилар.

Нарёқда ёв қўшинини ўраб, чулғаб, тўлғама усулини хон айтгандай амалга ошираётган сultonлар мингга яқин йигитлари билан Бобир турган тепаликка етиб бордилар. Пиёдалар Бобирга иш бермай қўйди. Яқинда Тошкентдан келиб қўшилган мўғул отлиқлари Бобирнинг жангни бой бераетганини сезишид-ю, ўлжасиз кетмаслик учун эгасиз қолган отларни жиловидан тутиб, етаклаб,

жанг майдонидан чиқиб кета бошладилар. Баъзи мӯгуллар эса ўзлари билан бир сафда жанг қилаётган андижонлик ва самарқандлик йигитларни эгарларидан ағдариб ташлаб, отларини ўлжа қилиб олиб қочишга тушдилар.

Бир вақт Шайбонийхон Бобирнинг ўн-ўн бешта ичкилари билан тепаликдан тушиб, дарё томонга қараб чекинаётганини кўриб қолди. Бу бир ҳийла эмасмикин, деб тикилиб қараса, Бобир тўлиб-тошиб оқаётган дарёга от солиб кирди. Қирғоқда қолган унинг бир неча юз навкари Бобир кетидан интилган ёвнинг йўлини девордай тўсив олди. Бобир Самарқандга қараб қочаётганига энди астойдил ишонган Шайбонийхон қўлларини осмонга чўзиб, ҳаяжон билан:

— Худоё ўзингга шукур, ўзингга шукур! — деди. Аммо ёви енгилиб қочаётгани энди унга озлик қиласидандай туюлди. Шу топда у ўз ғалабасининг яна бир дараҷа баланд бўлишини истарди. Шунинг учун ортда турган чопар томонга ўғирилди:

— Тез бориб шунқорларимга айт, Бобирнинг бошини кесиб келган одамга боши баробарлик олтин бераман!

Чопар энди отининг жиловини бўшатиб жойидан силтаниб қўзғалганда Шайбонийхон:

— Тўхта! — деди. У мағлуб бўлган Бобирни асир олиб, тавбасига таянтиреа, ғалабасининг шухрати яна бир дараҷа ошишини сезди: — Шунқорларимга яна бир буйруғимизни еткиз! Бобирни тирик тутиб келганига бўйи бараварлик олтин бераман! Ё тирик, ё улик, албатта, олиб келинглар!

Чопар тепаликдан от чоптириб тушиб кетаётганда Шайбонийхон кўзларининг нам эканини сезди. Ғалаба завқидан кўзига ёш келганини у энди пайқади-ю, кулимсираб, кафти билан кўз ёшини секин артиб қўйди.

8

Саратон ўтиб, асад ойи кирди, Самарқанд атрофидағи боғларда мевали дараҳтларнинг шохлари етилган ҳосилдан эгилиб, ерга салом бера бошлади. Шаҳар ичида ҳам мевали дараҳтлар, токлар жуда кўп, аммо улар ҳаммаси ҳозирданоқ шипшийдам бўлиб қолган. Ҳали сарғаймаган кўм-кўк барглар орасида бирорта олма, бирорта шафтоли, бирор шингил узум қолмаган. Беш

ойдан бери қамал азобини тортаётган шаҳар ҳалқи бор меваларини пишар-пишмас еб тутгатган. Қўргоннинг ҳамма дарвозалари ёпиқ, шаҳар атрофини Шайбонийхоннинг қўшини қуршаб ётибди. Ичкаридан ҳам ҳеч кимни чиқармайди, ташқаридан ёрдам бермоқчи бўлганларнинг ҳам йўлини тўсади.

Улуғбек мадрасасининг баланд томи устидаги текис саҳнга Бобирнинг оқ ўтови ўрнатилган бу ердан қўргон деворлари, атроф маҳаллалар, шаҳар дарвозалари яхши кўринади. Бобир гоҳ оч одамларнинг том бўғотларига ин қурган мусичаларни овлаб юрганини кўради. Қанотли қушлар силласи қуриган очларга тутқич бермайди. Шаҳар ячиди қушлар ейдиган дон-дун, овқат қолдиқлари ҳам топилмайди. Шунинг учун бу ердан қушлар ҳам ўзини олиб қочади. Гоҳ атроф кўчаларда бирор киши ит ёки мушук тутиб олса, очлар шуни ҳам талашиб, ғижиллашиб қолишади.

Мадрасанинг орқа томонида подшоҳнинг катта отхонаси бор. Илгари бу ерда саройнинг етмиш-саксонта оти боқилар эди. Ҳозир шулардан тўрттагинаси қолган. Бир қисми Сарипулда қўлдан кетди. Кўпчилиги сўйиб ейилди. Бироқ шу тўртта отга ҳам емиш топилмайди. Дон юзини кўрмаганларига бир ойдан ошди. Пичану бедалар аллақачон тугаган. Атрофдаги дараҳтларнинг баргларини ҳам юлиб, қоқиб, от ва туяларга едиришган. Ҳозир баргиз дараҳтлар ёзда ҳам худди қишидагидай ялан-ғочланиб, кўзга жуда хунук кўринади.

От-уловларга барг ҳам топилмай қолгандан кейин дараҳтларнинг қуриган ёғочларини рандалаб берадиган бўлишган.

Бобир отхона ҳовлисида ёғоч рандалаётган Тоҳирни кўрди. Сарипулда бу йигит Бобирнинг хос навкарлари орасида эди, дарёдан ўтишда ҳам, орқадан ҳамла қилган ёв илғорларининг ҳужумини қайтаришга ҳам жонбозлик кўрсатган эди. Бобир яқинда унинг уйланиш тарихини эшигиди. Шунча азоблар билан қайта топиб олган хотини очарчиликда нобуд бўлиб кетмасин деб, Робияни онаси Қутлуғ Нигор хонимга каниз қилиб қўйди.

Тоҳир майда қилиб рандалаган ёғочни сарғиши мўйловли Мамат сувга ивитиб юмшатмоқда эди. Шундай қилинмаса уни от еёлмас эди.

Сарипул жангига Мамат ҳам навкар бўлиб қатнашган эди. Ўша қирғиндан эсон-омон қайтган бу йигит

ўтган ҳафта қўргон ташқарисига мева ўғирлашга чиқиб, бир қулоғидан ажралиб қайтди.

Қўргон деворидан бўй чўзиб, ташқарига қараган очлар ташқи боғларда пишиб, шохларда тиралиб турган, ерларга тўқилиб ётган олмалар, ноклар, шафтолиларни кўриб чидаб туролмас эди. Кечаси эл ухлаганда Мамат уч-тўртта эски косиб ошналари билан қалъа девори тагидаги обмўридан ташқарига чиқади. Чоҳдан ҳам бир амаллаб ўтиб, пишган мевалардан тўйганича ейишади. Кейин қўлларида халта ва хуржунларни ҳам мёвага тўлдиришади, аммо қўргонга томон қайтаётганларида шафқатсиз Қўпакбийнинг йигитлари уларни тутиб олишади. Мамат ҳам ўзини косиб деб танитди. Агар «Бобирнинг навкариман» деса тирик қолмас эди. Қўпакбий «мева ўғирлагиси келганларга ибрат бўлсин», деб тутилганлардан учтасининг бурнини, иккитасини қулоғини кестиради-ю, қўйиб юборади. Бир сиқим мева учун қилинган бу ваҳшийлик туфайли Мамат энди ёзда ҳам телпагини кесик қулоғидан пастгача бостириб киядиган бўлган. Баъзida у ўзига-ўзи тасалли беради:

— Қулоқни-ку, жаширса бўлади, бурним кесилса нима қилас әдим?

Бобир кўчадан ўтаётib гоҳо бурни кесилган бечораларни ҳам кўриб қолади.

У бир вақтлар ўзи Самарқандни етти ой қамал қилиб ётганда одамларнинг бошига қанчалик оғир кулфатлар тушганини мана энди чинакам биляпти. Уша очарчиликда саҳҳофлик растасига борганларида ўғли кунжара еб шишиб ўлган, ўзи жинни бўлиб қолган бир кампир худони қарғаб, «Илоҳим ўзи ҳам шу кўйга тушсин!»— деганини Бобир энди қасоскор тақдирнинг ҳукмидек эслайди...

Камбағаллар кулбасидан бошланган очлик аста-секин навкарлар, беклар қароргоҳига ҳам, подшоҳ саройига ҳам ўрмалаб келди. Мана, ўн кундирки, Бобир нон юзини кўрмайди. Ун аллақачон тугаган. Унга олтин-кумӯш идишларда эрталаб бир сиқим майиз билан чой, кечқурун тuya гўшидан пиширилган бир коса шўрва ёки учтўрт туюр кабоб берадилар. Бобир олтинлари ялтираган шоҳона идиш-товоқларга термилиб қарайди-ю, ҳозир шуларнинг ҳаммасидан бир парча нонни афзал кўради. Лекин нон олtinga ҳам топилмайди.

Ойиша бегимнинг олти ойлик эмизикли қизаси би-

ғиллаб йиғлайди. Чуңки озиб, ғадордан кетиб қолган Ойиша бегимнинг сийнасидан сут келмайди. Яқинда бола кўрган бошқа бир онани топиб, Фахринисони беш-үн кун эмиздирган эдилар, фалокат юз берди. У она вабога учраган хонадондан экан. Даҳшатли касаллик Фахрини-сога юқди-ю, икки кун ичида бола мумдай эриб жон берди.

Бобир кафанга ўралган гўдакни янги қазилган қабр олдигача кўтариб борар экан, унинг буришган юзчасига юзини босиб йиғлаб юборди: «Майли, шу вабо менга ҳам юқсину бу азоблардан биратўла халос бўлай!— деган аламли ўй билан гўдакнинг совуқ лабларидан ўпди.

Ғалаба кунлари дунёга келиб Фахринисо номини олган қизчани қабрга қўйиб, устига тупроқ тортгандаридан Бобир бир лаҳза ўзини унинг ўрнида кўрди, ҳали тирик бўлса ҳам ҳаётининг бир бўлаги, аввалги зафарлари-ю, қувончлари билан бирга умрбод тупроқ тагида қолганини бутун вужуди билан ҳис қилди.

Ичкарида Бобир кулфат чекиб ғам-ғуссага ботган сари ташқарида унинг душманлари тантана қилишмоқда эди. Бобир Ҳиротдаги амакиси Ҳусайн Бойқародан, Тошкентдаги тоғаси Маҳмудхондан беш ой давомида ёрдам кутди, келмади. Энди келмаслиги аниқ. Шуни пайқаган Шайбонийхон ҳар куни кечаси дарвозалар ташқарисида нақора чалдиради, карнай-сурнайлар билан шаҳар аҳлини уйғотади. Сўнг хон жарчилари қўрғон ташқарисидаги кўтармаларга чиқиб, шаҳардагиларни хон томонига ўтишга чорлайди, оч одамларга турли нознеъматлар ваъда қиласди. Бобир энди урушни бой берганини сезган бек ва навкарлар деворлардан ошиб тушиб, сув мўриларидан ўтиб, қамал балосидан қочади.

Бир кун кечаси Бобирни қўриқлаб юрадиган қўрчибеги ҳам қалъадан яширинча чиқиб қочди. Хос қўриқчилар орасида Тоҳир бор эди. Эртаси куни кечаси Бобир уни ўз ҳузурига чақириб олди.

Тоҳир озиб кетганидан елкалари пуччайиб қолган, кўзлари ичига ўпирилиб тушган. Юзидаги чандиғи эса бўртиб, гўё аввалгидан хийла катта бўлиб кетган.

— Тоҳирбек,— деди Бобир,— Гўри Амир мақбарасининг ҳошиясига араб тилида бир ҳикмат битилмишdir. Бу ҳикматда «Жаҳон сендан юз ўғирмасдан олдин сен жаҳондан кўнгил уза билгин» дейилмишdir. Мен энди жаҳондан кўнгил узмоқчимен. Вабо мени олиб кетса

балки тез қутулар эдим. Лекин мени вабо ҳам четлаб ўтди...

— Худо сақласин, амирзодам! Бизнинг сுянган тоғимиз ўзингизсиз!

— Суянган тоғингиз ҳозир ер билан яксон бўлмиши-
дир, Тоҳирбек! Кеча бир байт битмишмен:

«Эй кўнгул, гар Бобир ул оламни истар, қилма айб,
Тангри учун де, бу оламнинг сафоси қолдиму?!

Тоҳир шеърдан таъсирланиб:

— Рост, ҳозирги қунларимида сафо қолмади, амир-
зодам!— деди.— Лекин ойнинг ўн беши қоронги бўлса,
ўн беши ёруғ. Шукур, ҳали танда жон, белда шамши-
римиз бор!

Бобир ўйланиб турди-ю:

— Энди сўнгги илинж ёғий илкига тирик тушмас-
лик!— деди.— Бор кучларни тўплаб, қулай бир пайтда
қалъадан чиқайлигу ёғий ҳалқасига ҳамла қилайлик!
Кунимиз битмаган бўлса ёриб ўтурмиз, битган бўлса қи-
лич билан жон берурмиз!..

— Худо хоҳласа ёриб ўтурмиз, амирзодам!

— Бу сирни ҳозирча фақат Қосимбек билур, сиз ҳам
сир сақланг, тайёрлик кўринг!

— Жоним билан!

Тоҳир ўша куни кечаси Қосимбекка учраши. Икков-
лари қалъа деворининг хокрезлари орқали ташқарини
кузатиб, ёвнинг асосий кучлари Оҳанин, Феруза ва Чор-
раҳа дарвозалари томонда жойлашганини, Шайхзода
дарвозасининг атрофларида эса ёв ҳалқаси заифроқ экан-
ни аниқладилар. Навкарлар ва отлиқларнинг энг ба-
қувватларини танлаб, уларни ҳамлага тайёрлай бошла-
дилар.

Бобир Бўстонсаройда хонайи хосда китобларни ва қо-
ғозларини кўздан кечириб, уларнинг энг кераклиларини
олиб кетмоқчи бўлиб саралаётганда эшикдан Қутлуғ
Нигор хоним, Эсон Давлат бегим ва Қосимбек кириб
келишди. Важоҳатларидан фавқулодда бир гап бўлган.

* * *

— Амирзодам,— деб Бобирнинг бувиси, сўнгги йил-
ларда анча букчайиб қолган Эсон Давлат бегим гап

бошлади: — Шайбонийхон сулҳ тақлиф қилиб одам юбормиш!

Сулҳ сўзи Бобирнинг қулоғига нажот оҳангидаи эши-тилди. Аммо нажотни ҳеч қаҷон Шайбонийхондан қутмаганлиги учун қулоқларига ишонмай, кўзларини бувиси билан онасига тикди. Қутлуғ Нигор хоним негадир қаттиқ изтиробга тушган. Эсон Давлат бегимнинг қўлида зарҳал ҳошияли қофоз. Кампир алланарсадан хижолат чеккандай бўлиб:

— Хоннинг номаси,— деди-да, қўлидаги қофозга истар-истамас қараб қўйди.

Хоннинг номаси нёга энг аввал бувисининг қўлига келиб тушганидан Бобирнинг таажжуби ошди:

— Номани ким келтирди?

— Нуфузли бир дарвиш. Нақшбандийлардан. Раҳматлик Хўжа Яҳёга қўл берган мўйсафид экан.

Бобир онасига қаради:

— Сизга келтириб бердими?

— Йўқ,— деб Қутлуғ Нигор хоним маъюс бош чайқади.

Эсон Давлат бегим номани Бобирга узатар экан, уялинкираб қўшиб қўйди:

— Аслида бу нома Хонзода бегимнинг номларига келмишdir.

— Ажабо!— деб Бобир хатни жирканиброқ қўлига олди.

— Амирзодам,— деди бувиси,— сизга айтишга ҳам уялурмен... Шайбонийхон Хонзода бегимнинг таърифларини эшитиб ғойибона дард чекармиш. Номасида бир пора шеър ҳам бор.

Бобир Шайбонийхоннинг бу йил эллик ёшга кирганини, ўғилларини аллақачон уйлантириб, неваралик ҳам бўлганини билар эди. Заҳарханда билан номани очар экан, энг аввал шеърий сатрларга кўзи тушди:

«Сифатингни эшитиб зор ўлдим,
Ишқинг илкига гирифтор ўлдим».

Бобирнинг ғаши келиб, номани гилам устига отди:

— Бу хон бултур Султон Али мирзонинг онаси Зуҳра бегимга ғойибона ошиқ бўлиб нома юборганини нечун унудиларингиз? Наҳотки, бу номага ишониб бўлса?!

Қутлуғ Нигор хоним уҳ тортди. Эсон Давлат бегим эса иложи борича совуққонлик билан гапира бошлади:

— Амирзодам, бошқа вақт бўлса душманингизнинг бу номасини ўқишга ҳам ҳазар қилур эдик. Лекин ҳозир жонимиз қил устида. Мен-ку, ёшимни яшаб, ошимни ошаганмен, беш кун олдинми, кейинми, бари-бир кетурмен. Лекин сиз фарзандимнинг ёлғиз ўғли, кўзимизнинг оқу қораси...

— Мен ҳам тақдиримда борини кўурмэн. Насиб қиласа, ёв ҳалқасини ёриб чиқурмиз!

Бобирнинг қалтис қарорини Қутлуғ Нигор хоним Қосимбекдан эшишган экан шекилли, таҳлика тўла товуш билан гапирди:

— Тақдир деб ўзингизни ўтга ташламанг, амирзодам! Бизни ҳам ўйланг! Сиз ёв тифига ўзингизни урсангиз, биз не қилурмиз? Умр йўлдошингиз Ойиша бегим не қилур?

Бобир бундай хатарли жангга аёлларни олиб чиқиб бўлмаслигини энди ўйлади-ю, онасининг сўзларига жавоб тополмай қолди. Бир лаҳзалик сукутдан сўнг Эсон Давлат Бегим гилам устида ётган номага ишора қилиб, истеҳзоли кулимсиради:

— Бунинг келганига икки кун бўлди. Мени билурсиз, амирзодам. Кўп балоларни кўриб пишган тадбиркор кампирмен. Нома келтирган дарвишни гапга солдим. Шубҳаларимизни айтдим. Дарвиш қасам ичди. «Хон астойдил сулҳ тузмоқчи», деб бир талай далил келтирди. Барibir ишонмадим. «Бўлмаса вакил юборинг, хон ўз ниятини қўлида қуръон билан тасдиқласин!»— деди. Биз буни сизга айтишдан олдин ўзимиз тафтиш қилмоқчи бўлдик. Раҳматлик Ҳўжа Яҳёга қўл берган ҳалолу покиза бир мўйсафид бор эди. Ушани дарвиш билан бирга хон ўрдусига чиқардик. Бугун эрталаб қайтиб келди. Хон барча сultonларининг олдида қўлига қуръон олиб айтибди: «Шунча қон тўклигани етар, энди Ҳонзода бегим рози бўлсинглар, иниларига, оналарига, бошқа одамларига тегмаймиз, қалъадан бехавотир чиқиб кетсунлар» дебди. Катта тўй-тамошо билан уйланмоқчи эмиш! Бир қанча мўйсафидлар буни эшишиб биздан илтимос қилдилар. Начора?

Бобир чаккаларини икки қўли билан қисиб, бир лаҳза жим турди-ю, сўнг бирдан алами келиб гапирди.

— Гулдай Хонзода бегим неваралик хоннинг ҳарамида... Йўқ, йўқ! Бу инсофисизлик!

— Амирзодам,— деб энди Қосимбек гапга аралашди.— Шу кетишда Шайбонийхон Самарқандни барibir олур. Ўшанда зўрлик билан бўлса ҳам ўз ниятига етур.

Бобир онасидан ҳимоя кутиб, Қутлуғ Нигор хонимга юзланди:

— Онажон, Хонзода бегим ҳам сизнинг суюкли фарзандингиз-ку. Шундай жигарбандимизни қайси виждон билан ўтга солурмиз?

Ўзи зўрға турган Қутлуғ Нигор хоним ўғлининг бу гапидан куюниб йиғлай бошлади:

— Худо менинг бощимга бу қора кунларни солгунча жонимни олса бўлмасмиди?! Хонзода бегим — менинг тўнғичим! Ёлғизлигимни билдирамай юрган сирдошим, меҳрибоним! Мен ундан қандоқ айрилгаймен, э, парвардигор? Мен шундай қизимни ёғий панжасига қандай топширумэн?

Эсон Давлат бегим қизининг елкасидан силаб, унинг изтиробини босишга тиришар экан:

— Ўзингизни босинг, болам!— деди.— Сиздан кўра қизингиз ақллироқ. Хонзода бегим ҳамма нарсани тушуни. Мушкилотларга фаҳми етди. Йиғлаб-сиқтаб, ахир кўнди.

Бобир ҳанг-манг бўлиб Қосимбекка юзланди:

— Наҳотки шу гап рост? Хонзода бегим рози бўлдиларми?

— Ҳа, амирзодам!

— Ишонмаймен!— деди Бобир. Сўнг кафтини-кафтига асабий уриб савдарбошини чақирди-ю:— Хонзода бегимни чорланг!— деб буюрди. Кейин онаси, бувиси ва Қосимбекка қаратада деди:— Мени маъзур тутингиз, бегим билан яккама-якка сўзлашмоқчимен.

Учовлари индамай чиқиб кетишиди. Анчадан кейин яшил қабо кийгаи Хонзода бегим эшикдан мотамсаро бир алфозда секин кириб келди.

Бобир уни қаршисига ўтқазиб, бир лаҳза юзига тикилиб турди. Илгариги гулгун ёноқлар энди сарғайиб ичига ботган. Лаблар сўлғин. Фақат йирик-йирик кўзларда қандайдир қатъият аломати бор.

— Бегим, сиз... Шайбонийхон таклифига ризолик берган эмишсиз. Шу ростми?

— Ризо бўлмай не иложим бор?

— Менинг мағлубиятим сизни иложисиз қолдиргани рост. Лекин инингиз ҳали тирик. Мен асир тушмоқчи эмасмен. Бир ўлим бўлса, ҳамма вақт бор. Ажал етмаган бўлса, сизларни олиб чиқиб кетурмиз. Куним битган бўлса, илкимда қилич билан жон берурмен. Ана ундан кейин ризолик берсангиз майли. Унда ҳеч ким «ўзи омон қолиб, эгачисини қурбон қилди» деёлмас. Менга бундай маломатдан ўлим афзал. Ризо бўлманг!

Хонзода бегимнинг кўзига ёш қуюлиб келди. У Бобирнинг ёв ҳалқасини жанг билан ёриб чиқиб кетолмаслигини биларди. Бобир бир ўлимни астойдил бўйнига олиб шундай деганини сезарди. У Бобирни мана шу мардлиги ва довюраклиги учун ҳам жонидан ортиқ кўрар, ўзини ёв қўлига тутқазиб, укасини нақд ўлимдан олиб қолишини истарди.

Лекин у ўзининг бу ниятини Бобирдан яширишга мажбур эди. Чунки Бобир, ҳозир ўзи айтгандай, опасини қурбон қилиб қутулиб кетиш маломатидан ўлимни афзал кўрарди. Агар у Хонзода бегимнинг асл ниятини билиб қолса, ҳар қандай йўл билан бўлса ҳам опасини ниятидан қайтаради. Ундан кейин нажот йўли бутунлай бекилади!

— Бобиржон, сиз мени деб бевақт ўлимни бўйнингизга олманг. Мен сизнинг улуғ истиқболингизга ишона мен. Сиздек нодир истеъодлар дунёга кам келишини бошқалар билмаса ҳам мен билурмен. Ўзингизни эҳтиёт қилинг! Тақдирингизни толеи паст эгачингизнинг тақдир билан тенглаштирунг!

— Нечун бундай дейсиз? Ҳаммамиз ҳам бу ўткинчи дунёга меҳмонмиз! Сиз билан мен бир онанинг фарзандимиз!

— Лекин мен қиз туғилганмен, фарқимиз шунда! Ёшим йигирма бешга кирди-ю, ҳамон ёлғизман. Мен кўнгил қўйган одамни тақдир менга раво кўрмади! Омадингиз келиб, Шайбонийхонни енгганингизда, балки менинг ҳам бахтим очилармиди? Йўқ, ҳамма умидларим тарихнинг ғилдираги тагида янчилди! Қачонгача даргоҳингизда қари қиз бўлиб юргаймен, амирзодам? Шунчалик асррадиларингиз, бўлди, энди иззатимни билишим керак!

— Наҳотки, сиз неваралик чолни ўзингизга муносиб кўрсангиз?

— Муносибимни топишдан умидим узилган! Энди кексами, ёшми менга барибир!

— Бир вақтлар Ушда сиз менга нелар деган эдингиз? «Қўнглингизга ишонинг», демаган эдингизми? Наҳотки, сизнинг кўнглингиз шу бераҳм хонга мойил бўлса? Бултур бу одам Зуҳра бегимга қанчалик ноинсофлик қилганини бир эсланг. Наҳотки, сиз шундай одам туфайли биздан ажralиб кетмоқчи бўлсангиз?!

Хонзода бегим ўкириб йиғлаб юборди:

— Не қиласи?! Бошқа нажот йўқ! Йўқ!!

— Бир онадан туғилғанмиз, энди тақдиримизда неки бўлса бирга кўурмиз! Биздан ажралманг! Тунда ёв ҳалқасига ҳамла қилурмиз! Тайёр туринг!

Хонзода бегим ҳам яна эркакча кийиниб, укаси билан жангга киришни бутун вужуди билан истарди. Ховир унга ҳам душман асоратидан кўра қўлида қурол билан ўлиш афзал туюларди. Хонзода бегим тўсатдан шу гуйғуга берилиб:

— Қачон?— деб сўради.

Бобир овозини пасайтириб:

— Шу бугун кечаси!— деди.

Хонзода бегим бугун кечаси суюкли укасининг ёв қуршовида ҳалок бўлиши муқаррарлигини гўё олдиндан сезди-ю, сесканиб ўрнидан турди:

— Бугун эмас! Йўқ, йўқ!

Бобир ҳам ўрнидан турди:

— Бегим, менинг иниларча айтган сўзим инобатга ўтмаса, буни подшоҳлик фармони деб билинг!

Хонзода бегим индамай Бобирга яқинлашди. Юзини укасининг кўкрагига босиб, елкалари силкина-силкина ўртаниб йиғлади. Шу тарзда у Бобир билан сўэсиз видолашди-ю, кейин гўё унинг фармонига бўйсунгандай бош эгиб, чиқиб кетди.

* * *

Ярим тунда Бобир, Қосимбек, Кутлуғ Нигор хоним, Ойиш бегим, Тоҳир хотини Робия билан бирга, яна ўтиз-қирқта бек ва навкарлар Шайхзода дарвозасига йиғилдилар. Бироқ уларнинг орасида Хонзода бегим йўқ.

Бобир Хонзода бегимни бирга олиб чиқишини онаемга топширган эди.

Кутлұғ Нигор хоним йиғлайвериб овозини олдириб қўйган. Унинг ҳазин товуш билан берган узуқ-юлуқ изоҳидан Бобир шуни билдики, Хонзода бегим бувиси билан бирга Чоррача дарвозасига қараб кетган.

Шайбонийхоннинг қароргоҳи ўша томонда. Наҳотки Хонзода бегим ўша ниятидан қайтмаган?!

Бобир орқароқда турган навкарларига ўгирилди-ю, кўзи Тоҳирга тушди:

— Тез Чоррача дарвозасига боринг! Хонзода бегимни топиб, менинг буйруғимни етказинг! Дарҳол бу ёқса етиб келсинлар! Бегим келмагунларича биз қўзғолмаймиз! Шуни бориб айтинг!

— Амирзодам!..— деб Қосимбек Бобирга эътиroz қилмоқчи бўлган эди. Бобир унга қулоқ солмай яна Тоҳирга буюрди:

— Тезроқ боринг!

Шиддат билан чопаётган отнинг тақалари тошларга қарсиллаб урилиб, кўчаларнинг тунги сукутини бузиб ўтди. Тоҳир Чоррача дарвозасига етиб боргандан Хонзода бегим тушган маҳофа машъал кўтарган отлиқлар қуршовида қўрғондан чиқиб кетмоқда эди.

Кўпдан бери давом этаётган қамал ёв қўшинини ҳам толиқтирган, ҳамма уруш тугашини сабрсизлик билан кутар, агар Бобирнинг опаси хоннинг шартини қабул қилса сулҳ тузилишини кўп одам билар эди. Энди шаҳардан машъалалар ёқиб, дарвозани очиб чиққан шоҳона маҳофа ва унинг ичидаги ўтирган Хонзода бегим хон қўшинига тинчлик аломати бўлиб кўринди-ю, ҳаммани уйғотиб юборди. Сулҳ келтираётган малика шарафига нақоралар ва карнай-сурнайлар чалинди.

Маҳофа атрофига мўри-малаҳдай қўшин тўпланиб бораётганини Тоҳир очиқ дарвоза орқали кўрди-ю, отини тез орқага бурди. Шайхзода дарвозаси олдига учиб бориб, ҳамма кўрганларини Бобирга айтиб берди.

Шодликка тўлиб янграётган нақора садолари, карнайнинг «ваҳ-ваҳа-ҳу-у»си, сурнай навоси бу ерларга ҳам эшитилмоқда эди. Бобирнинг назарида, Хонзода бегим қари қиз бўлишдан қўрқиб ва укаси даргоҳида тортган кулфатларидан безиб, Шайбонийхон ҳузурига роҳат-фарофат излаб кетган эди.

— Дунёда садоқат йўқ экан! — деди у алам билан ва отининг жиловини силтади: — Дарвозани очинг!

Дарвоза секин очилди. Чоҳ кўприги туширилди. Олти ойдан бери қўрғондан чиқмаган бир даста отлиғу пиёда одамлар қоронги тунда юракларини ҳовучлаб, чоҳ кўпригидан ўтдилар. Атроф таҳликага тўла. Гўё ҳар дараҳт ортида бир ўлим кутиб тўрибди. Йўлларда ёв жангдовуллари учраб қолишидан хавотирланиб, йўлсиз жойлардан юрдилар, чуқур ариқлардан ўтдилар. Лекин бирор жойда ёвга дуч келмадилар.

Самарқанд қўрғонига ўралиб, унинг олти дарвозасини олти бошли аждарҳодай қўриқлаб ётган ёв қўшинининг бутун диққат-эътибори хон қароргоҳидан келәётган карнай-сурнай товушига ва қалъадан гўё сулҳ тимсоли бўлиб чиқсан маликага жалб бўлган эди. Хонзода бегим хоннинг шартини қабул қилгандан сўнг Бобирни таъқиб этмаслик ҳақида бутун қўшинга фармон берилган эди.

Хонзода бегим ҳамма балоларга ўзини тутиб бериб, укасини ёв қуршовидан халос қилганини Бобир билмаса ҳам Қутлуғ Нигор хоним яхши билар эди. Узоқдаги нақора ва карнай-сурнайлар тўй шодиёнасини эслатувчи қувноқ куйлар чалган сари Қутлуғ Нигор хонининг юраги қон бўлиб, кўзларидан дув-дув ёш тўкиларди.

ТОШКЕНТ. ҮРАТЕПА. ИСФАРА. Кўчки босган булок

1

Тошкент... Үн беш-йигирма йилдан бери урушнинг совуқ нафаси тегмаган бу шаҳар Самарқандга нисбатан осуда ҳаёт кечирмоқда эди. Тошкент қўрғонининг ҳар ўн икки дарвазасидан одамлар бемалол кириб-чиқиб турибди. Бўзсув ва Салор аригининг бўйларидаги мевали дараҳтлар куз ёмғирида ювинган. Ўрик, олча барғлари ўз бутоқлари билан видолашиб олдидан шафақдай қизил тус олган. Узоқдан қўриниб турган Чотқол тоғларига қор тушган.

Қамал даҳшатларини бошдан кечириб келаётган Бобирга Тошкентнинг тўкин-сочин кузи, бағри кенглиги, тоғдан эсган сарин шабадаси маъсуд ўсмирлик даврини эслатди. У ўн олти яшарлигига келганида Хадрадан пастдаги Ҳазрати Уккоша булогидан сув ичган,

Үқчи маҳалласида Тошкентнинг жаҳонга машҳур ўқ-
ёйларини ясаган усталарга олтин безакли «Қамони Шо-
ший» буюртма берган, Шайҳантаҳурга кўмилган бобоси
Юнусхоннинг қабрини зиёрат қилган эди.

Ҳозир у элликтacha бек ва навкари билан (қолганла-
ри уни Ўратепада кутиб турадиган бўлишди) Бешоғоч
дарвозасидан кириб, Қоратош маҳалласи орқали хон
саройи томон борар экан, ёнидаги Қосимбек бирдан бе-
зовта бўлди:

— Нечун доруға пешваз чиқмади?

Бобир Тошкент хонининг жияни эди, ўтган гал кел-
ганларида шаҳар доруғаси уларни қўрғондан ташқари-
да иззат-икром билан кутиб олиб, саройга бошлиб бор-
ган эди.

— Бу гал биз хонумондин айрилиб, мағлуб бўлиб
келмоқдамиз, жаноб Қосимбек! — деди Бобир маъюс ку-
лимсираб.— Шунинг учун ортиқча эҳтиром кутманг.

Чиндан ҳам Маҳмудхон саройида Бобирни жуда со-
вуқ қарши олишди. Унинг навкарларини ҳатто аркка
киргизишмади. Бобир Қосимбекнинг иззат-нафсга бориб
асабийлашаётганини кўрди-ю:

— Сиз билан биз Самарқандда нақд ўлимни зимма-
мизга олган эдик, ҳатто ўлимдан нажот излаган эдик! —
деди.— Ўшал даҳшатларнинг олдида бу майда беҳур-
матликлар ҳеч гап эмас. Кеча Ўратепада бир байт бит-
дим, айтами?

— Бажонидил!

— Эшитинг:

Давлат учун кўнгулни зор этма,
Иззат учун ўзингни хор этма!

— Ҳақ гапни битибсиз, амирзодам. Бу бевафо дунё
ғам емакка арзимайдир!

Шу билан икковлари бир-бирларига сал тасалли
берган бўлдилару Бобир хонининг қабулхонасига қараб
кетди.

Қўлига олтин дастали ҳасса ушлаган, зарбоф тўн
кийган шифовул Маҳмудхоннинг Шайбонийхон элчиси
билан банд эканини айтганда Бобирнинг қалбида бир-
дан ноҳуш туйғулар қўзғалди. У қамалдан чиққандан
сўнг икки ойча Ўратепада холасиникида турган, Шайбо-
нийхон Маҳмудхонга элчи юбориб, Мовароуннаҳри бў-

либ олиш ҳақида битим тузишга интилаётганини ўша ерда эшигтан эди. Мишмишларга қараганда, Шайбонийхон Фарғона водийсини Тошкент хонига бериб, Уратепани ўзи ишғол қилмоқчи эмиш. Агар шу гап рост чиқса, Бобирнинг бу атрофда жон сақлайдиган жойи қолмайди, Мовароуннаҳдан бош олиб чиқиб кетиш керак бўлади.

Унинг бугун Тошкентга келишидан мақсади — тоғасини Шайбонийхоннинг макру ҳийлаларидин огоҳ қилиш ва уни босқинчиларга қарши мудофаага чорлаш...

Бобир қабулхонада анча вақт мунтазир тургандан кейин шифовул чиқиб, уни хоннинг ҳузурига бошлаб кирди. Тўрда қимматбаҳо тошлар билан безатилган шатранж доналари кўринди. Шайбонийхоннинг элчиси йўғон гавдали, баҳайбат Жонибек Султон хонга таъзим қилиб турибди. Сарғиши юзли, хушбичим Маҳмудхон тилларанг мўйловини диккайтириб мамнун қулимсираётганига қараганда, ҳозир Жонибек Султонни шатранжда ютган эди. Тўрт йилдан бери жиянини кўрмаган тоғаси шунча узоқдан бошига кулфат тушиб келган Бобирни куттириб қўйиб, ўзи Шайбонийхоннинг элчиси билан шатранж ўйнаб ўтирганида қандайдир яширин маъно бор эди. Маҳмудхон мағлуб бўлган жиянидан кўра ғолиб Шайбонийхонни ортиқроқ ҳурмат қилишини элчига сездириб қўймоқда эди.

Буни пайқаган Бобир Жонибек Султонга атайлаб салом бермади, унга худди деворга қарагандай бепарво· бир назар ташлади-да, тоғасига юзланди:

— Хон ҳазратлари, мен сизни ёғийларингизнинг макру ҳийлаларидин огоҳ қилгали келдим!

У Жонибек Султоннинг чиқиб кетишини бир лаҳза сукут қилди. Орага тушган ноқулайликни тарқатиш учун Маҳмудхон элчига маҳсус эҳтиром билдириб, уни эшик оғзигача кузатиб қўйди. Сўнг Бобирни зарбоф кўрпача устига таклиф қилиб, ўнг ёнига ўтқазди:

— Хуш келибсиз, мирзом! Кўп оташин бўлманг. Бу кунлар ҳам ўтар. Сиз ҳали ёшсиз, ўн гулингиздан бири ҳам очилган эмасдур.

— Менинг кўп гулларим очилмай ҳазон бўлди, ҳазратим. Менинг бир қанотим Аҳмад Таңбалнинг оловида куйди-ю, иккинчи қанотимни Шайбонийхон куйдир-

ди.. Илоҳим энди сиз шу машъум оловларнинг орасида қолмайди!

Маҳмудхон бу гапни сал бошқача тушунди:

— Тӯғри, бирдан икки тараф билан ёйиллашиш яхши эмас. Шунинг учун биз Танбал әлчисини эмас, Шайбонийхон әлчисини қабул қилдик.

— Аммо сиз учун Танбалдан кўра Шайбонийхон юз чандон хатарлироқ, ҳазратим! Чунки Танбалга Фарғона водийси етиб ортадир. Аммо Шайбонийхон бутун Мовароунаҳрни эгалламоқчи. Хурросон билан Эронни ҳам олмоқчи. Эътибор берган бўлсангиз, унинг унвони «Халифаи раҳмон, Искандар соний!» Шайбонийхон Искандар Зулқарнайндек барча мамлакатларни фатҳ этмоқчи, яна бу билан қаноатланмай, бутун мусулмон оламининг, диний раҳбари — халифаи замон бўлмоқчи!

Шайбонийхоннинг нияти унинг унвонидан ҳам кўриниб туришига Маҳмудхон илгари унча эътибор бермаган эди. Ҳозир Бобирнинг сўзлари таъсирида бир лаҳза ўйлануб олди, сўнг бояги хон әлчисининг сўзларини эслади:

— Назаримда, Шайбонийхон бизга қарши юриш қўймоқчи эмас. Элчисининг айтишича, улар Ҳисорни, сўнг Хуросон билан Эронни эгаллашмоқчи.

— Хон ҳазратларц, бу ҳаммаси сизни гафлатда қолдириш учун келтирилган ёлғон далиллардир! Тарихни бир эсланг: қайси фотиҳ аввал Тошкент билан Фарғонани олмай туриб, Хуросону Эронга юриш қилган? Чингизхонми? Йўқ! Амир Темурми? Йўқ! Ахир бутун Мовароунаҳрни, Самарқанду Тошкенту Фарғонани эгалламасдан, уларнинг кучига таянмасдан туриб, Хуросону Эронга юриш қилиш аҳмоқлик бўлур-ку! Буни Шайбонийхон билмагай дейсизми?

Шайбонийхоннинг Тошкентга ҳужум қилиш эҳтимоли Маҳмудхонни анчадан бери таҳликага солиб келади. Шунинг учун у Иссиққўлдан нарида ҳукмронлик қилиб юрган укаси Олачаҳонни ўн беш минг қўшини билан ёрдамга чақирган. Бу қўшин ҳозир йўлда, бирор ой ичидаги Тошкентга етиб келади. Шайбонийхоннинг одамларни бундан аллақачон хабар топган бўлишлари керакки. Тошкентга элчи юбориб, муроса йўлини излаб қолишади. Маҳмудхон Шайбонийхоннинг саркардалиқ қобилиятини яхши билади ва у билан урушишни истамайди. Жияни Бобир эса уруш бўлишини жуда нақд қилиб қўй-

ялти. Нега? Маҳмудхон жиянининг ниятини аниқроқ билмоқчи бўлди:

— Хўш, мирзом, Шайбонийхоннинг урушиши аниқ бўлса, биз не қилмоғимиз керак?

— Шайбонийхонга қарши турган барча кучлар тўпланиб иттифоқ тузмоғимиз лозим!

Маҳмудхон қўнғир кўзларини Бобирга синовчан назар билан тикди.

— Сиз билан иттифоқ тузайликми, мирзам?

— Фақат биз эмас, кичик хон додам Олачаҳон ҳазратлари борлар-ку.

— Ҳа, Олачаҳоннинг қўшини билан менинг қўшиним бирлашса ўттиз минг бўлур. Қейин биз сизнинг қўшинингиз билан бирлашурмиз — шунда қанча бўлгай?

Бобирнинг икки юзу элликтагина одами қолган эди. Буни яхши биладиган Маҳмудхон Бобирни кулги қилмоқчи бўлиб шу саволни бермоқда эди. Чиндан ҳам ўттиз минг қўшини бор хонлар бир даста аскари қолган, хонумонидан айрилган Бобир билан иттифоқ тузиб ўти-рармиди? Бобир Маҳмудхонни ўзига яқин олиб, шу гапни айтганидан изза бўлди.

— Ҳазратим, ўғай тақдир ҳозир мени шу кўйга солди. Аммо биз мағлубият заҳрини ичишдан олдин ғалаба шаробини ҳам татиб кўрган эдик. Шунинг учун сизга кўнглимни очиб гапиришга журъат этдим!

— Очиқ гапирганингиз маъқул, албатта. Қалай, илож бўлса Шайбонийхон билан яна олишмоқчимисиз?

Маҳмудхоннинг саволида: «Йиқилган курашга тўймайди, чамаси-да!» — деган кинояли маъно бор эди.

— Олишишга менинг ҳаққим бор, — деди Бобир. — Чунки бирда йиқилган бўлсан, бирда йиқитганмен!

— Бу — рост, рост! — деди Маҳмудхон. Шу топда унинг кўнглидан «агар оға-ини икковимизнинг ўттиз минг қўшинимизга Бобирни саркарда қилиб қўйсак, жиянимиз Шайбонийхон билан уришиб, анча тажриба орттирган, ўзи ҳам довюрак йигит, енгиб чиқиши мумкин» деган фикр кечди.

Маҳмудхоннинг ўзида саркардалик истеъоди йўқ эди. Агар Бобир унинг қўшинига бош бўлиб Шайбонийхонни енгса, кейин одамлар Маҳмудхонни эмас, Бобирни ва унинг истеъодини улуғлайди. Ундан сўнг Бобир Тошкентни ҳам тоғасидан тортиб олишга ҳақли бўлади.

Чунки азалдан маълум: қўшин кимнинг қўлида бўлса, ёқимият ўшанини.

Маҳмудхон шуни ўйлади-ю, ўз қўшинига Бобирни саркарда қилиш фикридан дарҳол қайтди. Гапни бошқа ёққа буриб:

— Шўрлик Хонзода бегим... не кўйларга тушди-а?— деди.— Шайбонийхон маккор тулки-да. Хонзода бегим она томондан бизга авлод, ота томондан темурийларга мансуб. Бегимни олса обрўси ошишини билган. Самарқандда дабдабали тўй бериб уйланганимиш.

Маҳмудхоннинг гап авзойидан, Бобир гўё опасини қурбон қилиб, ўзи қутулиб чиққан эди. Бобир воқеани бошқача бўлганини айта бошлаганда, Маҳмудхон ишонгиси келмай бош чайқади:

— Жуда уят бўлди-да, мирзам, ҳаммамиз маломатга қолдик!

— Даврон менинг бошимга тож кийдирган эди,— деди Бобир яна оташин бўлиб.— Энди шу тож ўрнида таъна тоши!.. Ҳаммасидан тўйдим, хон ҳазратлари! Энди борса келмас бўлиб бош олиб кетишдан бошқа иложим қолмади!

— Ундоқ деманг, мирзам! Минбаъд сиз бизнинг азиз меҳмонимизсиз. Эгачим Қутлуғ Нигор хоним сизга мунтазир эдилар. Заифангиз Ойиша бегим ҳам шу ердалар. Бориб улар билан кўришинг, дам олинг. Эртага Шайбонийхон элчиси шарафига қабул маросими үтказмоқчимиз. Сиз ҳам иштирок этинг!

Бобир хон ҳузуридан чиқар экан, ҳамма гапи бекор кетганини, Маҳмудхон Шайбонийхондан таҳликага тушиб қолганини ва у билан дадил олишишга журъат этолмай, хушомад йўлига ўтганини энди аниқ сезди. Арк ҳовлисидан ўтиб бораётганда Тошкентдаги осудалик ҳозир унга довул олдидан бўладиган хатарли сукунатдек туюлди. Яқинлашиб келаётган довулдан онаси ва хотинини олиб чиқиб кетиш нияти билан аркнинг тўридаги аёллар турадиган ички ҳовлиларга қараб кетди.

* * *

Ойиша бегим Тошкентга бундан икки ой аввал келган эди. Самарқандда илк фарзандининг ўлими устига қамал азоблари қўшилиб, ёш жувон касалманд бўлиб

қолган эди. Маҳмудхоннинг суюкли хотини Розия султон синглисига ўзи турган қасрдан жой бериб, уни энг яхши табибларга қаратган ва яхши парвариш қилиб, оёққа турғизган эди.

Бобир шунинг ҳурматини қилиб, аввал Розия султон бегим ҳузурига кирди. Ойиша бегимга қилган парваришлари учун қайнәгачисига миннатдорчилик билдириди-ю, энди хотинини Үратепага олиб кетмоқчи эканини айтди. Лақаби «Қоракўз бегим» бўлган ўттиз ёшлардаги бу чиройли жувон шаҳло кўзларидан учқунлар сошиб:

— Амирзодам, Ойиша бегим саргардонликдан тўйган, энди уни чекка жойга юбормагаймиз! — деди.

— Тақдиримизда бори шу бўлса начора, ҳазрат бегим?

— Мени маъзур тутинг, амирзодам, аммо ҳар кимнинг тақдирни ўз пешонасига битилур.

— Бироқ... кемага тушганинг жони бир бўлмасми?

— «Жонимиз бир» деб бечора синглимга шунча азоб берганларингиз етар. Озиб чўп бўлиб келди. Энди соғайгандан яна сарсонлик, яна ломаконлик!

Бобир бугун майдада беҳурматликларга бардош беришни зиммасига олиб келган бўлса ҳам, лекин хоннинг бояги киноялари устига қайнәгачисининг бу бендиша гаплари қўшилиб, жон-жонидан ўтиб кетди.

— Ҳазрат бегим, мақсадингизни очиқ айтинг — энди синглингизни мендан ажратиб олмоқчимисиз?!

— Мен ундоқ деганим йўқ! Сиз ҳам саргардонликни бас қилинг, амирзодам. Энди Тошкентда муқим туриңг!

Бобир: «Сизга сифинди бўлибми?» — дегиси келди-ю, лекин яна ўзини босиб:

— Таклифингиз учун ташаккур! — деди ва хайрлашиб чиқиб кетди. Ўша куни оқшом у Ойиша бегим билан ёлғиз қолганда Розия султон бегимнинг гапларидан норози бўлганини айтди:

— Тўн илигини эгаси билур, дейдилар. Розия Султон бегим бизни ўзимизчалик билмасалар керак. Кўп аралашмасалар яхши бўлур эди.

— Аммо мен эгачимга ҳамма гапни айтиб берганмен, мирзам.

— Эр-хотиннинг ҳеч кимга айтмайдиган сирлари бўлмагайми?

Ойиша бегимнинг илгариги уятчанликлари энди қа-

ёққадир йўқолганди. У ҳам опасига ўхшаб, Бобирга тик гапирди:

— Менинг эгачимдан яширадиган сирим йўқ, мирзом!

Бир вақтлар Бобирни улуғлаб, «ҳазратим» дейдиган Ойиша бегим энди хонга ўхшаб, баландроқдан келиб, «мирзом» дейиши ҳам ғалати эди.

Бобир киноя билан сўради:

— Демак, энди сизга мен керак эмасмен, фақат эгачингиз керак?

— Нечун ундаи дейсиз? Мен ҳали ҳам-сизнинг никоҳингиздамен!

— Ундаи бўлса, мен сизни бу ердан олиб кетурмен. Сафар тайёргарлигини кўринг!

Йўл азобига чидами йўқ Ойиша бегим озорланиб сўради:

— Яна Ўратепагами? Мен ўша йўлларни эсласам, кўнглим беҳузур бўладир. Ҳазратим, менинг жонимни йўл олди! Самарқандга бежон бўлиб бормасам эдим, жигарпорам ўлмас эди. Мана ҳозир бир ёшга кириб тепаоя бўлиб юриб кетур эди!

Ойиша бегим гўдак ўлган қизалоғини эслаб, кўзла-ри жиққа ёшга тўлди. Ўшандаги ўлимнинг совуқ нафа-си Бобирнинг ҳам юзига тегиб ўтгандай эти увушди.

— Ажалга даво йўқ экан, бегим. Лекин ундан берида бир бошга неча қайта офтоб тегиб, неча марта кулфат тушар экан. Ёш бўлсак ҳам буни кўп кўрдик. Ўлмасак, ҳали яна ёруғ куиларга етишурмиз, фарзандлик ҳам бўлурмиз. Шу мушкул дамларда бир-биrimизни тарк этмайлик. Мен билан бирга юринг.

— Бирга юрган пайтларимда сиз менга қарадингизми, мирзом? Ҳамиша салтанат ташвиши-ю, уруш, юришлар... Мен сизни деб шунча саргардон бўлдим. Сиз мени ойлар давомида кўрмасангиз ҳам соғинмас эдингиз... Балки мен сизга муносиб эмасдурмен?.. Суймаган хотинингизнинг сизга не кераги бор?!

Бобир хотинига кўнгилсизроқ бўлиб юрган пайтларини эслади. Ҳозир ҳам Ойиша бегимни бирга олиб кетишга уринаётгани — уни ортиқ даражада суйганидан ёки усиз яшай олмаслигидан эмас, балки Ойиша бегими яқинлашиб келаётган хавф-хатар гирдобига ташлаб кетишини ўз шаънига муносиб кўрмаганидан эди.

— Хонзода бегимни ёғийга олдирганимиз озми? —

деди Бобир.— Шунинг маломати ҳам менга етиб ортадир, бегим! Энди сизни бундай балолардан узоқроққа олиб кетмоқчимен!

— Ҳозир мен учун Тошкентдан тинч жой йўқ!

— Бу ҳаммаси — мұваққат тинчлик, инонинг! Кўп ўтмай Шайбонийхон бу ерга ҳам бостириб келур!

— Мен эгачимнинг қаноти остида ҳеч нарсадан кўрқмаймен! Даргоҳингиздан адои тамом бўлиб келиб, эгачимнинг ёнида яна тирилдим!

— Менинг даргоҳимда қийналганингиз рост. Лекин... яхши кунларимиз ҳам бўлган эди-ку!. Инсоф билан бир эсланг ахир!..

Ойиша бегимнинг барча аламлари янгилиниб, хотираси лойқаланиб турган шу дақиқаларда бирорта яхши кун эсига тушмади.

— Даргоҳингизда қачон яхши кун кўрибмен, миризом?! Мудом сафар! Мудом таҳлика! Мудом сарсонлик! Мудом бемеҳрлик!

Бобир Ойиша бегимдан бунчалик адолатсиз гап кутмаган эди. Ахир у Самарқандни биринчи марта олганида Ойиша бегим «нажоткоримизга» деб совға юбормаганмиди? Кейинги ғалабасида «фаҳрланамен» деб шивирлаган ким эди? Бобир буларни эслаб ўтиришни ўзинга эп кўрмади-ю, хотинига ҳайрат билан тикилиб:

— Наҳотки ҳаммасини унугтансиз?!— деди.

— Йўқ, кўрган азоб-уқубатимни умрбод унумасмен!

— Фақат азоб-уқубат?!

— Бу озми? Оз бўлса, хўрланиб йиғлаганларимни ҳам унумасмен! Энди қолган умримни эгачимнинг дуои жонини қилиб ўтказурмен. Саргардонлик бас! Хўрлик бас! Мен ҳам шоҳ қизимен!

Бобир олтин камарига осилган чарм ҳамёнини титроқ қўллари билан очиб, ниманидир қидирди, аммо тополмади. Сўнг индамай ташқари чиқди-ю, мулоғимлари турадиган хонага ўтди.

Дасторпеч эртага бўладиган қабул маросими учун Бобирнинг шоҳона кийимларини сандиқдан олиб, дазмолламоқда эди. Олтинлар, қимматбаҳо гавҳарлар билан безатилган ипак кийимлар Бобир ҳозиргина хотини ва қайнэгачисидан эшигтан беандиша гаплар аламини янада ошириб кўрсатгандай бўлди. Шунинг устига Қосимбек Бобирга рўпара бўлиб шикоят қилди.

— Хон шиговули эртанги қабул маросимида Жони-

бек Султонни сиздан баландроқقا ўтқазмоқчи эмиш!
Бу не сурбетлик! Ахир сиз шоҳсиз! Наҳотки даштий
бир бекни сиздан ортиқроқ эъзозласалар?

Қосимбек ҳали ҳам ўзини Бобирнинг эшик оғасидек тутар ва унинг обрў-иззатини ҳимоя қилишни ўзининг бурчи деб биларди. Хон бугун Бобирни қабулхонасида мунтазир қилиб қўйиб, Шайбонийхоннинг элчиси билан шатранж ўйнаб ўтирганда ҳам даштий султонни жиянидан баланд қўйган эмасмиди? Бир кунда шунча камситиш!.. Эртага бундай майдачуїда камситишлар янада кўпайиши аниқ. Бунинг ҳаммасига чидаб, сиғинди бўлиб юришга бардоши етмаслигини энди аниқ сезган Бобир:

— Иўқ! — деди. — Ҳаммасидан кечдим! Жаноб Қосимбек, мен энди шоҳ эмасмен! Керак эмас менга хон қабули! Бац! Улоқтиринг ҳаммасини!

Бобир дасторпечнинг қўлидаги олтин безакли тўнни юлқиб олиб, ерга отди. Нарироқда гавҳар ва ёқутлар билан безатилган шоҳона салла турган эди. Бобир саллага қадалган иккита гавҳар донасини — бир вақтлар Ойиша бегим берган совғани ситиб, юлиб олди, сўнг саллани эшикка қараб отди. Салла чувалиб кетиб, бир учи остона устига узала тушди.

Қосимбек саросима билан Бобирнинг елкасига қўлини қўйди:

— Амирзодам, сизга не бўлди? Амирзодам!

Рангига қон қолмаган Бобир ҳансираф хитоб қилди:

— Минбаъд мен бир дарвиш бўлиб кун кўрмоқчи мен! Жаноб Қосимбек, онамга айтинг! Мен ҳозир Ўратепага кетурмен! Юз чумчуқа бир кесак! Тожу тахт даъвосидан воз кечдим! Ким шунга кўнса, мен билан юрсин! Қолганларга жавоб!

Бобир салладан юлиб олган иккита гавҳарни сиқимлаганича арк ҳовлисига чиқди. «Сўймаган хотинингиз сизга не керак?» — деган сўзлар қулогига қайтадан эшитилиб кетди. Чиндан ҳам юлдузи юлдузига тўғри келмаган бегимни энди ўз ихтиёрига қўйгани маъқул эмасми? Аммо бу бегим энди тил чиқариб, шунча аччиқ гапларни айтиши, эридан биронта ҳам яхшилик кўрмадим, дейиши, Бобирнинг қалб яраларига сепилган туздек вужудини ачиштирмоқда эди. У ўз хонасига кириб қофоз ва дафтарлари сақланадиган сандиқ тагидан Ойиша бегим бир вақтлар ипак билан тиккан халтачани қидириб топди. Йиллар давомида халтачанинг оқ матоси сарға-

йиб, хиралашган, аммо қизил ипак билан тикилган «Нажоткоримизга» деган каштасимон ёзув аслидай турган эди. Бобир гавҳарларни ҳалтачага солиб, Ойиша бегимнинг олдига борди:

— Бегим, сиз мени нажоткор билиб, бу гавҳарларни «тахтга чиққанда тожга қадаб чиқсинлар» деб юборган эдингиз. Ҳозир менинг тожу тахтим йўқ... Шоҳлик дарьосидан ҳам бутунлай воз кечдим. Дарвиш бўлиб тоғларга чиқиб кетмоқчимен. Сиз эса шоҳ қизисиз... Олинг гавҳарларингизни!.. Балки яна бошқа бирон... нажоткорингизга совға қилурсиз!

Ойиша бегим ҳалтачани олар экан, аччиқ билан бидиллаб деди:

— Мени яна ташлаб кетадиган бўлсангиз жавобими бериб кетинг!

— Шундоқми? Ажрашмоқчимисиз?

— Ҳа! Ажрашамен!

— Бўлмаса... бугундан бошлаб менга хотин эмассиз! Бошингиз очиқ! Шариат бўйича уч талоқсиз!

2.

Ўратепанинг жанубидаги Туркистон тизма тоғи этакларига баҳор анча кечикиб келади. Ҳамал ойининг охирларида далаларга энди қўш чиқади. Қорли Пирях чўққисининг тагида тўрт томони баланд тепаликлар билан ўралган шамолпана Даҳкат қишлоғида ўриклар савр ойига бориб гуллайди.

Қишлоқнинг кунботиш томонида баланд тепаликка кўтариладиган тик йўл — бароз бор. Бароз шунчалик баландки, унинг юқорисидан Даҳкатга қарабалса, қишлоқ теран бир чуқурликнинг тубига жойлашгандай кўринади.

Бароздан юқоридаги текис далада Тоҳир яланг оёқ бўлиб, ҳўқиз билан ер ҳайдамоқда. Самарқанддан Тоҳирга қўшилиб навкар бўлиб келган бир қулоғи кесик Мамат эса ҳали ҳайдалмаган зояк ерга қулочкашлаб уруғ сочяпти. У ҳам яланг оёқ бўлиб иштон почасини шимариб олган. Улардан нарида уч-тўртта даҳкатлик тожик деҳқонлар ҳам ер ҳайдаб, экин экаётир. Ер юмшоқ, ҳаво ёқимли, ишнинг унуми яхши. Шунинг учун ҳаммаларининг руҳлари кўтарилик. Шунча вақт жангу жадалда юриб, деҳқонлик касбини соғинган Тоҳир энди яйраб ер ҳайдайди ва бирда-ярим ашула хиргойи қилиб қўяди.

Бароздан пиёда кўтарилиб келган Бобир тоғда қўй боқиб юрган, далада қўш ҳайдётган ёш-ялангларга қарар экан, бир нарсадан таажжубланди. Тоғу тошга пойабзал чидамагани учун камбағалларнинг кўписи яланг оёқ юради. Уст-бошлари ҳам юпун, лекин руҳлари тетик, қоринлари тўйиб овқат ейишса, кайфлари чоғ.

Бобир ўзини шу ёшларга қиёс қилади: унинг ҳам тўрт мучаси соғ, ўзи кучга тўлган йигирма ёшли йигит, қишлоқ йигитларидан камлиги йўқ. Лекин нега у бунчалик фамгин? Мана бу улуғвор тоғлар бағрида нега у гўзал табиатнинг тирик бир бўлагидай яйрай олмайди?

Ҳамма гап яланг оёқ юришда бўлганидай, Бобир ағдарма этигини ечиб марзага қўйди-ю, ҳайдалган ер устида сарпойчан юриб кўрди.

Тупроқ бахмалдай майнин, ундан баҳор ва ёшликтининг ҳиди келади. Одамнинг тупроқдан яратилгани ҳақидаги ривоят эсга тушади.

Навкарлар ва деҳқонлар Бобирнинг яланг оёқ юрганини аввал ҳазилга йўйиб кулишди. Қейин Бобир этигини марзада қолдириб Даҳқатнинг барозидан яланг оёқ тушиб кетаётганини кўришид-ю, ҳайрон бўлишди.

Барознинг майда тошлари Бобирнинг товонларига ботар, тик жойлардан тушаётгандай чақир тошлар оёғига тикан бўлиб кириб кетаётгандай оғриқ қўзғар эди. Лекин Бобир тишини-тишига қўйиб оғриққа чидаб борар эди.

Барознинг ярмигача тушганда кетидан ағдарма этикни қўлига олиб, сакраб-сакраб, Тоҳир етиб келди:

— Амирзодам, этикни кийинг! Тўхтанг. Бу тошлар оёғингизни яра қилмасин!

Бобир тўхтаб, Тоҳирнинг товонлари қорайган каттакатта оёқларига қаради:

— Сизнинг оёғингиз жароҳатсиз-ку?

— Э, амирзодам, биз ўрганиб кетганимиз.

— Мен ҳам ўрганмоқ истаймен.

— Нечун?

— Сизларга ҳавасим келур,— деди Бобир йўлида давом этиб.

Тоҳир ундан сал кейинроқда борар экан, кулди:

— Амирзодам, подшоҳнинг навкарга ҳаваси келиши мумкин эмас.

Бобир Тоҳирдан хиёл ранжиб:

— Сиз ҳам менга ишонмадингизми? — деди. — Тошкентда подшоҳлик даъвосидан воз кечганимни айтган эдим-ку!

Бу ҳодисага Қосимбек ҳам, бошқа кўпчилик бек ва навкарлар ҳам «аччиқ устида шунчаки айтилган гап» деб қарашган ва ўша икки юз эллик кишининг ҳаммаси Қутлуғ Нигор хоним билан бирга Бобирнинг кетидан Даҳкатга келишган эди.

Тоҳир оғир тин олди-ю:

— Амирзодам, мен сизга ўзимдан ҳам ортиқ ишонурмен, — деди. — Аммо сизнинг шоҳлик ташвишидан қутулишингиз мумкин эмас.

— Нечун? Ахир шаҳзодаларнинг тожу тахтсиз ўтганлари йўқми?

— Бор. Аммо сиз ундейлардан эмассиз.

— Аммо мен тожу тахтнинг бевафолигини билгандарданмен. Шоҳ Жамшиддек, Искандар Зулқарнайндек тождорлар ҳам орттирган давлату молу дунёларини ташлаб, қабрга битта кафан билан кетган эмасларми?

Тоҳир яқинда тоғнинг нариги томонидаги Оббурдон қишлоғига боргандарини эслади.

Бобирнинг тожу тахтдан ихлоси қайтганлиги беҳазил бўлса керакки, шоҳ Жамшидинг тилидан тоҷикча шеър ёзиб, уни чашма бўйидаги тошга ўйдирди. Тўрт сатрлик бу шеърнинг икки сатри Тоҳирнинг эсида турибди:

Гирифтем олам ба марди-ю зўр,
Ва лекин набурдем бо худ ба гўр¹.

Оламни забт этган жаҳонгирларнинг салтанати ҳам омонат — ўзлари дунёдан кетишлари билан тугайди. Лекин шоирнинг яхши сўзлари тошга битилган ҳарфлардай асрлар давомида ўчмайди. Шундай экан, Бобир қолган умрини шоирликка бағишиласа яхши эмасми?

— Мен жон дер эдиму, лекин беклар сизни қўймаслар, — деди Тоҳир.

— Бекларга ижозат берурмиз, кетурлар.

Бобир шу сўзининг устидан чиқа олишини яланг оёқ

¹ «Оламни мардлик ва зўрлик билан олдик, лекин ўзимиз билан бирга гўрга олиб кетмадик». Бобир 1502 йилда тошга ўйдирган бу сатрларни орадан 452 йил ўтгандан кейин 1954 йилда тоҷик олими А. Мухторов Оббурдон қишлоғидаги бир қудуқдан топиб олади. Тошга битилган бу шеър ҳозир Душанбада музейда сақланмоқда.

юриш билан исбот қилмоқчи бўлгандай, яна майда тошлар устидан сарпойчан юриб кетди. Бироқ унинг қийналиб бораётгани майишиб юришидан сезилди. Тоҳир уни қувиб етди-ю:

— Амирзодам, ўтикни кийинг,— деди.— Яланг оёқликни ҳавас қила кўрманг. Худо сизни ҳеч вақт бу кўйларга солмасин.

— Қайси кўйларга?

— Ялангоёқларнинг аҳволига тушманг!

— Ажабо! Ялангоёқлар одам эмасдирларми?

— Одам. Лекин сиз шоҳ бўлиб туғилгансиз!

— У ҳолда — шоҳ — одам эмасдирми?

Тоҳир жавоб тополмай қолди. У шоҳ билан навкар орасида тоғдай баланд девор борлигини билар, Бобир бу деворни бир сакраб ошиб ўтмоқчи бўлаётгани фалати туюларди.

Тоҳирнинг назарида, Бобир қайта шоҳ бўлишдан умидини узгану тушкунликка учрагани учун шу гапларни айтаяпти.

— Амирзодам, агар сиз шоҳликдан шоирликни афзал кўрсангиз, унда мен ҳам... аҳли аёлим билан тинч бир гўшада деҳқончилик қилиб, сизга садоқат билан умр ўтказган бўлур эдим... Лекин бунинг иложи бўлмас...

Бобир этигини Тоҳирнинг қўлидан олди.

— Сиз қайтинг,— деди Тоҳирга.— Аммо бу гаплар орамизда қолсин. Кейин яна кенгашумиз. Боринг!

Тоҳир бароздан қайтиб чиқар экан, Бобирнинг унга ўзини яқин олиб шунча фалати гаплар айтганидан кўнгли кўтарилиб кулиб қўйди. Бироқ Бобир бир гўшада тинчгина яшайдиган мискинтибат одамлардан эмас эди. Унинг яланг оёқ юришга ўрганмоқчи бўлгани эса Тоҳирга шоирона бир шўхлик бўлиб кўринарди.

Тоҳир барознинг тепасига чиққанда орқасига ўгирилиб қаради. Бобир ҳамон этигини қўлига олиб, пастлаб бормоқда эди. Тоҳир унинг чидамига тан бериб: «Лекин сўзидан қайтмайдиган одати ҳам бор!»— деб қўйди.

Бобир, оёғининг бир-икки жойи қавариб шилинганини сезса ҳам оғриғига чидаб, қишлоқнинг бериги четидаги чашма бўйигача сарпойчан борди. Ундан нарида юмшоқ тупроқли сўқмоқ бор эди. Лекин қишлоқ одамлари унинг яланг оёқ юрганини кўриб, пасту баланд гап қилишлари мумкин эди.

Унга уйини берган қишлоқнинг кадхудоси ҳам, бек ва мулозимлар ҳам «мирзо ҳазратлари» деб, Бобирга ҳамиша таъзим қилишар эди. Агар Бобир камбағал дәхқонга ўхшаб сарпойчан юрса, булар оддий ялангоёқ-қа таъзим қилгандай кўриниб, иззат-нафсга боришлари ва хафа бўлишлари мумкин эди. Шунинг учун Бобир аъёнлар учрайдиган жойлардан одатдагидай этик кийиб ўтар эди-ю, Даҳкатнинг атрофидаги ёнбағирларга боргач, яна яланг оёқ бўлиб оларди. Оёғига ботиб озор берадиган ғадир-будур тошлар, буталар дилини ўртаётган аламли ўйларнинг тафтини оладигандай бўлар эди. Кунлар ўтиши билан унинг товоnlари сағри чармидай қалинлашиб, тош-пошлар, ёғин-сочинлар кор қилмайдиган бўлиб кетди.

* * *

Даҳкатдан уч-тўрт чақирим қўйида Қоразов деб аталадиган баланд жарлар тагидан одамни оқизадиган улкан Оқсув елиб ўтади. Бу сувнинг ўнгга бурилиб, ёйилиб оқадиган сокинроқ бир жойида кечув бор.

Тоғ баридан қиялаб ўтган сўқмоқ билан арчалар орасидан юриб келаётган Бобир тушга яқин Оқсувнинг шу кечуви олдидан чиқди ва дарёдан ўтиб келаётган йигирматача қуролли отлиқларга рўпара келиб қолди. Олдинда пиёзи чакмон ва қизил бўрк кийган Қосимбек. Унга эргашиб келаётган навкарлар ҳам таниш.

Бобир уларга яланг оёқ юрганини кўрсатгиси келмади-ю, ўйлдан четланиб, баланд бир арчанинг соясига бориб ўтирди.

Лекин бу орада Қосимбек ҳам уни кўриб қолди. Кечувда қорнигача ҳўйл бўлган отини Бобирдан анча нарида тўхтатиб, тез ерга тушди. Навкарлар ҳам Бобирни қурмат қилиб апил-тапил отдан тушдилар. Қосимбек отининг жиловини навкарига бериб, эгилиб таъзим қилган қўйича Бобирга яқинлашиди. Мусибатли товуш билан деди:

— Амирзодам, бир қошиқ қонимдан кечинг! Яна бир шумхабар!..

Бобирнинг хаёли Тошкентга кетди. Қосимбек уч ойдан бери ўша ёқларда юрган эди. Бобирнинг тоғасик Мажмудхон Шайбонийхоннинг элчиси шарафига зиё-

фатлар бериб юриб, ахийри хон билан битим тузган эди. Бу битимга биноан Шайбонийхон Үратепани Маҳмудхонга бериб, ўзи Ҳисорга қўшин тортиб кетган эди. Пайтдан фойдаланган Маҳмудхон укаси Олачаҳон билан бирга Фарғона водийсидаги Аҳмад Танбалга қарши уруш очган эди. Улар водийни Аҳмад Танбалдан тортиб олиб, Тошкент хонлигига қўшмоқчи эдилар. Шайбонийхон аввал бу ниятга қўшилган эди. Наҳотки энди сўзидан қайтган бўлса?!

— Не бўлди? Сўзланг!

— Шайбонийхон манфурлик билан сўзидан қайтмишdir, амирзодам! Тоғаларингиз Фарғона водийсида Аҳмад Танбал билан олти ой олишиб, уни енголмай, кўп талафотлар бериб, заифлашиб қолган пайтда Шайбонийхон битимни бузиб, кутилмагандан кетларидан бостириб келмишdir! Олдинда Аҳмад Танбал қўшини, кетларида ёлғон иттифоқчи Шайбонийхон қўшини! Тоғангиз бу икки балонинг орасида қолиб тор-мор бўлдилар! Шайбонийхон уни асир олмишdir!

Бобир жойида ўтиролмай ўрнидан туриб кетди.

— Ё алҳазар! Тошкент ҳам кетдими, а?

— Э, сўраманг, амирзодам! Тошкентда икки минг қўриқчи аскар бор эди. Олти ойга етгулик заҳира бор эди! Қўргонни қаттиқ туриб ҳимоя қилса бўлур эди. Бироқ асир тушган Маҳмудхон беҳад уятлик бир иш қилмишdir. Шайбонийхон уни қатл эттирмоқчи бўлганда, Маҳмудхон: «Қонимдан кечинг, не талабингиз бўлса бажарай!»— дейди. Шунда Шайбонийхон шарт қўюрки, Тошкентдаги қўриқчи аскарларингизга буйруқ ёзib юборинг, токи қўргонни жангсиз ташлаб чиқиб кетсинлар, аммо хазина билан ҳарам қўргонда қолсин. Жон ширинлик қилиб, Маҳмудхон бу шартни қабул қилмишdir!

— Наҳотки бутун ҳарам Шайбонийлар илкига тушган бўлса?!

— Ҳа, амирзодам, ғолиблар қўриқчисиз Тошкентда уч кун элни таламишdir! Тогойингиз Маҳмудхоннинг энг кўҳлик синглиси Давлат бегим Шайбонийхоннинг ўғли Темур Султон ҳарамига учинчи хотин бўлиб кирмишdir. Эллик уч яшар Шайбонийхоннинг ўзи Маҳмудхоннинг ўн олти ёшлик гўзал қизи Мўғил хошимни никоҳлаб олмишdir! Маҳмудхоннинг суюкли хотини Розия султон бегим илгариги элчи Жонибек султонга гун-

чачи қилиб никоҳланмишдир! Бултур Хонзода бегим учун бизни шунчалар маломат қилган Маҳмудхон энди суюкли хотинини, қизини, синглисини ўз жони учун бунчалик шармандали аҳволга соглани бутун эл-улус-нинг нафратини келтирмишдир!

Бобирнинг хаёли Ойиша бегимга кетди. Ундан кўнгли қолиб, ажрашиб кетган бўлса ҳам, лекин бир вақтлар илк ёшлик меҳри билан суйган хотинининг Шайбонийхон ҳарамига тушиш эҳтимоли уни даҳшатга келтириди. Опаси Хонзода бегимнинг Шайбонийхон ҳарамига тушгани озми?

Бобир Қосимбекка даҳшат тўла кўзларини тикиб сўради:

— Наҳотки Ойиша бегим... Эгачим Хонзода бегимнинг кундошига айлантирилган бўлса?!

— Йўқ, амирзодам! Не тил била айтайки, Ойиша бегим хоннинг амакиси — эллик беш ёшли Кўчкинчининг тўқол хотин қилиб никоҳланмишдир!

Бобир юзини қўллари орасига олиб нидо қилди:

— О, бу не разолат? Не шармандалик?!

Қора кўзларидан учқунлар сочиб Бобирга аччиқ гаплар айтган ўша Розия сultonон бегим бугун Жонибек сultonнинг қучоғида! Бу йўғон гавдали маккор бек Маҳмудхон саройида элчи бўлиб, хон билан шатранж ўйнаб, атайлаб ютқизиб юрган пайтларндаёқ унинг суюкли хотинини кўз остига олиб қўйган бўлса эҳтимол. Ойиша бегим-чи?

Қосимбек армон тўла товуш билан сўзида давом этди:

— Кошки Маҳмудхон шунча уят ишлар қилиб тирик қолган бўлса!

— Тогойим ўлдирилдими?!

— Шайбонийхон биринчи мартасида уни ўлдирамаган эди. Лекин ҳалиги шармандаликлар билан руҳан ўлдиргандан баттар қилиб Мовароуннаҳр чегарасидан шарқقا — Олтой томонга қувиб юборган эди. Бундан алами келган Маҳмудхон ўша ёқларда ўзига тарафдорлар топиб, қўшин йиғиб Шайбонийхондан қасд олиш учун яна Сирдарё бўйига келади. Хўжанд яқинида иккинчи марта жанг бўлиб, Маҳмудхон яна енгилади-ю, икки ёш ўғли билан асир тушади. Бу гал Шайбонийхон Маҳмудхоннинг ўзини ҳам, ёш ўғилларини ҳам аёвсиз қатл эттиришибдир!

— Ё алҳазар!.. Ё раб!..

Бир вақтлар Бобирга оқибатсизлик қилиб, алам ўт, казган яқинларининг тақдир томонидан бунчалик шафқатсизларча жазоланиши Бобирни қора босириқдай эзив, карахт қилиб қўйди. Бобир улардан ҳар қанча ранжигандага ҳам бундай оғир жазоларни уларнинг ҳеч бирига раво кўрмас эди.

Бобирнинг ранги қув ўчиб, юз мускуллари титраётганини кўрган Қосимбек шумхабар келтиргани учун яна бир марта уэр сўради. Бобирнинг сал тафтини оладиган чора қидириб:

— Амирзодам, қани, ўлтирсинглар, марҳумларнинг арвоҳига тиловат қиласайлик,— деди.

Тиззалари бўшашиб, оёғида зўрға турган Бобир арча тагидаги бояги жойига қайтиб ўлтирди. Қосимбек унинг қаршисига тиз чўкли. Навкарлар ҳам бирин-кетин чўн-қайдилар. Қосимбек ширали, йўғон овоз билан қуръон сураларини оҳангдор қилиб айтиб, узоқ тиловат қилди. Дарёдай бир зайлда оқадиган бу оҳанглар Бобирга дунёнинг бебақолигини, ўтиб турган ҳар бир дақиқа умр қайтиб келмайдиган неъмат эканини, ҳаётнинг ғаниматлигини эслатди-ю, у ўзини сал босиб, яланг оёқларини гўнининг этаги билан бекитиб қўйди. Тиловат тугаб, юзларига фотиҳа тортганларидан сўнг Қосимбек навкарларга қўли билан нарироқ бориб туриш ишорасини қилди. Улар узоқлашгач, Бобирга янада яқинроқ келиб, паст овоз билан деди:

— Шайбонийзодалар бу ғалабалардан қутуриб, Андижонга кўз тикмишлар. Босқинчилар эрта-индин Ўратепага ҳам келурлар. Энди бу ерларда юриш хатарли, амирзодам. Тоғ ошиб, Ҳисорга кетмоқ керак.

Ҳисор ҳукмдори Хисравшоҳ таҳти Бобирнинг амакиваччаси Бойсунқур мирзодан тортиб олиб, бошқа бир темурийзодани таҳтга даъвогар бўлмасин, деб, кўзига мил тортиб кўр қилган эди. Бобир шуни эслади-ю:

— Менинг қордан қочиб дўлга тутилишим не даркор, жаноб Қосимбек?— деди.

— Менинг мақсадим бошқа, амирзодам. Камина Ҳисор беклари билан бултурдан бери махфий музокара олиб бормоқдамен. Уларнинг кўпи Хисравшоҳдан норози экан. Ўзи бир навкардан чиққан таги паст ҳукмдор. Таҳтга ўлтиришга ҳаққи йўқ. Борсак, яхши беклари сизга ён босгайлар.

— Яна таҳт талашишми? Йўқ, жаноб Қосимбек! Мен

бу талашлардан жуда тўйдим! Ҳозир менга тинч бир гўша бўлса, дарвешона ҳаёт кечирсан, ашъор ёзсан— шу ўзи бас!..

Қосимбек боядан бери кўзини Бобирнинг яланг оёқларидан олиб қочмоқда эди. Шаҳзоданинг бундай юриши унга жуда эриш туюларди.

— Амирзодам, сиз бизнинг тақдиришимизни ҳам ўйланг! Икки юз элликта содиқ одамларингиз — беклару мулоzиму навкарларингиз сизга омад тилаб, аввалгидан ҳам катта мартабаларга етишингизга ишониб, тоғу тошда саргардон бўлиб юриши нечун?

Қосимбекнинг гапи тагида—«Чиндан дарвиш бўламен десангиз сизга бунча беку навкарларнинг не кераги бор? Нечун жавобини бермайсиз?»— деган маъно ётар эди.

— Сиз қелтирган мудҳиш хабарлардан кўнглим вайрон бўлиб турган пайтда яна бир мушкул гапни қўзғадингиз, жаноб Қосимбек!

— Густоҳлигим учун мени кечиринг!

— Аммо сиз ҳақсиз. Мен сиздек содиқ кишиларимнинг тақдирини ҳам унутмаслигим керак. Ростини айтинг, жаноб Қосимбек, Хисравшоҳнинг ўзи ҳам сизни хизматга чорлаганими?

— Чорлаган. Икки қайта маҳсус одам юбормишдир.

Бобир Қосимбекнинг мардона юзига, қирқ ёшга бормасдан оқ оралай бошлаган калта соқол-мўйловига маъюс бир назар ташлади.

— Сиздан маҳрум бўлиш мен учун беҳад мушкул!— деди. — Отам ўлгандан бери менга отадек ғамхўрлик қилдингиз. Мен сиздан кўрган садбқату яхшилигимни ҳали бошқа ҳеч қайсан бекдан кўрган эмасмен!

— Сарафрозмен, амирзодам!

— Энди шу яхшиликларингиз ҳурмати, мен сизга жавоб берурмен. Майли, Ҳисорга боринг!

— Сизни тарқ этиб кетишга кўнглим йўқ, амирзодам! Бирга кетайлик!

— Мен ўзим ҳам шоҳлик занжирдан бутунлай озод бўлишга интилмоқдамен, жаноб Қосимбек. Бу занжирнинг бир уни тобе одамларга боғланган бўлса, унинг иккинчи уни шоҳнинг ўзига боғланур экан! Шу сабаб, тобеларни занжирдан бўшатмагунча подшоҳнинг ўзи ҳам занжирбанд бўлур экан. Мен энди мана шу табиат бағрида занжирсиз яшашга қасд қилдим. Шунинг учун

сизга жавоб! Бошқа беку мулозиму навкарлар ҳам вақт-соати билан жавоб олурлар!

Бобир Қосимбек билан хайрлашмоқчи бўлиб ўрнидан турди. Самарқандда суюкли опасидан, Тошкентда хотинидан айрилган, бугун эса шунча машъум хабарлар эшитиб, яна энг ишонган бекидан ҳам ажрашишга мажбур бўлаётган Бобир ўзини ҳар қанча тетик тутишга уринса ҳам тиззалари букилиб, гандираклаб кетди. Қосимбек уни қулоқлаб хайрлашар экан, кўзлари жиққа ёшга тўлди.

3 .

Бобир ўзига азоб берадиган оғир туйғуларни тоғлардан кўринадиган кенгликларга сочиб юбора олса ёки гўзал шеърий сатрларга жойлай олса бир қадар енгил тортади.

— Не ерда сокин ўлай? Не қилай? Қаён кетайин?
Не дайрдин эшигим очилур, не масжиддин.
Неча эшикдан эшикка гадо каби стайнин?

Куйиб-ёниб ёзган бу сатрлари қалбининг тафтини олар, дунёда унинг учун ҳамма эшиклар бекилганда ҳам бир муқаддас қопқа — шеърият қопқаси доим очиқ эканини ич-ичидан сезиб кўнгли кўтарилади. У ўз қалбіда ҳали сарф этилмаган қудратли кучлар борлинини, опаси Хонзода бегим Бобир билан видолашган пайтида: «Сизнинг нодир истеъдодингиз бор, бу буюк неъматни ҳайф қилманг!»— деган сўзлари кўп эсига тушади. Кеча мана шу Оқсув бўйидаги бир қишлоқда тўй бўлган, шунда ўш бир хонанда сеҳрли товуш билан Бобирнинг «Кўнглимдан ўзга ёри вафодор топмадим» деб бошланадиган ғазалини ашула қилиб айтганини у ўзи кўчадан ўтаётиб эшигтан эди. Уша дақиқаларда унинг қалбидаги энг зўр куч жунбишга келиб, юзага чиқиш учун йўл ахтарган эди. Бу ички куч унга Даҳкатнинг кунботиши томонида уч минг газ баландликдаги Осмон Яйлов тоғининг учидан отилиб чиқиб турған мўъжизавий булоқни эслатди. Жилғалар бўйидан, тоғ ёнбағирларининг тагидан кўз очган булоқлар кўп. Лекин шундай юксак тоғнинг энг баланд бир нуқтасидан ёриб чиққан бундай ғалати чашмани Бобир биринчи марта шу ерда учратди.

Жанубда мангү қорга бурканган улуғвор Пирях чўққиси ялтираб турибди. Аммо у чўққи билан Осмон Яйлов тогининг орасида беҳад чуқур жилгалар, катта-катта баландликлар бор. Бу булоқнинг суви ўша чўққидан тушиб, яна Осмон Яйловга чиқиб келгунча икки орадаги чуқурликлардан ҳам теранроқ жойга тушиб, сўнг яна юксак тоққа кўтарилиган бўлиши керак. Булоқ бунча кучни қаердан олганикин? Уни шунчалик баланд жойга чиқишига, шундай тошлар орасидан кўз очишга нима мажбур қилган экан? Эҳтимол, илгари унинг кўзи пастдаги тоғ камарларида бўлгандир? Балки булоқнинг устига тоғ кўчиб тушиб, аввалги кўзини бекитиб қўйгандир?

Бобирга бирдан ўз ҳаёти ҳам кўчки босган булоқقا ўхшаб кўринди. Ахсида қулаган жар ҳам шу булоқнинг кўзига тушган. Кўчманчи султонларнинг Самарқанддаги ғалабаси ҳам... Ички бир куч билан қайнаб чиқаётган булоқ кўчкининг тупроқларини ювив, тошлар орасидан йўл топиб ўта бошлаганда Мовароуннаҳрдаги ижтимоий зилзилалар зарбидан янги-янги жарлар қулайди, қоялар кўчади-да, яна шу булоқнинг кўзига тушади.

Булоқ ҳамон туғилган заминининг бошқа жойларига бош уриб, ёруғ дунёга олиб чиқадиган янги йўллар излади.

Агар Осмон Яйлов булоги тошлар орасидан йўл топиб, мана шундай баланд қояни ёриб чиқсан бўлса, Бобир умидсизланмаслиги керак. Эҳтимол, унинг толеи ҳам мана шу булоқقا ўхшаб, баланд бир нуқтадан қайта кўз очар. Балки бу баланд нуқта шеъриятдадир?

Бир кун пешин кечроқ Бобир Осмон Яйлов булоги бўйида мана шу хаёлларга ғарқ бўлиб ёлғиз ўтирганда катта-катта иккита бўрибосар итни эргаштириб бир чўпон йигит келиб қолди. Оёғида чориқ, бошида қизил ҳошияли оқ қалпоқ, белига катта пичноқ осиб олган, қўлида қизил иргай таёқ. У тош устида ўтирган Бобирга салом берди-ю, итларни орқароқда қолдириб, ўзи булоқдан кафти билан сув ичди. Кейин ҳўл қўлларини қалами яктагининг қўлтиқларига арта туриб, Бобирга гап қотди:

— Ҳа, жўра, пошонг зиқналик қилдими, тоққа яланг оёқ чиқибсен?

Чўпон «сен-сен»лаб гапиргани Бобирнинг қулоғини тирнаб ўтгандай бўлди. Аммо ўзини босиқ тутиб:

— Қайси подшоҳим?— деб сўради.

— Бобир деган бир пошшо Даҳкатда юрган эмиш
Сен ўшанинг одамлариданмисен?

Бобир эски кийимларини кийиб чиққан, ўзи тоғ офтобида куйиб қорайган, аммо унинг юзида, қўлларида аслзодаларга хос бир назокат борлиги билиниб турарди. Чўпон уни подшоҳнинг мулоҳизмларидан деб ўйламоқда эди. Бобир ўзини танитгиси келмай:

— Ҳа,— деди.

Чўпон иргай таёғига кенг кўкрагини тираб, Бобирга синовчан назар билан тикилди:

— Пошшонгга жуда содикмисен?

Бобир мийифида кулиб:

— Мен ўзимга содик бўлсам бас,— деди.

— Пошшонг ҳам сени ёмон кўрса керак-да, хор қилиб қўйибди.

Энди Бобир чўпоннинг юзига тикилиб қаради. Бетига ҳали устара тегмаган йигирма ёшлардаги йигит. Лекин чуқур кўзлари қирқ-эллик ёшга кирган ва кўп ғам чеккан одамникидай сўлғин, кексанамо.

— Подшоҳимни мунча кўп сўроқладинг, бирон арзинг борми?— деди Бобир кулимсираб.

Чўпон қовоқларини уйиб:

— Мен уни мана шу тоғда яkkама-якка учратмоқчи мен,— деди.

— Агар учратсанг... Не гапинг бор?

Чўпон йигитнинг кўзлари ғазаб билан қисилди:

— Отам билан акамнинг бошини не қилган, шуни сўраб билмоқчи мен.

— Бошини? Бобир-а?! Сен... сен кимсан ўзинг?

— Чагракларданмен!

Бобир Андижон тоғларида яшайдиган чорвадор туркӣ қабила-чагракларни эслаб ҳайрат билан сўради:

— Бу ерда ҳам чаграклар борми?

— Биз бу ерга Ўш томонлардан қочиб келгандик. Мен ўшанда ўн тўрт яшар бола эдим. Бобир келиб отам билан акамнинг қўйларини, йилқиларини тортиб олмоқчи бўлган. Чўпонлар «Бермаймиз!»— деб ғалаён қилган. Кейин Бобир ҳаммасини ўлдириб, бошларини кесиб кетган. Онам билан борсак, ўн беш-йигирмата ўлик ётибди. Бошлари йўқ. Танасидан таниб олиш қийин бўларкан. Онам дам у танани қучоқлаб йиғлайди, дам бу танани...

Бобир Ўшнинг жанубида бундан олти йил аввал Аҳмад Танбалнинг қонли хуржунидан лолақизғалдоқлар

Устига юмалаб тушган каллаларни яна кўз олдига келтирди. Ўшанда уни сесканириб юборган ўшгина йигитнинг калласи ва устара тегмаган юзи кўз олдида қайтадан гавдаланди. Мана бу турган чўпоннинг юзи Бобирга бирдан ўша юзни эслатди-ю, кесик бўйиннинг қон аралаш гўштлари хаёлида такрор пайдо бўлиб, борлигини даҳшатга келтирди. У чўпонга саросима кўзлар билан қараб:

— Аҳмад Танбал ўлдирган! — деди. — Султон Аҳмад Танбал!

Чўпон таёгини кўкрагидан олиб, Бобирга яқинроқ келди:

— Сен ўша бошларни кўрганмидинг?

— Ҳа, яйловда... Ўшнинг яйловида Аҳмад Танбал ўша бошларни келтириб кўрсатган. Бунга олти йил бўлди... Чўпонлар ғулу кўтариб, навкарлардан уч-тўрттасини ўлдирмишлар. Танбал ўшанинг қасдига бош кесиб келган эди!

— Танбал эмас! Менга кўрган одамлар айтган! Отамнинг бошини Бобир кесиб кетган!

— Одамлар ёлғон айтмишлар! Мен... аниқ биламен. Бобир норасида ўсмир эди. Тоққа Султон Аҳмад Танбал борган!

Бобир ўзини оқлаётган одамга ўхшаб шошилиб гапираётгани учун чўпон йигит энди ундан гумонсиради. Зуғум қилиб:

— Сен ўзинг кимсен? — деди. — Бобир сенинг киминг?

Бу савол Бобирнинг этини жунжиктириди. Гўё чўпон ҳозир ундан отасининг хунини талаб қиласидек туюлди.

Эгасининг овозидаги ғазаб ва таҳдидни пайқаган итлар бирдан ириллаб, Бобирга ташланишга тайёрланишиди. Бобир ўрнидан сапчиб турди. Қўли беихтиёр белидаги ханжарнинг сопига борди.

Лекин унинг оёқлари яланг эди. Итлар энг аввал унинг оёғидан оладигандай кўринди. Шу пайт у ўзининг яланг оёқ юрганидан қаттиқ пушаймон бўлди.

— Нега индамайсен? — деди чўпон яна таҳдид билан.

Бобир ўзини иложи борича вазмин тутиб:

— Не дейин? Гапимга ишонмасанг! — деди.

Чўпон итларига ўгирилиб:

— Тўрткўз, Бўйиноқ, ётинглар! — деди. Сўнг яна Бобирга юзланди:

- Хўш, гапинг чин бўлса, мениңг отамни Бобирнинг ўзи эмас, Танбал деган бир беки ўлдирган. Шундайми?
- Шундоқ.
- Уша бекка ким фармон берган? Бобирми?
- Бобир бундай бўлишини билмаган... Ёшлиқ қилган!

— Яна пошшонгнинг тарафини оласан-а! Агар мен ҳозир мана бу итларимга «ол!»— десам, сени тилка-пора қилиб ташлагай. Шунда фақат итлар айбор бўлгайми? Буларни олкшлаганим учун мен гуноҳкор бўлмасменими?

Бобир чўпоннинг бу гапига эътиroz қилиб бўлмаслигини сезди-ю, бошини қуи солди:

- Балки сен ҳақлидирсан...
- Кимсен ўзинг? Айт ростини!

Чўпоннинг овозидаги таҳдидни сезишиб, итлар яна ириллашди. Бобир қўрққанини сезса итлар унга ташланадиганга ўхшарди. У бор кучини гўё кўзларига йиғиб, чўпоига тик қаради-ю, дадил туриб:

- Мен Бобирмен!— деди.

Чўпон қулоқларига ишонмай, унинг яланг оёқларига яна бир қаради:

- Наҳотки подшоҳ Бобир сен бўлсанг?!

- Ҳа, мен подшоҳ әдим!

- Ҳозир-чи?

— Ҳозир... тожу тахт даъвосидан воз кечдим. Энди фақат шоирона ҳаёт кечирмоқчимен.

- Шошма, шошма!

Оқсув бўйида бўлган кечаги тўйда чўпон ҳам бор эди. Ў хушовоз ёш ҳофизнинг Бобир ғазали билан айтган ашуласини тинглаб ғалати бўлиб кетган эди. Ашула охирида:

Бобир, ўзунгни ўргата кўр ёрсиэки, мен
Иstab жаҳонни, мунча қилиб ёр топмадим!—

деган сатрлар унинг эсида қолган эди.

Ҳозир Бобир бир ўзи тоғу тошда ёлғиз юргани ҳам унинг ўша байтини тасдиқлаган кўринди-ю, чўпон итларига қараб:

— Ет! Бўйноқ, ёт!— деб буюрди. Итлар тинчлангач, яна Бобирга кўз тикиб сўради:

— Шоирлигинг рост бўлса, шу ерда ёзган шеърларингдан бирини айт-чи?

Бобир ёрга қараб ўйланиб олди-да, бошини кўтарди
— Эшит:

Не хеш мени хушлару не бегона,
Не ғайр ризо мендину не жонона.
Ҳар нечаки яхшиликда қилсан афсун,
Халқ ичра ёмонлик била мен афсона.

Ички түгён билан ўртаниб айтилган бу сатрларнинг тафти чўпоннинг бирдан ялтираб кетган кўзларида ако этди.

— Сен ҳам куйганлардан экансен, шоирлигинга тан бердим! Агар шу шоирлигинг бўлмаса, сени раҳматлик отамнинг қасдига итларимга талатиб юборар эдим! Хайр, шоир, омон бўл!

Чўпон итларини эргаштирганича чағатда ёйилиб юрган қўйларига қараб кетди.

Бобир шу куни Осмон Яйловдан Даҳкатга қандай тушиб келганини билмайди. У машъум ўтмишидан осонликча қочиб қутулолмаслигини, ёмон беклар Бобирнинг номидан қилган золимликларни одамлар ундан кўришини ўйлаб, вужудини янги бир безовталик чулғаб олди. Ёшлика бекларнинг ратьига қараб қилган хатолари бояги иккита ваҳимали итнинг қиёфасига кириб, ҳали ҳам кетидан қувиб келаётганга ўшарди.

Даҳкатда эса уни яна бир таҳликали хабар кутиб турарди. Шайбонийхон қўшинлари Ўратепага етиб келган, шаҳарга бозор қилиш учун борган даҳкатлик кадхудони хон кишилари тутиб олиб калтаклашган:

— Бобир яшириниб юрган жойни кўрсатасан!— деб талаб қилишгән эди. Юзлари қамчи изидаи қонталашиб бўлиб шишиб кетган эллик ёшлардаги кадхудо тожикчалаб:

— Мен меҳмонимни тутиб берадиган аглаҳ эмас!— деди Бобирга.— Ёвларингизни Оқтанги деган дарага бошлаб бориб, адаштириб, ўзим тоғма-тоғ қочиб қелдим!

Оқтанги Даҳкатдан ўттиз чақиримча гарбда эди. Хоннинг исказтопарлари бугун бўлмаса, эртага бу ерларга етиб қелиши муқаррар. Шайбонийхон Бобирнинг бўшини кесиб келганларга катта олтин ваъда қилган.

Ички ҳовлидан Қутлуғ Нигор хоним чиқди:

— Бобиржон, ҳаммамиз нажотни сиздан кутмоқдамиз! Дарвешона юришларни энди бас қилинг. Ҳамма

сизни қувғиндаги шоҳ деб билур, бошқа гапга ҳеч ким ишонмагай. Хон кишилари ҳам сизни тахтга даъво қилиши мумкин бўлган бир шаҳзода деб излаб юурулар. Даҳкатликлар ҳам шунча вақт бизга нону туз бердилар. Энди бу қишлоқ хавф-хатардан қутқарниш ҳам сизнинг бурчингиздир, жоним!

Бобир агар ёв билан бу ерда тўқнашса, қишлоқ оёқ ости бўлишини ўйлади. Бу ерда у билан бирга юрган онасини, бек ва навкарларини ёвдан омон сақлаш учун ҳам, ўзи бояги чўпонга ўхшаш қасоскорларнинг тасодифий қурбони бўлиб кетмаслиги учун, даҳкатлик кадхудонинг тузини оқлаш учун ҳам Бобир яна қайтадан қурол-яроғ тақишига ва одамларига бошчилик қилишига мажбур эканини, ҳозир шундан бошқа иложи йўқлигини ҳис қилди-ю, оғир «уҳ» тортиди:

— Шоҳлик тақдиримдан яланг оёқ қочиб қутулолмас эканмен! Жаноб Шеримбек! Сиз энди Қосимбекнинг ўринда амирал умаросиз!

Бобирни ўн икки ёшида Олатоғ томонларга олиб қочиб кетиб қутқармоқчи бўлган кекса Шеримбек тоғойи қувониб таъзим қилди:

— Иноятингиздан сарафрозмен, амирзодам! — де-ди.— Буюринг!

— Одамларимизнинг барчасига амримизни етка-зинг. Кўч-кўронни йиғиштиурсинлар! Шу бугун кечаси Даҳкатдан жўнаб кетгаймиз!

— Муборак буйруғингиз алҳол адо этилур, амирзодам!

Яна зирхли кийимлар кийган, қурол-яроғ тақсан Бобир ўша кеча тоғдан-тоққа ошиб кунчиқиши томонга — Исфарага қараб кетди.

4

Пастда Исфарасой тошларга бош уриб шовуллайди. Баланд бир қоятош устида ўтирган Бобир узоқларда — Хўжанддан наридаги Мўгултov устига сояси тўшалиб ётган оқищ булутларга қарайди. Ортидаги қорли тоғлардан совуқ шамол эсади. Водийлар эса ям-яшил баҳор либосини кийган.

Уфқнинг ҳаржар пардаси ортида — кўз илғамас узоқликларда Чотқол тоғлари-ю, Тошкент воҳаси бор. Жиззах ва Самарқандни, Марғилон ва Андижонни Бобир ҳо-

зир гўё хаёл кўзи билан кўрди-ю, бир вақтлар шундай кенг дунёда бехавотир, эркин юрган пайтларини эслаб, юрагини армон тимдалади.

Ҳозир мана шу улкан ватанда унинг осуда яшайдиган макони, тайинли бир уйи йўқ. Ҳаммаси Танбал билан Шайбонийхоннинг қўлига ўтиб кетган. Эшик оға Шерим тогойи Бобирни Хурсонга кетишга ундаиди.

Бироқ Бобир кетса ватанидан умрбод айрилиши мумкинлигини гўё олдиндан сезади. Йилгари туғилган юртида бемалол юрганда унчалик билинмайдиган ватан туйфуси энди ватанидан айрилиш хавфи туғилганда унинг бутун вужудини қамраб олган. У мана шу ўлкани неча қайта у четидан-бу четигача кезиб чиққан, унинг ҳар бир чақиримига кўз нурини тўкиб, ёшлигини уругдай сочиб ўтган. Унинг бутун умри, бутун борлиғи мана шу муаззам заминга илдиз отган. Энди бу илдизларнинг ҳаммасини қандай юлиб олиб кетади? Бунинг оғриғига қандай чидаш мумкин?

Аҳмад Танбал билан Шайбонийхон аввал бир-бири билан иттифоқ тузиб, ҳозир бир-бирининг пайнини қирқишига тушган. Шу кунларда улар жанг қилаётганини Бобир аниқ билади. Зора бу иккаласи бир-бирининг бошини еса-ю, Бобирнинг бекилган йўллари очилса...

Бобир шу умид билан Андижон томонга маҳсус одамлар юборган. У эртаю кеч шу одамларнинг хушхабар билан қайтишини кутади.

Лекин юборилган одамлар бир ярим ойдан бери қайтмаяпти. Нима бўлдийкин? Кутиш оғир. Кунлар бениҳоя секин ўтади. Бобир нима қилишини билмай тоғ ёnlари ни ёлғиз кезгани кезган. Тадбиркор Қосимбек кетиб қолмаганда балки ундан яхши бир маслаҳат чиқармиди? Жонкуяр сафдоши Нўён Кўкалдош ҳам йўқ — бултур Тошкентнинг жанубидаги Оҳангаронда бир номард уни баланд жардан ташлаб ўлдирған. Бир-биридан машъум хотиралар Бобирнинг хаёлида муттасил чарх уради. У интиҳосиз ғам-ғуссалар қуршовидан чиқиб кетишга интилиб, хаёлида шеър машқ қилиб кўрди. Аммо уни бу кўйларга солган даҳшатли воқеаларни қофияга солиб, оҳангдор қилиб айтишга ҳуши келмади.

* * *

Кечки пайт тоғларга туман тушди. Арчазор ёнида хаёл суриб юрган Бобир пастдаги водий йўлларини

ҳам туман тўсиб қўйганини кўрди-ю, сой бўйига келди.

Қуюқ туман дунёни алланечук тор ва совуқ қилиб қўйди. Йисфарасойнинг юқори-пастлари ҳам кўздан йўқолди. Тезоқар тоғ дарёчасининг қаёқдан келиб, қаёқ-қа кетаётгани энди фақат унинг тошларга урилиб шовуллашидан билинар эди, холос.

Бобирнинг ҳозирги қароргоҳи мана шу сойнинг яқинида — кенг бир сайҳонликда эди. Баландроқ бир жойда унинг қизил мовут чодири бор. Чодирнинг ўнг ёнида Қутлуғ Нигор хонимнинг саккиз бурчакли оқ ўтови турипти. Қолган йигирма-ўттизга ўтов ва чодирлар уларнинг нари-берисига ўрнатилган. Совуқ туман ичидаги чодир ва ўтовлар гўё бир-бирларидан узоқлашиб кетгандай ва ҳаммасини моғор босаётгандай кўринарди.

Бобир йўлида учраган одамларнинг таъзимларига индамай бош иргаб ўтди-ю, Мамадали китобдорнинг ўтови томонга бурилди. Бу ерда Бобир доим ўз кўчи билан бирга олиб юрадиган китоблари сақланар эди. Беш-олти туяга юк бўладиган нўдир китоблар қалин чарм қопланган маҳсус сандиқ ва қутиларга ёғин-сочин ўтмайдиган қилиб жойланган эди. Қексайиб қолган бўлса ҳам ҳамма сафарларда Бобир билан бирга юрадиган заҳил юзлик эллик беш яшар Мамадали китобдор китобларни худди чақалогини авайлайдиган онадай авайлаб асрар эди. У Бобирга таъзим қилиб:

— Буюринг, амирзодам! — деди.

Бобир тарихий китоблардан бир-иккитасининг номини айтди.

Мамадали китобдор китобларга қўл уришдан олдин қўлни яхшилаб ювадиган одати бор эди.

— Сиз мунтазир бўлманг, қулингиз элтурмен!

Бобир ўтвдан чиқиб ўз чодирига кирди. Орадан анча вақт ўтгандан кейин Мамадали китобдор айтилган китобларни ипак матога ўраган ҳолда икки қўллаб кўтариб кирди-ю, тўрдаги миз устига секин қўйиб, орқаси билан юриб чиқиб кетди.

Бобир машҳур саркардалар ва шоҳларнинг ҳаётлари ҳақидаги тарихий китобларни варақлар экан, мураккаб жумлалар, жимжимадор ўхшатишлар, афсона ва ривоятлар орасидан чинакам бўлган ва одамни ишонтирадиган воқеаларни изларди. Лекин кўпчилик китобларда нуқул ғалабалар дабдабали услугуб билан куйланарди.

Эҳтимол, ҳозир Шайбонийхон ҳақида ҳам мана шундай дабдабали қитоблар ёзилаётгандир. Бобир Бинойнинг яна Шайбонийхон томонига ўтиб кетганидан, Муҳаммад Солиҳ эса «Шайбонийнома»деган шеърий қитоб ёзаётганидан хабардор эди. Улар Шайбонийхоннинг Бобир билан олишганларини қандай ёзишаркин? Мана бу қитоблардаги каби ғолибни кўкларга кўтариб, мақташса, Бобирга бўлмаган айбларни тақиб, уни ёмонлашса, кейин одамлар ҳақиқатни қаердан билади?

Бобир нуқул зафар тантаналарини куйлаган жангномаларни бир четга сурib қўйди. Сўнг ўрнидан туриб, ўзининг «Вақоиъ» деб аталган хотира дафтарларини сандиқдан олди.

Қизиқ: сўнгги дафтарга Бобир ўзининг Самарқандни Шайбонийхондан қандай тортиб олганини ёзгану қейин унга қўл урмаган эди. Демак, кейинги мағлубият ва ғаргардонликларни унинг ўзи ҳам ёзишни истамаган скан! Аммо булар дафтарга ёзилмагани билан Бобирнинг хотирасида муттасил такрорланиб юриби-ку. «Иситманни яширсанг ичга урар», дейдилар. Бобир қилган хатоларини дафтаридан яширгани билан улар ҳар куни исча қайта янги-янги тафсилотлари билан хаёлидан ўгиб, қалб ярасини тирнагани тирнаган. Бундан кўра ҳамма воқеаларни ростгўйлик билан мана бу дафтарга ёзса, балки ўшанда иситма ташига чиқиб, дили хиёл енгиллашар?

Бобир дафтарига Сарипулда қандай мағлуб бўлганини, кейин қандай хўрликлар кўрганини ёза бошлиди.

У бу ишни гўё ўзи учун ўз виждони олдида ҳисоб бергиси келиб қиласарди. Шунинг учун боя ўқиган қитобларидаги жимжимадор, баландпарвоз услуб бу ёзувларга мутлақо ярашмаслигини сезарди. У бошидан кечирган ҳодисаларини энг ишонган сирдошига айтиб дардлашашётган одамга ўхшаб ёзарди. Фақат унинг эндиги сирдоши — ўзи-ю, мана шу дафтари эди. Қўшиқ бўлиб кетган ғазалида «Қўнглимдан ўзга маҳрами асрор топмадим» деган Бобир энди ўзининг мана шу эътиқодига амал қилиб, гўё ўзига-ўзи роз айтар эди.

У чагракларга қарши чопқин бўлганини ҳам, Аҳмад Танбалга инъом қилган қиличи ахийри ўз бошига келиб тушганини ҳам, ҳатто яланг оёқ юрганидан оёқлари тоғу тоғни сезмайдиган бўлиб кетганини ҳам содда, ра-

вон, ҳақгўй тил билан ёзгани сари қалбини шеър ёзган-
даги каби жўшқин бир илҳом чулғаб олди.

Шоҳлик тақдиридан қочиб қутулмадими, энди бунинг
ҳамма даҳшатларини очиқчасига ёзади! Бобир билган
тождорларнинг ҳеч бири ўзининг бошидан кечирганла-
рини рўй-рост айтиб берган эмас. Лекин одамлар доим
ҳақиқатни билишга ташна. Бобир мана шу ташналикини
озгина бўлса ҳам қондира олса унга берилган истеъ-
дод бекор кетмайди, бошига тушган машаққатлар эса
бошқаларга сабоқ бўлиши мумкин. Унинг подшоҳ бўлиб
кўрган-кечирганлари ҳаққоний китобга айланса, қилич
билан мулк ололмаган Бобир балки қалам билан киши-
ларнинг қалбини забт эта олар? Бу ҳам бир баҳт эмас-
ми?

Шу ўйлар билан хотира ёзишга берилиб кетиб, қо-
ронғы туша бошлиганини ҳам сезмади. Савдарлар ол-
тин қандилдаги шамларни ёқдилар. Бобирга кечки ов-
қат келтирдилар. У ёлғиз ўтириб овқатланди. Хотира
ёзгалида унга ўз ҳаёти аввалидан иликроқ ва маъноли-
роқ түюлган эди. Бекор ўтирганда эса яна ўша оғир
ўйлар, совуқ пушаймонлар хаёлига босиб кела бошлиди.
Бобир улардан тезроқ қутулгиси келиб, яна қаламини
қўлига олди.

Кейин ярим тунгача дафтиридан бош кўтармай сўнг-
ги йилнинг воқеаларини ёзди.

* * *

Атрофдаги ўтовлар жим, ҳамма уйқуда.

Тун сукунатида отнинг дупури, итларнинг ҳуриши
эшишилди. Қароргоҳнинг четига қўйилган қоровул зарда
қилиб:

— Тўхта! Кимсен? — деди.— Ўронни¹ айт!

— Ўрон — Андижон.

Қоровулнинг овози юмшади:

— Андижон бўлса келавер. Овозингдан Тоҳир чопуқ-
қа ўхтайсанми?

— Ҳа, Тоҳирмен.

— Бемаҳалда ёлғиз юрибсен?

— Мени гапга тутма. Мирзо ҳазратларига шошилинч
хабар келтирдим.

¹ Ўрон — пароль.

Тоҳир қоронғида Бобирнинг чодирини тусмоллаб топди-ю, отини берироқдаги қозиққа боғлади. У аввал соқчиларни ёки мулозимларни уйғотмоқчи бўлиб, чодирнинг рўпарасидаги ўтовга қараб ўта бошлади. Шунда чодирнинг ичи ёруғ эканини, эшик ўрнига тутилган парда очилиб, Бобир чиқиб келганини кўрди. Тоҳир Бобирнинг қаршиисига келиб юкунди. Паст товуш билан:

— Амирзодам, мунтазир қылганим учун афв этинг,— деди.— Ёғийларингизнинг уруши энди тугади.

Бобир сабрсизланиб сўради:

— Хушхабар борми? Нечун ёлғиз қайтдингиз?

Тоҳир бошини қуий солиб, ҳазин товуш билан деди:

— Бир қошиқ қонимдан кечинг, амирзодам!..

Бобир совуқ хабарлар изғиринини олдиндан сезгандай эти увшуди:

— Қани, ичкари киринг.

Савдарлар ухлаб қолган. Бобир ҳеч кимни уйғотгиси келмади. Баланд, кенг чодирнинг тўрида тўрт-бешта шам липиллаб ёниб турибди.

Бобир шам ёруғида Тоҳирга энди зеҳн солиб қаради. Чакманинг этакларига лой сачраган. Озиб кетганидан елкалари пуччайиб қолган, кўзлари ичига ўпирилиб тушган. Юзидаги чандиги эса бўртиб, гўё аввалгидан хийла катта бўлиб кетган. Лаблари пирпираб, ўпкаси тўлиб гапирди:

— Амирзодам, Андижон ҳам Шайбонийхоннинг илкига ўтди. Беҳисоб қўп одам қирилди. Ҳамроҳим қирғинда ҳалок бўлди.

Тоҳир шунчалик чарчаган эдики, гавдаси чайқалиб, оёқ устида зўрга турар эди. Сўнгги умидидан ҳам айрилиб бўшашган Бобир кўрпача устига ўтиб ўтириди-ю, Тоҳирни ҳам ўтиришга таклиф қилди.

Тоҳир гилам устига чўйкалаб ўтиргач, Бобир ундан воқеанинг тафсилотини ва Аҳмад Танбал нима бўлганини сўради.

Тоҳир Андижон яқинидаги Хўжа Катта деган қишлоқда бой бир одамга аравакаш бўлиб ёлланган, ўзининг кимлигини билдирмай, бутун ҳодисаларни одамлардан сўраб билган, бойнинг шаҳардаги дўконига мол олиб борганда кўп нарсани ўзи ҳам кўрган эди.

Аҳмад Танбал Андижон этагида бўлган жангда шикаст егандан кейин қўргонга кириб бекинади. Қамал бошланади. Қўргон ичиди очлик, касаллик ва нифоқ ку-

чаяди. Бир вақтлар Самарқандда Бобирни ташлаб, Аҳмад Танбалга эргашиб қочган бек ва навкарлар энди унинг ўзини ташлаб, Шайбонийхон томонига қочиб ўтадилар. Хоннинг қўшини деворга шоти қўйиб чиқиб, қўргонни босиб олади. Аҳмад Танбал акаси Бек Тилба, укалари ва бошқа одамлари билан аркка кириб бекинишади. Бироқ аркнинг атрофида уйлар кўп, уларга орқадан шоти қўйиб томига чиқиши осон. Аҳмад Танбал аркда жон сақлаёлмаслигини сезади-ю, Шайбонийхондан шафқат сўрашга қарор беради. «Ийқан барча олтинларимни ҳазрати хонга моли амон тариқасида тўламоқчимен, умрбод хизматларида бўлмоқчимен, қонидан кечсинлар!»— деб аркдан бир мўйсафидни вакил қилиб чиқаради. Аммо мўйсафид аркка қайтиб келмай йўқ бўлади. Хон аскарлари аркнинг томлари устига шоти қўйиб чиқа бошлайдилар. Талвасага тушган Аҳмад Танбал ака-укалари билан бирга аркнинг дарвозахонасига боради. Таслим бўлганинг кўрсатиш учун қиличларини бўйинларига осиб, дарвозадан ташқарига шафқат сўраб чиқадилар.

Арк дарвозаси олдида Шайбонийхоннинг ўғли Темир Султон турган экан. Навкарларига: «Асир олма, арзимайди, қир ҳаммасини!»— деб буйруқ беради. Аҳмад Танбални ака-укаларига қўшиб, қилич билан чопиб, бурдалаб ташлайдилар. Кейин бошларини кесиб бир қонга тиқадилару Шайбонийхонга кўрсатгани олиб кетадилар.

Тоҳирнинг ҳикояси шу ерга келганда Бобир:

— Е худоё тавба!— деб беихтиёр ёқасини ушлади.

Сўнгги пайтларда Бобирни эзиб юрган жавобсиз саволлардан бирига ҳозир гўё момақалдироқдай ваҳимали жавоб келган эди. Хўжа Абдулладай мард, фидокор одамни қўргон дарвозасига осиб ўлдирган Аҳмад Танбалнинг ўзи энди ўша қўргондаги арк дарвозаси олдида итдай хор бўлиб ўлган эди! Бобир инъом қиласан қиличини унинг бошига разилона урган Танбал энди бошқа қиличлар зарбидан бурдаланган эди!

Тоғдаги чагракларнинг бошини ваҳшийларча кесиб, хуржунга солиб келган Танбалнинг ўз бошини янада ваҳшийроқ бир тарзда кесиб, қопга солиб кетган бўлсалар, уни, албатта хонга элтиб кўрсатганлар.

Бобир қондан Шайбонийхоннинг оёғи тагида юмалаб тушган таниш каллаларни кўз олдига келтирди. Мах

мудхонда эшик оға бўлиб юрган Тилба Султоннинг йўғон бўйинли семиз бошини Шайбонийхон таниган бўлса керак. Аммо хон Аҳмад Танбалнинг калласини танимайди. Шайбонийхон ўзини шунча овора қилган Аҳмад Танбалнинг башарасини кўриб қўйгиси келади, аммо юзтубан тушган қонли каллага қўл ургиси келмайди. Аҳмад Танбалнинг қонли калласини оёғининг учи билан юмалатиб, ўнглаб сийрак соқолига, суяги бўртган кенг юзига қарайди.

Бобир ўзича тасаввур этган бу ҳодисадан ақли шошиб:

— Оббо! Оббо! — деб бир неча марта такрорлаб қўйди.

Бу ҳодисаларда қандайдир ўзгача бир адолат борлигини сезган Бобир бошқа воқеаларни ақлига сифдиролмай лол бўлиб қолди. Шайбонийхон бераҳмликда Аҳмад Танбалдан ҳам ўтиб тушган-ку. Наҳотки фалак интиқом қиличини шундай шафқатсиз хоннинг қўлига бериб қўйса? Бир вақтлар Бобир орзу қилган, аммо етишммаган улкан мақсадга — Мовароуннаҳрдаги пароканда вилоятларни бирлаштириб, ягона кучли давлат барпо этиш мақсадига — энди Шайбонийхон етишмоқдами? Наҳотки бунинг учун Шайбонийхондай маккор, золим ва шафқатсиз бўлиш керак эди? Тоҳир Андижонда хоннинг буйруғи билан бўлган қирғиннинг тафсилотини айтиб берганда Бобирнинг соchlари тикка бўлиб кетди. Мингларча аёллар, ўсмирлар, чоллар Аҳмад Танбалнинг одамлари қаторида бекордан-бекорга нобуд қилинган эди. Наҳотки ҳозирги зўрлар замонасида енгиб чиқиш учун Шайбонийхондай зўравонликлар қилиш шарт бўлса?

Бобир маърифатли шоҳ бўлишга уриниб, шеъру санъатга кўп вақт бериб, инсофу диёнатни ўйлаб, наҳотки шу туфайли Шайбонийхонга ютқизган бўлса?

— Амирзодам, хон кишилари сизни сўроқлаб юрганларини эшийтдим. Айғоқчилари ҳид олиб Исфарага келиб қолсалар ҳам ажаб эмас!

Бобир ота юритидан батамом ажралганини энди астойдил ҳис қилди. Аҳмад Танбалнинг мағлубияти булоқнинг кўзига тушган янги бир кўчки эди. Тогнинг бу томонида булоқ қайтадан кўз очиши мумкин бўлган йўлларнинг ҳаммаси бекилди. Агар Бобир тезроқ тоғ ошиб

Хуросонга кетмаса, Шайбонийхон айланиб ўтиб, унинг сўнгги йўлини ҳам бекитади!

Бобир изтироб ичидা Тоҳирнинг оддий бир навкар эканлигини ҳам унуди-ю, унга ҳасрат қилиб гапирди:

— Хонумондан айрилганимиз озмиди? Энди ватандин ҳам жудо бўлурмизми?!

Бобирнинг кўзи ёшланганини кўрган Тоҳирнинг ҳам кўнгли бузулиб, лаблари пирпиради:

— Амирзодам, мусофирилик ғами менинг ҳам юрак-бағримни ўртайди. Бизнинг Қувалар ҳам хоннинг пошинаси тагида мажақланди. Агар борсам мендан Фозилтархоннинг қасдини олишлари аниқ. Биз ҳам киндик қони томган жойдан айрилдик, амирзодам. Мусофирилик тақдиримизда бор экан. Исфарада ҳам мусофирилиз. Ҳисорга борсак ҳам, ундан нарига кетсан ҳам шу мусофирилик... Йўлда келаётib ўйланиб келдим. Мен сиздан ажралмаймен, амирзодам!

Тоҳир бутун нажотни одил подшоҳдан излайдиган деҳқонтабиат йигит эканини Бобир биларди.

— Лекин мен сиз кутгандек одил подшоҳ бўлолмадим!— деди Бобир.— Келгусида бўламенми, йўқми, ҳали номаълум...

Орага бир лаҳза сукунат чўмди. Ташқарида Исфарасой гўё тун сукунатидан фигони чиқиб шовуллар эди.

Чодир ичидা қувфидаги шоҳ билан унинг оддий навкари юзма-юз ўлтирибди. Ватандан ажралиш мусибати олдидা уларнинг ораларидағи катта фарқ гўё кичрайиб, аҳамиятсиз бўлиб қолган. Бошларига тушган кўргиликлар уларнинг тақдирларини бир-бираига ўхшаш қилиб қўйган. Шунча йил жанг жадалларда бирга юриб, қанчадан-қанча ўлим хавфларини бирга кечирган бу икки йигит бугун биринчи марта сирдошларча очиқ сўзлашмоқда эдилар. Тоҳир бошқа вақтда Бобирга айтольмайдиган сўзларини ҳозир кўнгли юмшаб, эриб турган пайтда айтди:

— Амирзодам, мен бир навкарингиз бўлсан ҳам сизга туғушқонимдек меҳр қўйганмен. Ботирлигизгами, шоирлигингизгами, одамгарчилигингизгами,— ишқилиб, менинг... сизга ихлосим зўр! Сизга ёмонлик қилганлар бирин-кетин йўқ бўлиб кетгани бежиз эмас! Сизнинг шунча хавфу хатарлардан омон қолганингиз ҳам катта давлат!

Шу топда Тоҳир суюкли инисиға меҳри тобланиб, оғир пайтда унинг кўнглнни кўтараётган жонкуяр акага ўхшар эди. Дарҳақиқат, у Бобирдан етти ёш катта эди. Бобир ҳам бир лаҳза шоҳлигини унутиб, Тоҳирга худди акасига қарагандай қаради:

— Мени жуда кўп хатарлардан сиз олиб қолгансиз. Мен сиздан кўрган яхшиликларимнинг ўндан бирини ҳам қайтарган эмасмен. Сиз менга туғишган оғамдек қадрдоңсиз.

— Раҳмат сизга.

— Лекин ҳозир менинг кўнглим ер билан яксон. Тақдир менга истеъдод берган, куч берган, ғайрат берган, аммо нечун баҳт бермаган?!

— Бу замонда баҳт ўзи йўқ, амирзодам! Ахир сиздек нодир истеъдодлар дунёга ҳар куни келмайди-ку. Нодон тождорлардан қон йиғлаган эл-юртимиз сиздек маърифатли саркардага муштоқ. Лекин баҳил замона ғалабани золим хонга бериб, бизни, мана ватанимиздан ҳам жудо қилмоқчи. Илоҳим бу баҳил замонанинг боғлари қуриб кетсину сизу бизнинг қадримизга етадиган яхши замонлар ҳам келсин! Энди... амирзодам, бу ердан тезроқ кетиш керак. Ҳирот ҳам бизга бегона юрт эмас. Подшоҳ Ҳусайн Бойқаро сизнинг қариндошингиз. Менинг тоғойим Мавлоно Фазлиддин ҳам Ҳиротда экан..

Бобир Хуросонга кетмай иложи йўқлигини ўйлади-ю, ошиб ўтиши керак бўлган тоғларни кўз олдига келтирди. Узоқдан мовий тусга кириб беҳад жозибали кўринадиган бу тоғлар тик довонлардан, хатарли учмалардан ўтиши керак бўлган одамга қанчалик тунд ва бераҳм кўринади! Ҳозир Бобирнинг тасаввурида баланд чўққиларнинг асрий қорлари кафандай беҳаракат ва совуқ, ўлимдай абадий бўлиб гавдаланди.

— Хатарли йўлларда мен ўз жонимни аввал худога, сўнг сизга ишониб топшироқчимен. Бугундан бошлаб сиз менинг қўрчибошимсиз. Ички бекларим қаторида бўлурсиз.

— Иноятингиздан миннатдормен, амирзодам!

— Ҳозир бу иноятнинг шарафидан азоби кўпроқ. Йўлда ҷарчагансиз. Бориб дам олинг. Эртадан сафар тайёрлиги бошланур.

Тоҳир таъзим қилганича чиқиб кетди.

Бобирнинг уйқуси келмас эди. У яна чодирдан чиқди.

Кундузги туман тарқаб кетган, лекин осмонда булут бор.

Юлдузлар онда-сонда кўриниб қолади. Исфарасой осмонни бошига кўтариб шағирлайди. Тунда тоғларнинг қораси кундузгидан ҳайбатлироқ кўринади.

Бобир қол-қора тоғларга тикилиб турганда яна кўчки босган булоқ эсига тушди. Тоғларнинг бу томонида ҳамма йўллари бекилган булоқ энди тоғларнинг нарёғидан кўз очиб чиқа олармикин? Үлугтоғдан нарида баҳайбат Помир. Ундан нарида Ҳимолай ва Ҳиндикуш...

Булоқ бу тоғларнинг ҳаммасидан ўтиб бориб, нарёқларда қайтадаң кўз очиш ўчун қанчалик катта қўч-қудрат керак!..

ИККИНЧИ ҚИСМ

ФАЛАКНИНГ ГАРДИШИ



ҲИРОТ. Тўлган паймоналар

1

Ҳазонрезлик пайти. Ҳирот боғлариға сув берадиган Ҳирийруд дарёси ва Инжил анҳорининг қирғоқларига заъфарон япроқлар тўкилган. Қалъа ташқарисидаги машҳур Бояни Жаҳоноро, Бояни Мухтор, Бояни Зубайдা, Бояни Чаманлардаги узумзор ва анорзорлар ёз бўйи кўтариб турган меваларидан айрилиб, яккам-дуккам қовжироқ барглар билан сўппайиб қолганлар.

Бироқ бу жанубий шаҳарда кузнинг ҳазонрезлик одатига бўйсунмайдиган дарахтлар ҳам кўп. Ҳиротга Қандаҳор томонидан келишда ўйл бўйидаги хиёбон ва сайдироҳларда ўсан мингларча сарвлар, санобар¹ дарахтлари кузда ҳам баҳордагидек яшнаб турибди. «Ҳусайн Бойқаро ҳовузи» деб аталган улкан тошҳовуз бўйида кумушранг жажжи япроқлари қуши тилини эслатадиган баланд ва гўзал лисониттайр дарахтлари бор — булар ҳам ҳазон нималигини билмайди.

Лисониттайрнинг барглари яра-чақага дорилигини эшигтан Тоҳир ҳовуздан берироқда отдан тушди-ю, жиловини ёшгина навкарига тутқизди. Сўнг ўзи ҳовузнинг хилватроқ томонига ўта бошлади. У доривор барглардан юлиб олиб кетмоқчи бўлиб, тепадаги шохларга тикилиб бораётгандан қаршидан кимдир:

— Менга қаранг, бек йигит! — деб қолди.

Тоҳир дарахтнинг йўғон танаси ортидан чиқиб ке-

¹ Санобар — нина барги оч ҳаворанг тусдаги гўзая қарағай-симон дарахт. Бизда масалан, Сайробда ва Ялта атрофларида учрайди.

лаётган мулланамо кишини кўрди. Нимасидир Фазлиддин тоғасини эслатиб, юрагини ҳаприқтириди. Аммо соқолининг узунлиги-ю, юзининг кексанамо кўрикиши Тоҳирни шубҳага солди. У одоб билан:

— Лаббай,— деб салом берди.

Тоҳирнинг юзидағи ханжар изига тикилиб турган ҳалиги киши энди унинг овозини ҳам таниди-ю:

— Тоҳир! Жияним!— деб қичқириб юборди.

Тоҳир ҳам энди тоғойисини таниб, қучоқ очганича унга қараб отилди. Ҳовузнинг шишадай тиниқ сувида уларнинг акслари бир-бирига қўшилиб кетди.

— Ватанимнинг ҳидини олиб келган, жияним! Худога шукур, эсон-омон экансен!

Мавлоно Фазлиддин жиянини қучоғидан қўйди-ю, қўзидан юзига оқиб тушган қувонч ёшларини артиб, Тоҳирнинг кумуш камарига, беклар тақадиган қимматбаҳо ханжарига ва сақорлот чакмонига энди разм солиб қарди. Тоҳирнинг бошидаги дубулғанинг тепасида ҳам бекларга хос кичкина байроқча бор эди.

— Жияним, мартабанг ошибдими?

— Ҳа, тоға, қўрчибегимен.

— Муборак бўлсини. Илоҳим сенга ёмон бекларнинг таъсири урмасин!

— Бобир мирзо ҳам ёмон бекларидан безгандан кеши биттасининг ўрнига мени қўйди... Хўш, ўзингиз қалайсиз, мулла тоға? Келганимдан бери қидирамен. Сўроқлаб-суриштирай десам, таниш-билиш йўқ.

Ёши қирққа кирав-кирмас юзига ажин тушган Мавлоно Фазлиддин маъюс товуш билан деди:

— Юрибмиз... Тупроқдан ташқарида. Худо бизни омадсиз яратган экан-да, жияним. Бу ерга келиб, энди Ҳавоий ҳазратларининг марҳаматларидан баҳраманд бўлай деганимда, у зоти олий вафот этдилар. Катта қурилишлар Ҳусайн Бойқаро замонида ҳам унча-мунча бўлиб турган эди. Мана шу йил Ҳусайн Бойқаро ҳам оламдан ўтди. Қурилишлар тақа-тақ тўхтаган. Бизга ўшаганларга яна иш йўқ!

— Ундан бўлса, Бобир мирзога бир учранг.

— Бобир мирзо ҳам бу ерда меҳмон... Мени қабул қиласдими, йўқми? Орада нозик гаплар ўтган.

Тоҳир Мавлоно Фазлиддин билан Ҳонзода бегим орасида бўлган мураккаб воқеаларнинг чет-ёқасини эшигтан эди:

— Бўлмаса аввал мен у кишини холи топиб, сиз тўғриңгизда гап очиб кўрайми, мулла тоға?

— Майли, буни кейин яна маслаҳатлашурмиз. Оббо жияним-эй! Мен Бобир мирзонинг Ҳиротга келганларини эшиганимдан бери «сен ҳам бормикинсен, йўқмикинсен» деб ҳар бир навкарга кўз тикиб юрган эдим... Қани энди, юр, уйга борайлик! Агар сенга мана бу доривор япроқлар керак бўлса, уйдан топиб берамен. Бизнинг боғчада ҳам шу дараҳтдан бор.

— Боғчада... бир ўзингизмисиз ёки уйландингизми, мулла тоға?

— Уйланганмиз, жиян. Навоий ҳазратлари ҳаслаҳат бердилар. У кишида боғбон бўлган дуруст бир одамнинг қизи бор экан...

— Муборак бўлсин! Фарзандлар ҳам борми?

— Ҳа, бир ўғил, бир қиз.

— Э, ажойиб-ку! Үндай бўлса, мен уйингизга тўёналар билан борурмен!

— Узингни кўрганим минг тўёнадан афзал, жиян! Қани, юр!

Тоҳир бир неча қадам юрди-ю, кейин ниманидир эслаб, осмонга қаради. Офтоб оғиб борар эди.

— Мулла тоға, уйингиз яқинми?

— Йўқ, узоқроқ. Шаҳар четидаги Назаргоҳ маҳаллотида. Нима эди?

— Мен ҳозир бир соатдан сўнг хизматда бўлмоғим керак эди. Подшоҳ буюрган эди.

— Оббо!.. Үндоқ бўлса... Шу ерда бирпас ўтирайлик. Мен сал дийдорингга тўяй! Узинг қалайсен, жияним, уйланганмисен?

Тоға-жиян ҳовуздан четроқдаги тош курсига бориб ўтиридилар. Тоҳир Робияни қандай топганини айтиб берди-ю:

— Кобулга келиб битта ўғилча кўрдик!— деди.— Отини Сафарбек қўйдик.

— Э, хайрият! Мен бир вақтлар ҳамма нарсадан умидимни узган эдим. Сени ҳам қайта кўролмасмен деб ўйлаган эдим. Бош омон бўлса, ҳаммаси ўтар экан... Сен билан биз-ку, қутулиб келдик-а! Андижондагиларниг аҳволи не бўлди?

— Буни сўраманг, мулла тоға! Шайбонийхоннинг қирғини кечалари тушимга кирса, босинқирағ чиқамен!..

У ёқда роса абор бўлиб, икки юз қирқтагина одам би-

лан Хуресонға қараб жүнадык. Ҳисор тоғларининг орасида роса қийналдик. От-уловлар ўлиб-сўйилиб тамом бўлган. Бобир мирзо ҳам отини онасига бериб, ўзи пиёда юради. Оёқларимизда чориқ. Қўлларимизда таёқ. Турадиган жойнинг тайини йўқ. Бирор бери кел, демайди. Арзимаган амалдорлар Бобир миরзодай одамга беҳурматлик қилиб «йўлларингдан қолманглар, Ҳисордан тезроқ ўтинглар», дейди. Бизнинг ғазабимиз келиб, қўпол гапирган амалдорларни чопиб ташласак деймиз. Лекин Бобир мирзо: «Бардош қилинглар, «теэроқ Амударёдан ўтиб олайлик», деб шоширади.

— Лекин шоширганича бор экан-да, жиян. Сизлардан сал кейин Шайбонийхон Ҳисорни ҳам босибди-ку.

— Ҳа, кейин билсак, Бобир миризо узоқни ўйлаб шундай қилган эканлар. Ҳисор подшоси Ҳисравшоҳ умрида бир мушук билан ҳам урушиб кўрмаган қўрқоқ одам экан. Бекларнинг кўпчилиги ундан норози экан. Бобир миризога махфий одамлар юбориб, «Келинг, Ҳисорни сизга берайлик!»— дер эканлар. Лекин Бобир миризо фитнага аралашмади. «Келинг», деган ҳалиги бекларга, «Хоқон бўлсаларинг ўзларинг келинглар», деб яхши гаплар айтиб, одам юбордилар. Биз Амударёдан бу ёққа ўтганда Шайбонийхон Ҳисорга бостириб кирибди. Қўрқоқ Ҳисравшоҳ хон билан жанг қилишга юраги бетламай, пойтахтни ташлаб қочибди. Унинг ўттиз минг қўшини тарқаб кетибди. Ўзингиз биласиз, мулла тоға, бундай пайтда беклар номи улуғроқ бир подшоҳ излаб қолишади. Бобир миризо Шайбонийхон билан дадил жанг қилгани, бирда енгилган бўлса, бирда уни енггани эсларига тушади. Илгариги эшик оға Қосимбек ўша пайтда Ҳисор қўшинининг орасида эди. Унинг Бобир миризога ихлосмандлигини биласиз. Хуллас, ини бузилган арига ўхшаб тарқаган Ҳисор қўшини Амударё бўйида бизга келиб қўшилаверди. Энг аввал Боқибек Чагониёний дегани тўрт юз аскари билан келди. Бобир миризо унга кутганидан зиёда ҳурмат кўрсатди. Боқибекни энг баланд мартабали эшик оға қилиб қўйди. Кейин Ҳисравшоҳнинг бошқа беклари-ю, навкарлари кетма-кет келиб бизга қўшилаверди-да. Ўзимиз дарёдан икки юз қирқтагина одам ўтган эдик. Бир ой ичидаги тўрт мингга етдик...

Мавлоно Фазлиддин жиянининг сўнгги йилларда бир қадар ўзгариб қолганини энди аниқроқ сезди. То

>Toχir илгари бунчалик силлиқ сўзлай олмас эди. У гапдан аслзодалар орасида кўп юриб, мулозимларга хос мураккаб иборалар ишлатишга ўрганган эди:

— Биз Кобулга келсак, аргин деган уруғдан Мұқимбек ҳоким бўлиб ўтирган экан. Тахт даъво қилишга ҳаққи ҳам йўқ, биз билан олишадиган кучи ҳам йўқ. Кобулни бизга жангсиз берди. Кейин Ҳусайн Бойқародан Бобир мирзога хат берди. «Черик билан келинг, Шайбонийхонга қарши иттифоқ бўлиб чиқайлик», дебди. Отда қирқ кун юриб шунча жойдан келсак, Ҳусайн Бойқаро оламдан ўтибди.

— Бир жиҳатдан Кобулни пойтахт қилиб, бу ерга обрў билан келгандаринг яхши бўлибдир, жияним. Акс ҳолда, Ҳусайн Бойқаронинг калондимоф ўғиллари Бобир мирзони писанд қилмаган бўлур эди.

— Лекин ҳозир ҳурматимиз жуда жойида. Шаҳар ҳокимини бизга қўшиб қўйганлар. Ҳиротни айлантириб роса томоша қилдирди. Қатта даргоҳларда ҳар кун зиёфат. Бугун кеч Бобир мирзо яна саройга боришлири керак эди...

Toχir осмонга кўз ташлаб, офтобнинг анча пасайиб қолганини кўрди-ю, безовталаниб ўрнидан қўзгалди:

— Мулла тоға, мен кеч қолсам бўлмас. Сизнинг уйингизга эртага борсам майлими? Қандай топиб борамен? Шуни айтинг.

Улар Toχirнинг отини жиловидан тутиб турган навкарнинг олдига боргунларича Мавлоно Фазлиддин уйининг қаердалигини Toχirга батафсил тушунтириди. Toχir отининг жиловини навкарининг қўлидан олар экан:

— Мулла тоға, отингиз қани? — деди.

— Жияним, мен пиёда юрамен,

— Уйингиз узоқ бўлса ҳам-а?

— Урганиб кетганмен.

Toχir тоғасининг камбағаллашиб қолганини энди сезди-ю, отининг кумуш безакли юганини Мавлоно Фазлиддинга тутқазди:

— Бўлмаса мана шу от сизники.

— Узинг-чи, жияним?

— Отхонада менинг яна иккита отим турибди. Миннинг!

Toχir тоғасини қўймасдан отга миндириди-ю, белига қистирилган қимматбаҳо қамчини ҳам тоғасига берди.

— Сиз Ушда менга миндириб юборган отнинг қулу-

ни бу, мулла тоға. Ушанда мени бошдан-оёқ кийинтирган ҳам әдингиз-а, эсингиздами?

— Э, баш омон бўлса дўппи топилади, жиян! Буни эслатиб ўтирма.

«Аммо эртага келин аяга ҳам, болаларига ҳам бошоёқ кийимлик олиб бориб, тоғамни яна бир суюнтиришим керак!» — деди Тоҳир ўзича.

Иккинчи от устида ўтирган ёшгина навкар нима бўлаётганига уччалик тушунмаса ҳам тоға-жиянга анграйиб қараб турарди.

Мавлоно Фазлиддин хўшлашиб кета бошлади. Тоҳир навкарига қараб шипшиди:

— Фаросатинг борми?

Бекни пиёда қолдириб, навкарнинг отлиқ туриши чиндан ҳам одобга тўғри келмас эди. Ёш навкар буни эртароқ сезмаганидан изза бўлиб отдан сакраб тушди ва жиловини Тоҳирга тутди:

— Афв этинг, бек жаноблари.

Мавлоно Фазлиддин орқага ўгирилиб қаради-ю, Тоҳир навкарнинг отида бекларча савлат тўкиб бораётганини, навкар эса унинг ёнида йўргалаб пиёда кетаётганини кўрди. Навкардан чиққан баъзи беклар обрўталаб бўлиши Мавлононинг эсига тушди. «Ишқилиб, Тоҳир ўшаларга ўхшамасин-да!» — деб қўйди ичидা.

2

Бугун ўн етти кундирки, Бобир Ҳиротда Алишер Навоий истиқомат қилган муҳташам Унсияда¹ яшайди. Унсиянинг баланд пештоқлари, нилий гумбази, офтобда жилоланган ранг-баранг кошинлари Бобирга Самарқанддаги Улуғбек мадрасасини эслатади. Лекин Унсиянинг тўрт томонидаги тўртта минораси Улуғбек мадрасасиникидан баландроқ, бинонинг ҳажми ҳам каттароқ эди. Ўзи бундан ўн беш йилчагина олдин қуриб битирилган, ҳали ҳамма безаклари яп-янги эди.

Унсиянинг ичидаги хоналардан бир қанчасини Навоийнинг шахсий кутубхонаси эгаллаган. Бобир кутубхонадаги китобларни варақлаганди, уларнинг баъзи жойларида улуғ шоирнинг дастхатини кўрди-ю, Самарқандда ундан олган мактубни эслади. Навоийни кўришга мус-

¹ Унсия —«Дўстлик уйи» демакдир.

— сар бўлолмагани учун юрагини маъюс туйғулар чулғади.

Кутубхона эшиги олдига чиройли бир жавонга ўхшаш катта соат қўйилган. Белгили вақтларда бу соатнинг тесасидаги жажжи ҳайкалча ҳаракатга келади-ю, олтин болғачалар билан оҳангдор қилиб занг чалади. Бундай соат ясаш ғоясини соатсозга Навоийнинг ўзи айтиб, махсус буюртма берган әди. Қейин Ҳиротда «Алишерий» деб аталадиган занг чалувчи соатлар расм бўлиб кетган әди.

Бобир кутубхонадан чиқар экан, устма-уст занг чаляётган соатга қараб туриб, ўзича ўйланди: «Ажаб! Алишербекнинг ўzlари вафот этган бўлсалар ҳам ихтиrolари тирик. Умри соний шулмикин? Бу соат ўз эгасининг иккинчи умрини ўлчаб занг чалмоқдамикин?»

Унсиянинг ич-ташида бу бинони қурган ва унда ҳаётининг охирги кунигача яшаган ноёб инсоннинг руҳи кезиб юрганга ўхшарди. Бобир Навоийнинг қўли теккан эшикларни эҳтиёт билан очар, мармар зиналарда унинг кўзга кўринмас изларини босиб ўтаётганини ҳис қилиб, мумкин қадар секин қадам ташлар әди.

Ховлида тошҳовуз бўйидаги чинорлар тагида фаррош йигит хазон супурмоқда әди. Бобир икки томонида тўқ яшил шамшод дараҳтлари қатор турган чиройли йўлкага бурилди. Бу ерда уни Навоийнинг шогирди Хондамир ва унинг энг яқин надим¹ларидан Соҳиб Доро кутиб турар әдилар. Ҳасса таянган кекса Соҳиб Доро Бобир билан кўришаётib:

— Амирзодам, — деди. — Ҳазрат Мирнинг вафотларидан бери Унсия руҳсиз танадек әди. Сиз келганингиздан сўнг бу танада янги жон, янги руҳ пайдо бўлди!

Ёши ўттизларга борган тийрак кўзли Хондамир Бобирга синовчан назар билан кулимсираб тикилди: Андиндан келган йигирма беш ёшлик шаҳзода бу муболағали гапга яраша камтарона жавоб топармикин?

Қалби эзгу ва маъюс туйғуларга тўлиб турган Бобир шоирона ўхшатишлар қилиб ўтиргиси келмай жўн жавоб берди:

— Мавлоно, Ҳазрат Алишернинг маконлари менинг ўзимда янги бир руҳ пайдо қилди. Бу ерда мен санъату

¹ Надим — қурдош-суҳбатдош.

маърифатнинг ҳали умримда кўрмаган камолотини кўрмоқдамен.

Хондамир Бобирнинг жавобидан қаноатлангандек мамнун бош иргади. Соҳиб Доро ҳам:

— Сиз ҳақсиз, амирзодам, — деди. — Ҳазрати Мир неки яратган бўлсалар, ҳаммасида ўзларининг олий руҳларидан бир нишона қолдирмишлар. Мана бу минораларга бир назар ташланг!

Бобир учи осмондаги оқ булутларга тегай деб турган баланд кошинкор минораларга тикилди.

Одатда, юксак минораларнинг одам чиқиб атрофга қарайдиган усти ёпиқ ҳалқаси, яъни шиййончаси энг тепасида бўлади. Унсия минораларида эса тепадаги ҳалқадан ташқари ўрта белида ҳам маҳсус ҳалқалар бор эди. Соҳиб Доро бунинг сабабини айтди:

— Ҳазрати Мир Ҳирот манзараларига баланд бир жойдан қараб ўлтириб ҳордиқ чиқарар эдилар. Кексайтан пайтларида минора тепасидаги ҳалқага чиқишилари мумкин бўлмай қолди. Шундан сўнг меъморга ўзлари айтиб, пастроққа ҳам ҳалқа қурдирдилар.

— Илож бўлса, шу ҳалқалардан бирига биз ҳам чиқсак, — деди Бобир.

— Бажонидил!

Соҳиб Доро Бобирни Хондамир билан берга фарбий минорага томон бошлади. Аммо минора ичидаги тик, айланма зиналардан чиқолмаслигини айтиб, ўзи пастда қолди. Миноранинг ўрта ҳалқасига Бобирни Хондамир бошлаб чиқди.

Улар атрофга кўз югуртиришди. Узоқда қорли Мухтор ва Искалжа тоғлари. Пастда куз кириб, суви жилдирраб қолган Инжил анҳори. Унинг чап соҳилида машҳур Гавҳаршод бегим мадрасаси савлат тўкиб турибди. Навоий қурдирган Ихлосия мадрасаси Йижилнинг ўнг қирғозида — Гавҳаршод бегим мадрасасига юзма-юз тушган эди. Ихлосиядан нарида беморлар даволанадиган, айни вактда, мударрислар ёшларга тиббиёт илмини ўргатадига Шифоия номли шифоҳоҳа — мадраса. Ундан нарида улкан гумбазли Халосия хонақоҳи. Катта бир маҳалланинг ўрнини оладиган жой Алишер Навоий қурдирган нодир обидаларга тўлиб, Ҳиротнинг салобатига салобат қўшган эди.

Шаҳарнинг нариги ёқларида ҳам мовий тоғларга ўхшаб юксалиб турган минора ва гумбазларнинг кўплиги

Бобирга бирдан Самарқандни эслатди-ю, юрагини дард аралаш соғинч түйгуси чулғади.

— Мавлоно,— деб Бобир Хондамирга юзланди.— Ҳирот обидаларини қўрган меъморлар орасида Мовароуннаҳрдан келганлари ҳам бормиди?

— Амирзода, сиз Ҳиротда Самарқанд сайқали ҳам борлигини сезиб турганга ўхшайсиз.

— Ҳа, саволимнинг боиси ҳам шу.

— Ҳиротнинг кўп улуғ зотлари Самарқандда таҳсил кўрмишлар. Улар Самарқанд сайқалини қалбларида олиб келмишлар. Яна Мовароуннаҳрдаги фаторатлардан безиб қочган талай истеъоддлар Ҳиротга келиб, Ҳазрат Алишердан паноҳ топмишлар. У олий зотнинг фазилатлари беҳисоб эди. Лекин фақирга энг улуғ туюлган фазилатлари — Ҳазрат Мирнинг истеъодушносликлари-ю, заковатпарварликлари эди. Улуғ ишларни улуғ истеъоддларсиз қилиб бўлмаслигини Ҳазрат Алишер яхши билур эдилар. Шунинг учун ҳамиша эл-улус орасидан нодир истеъоддлар излаб ўтдилар. Ёнларида юрган надимларига, мусоҳибларига, биз каби шогирдларига айтар эдиларки, баҳиллик доим нурсиз, лаёқатсиз, истеъододсиз одамлардан чиқур. Хусусан, олий жамиятда лаёқатсиз баҳиллар доим истеъододларнинг йўлини тўсурлар, худоддоз заковатларини юзага чиқармай, ҳайф қилурлар, бундан бутун ҳалқ зарар кўрур. Дунёдаги энг машъум баҳиллик, истеъододларнинг йўлини тўсувчи баҳилликдир. Дунёдаги энг олий саховат эса нодир истеъододларни юзага чиқарувчи саховатдир.

— Айни ҳақиқат! — Завқланиб хитоб қилди Бобир.

Хондамир бу хитобдан руҳланиб овозини хиёл кўтариб давом этди:

— Биз бирон сафардан қайтсан ёки Ҳазрат Алишерга бир-икки кун кўринмай юриб, кейин ҳузурларига келсанк, «Қани, хўш, яна қандай ажойиб истеъод учратдингиз?» — деб сўрар эдилар. Биз учратган нодир истеъододларнинг баъзилари ўн беш, ўн олти ёшлик ўспириналар бўлар эди. Ҳазрат Алишер «бўладиган бола ўн беш ёшида бош бўлур, бўлмайдиган одам қирқ ёшида ҳам ёш бўлур», дер эдилару топилган истеъод ўспирин бўлса ҳам ҳузурларига чорлар эдилар. Соҳиб Доро истеъододли шоир Зайнiddин Восифийни ўн беш ёшида Ҳазрат Мирнинг ҳузурига келтирган эди. Ҳазратнинг саховатларидан баҳраманд бўлган бу ёш шоир жуда тез улғайиб, бу-

тун Ҳиротга машҳур бўлди. Улуғ мусаввир Қамолиддин Беҳзод ҳам ёшлиқдан Ҳазрат Мирнинг тарбиялари билан улғайдилар. Шоир Ҳилолий, ҳаттот Султон Али Машҳадий ҳам Ҳазрат Алишер кашф этиб, тарбият қилган истеъдодлардандир. Кўз ўнгимизда турган Ҳирот сўнгги ўттиз-қирқ йил мобайнида аввалгидан ўн баробар гўзалроқ, улуғворроқ бўлиб кетганини барча фозил кишилар айтурлар.

— Сўзингиз чин, мавлоно. Мен кўрган Рубъи маскунда¹ Ҳиротдек шаҳар йўқдир!

— Амирзодам, бугунги Ҳиротни шунчалик гўзал, шунчалик улуғ қилганлар — эл-улус орасидан чиққан истеъдодлар эмасми?

— Рост! Кўз ўнгимизда турган барча нодир обидалар — улуғ истеъдодлар хазинасидан чиққан гавҳарлардир.

— Лутф қилдингиз, амирзодам. Ҳазрат Алишер — гавҳардай бебаҳо истеъдодлар хазинасини очган энг улуғ кашфиётчи эдилар. Буни Султон Соҳибқирон Ҳусайн Бойқаро ҳам тан олган эдилар. Эшитгандирсиз, амирзодам, Ҳазрат Алишер билан Ҳусайн Бойқаронинг ораларига нифоқ солган баҳиллар кўп эди. Маълумингизким, Султон Ҳусайн мастиликда кўп ёмон ишлар ҳам қилган эдилар... Аммо ичмай юрган таъблари тиниқ кунларда Ҳазрат Алишерга шундоқ эҳтиромлар кўрсатар эдиларки, ҳаммамиз ҳайрон қолар эдик.

Бобир Хондамирнинг завқли бир воқеани эслагандек мамнун кулимсираганини кўрди-ю, унинг ҳикоясини кутиб, юзига тикилди.

Хондамир ҳали йигит ёшида бўлса ҳам кўп ўлтириб ишлаш оқибатида бир оз семириб қолган тўла гавдали ўрта бўй киши эди. У гўштдор бармоқлари билан қошининг устини силаб қўйди-ю:

— Ҳазрат Алишер «Ҳамса»ларини битириб, Султон Ҳусайн Бойқарога ўқишига бердилар, — деб ҳикоя қила бошлади. — Султон Ҳусайн табъи назми ўткир зот эдилар. «Ҳамса»ни ўқиб Ҳазрати Алишерни саройларига чақирмишлар, бутун аъёнлари олдида табрик айтмишлар. Султон Ҳусайннинг яхши кўрган бебаҳо бир оқ отлари бор эди. Мироҳўрга «Ўшал отни келтиринг!» — деб бу юрмишлар. Мир ҳазратлари ҳайратга тушиб, «Менга от

¹ Рубъи маскун — дунёнинг инсон обод қилган қисми.

инъом қилмоқчиларми?»— деб ўйламишлар. Отни, келтиргунларича подшоҳ Мир Алишерга қараб: «Энди сиз шеъриятда менга устоз пирсиз, мен сизга мурид бўлмоқчимен», деганлар. Мир Алишер изтироб билан эътиroz қилганларки, «Ҳазратим, сиз подшоҳдирсиз, сизга мен мурид бўлмоғим керак». Шу аснода оқ отни олтин анжомлари билан келтирурлар. Султон Ҳусайн кулиб туриб сўрабдирлар: «Мурид пирнинг амрини бажармоғи керакми?» Мир Алишер, албатта, тасдиқ жавоб бермишлар. Шунда подшоҳ у олий зотга айтмишларки, «Бўлмаса, мана шул отга мининг!» Шоҳнинг амри вожиб. Мир Алишер отга яқинлашурлар. Оқ отнинг бир феъли бор экан: Султон Ҳусайндан бошқа одам минмоқчи бўлса, беланглаб қўймас экан. Мир Алишер яқинлашгандан отбеланглашга тушмиш. Шунда Султон Ҳусайн отни жиловидан олиб, «Тинч тур!» — деб ўшқириурлар. От тинчлангач, Ҳазрат Мир унга минурлар. Сарой аҳли, «Энди нима бўларкин?» — деб нафасларини ичларига олиб сукутга кетмиш. Султон Ҳусайн отнинг жиловини илклиридан қўймай ҳовли бўйлаб юриб кетмишлар. Ҳамма ҳайрён. Шунда подшоҳ от устидаги Ҳазрат Алишерга айттурларки, «туркий тилда биринчи бўлиб ёзган улуғ «Ҳамса»нгиз учун мендек Султон Соҳибқирон сизга жиловдор мурид бўлса арзир!» Сарой аҳли бу сўзни эшитиб, лол бўлиб қолмиш. Ҳазрат Алишернинг ўзлари шу дара жада мутаассир бўлмишларки, ҳушларидан кетиб қолмишлар. Кейин мулозимлар чопиб бориб ҳазратни отдан тушириб олмишлар... Ана, амирзодам...

— Фикрингизга тушундим, мавлоно, — деди Бобир ўйчан товуш билан. — Қаердаки истеъоддларга баҳиллар завол келтиролмаса-ю, сахийлар йўл оча олса, ўша жой бугунги Ҳирот каби камолот чўққисига кўтарилир экан.

Хондамирнинг кўнглидаги гапни Бобир бунчалик яхши топиб айтгани мавлонога ғалати таъсир кўрсатди. Хондамир Бобирда ўзининг маслакдошини топгандай қувониб:

— Тасанно, амирзодам! — деди. — Ушал улуғ зотлар даврида Ҳиротнинг камолот қуёши осмоннинг энг баланд нуқтасига чиққани рост! Лекин... афсуски, қуёш энг баланд нуқтадан сўнг пастга оғар экан. Сўнгги йилларнинг мудҳиш воқеаларини кўриб, қалбимни бир ваҳм титратур: Ҳиротнинг толе қуёши аста-секин оғиб туш-

масдан, бирдан зулмат қаърига қулаб кетса... унда не қилемаймиз?

Хондамир Мовароуннаҳрдаги тўполонлар ва қирғинлар Шайбонийхоннинг қўшини билан бирга Ҳиротга ҳам яқинлашиб келаётганини сезгани учун шу изтиробли саволни берган эди. Унинг назарида, бу саволга Шайбонийхон билан юзма-юз олишган Бобиргина жавоб бериши мумкин эди.

— Изтиробингиз бежиз эмас, мавлоно, — деди Бобир. — Ҳиротдаги бугунги осойишталик даҳшатли тўфон олдидан бўладиган муваққат сокинликни эслатур. Тошкент ҳам мен сўнгги марта борганимда, худди ҳозирги Ҳиротга ўхшар эди. Мен минг балоларни бошдан кечириб, жаҳаннам қаъридан чиқиб борган эдим. Марҳум тоғойим Маҳмудхонга «бу балолар сизнинг ҳам бoshingizga tushmasin, bирга чора topaylik», деганимда истеҳзё қилиб кулган эди. Раҳматлик сиз айтган истеъдодсиз, лаёқатсиз тождорлардан эди... Хийла баҳиллиги бор эди... Маҳмудхон ахийри Шайбонийхоннинг оёғи тагида қандоқ топталгани маълумингиздир.

— Наҳотки, ўша ҳодисалар Ҳиротда яна такрорланса, амирзодам?

Бобир Ҳиротнинг шимол-гарбидаги губор ичидаги кўриниётган Соқи Солмон чўлининг хира уфқига тикилиб, ўйланиб қолди. У Ҳиротга темурийларнинг бошини қувуштириб, Шайбонийхонга қарши мустаҳкам иттифоқ тузиш учун келгани, бу мавзуда қарийб йигирма кундан бери музокара бораётгани Хондамирга маълум эди. Бобир тезда жавоб беравермагач, Хондамир андиша қилиб деди:

— Амирзодам, музокаралар махфий бўлса, фақир давлат сирларини билишга ҳаққим йўқ. Фақат...

— Мавлоно, минора устида биз фақат иккимиз турибмиз. Менинг сиздан яширадиган сирим йўқ. Ҳирот таҳтида икки оға-ини бирга подшоҳлик қилишларини билурсиз.

— Ҳа, асли ўзи таҳт Бадиuzzамон мирzonики эди-ю, лекин Хадича бегимнинг тарафдорлари Музаффар мирzonи иккинчи подшоҳ қилиб кўтардилар. Тарихда ҳаргиз мисли кўрилмаган ҳодиса.

Хондамирнинг бу ҳодисадан норози эканлиги сезилиб турарди. Бобир босиқ товуш билан сўзида давом этди:

— Ҳар икки подшоҳларингиз ҳам меҳмондўстликда,

— сүхбатдорлйкда, ораста базм ўтказиша бўназирлар. Аммо жанг жадалга хоҳишлари йўқми, ҳар қадай Мургоб бўйида учрашганимизда фалати бир ҳодиса бўлди. Хоннинг бир пора қўшини Хурросоннинг Чечекту навоҳини¹ босгани тўғрисида хабар келди. Хоннинг ўзи Амударёдан нарида эди. Хондан кўра биз турган жой Чечектуга яқинроқ эди. Мен таклиф қилдимки, Чечектуни бешолти юз кишилик ёғий босган бўлса, дарҳол отлақиб, уларнинг ўзларини босмоқ керак. Токи хон қўшини Хурросонга осонликча келолмайдирган бўлсин. Бадиuzzамон мирзо инилари Музаффар мирзони Чечектуга юбормоқчи бўлдилар. Мальумингизким, ҳар икковларининг ўз эшик оғалари, ўз мулоzимлари, ўз чериклари-ю, алоҳида саркардалари бор. Музаффар мирзо жанг кўрмаган йигит, Чечектуга боришга журъат қилмади. «Ҳазрат оғам борсалар, биз бошқа чегаралар ҳимоясида бўлурмиз», деди. Бадиuzzамон мирзо, «Мен жангда нобуд бўлсан, бу тахтни ёлғиз ўзи эгаллайдими?» — деб ўйлади, назаримда, Чечектуга боргиси келмади, Кўп сансалор бўлгандан сўнг мен айтдимким, «ижозат бергайсизлар, мен йигитларим билан бориб, Чечектуни ёғийдан озод қилишга уриниб кўрай». Оға-ини бир-бирларига қарадилару эл-улусдан номус қилдилар. «Сиз меҳмонсиз» деб, мени бу ниятимдан қайтардилар. Қўймасдан Ҳиротга бошлаб келдилар. Чечекту ёғий илкида қолди.

Хондамир куюниб «уҳ» тортди:

— Бу ҳаммаси — Хурросондан толе юз ўгираётганинг нишонаси! Амирзодам, бошимиз устида қандай бадлар тўпланаётганини бизнинг подшоҳларимиздан кўра сиз яхши билурсиз. Чунки барчасини ўз кўзингиз билан кўрмишсиз. Биз бу ҳақда мавлоно Беҳзод билан ҳам кўп гаплашдик. Ҳиротнинг барча жонкуяр фозил кишилари умид кўзини сизга тикканлар. Хатар қанчалик кучли эканлигига шояд подшоҳларимизни ишонтирангиз. Барча яхши кучлар бирлашса-ю, шояд фалокатнинг олдини олишга мұяссар бўлсалар.

Бобир минорадан пастга тикилиб!

— Билмадим, мавлоно, — деди. — Бугун-эрта подшоҳлар билан яна шу ҳақда гаплашмоқчимен.

— Илоҳим, кушойиши корингизни берсину музока-рангиз биз истагандек тугасин, амирзодам!

¹ Навоҳи — кичик ўлка, район.

Бобир ташаккур айтиб, минора зинапоясига томон йўналди. Пастга тушаётиб, Ҳирот қалъасининг ичидаги баланд тепалик устида турган улкан аркка нохуш назар ташлади.

3

Куз илиқ келгани учунми, Ҳирот тождорлари ҳали ҳам қалъа ташқарисидаги боғларда яшамоқда эдилар. Шаҳарнинг шимол-шарқидаги Қипчоқ дарвазасидан нарида Шоҳруҳ мирзо даврида машҳур бўлган Боби Сафидда Музаффар мирзо Бобир шарафига катта зиёфат берди. Ҳиротнинг энг зўр пазандалари тайёрлаган физол¹ кабоблари, иштаҳа очувчи нордон очарлар², моҳича ноими билан машҳур бўлган ўта нозик хуштаъм суюқ ошлар Музаффар мирзо ўз меҳмони билан ўтирган тиллакори кўшкнинг юқориги қаватига кетма-кет олиб чиқилмоқда эди. Созандалар пойгакроқда ўтириб, қонун ва удда, фижжак ва пайдо этни жимирлатувчи куйлар чалишарди. Ҳиротнинг машҳур ҳофизлари овозларини унча баланд кўтармасдан, юракнинг қат-қатига сингадиган сокин ва майнин товуш билан ашула айтишар, бу ҳаммасин Бобирга жуда улуғвор бир санъатнинг намунаси бўлиб туюларди.

Базм авжига чиққаида соқий Бобир қархисига келиб, бир тиззасини гиламга тираб чўйкалади, сўнг йигирма йилдан бери хумда куч йигиб ётган ва бугунги зиёфат учун очилган тиниқ хушбўй майи нобдан суроҳийга қуиди-да, Бобирга узатди. Бобир ҳали май ичмаган эди. Аммо ҳозир эшигтан куй ва ашулаларининг таъсирида бирдан унинг май ичгиси келди-ю, ўнг ёнидаги Қосимбекка қаради.

Оббурдонда Бобирдан ажралиб Ҳисорга кетган Қосимбек Қавчин бултур Кобулда барча наввари билан бирга Бобир хизматига қайтиб келган ва яна унинг энг яқин маслаҳатгўйига айланган эди. Қосимбекнинг ўзи умрида май ичмаган худотарс киши бўлгани учун Бобирни ҳам ичкиликка йўлатгиси келмас эди.

— Амирзодам, — шивирлади Қосимбек. — Бадиузвазмон мирзонинг чоғир мажлисида май таклиф қил-

¹ Физол — кийинкнинг Хурсонда кўп учрайдиган бир тури.

² Очар — энра ва сирка қўшиб тайёрланган гўштли таом.

ганларида ичмаган эдингиз. Бу ерда ичсангиз, нариги мирзо эшитиб кўнглига олмасмикин?

Бу сўзлар Бобирни сергаклантирди. У битмай ётган мураккаб ва чигал ишларини эслади-ю, Музаффар миrzога қараб:

— Фақирни маъзур тутинг, мирзо ҳазратлари,— деди.— Мен умримда май ичмаганмен!

Музаффар мирзо Бобирнинг май ичишдан қўрқаётганини сезиб, қаҳ-қаҳ уриб кулди. Унинг анчагина кайф қилгани шу беандишашроқ кулгисидан билинди:

— Амирзодам, наҳотки бутун Андижону Самарқанд май завқидан бехабар бўлса?

— Мирзо ҳазратлари, май завқи Самарқанду Андижонда ҳам керагидан ортиқ. Аммо фақир бошқа завқлардан ортмас эдим. Узримни ҳазрат оғангиз Бадиуззамон мирзо қабул қилган эдилар... Фақир андеша қилмоқдамен...

Бадиуззамон мирзо тилга олингач, Музаффар мирзо ҳам жиддийлашди. Бобирнинг андишаси унга асосли туюлди-ю, соқийга: «Бас, қистама!» ишорасини қилди. Базмда Бадиуззамон мираннинг эшик оғаси Зуннунбек аргун ҳам бор эди. Соқий подшосининг ишораси билан Бобирга қўйилган майни ўша Зуннунбекка берди.

Одамларнинг кайфи ошган сари базм қизиб борар, баъзи беклар ҳам ўртага чиқиб рақс қилишар, Мир Сарбараҳна, Бурхон гунг деган машҳур қизиқчиларнинг аскияларидан кўтарилиган қаҳқаҳалар шифтдаги нақшларни ҳам титратётгандай бўлар эди.

Ҳусайн Бойқаронинг ўлимига ҳали кўп вақт бўлмаган. Ҳирот хавф остида турган оғир бир вазиятда шунчалик хушчақчақ базм ўтказилаётгани Бобирдан ҳам кўра Қосимбекнинг ғашини келтирмоқда эди. Қосимбек кулги шовқин орасида Бобирга шивирлади:

— Бу ширакайф шоҳ билан энди музокара қилиб бўлмас. Бунинг ихтиёри онаси Хадича бегимда эмиш. Ҳозир бегимнинг ҳузуринга чиқайлик, амирзодам.

— Зиёфат тугамасдан чиқиб кетсак беҳурматлик бўлмасми?

— Қулингиз келишиб қўйганмен. Бегим ўз қасрларида бизга мунтазирлар.

Аскиячилар мусобақаси тугаб, кулгилар босилгач, Бобир Музаффар мирандан ҳазрат бегимнинг ҳузурларига бориш учун ижозат олди.

Оқ мармардан қурилган уч қаватли улкан қасрда ўнлаб олтин қандиллар ёнмоқда эди. Бобир, Қосимбек, Зуннунбек ва уларни бошлаб бораётган Бурундуқбек зиналарга тўшалган Майнин гўлдёр пояндоzlардан товушсиз қадам ташлаб, учинчи қаватга кўтарилилар. Қасрнинг деворларига Шоҳруҳ миরзо ўзининг санъаткор ўғли Войсунқур миরзо учун ишлатган гўзал расмлар ҳали оҳори тўқилмай яп-янги турар эди.

Хадича бегим Бобирни қасрнинг муҳташам қабулхонасида кутиб олди ва олти оёғи ҳам қўйма олтиндан ишланган, устига яхлит садаф қопланган миз ёнига ўтқазди.

Салобатли, хушқомат бегимнинг орқароғида — қабулхонанинг энг кўзга кўринарли жойида бир туп атиргул ярқираб турибди: поялари олтиндан, барглари зумраддан, тўқ қизил гуллари ёқутдан. Гул шоҳига қўниб турган кичкина олтин булбулнинг тумшуқасида — дон ўрнида соф гавҳар жилоланиб турибди. Қабулхонанинг эшик ва деразаларига осилган шоҳи дарпардаларга ҳам дурлар, лаъллар ва бошқа қимматбаҳо тошлар қадалган эди.

Фақат Хадича бегимнинг ўзи қорамтири кумушранг парчадан безаксиз қабо кийган, унинг бошидаги кўкиш тоқида кўзга унча ташланмайдиган сийрак марварид доналари кўринар эди. Ақлни шоширадиган бундай жавоҳирот орасида гўзал қиз-жувонлар қуршовида ўтирган эллик ёшли улусифат малика Бобирни ҳам, Қосимбекни ҳам анча довдиратиб қўйди.

Бобир кўнглига туғиб келган мураккаб гапларини бегимнинг мусоҳабалари ва келинлари олдида қандай айтишни билмай безовталанди. Хадича бегим буни сезиб осойишта кулимсиради:

— Амирзодам, сиз бизга қариндошсиз. Шунинг учун менинг келинларим, мусоҳабаларим сизни ҳам ўз миrzоларидек эъзозлаб суҳбатингизга иштирок этмоқчилар. Тортинмай эркин ўлтиринг.

— Муташаккирмен!

Юзларида юпқа оқ пардалари бор қиз-жувонларнинг юз-кўзлари шам ёруғида унча аниқ кўринмас эди. Аммо хина қўйилган нафис қўллар, ипак кийимлар оғушидаги ингичка беллар ва баланд кўкраклар кўпчилик аёл-

ларнинг ёш жувонлар эканидан далолат берарди. Музаффар мирзонинг энг кўхлик хотинларидан Қоракўз бегим дегани қайнанасининг қулоғига лабини яқинлашибтириб, ёнгил бир кулги билан алланарса деди. Хадича бегим ҳам шўх кулиб бош иргади-ю, Бобирга юзланди:

— Амирзодам,— Ҳиротнинг аслзода қизлари сизга мароқ билан кўз тикар эмишлар. Шундай баҳодир шоҳ, шундай кўхлик йигит, шундай истеъодли шоир ҳарамиз бўйдоқ яшар эмишсиз. Ростми?

Бобир қип-қизариб ерга қаради-ю, бу тўғрида гап очилганидан озорланиб:

— Ҳазрат бегим, рост,— деди.— Тақдиру насибим шундоқ бўлди.

— Тақдирингиз энди тағайор топсин, амирзодам. Ҳиротда қолиб, Музаффар мирзога ини бўлинг. Сиз ҳам темурийзодаларданисиз. Ҳиротдан сизга муносиб гўзalu оқила қизлар топайлик, тўй-томуша билан уйланинг.

Музаффар мирзога ини бўлиш— унинг тарафдорига айланиш деган сўз эди. Бир вақтлар невараси Мўмин мирzonинг ўлдирилишига сабаб бўлган Хадича бегим, эҳтимол, келажакда Бадиуззамон мирзони ҳам йўқ қилиш ва ўғлини якка подшоҳга айлантириш мақсадидар. Бобир унинг ўғлига ини бўлса, албатта, бегимнинг бу мақсадини амалга оширишга иштирок этиши кепрак.

— Фамхўрлигингиздан миннатдормен, ҳазрат бегим,— деди Бобир.— Фақат менинг бир андешам бор.

— Қандай андеша, амирзодам?

— Фақирни маъзур тутинг.

Бобир сукут қилиб, ерга қаради. У гапини фақат Хадича бегимнинг ўзига айтмоқчи эканини сезган аёллар таъзим қила-қила чиқиб кетдилар.

Шундан кейин Бобир Шайбонийхоннинг Ҳирот устига бостириб келиши муқаррарлиги ҳақида, ҳозир тўй-томушага эмас, ҳаёт-мамот жангларига тайёрланиш кераклиги тўғрисида гапира бошлади.

— Шайбонийхон Андижондан Хоразмгача, Марвдан Туркистонгача барча жойни олиб, беҳисоб қўшин тўплашибдири. Мен унинг ҳар бир жангга қанчалик астойдил шайланишини билурмен. Бало-қазодай бостириб келса анча-мунча черик тит-пит бўлиб кетишини кўрганмен!

Бобир Шайбонийхонниг ҳарбий қудратини ва шаф-
қатсизлигини исботлайдиган далиллар келтира бошла-
ди. Хадича бегим сабрсизланиб:

— Бу балонинг балогардони недур? Шуни айтинг,
амирзодам! — деди.

— Бунинг балогардони барча темурийзодаларнинг
бирлашувидир. Ҳамма вилоятларга тавочилар юбориб,
эллик-олтмиш минг қўшин тўпламоқ керак. Қиши бўйи бу
қўшинни машқ қилдириб, ягона бир саркарда бошчили-
гида жангга тайёрламоқ керак.

— Ягона саркарда ким бўлиши мумкин? — деди Ха-
дича бегим сергакланиб.

Қосимбек «ялт» этиб Бобирга қаради. Ҳозир тирик
қолган темурийлар орасида Бобирдан бошқа одам бу
ишини эплолмаслиги унинг кўнглидан ўтди. Аммо қўшин
кимники бўлса, ҳокимият ҳам ўшанини экани азалдан
маълум. Хадича бегим ўғлининг ҳокимиятига ҳеч кимни
йўлатмаслиги ҳам аниқ.

Бобир унинг кўнгли учун «Ягона саркарда — Музоф-
фар мирзо бўлсинлар!» — демоқчи бўлди-ю, орқароқда
Зуннунбек ўтиргани эсига тушди. Зуннунбек бу гапни
Бадиuzzамон мирзога етказса икки орага иифоқ ту-
шади.

— Бош саркарда ким бўлишини ҳазрат оға-инилар
ўзлари ҳал қилмоқлари керак, — деди. — Базмларни
тўхтатиб, бутун эътиборни мудофаага қаратмоқ керак.
Ҳар бир кун ғанимат, ҳазрат бегим!

Хадича бегим Зуннунбек билан Бурундуқбекка муро-
жаат қилди:

— Жаноб амирлар, сизларнинг фикрларингиз қалай?

Зуннунбек ўсиқ қошлиарини диккайтириб, кўзларини
Бобирга қатъият билан тикиди:

— Амирзодам Шайбонийхоннинг Мовароуннаҳрдаги
ғалабалари-ю, хунхўрликларидан бизни огоҳ қилганла-
ри яхши. Аммо Шайбонийхоннинг Мовароуннаҳрда син-
маган қиличи Хурросонга келиб, албатта синур! Мен бун-
га аминмен, ҳазрат бегим! Шунинг учун ортиқча ташви-
шү таҳликага ўрин йўқ деб ҳисоблаймен!

Зуннунбек ишонч ва эътиқод билан айтган бу сўзлар-
дан Хадича бегим дарҳол енгил тортди. Бобир эса Зун-
нунбекка таажжуб билан тикилиб деди:

— Қароматингиз илоҳо тўғри келсин, жаноб амир!
Аммо бу қароматга қандай асослар бор?

— Бу кароматни мен эмас, Ҳиротнинг энг обрўли валийлари қилмишлар.

Зуннунбек шундай деб Хадича бегимга ийманиброқ қараб қўйди. Бу қараашнинг маъносини тушунган Хадича бегим Бобирга кулимсираб изоҳ берди:

— Ҳиротнинг Қутб номли машҳур валийси бор. Шу вақтгача Қутб нимани каромат қилган бўлса, ҳаммаси тўғри чиқмиш. Қутбга тушида аён бўлурки, Шайбоний-хоннинг қиличини амир Зуннунбек синдирурлар. Мўътабар мунажжимлар юлдузларга қараб, бу кароматни тасдиқ қилдилар. Шундан сўнг валийлар Зуннунбекнинг елкаларига муқаддас фўта солиб, номларига Ҳизабрулла унвонини қўшиб айтадиган бўлдилар.

«Ҳизабрулла» — арабча «оллоҳнинг арслони», яъни «енгилмас ботир» дегани эди. Арабчани яхши биладиган Бобир бу унвоннинг маъносини тушуниб, истеҳзоли кулимсиради:

— Жаноб Зуннунбекда арслоннинг юраги борлигига шак-шубҳа йўқ. Аммо ҳазрат бегим валийлару мунажжимларни тилга олганларида фақир Сарипулда Шайбонийхон билан масоф урушга чиққан кунларимни эсладим. Мана, жаноб Қосимбек ҳам бор эдилар. Шаҳобиддин номлик мунажжим кечаси осмонга қараб, Саккиз юлдуз елкангизда рост турур, эртага урушга кирсангиз, зафар, албатта, сизники бўлғай! — деб валийлик қилди. Биз шунга ишониб, Шаҳрисабздан келадиган кўмакни ҳам кутмасдан, майдонга чиқдик... Мана, ҳалига-ча ўшал хатомизнинг азобини тортиб юрибмиз.

Бобирнинг гапларидан Хадича бегимнинг юzlари тундлашиб, лаблари атрофида бурушиқлар пайдо бўлди. Зуннунбек эса ўтирган жойида асабий тўлғаниб:

— Амирзодам, ниятни яхши қилмоқ керак! — деди. — Ҳиротнинг валийлари Самарқанд мунажжимларидек нодон эмаслар! Сарипулдаги хатони Ҳиротдай улуғ шаҳарда ҳеч ким такрор этмагай!

Зуннунбек кўзлари ёниб, телбаланиб гапирганини кўрган Бурундуқбек уни босишга тиришиди:

— Жаноб Зуннунбек, олий меҳмон бизга яхшилик истаб Кобулдай жойдан келмишлар. Вазият хатарли эканлиги рост. Шошилинч чоралар ўйламоқ керак!

Хадича бегим баҳслашувчиларни мулоиймлик билан яраштириб қўйишига ҳаракат қилди:

— Жаноб Зуннунбек, вазият чиндан ҳам жиддий,

бепарво бўлмаслик керак. Аммо жаноб Бурундуқбек ҳам бир нарсани унутмасинлар: мағлубиятни кўп кўрган одамга хатар гоҳо аслидан каттароқ кўринур. Амирзодам, сиз кўп ташвиш чекманг. Шайбонийхон бизга тажовуз қилса ўз тажовузидан ҳалок бўлур!

* * *

— Хадича бегимдек кўпни кўрган малика шайхларнинг хушомад гапига ишониб юрганларидан мен ҳайрон, — деди Бобир эртаси куни Боги Жаҳонорода Бадиузвазмон мирзо билан гаплашиб ўтирганда.

Гавдасининг шертахлитлиги ва кўзининг қисиқлиги отаси Ҳусайн Бойқарога ўхшаб кетадиган Бадиузвазмон мирзо истеҳзо билан кулимсиради:

— Ҳайрон бўлманг, амирзодам. Не қилса ҳам аёл киши-да, қисқа ўйлаб ўргангган.

— Аммо бу калтабинликнинг касрати ҳаммага уриши мумкин-ку, ҳазратим?

— Начора? Суюкли фарзандимиз Мўмин мирзо ҳам шу бегимнинг касратидан ҳалок бўлиб кетди!

— Ҳазратим, раҳматлик отангиз кайф устида қилган фожиавий хатони энди унунинг!

— Унотолмаймен, чунки айб марҳум отамда эмас эди! Султон Соҳибқирон Мўмин мирзони беҳад яхши кўрар эдилар, шеърларини ёд билар эдилар. Авваллари отамнинг менга ҳам меҳрлари яхши эди. Ахир мен — тахт вориси эдим! Хадича бегим мен билан отамни душман қилишнинг йўлини излар эди. Мўмин мирзо асир тушгач, бу йўл топилди — уни ширакайф подшоҳнинг фармони билан ўлдирдилару мен билан отамни хундор душманга айлантиридилар. Шундан кейин бегимнинг ўғли Музаффар мирзо менинг ўрнимга валиаҳд бўлди. Бугунги шерики подшоҳлик ҳам мана шу бегимнинг ихтироси! Мен аниқ биламен: бегим мени муваққат тождор деб билурлар. Мени йўқ қилиб, Музаффар мирзони ягона подшоҳга айлантиришнинг қулай пайтини пойламоқдалар!

Бобир Бадиузвазмон мирзога Шайбонийхонни эслатди:

— Ҳазратим, Шайбонийхон ҳақида не янги хабарлар бор?

— Ҳон Хоразмни олиб, Самарқандга қайтган эмиш...

— Ундоқ бўлса, хон энди Хурросон юришига чиқмоқчикур? — сўради Бобир.

— Дарҳол-а? Хоразм юришидан сўнг бирор йил дам олмасмикин?

Бадиuzzамон мирзонинг тусмол гаплари — унинг душман орасидан аниқ хабар юбориб турадиган маҳфийси йўқлиғидан далолат берарди. Ўз инисининг барча майдо-чуйда сирларини билиб туриш учун беҳисоб маҳфийлар юбориб қўйган подшоҳ бу ишни ашаддий душмани Шайбонийхонга нисбатан қилмаётгани Бобирни танг қолдирди:

— Ҳазратим, Шайбонийхоннинг реву рангини¹ фақир озроқ кўрганмен. Хоннинг маҳфийлари ҳозир Ҳиротда дарвеш, ё савдогар, ёки навкар қиёфасида юриб, барча зарур хабарларни Самарқандга етказиб турган бўлсалар керак.

Бобирнинг койиниб гапирганини сезган Бадиuzzамон мирзо кинояомуз кулди:

— Амирзодам, сиз ҳам шоҳсиз, эҳтимол, сизнинг маҳфийларингиз Самарқанддан янги хабар юборган-дирлар?

— Мен сизни отамдек эъзозлаймен, ҳазратим. Гап маҳфийларда эмас. Фақир тажрибадан шуни биламен-ки, Шайбонийхон чарчаган аскарларини босиб олган вилоятда дам олиш учун қолдириб, аввалдан дам олиб ётган қўшини билан дарҳол янги юришга отланур. Унинг бутун кучи шундаки, барча оға-ини, қариндош-уруглари билан бир тан-бир жон бўлиб майдонга чиқур. Биз бу хатарли ёғий қаршисида ички низоларни унутмоғимиз керак. Биз ҳам бир тан-бир жон бўлиб, ягона саркарда бошчилигига жангга астойдил тайёрланиб кирмасак, оқибати ёмон бўлиши эҳтимолдан йироқ эмас.

— Ягона саркарда, дедингизми? Ким бизга саркарда бўлмоқчи, амирзодам?

Биринчиликни талашаётган бу икки оға-ини «Менга бўлмаса, унга ҳам бўлмасин!» — дейишга тайёр эканлиги Бобирга ҳозир аниқроқ сезилди. Рақиб оға-ини талашаётган мамлакат улардан фақат бирига ёки амакивач-чалари Бобирга текканидан кўра етти ёт бегонага теккани афзалроқ туюларди. Чунки бегоналар уларнинг бунчалик баҳиллигини келтирмас эди.

¹ Реву ранг — шумлик, ўз ишига пухталик.

— Наҳотки жангга ҳам алоҳида-алоҳида чиқмокчилизлар?— деди Бобир.

— Начора? Ҳар кимнинг ўз чериги, ўз саркардаси бор. Мен Музаффар мирзога ишонмаймен. Аммо сиз билан ҳар қандай жангга бирга киришга тайёрмен. Чунки сизга ишонамен. Амирзодам, сиз Ҳиротда қолинг! Неки даркор бўлса айтинг! Муҳайё қилурмиз.

Бобир оға-инининг фақат шу нуқтада яқдил эканини сезди. Жанг кўрган Бобир бутун бек ва навкарлари билан Ҳиротда қолса-ю, вақти келиб, жангга бирга чиқса уларнинг мушкуллари осонроқ бўладиганга ўхшарди.

Аммо оға-инининг қўш ҳокимияти Бобирга таги чириб тешилган кемага ўхшаб кўринарди. У бу кемада қолса паймонаси тўлган оға-инига қўшилиб ғарқ бўлиши муқаррарлигини тобора аниқ ҳис қилмоқда эди.

4

Эртаси куни пешин намозидан кейин Унсияга Бобирни кўриш учун келган Мавлоно Фазлиддин навкару савдарларнинг кўч йиғиштираётгани ва сафарга ҳозирланаётгандарини сезди. Йўлакда тоғасига дуч келиб қолган Тоҳир:

— Э, хайрият, ўзингиз келдингиз, мулла тоға! — деди.

— Ҳа, не гап, жияним?

— Эртага тонгда Ҳиротдан жўнаб кетурмиз.

— Кобулгами?

— Ҳа, деб шивирлади Тоҳир.— Лекин подшоҳлар буни билмасинлар. Рухсати олий шаҳар ташқарисида қишиламоқ учун берилди. Ҳаммага «Ҳуросонда қишилгаймиз», деб эълон қилинди. Сиз ҳам билдирамг.

Мавлоно Фазлиддиннинг руҳи тушиб:

— Оббо,— деди.— Бизни сағирдек мунғайтириб кетар экансизлар-да?

— Қиши чиқса, сиз ҳам Кобулга кўчиб боринг. Ўтган гал учрашганингизда Бобир мирзо ўzlари таклиф қилдилар-ку.

— Кўчиб бориш осонми, жияним? Бир-ой, қирқ кунлик йўл... Аёлманд одаммиз...

Мавлоно Фазлиддин хомуш бўлиб Бобирнинг қабулхонасига қараб кетди. Бир вақтлар Алишер Навоийнинг қабулхонаси бўлган кўркам танобийнинг заррин

Уймакор эшиги олдида ясовул йигит турган эди. У ичкарига кириб, тез қайтиб чиқди-ю, эшикни очиб, мавлонога йўл берди.

Уй тўридё Бобир билан сұхбатлашиб ўлтирган кишиларни мавлоно бир қарашда таниди. Навоийнинг надимларидан бўлган қирқ беш ёшлардаги кўса одам — шоир Султон Муҳаммад эди. Ундан берига машҳур хаттот Султон Али Машҳадий чўккалаган. Бобирнинг ўнг томонида Камолиддин Беҳзод ва Хондамир ўтиришибди.

Бобир Мавлоно Фазлиддин билан ўрнидан туриб кўришар экан, бошқалар ҳам оёққа турдилар. Мавлоно Фазлиддин пойгаҳга ўлтироқчи эди, ёши ундан кичикроқ бўлган Хондамир:

— Сиз олий меҳмонимизнинг ватандошисиз, — деб уни ўзидан юқорига ўтказди.

Маъюсланиб ўлтирган Хондамир сұхбатни тўхтатган жойидан давом эттириб:

— Ажаб кажрафтор фалак бу! — деди. — Амирзодам, сиз Ҳиротнинг юксак санъати-ю, ажойиб истеъдодларига ҳавасингиз келиб сўзладингиз. Биз эса бугунги Ҳиротга худо сиздек маърифатлик, сиздек истеъдодлик подшоҳ бермаганидан доғдамиз!

► Бобир ўзини шунча иззат-икром билан меҳмон қилган подшоҳларнинг шаънига тегадиган гап айтишни истамас эди.

— Мавлоно, подшоҳларингиз ҳам маърифатли зотлар, — деди.

Калта жингалак соқоли ўзига ярашган нафис юзли озгин Беҳзод киноя билан деди:

— Амирзодам, подшоҳларимизнинг бири офтоб бўлса, бири моҳтоб. Ҳалқ орасида ҳозир бир шеър тарқалмиш. Мазмуни шуки, Ҳусайн Бойқаро ҳақиқий подшоҳ эди. Унинг икки ўғли икки тахт устида ўлтириб, бири «оймен» дейди, бири «кунмен» дерлар, эртаю кеч бирбири билан рақобат қилурлар. Буларнинг ўзаро курашлари худди шатранж тахтаси устидаги шоҳларнинг курашларига ўхшайдир. Чунки бу иккови оталаридек ҳақиқий шоҳлар эмас, балки шатранж тахтаси устидаги ясама шоҳлардир.

► Бу ўхшатиш Бобирнинг икки подшоҳдан олган таас-суротларига шу даражада мос келар эди, у беихтиёр кулиб юборди:

— Лекин оға-инининг рақобати — шатранж ўйини га ўхшашлиги рост!

— Фалокат шундаки,— деди Хондамир,— бу ўйинда улар Хуросонни бой бермоқдалар! Буни уларга сўз билан уқтириш эса имкондан холи!

Шоир Султон Мұҳаммаднинг кўзлари исёнкорона чақнади.

— Уларга буни сўз билан эмас, фақат шамшир билан уқтириш мумкин!

Хондамир эшик томонга хавотирли кўз ташлаб қўйди. Бир вақтлар Алишер Навоийдай одамга маҳфийларини юбориб қўйган подшоҳлар Бобирнинг кетига ҳам одам қўйган бўлишлари мумкин эди.

Султон Али Машҳадий сұхбатни хатарли мавзулардан нарироқ олиб кетиш учун ёнида турган чарм жузденни очди-да, бир даста зарварақ олди.

— Фақир олий меҳмонимизнинг ғазалларидан бир нечасини кўчириб келган эдим.

Варақлар қўлдан-қўл ўта бошлади. Хаттотнинг ажойиб санъати туфайли ҳар бир ҳарф нафис ва тирик тасвирга айланган эди. Хондамир сатрларга кўз юргутириб:

— О!— деди ҳайрат билан.— Кўп шоирлар «ёр»ни илоҳийлаштириб, бутун нажотни «ёр»дан излаб ўрганишлар. Амирзодам бу одатий алданишларга қарши исён қилган каби ёзмишлар:

Жонимдан ўзга ёри вафодор топмадим,
Кўнглимдан ўзга маҳрами асрор топмадим...
Бобир, ўзингни ўргата кўр ёрсизки, мен —
Иstab жаҳонни, шунча қилиб ёр топмадим!

— Мардона сўзлар!— деди Беҳзод Бобирга қараб.— Сиз минг марта ҳақсиз! Одам ўзига ҳам ишонмоғи керак!

— Миннатдормен, мавлоно,

Шоир Султон Мұҳаммадга иккинчи шеърнинг матлаи ёқсан эди. —

— Эшиting, жаноблар!

Сендеқ менга бир ёри жафокор топилмас,
Мендеқ сенга бир зори вафодор топилмас.

Мавлоно Фазлиддин оғир тин олди:

— Ҳозиргина сўзлашган дардимизни айтмишлар!

Бобир мақтовлардан хиёл ўнфайсизланиб:

— Жаноблар,— деди,— мен сизлардек санъаткорлар билан учрашиб, сұхбатлашганим учун тангрига шукур қиласмен. Фақирнинг қоғозни қоралаб ёзган сатрларим Мавлоно Машҳадийнинг тенгсиз санъатлари туфайли сизларга шунчалик манзур бўлди. Жониз бўлса, ғазаллардан хотира учун мавлоноларга бир нусхадан бермоқчимен.

— Айни муддао!— деди Хондамир қувониб.

Бобир ғазалларидан атайлаб уч-тўрт нусхадан кўчирилган эди. Хондамирга, Беҳзодга, Султон Муҳаммадга ўзлари ёқтирган ғазаллардан бир нусхадан берди. Улар шоир ва хаттотнинг ҳурматлари учун ғазал битилган зарварақларни олиб, нон каби кўзларига суртиб қабул қилдилар. Бобир сўнгги ғазалдан бир нусхасини Мавлоно Фазлиддинга узатиб:

— Мавлоно, биз сиз билан фақат ватандош эмасмиз, ҳамдарду ҳасратдошмиз,— деди.

Мавлоно Фазлиддин ғазални олиб кўзига суртиди-ю:

— Мен аминмен, Ҳиротда битилган ушбу ғазал тез кунда Самарқанду Андижонга ҳам етиб борур,— деди.— Худо амирзодам билан бизни ҳам ватанга соғсаломат қайтгулик қилсин!

— Айтганингиз келсин, мавлоно!

Бобир Қосимбекни чақирилди ва Султон Али Машҳадийга ғазалларни санъаткорона кўчириланлиги учун олтин тугмалик кимхоб тўн кийдирди.

Сўнг у мавлоноларни ҳовлига кузатиб чиқди. Ҳаммалари хайрлашаётганларида меъморга қараб:

— Балки келгуси йилда Кобулга борурсиз, мавлоно?— деди.— Рост, катта меъморлик обидалари қуришга ҳали имконимиз йўқ. Кобул ҳозир Ҳиротга нисбатан чекка бир вилоят. Улуғ санъаткорларга макон бўларлик саройимиз йўқ. Лекин худодан умидимиз борки, келгусида толе бизга ҳам кулиб боққай, биз ҳам улуғ санъаткорларга макон берадиган кунларга етгаймиз!

— Таклифингизни бажонидил қабул қилурмен!— деди Мавлоно Фазлиддин.

— Амирзодам,— деди Хондамир.— Алишер Навоий.

нинг даргоҳларида қилган покиза ниятингиз илоҳим рӯёбга чиқсин! Илоҳим ҳазрат Алишернинг руҳлари ҳамиша сизга мададкор бўлсин!

Бу тилакка ҳаммалари сидқидилдан қўшилиб, юзларига фотиҳа тортилар.

* * *

Эрталаб кун ғиқаётгандан Бобир хос навкарлари ва беклари билан Ҳиротнинг ташқарисидаги кенг боғкўчадан кетиб борар эди. Кўччанинг икки томонида Ҳирот аъёнларининг гиштин деворли, кошинкор гумбазли кўшк ва чорбоғлари бор эди. Салобатли бир боғ ҳовлиниг баланд девори ёнидан ўтаётгандаридан, девор тепасидан кимдир уч-тўртта атиргул ташлади. Тўқ қизил рангли гуллардан бири Бобир мингдан саман отнинг ўсиқ ёлига келиб тушди. Гулнинг тиканлари от ёлига илиниб қолганини кўрган Бобир девор тепасига қаради-ю, ёш бир қизнинг қийғоч қошларини ва қош устига бостириб кийган гулдор тоқисини кўрди. Кейин у от ёлига илиниб қолган гулни қўлига олиб, лабига яқинлаштириди.

Узоқда ястаниб турган Занжиргоҳ тоғларининг баланд чўққиларига қор тушган эди. Ҳиротнинг кеч кузида нима ҳам бўлиб очилган бу гулнинг ажаб ҳиди бор эди. Бобир гулнинг хуш бўйи димогига урилган заҳоти жиловни беихтиёр тортиб, отини тўхтатди. Узангига оёқларини тираб, эгардан бўй чўзди-да, девор тепасидаги қизга тикилиб қаради. Энди унга қизнинг олов чақнатиб турган қоп-қора кўзлари, бу кўзларга ниҳоятда ярашган гулранг ёноқлари аниқ кўринди. Бобир бу кўчадан аввал ҳам ўтган эди. Қиз авваллари ҳам уни кўриб, таниб қолган эканми, кўзлари мўлтираб ва уялиб бош эгди. Бу унинг салом берганимиди ёки хайрлашганимиди? Ўн етти-ўн саккиз ёшлардаги бу қизнинг жозибаси-ю, мўлтираб бош эгиши Бобирга шундай тасир қилдики, у бир лаҳза нима қилишини билмай эсан-кираб турди.

Бу орада бошқа мулоғимлар ҳам қизни кўриб отларини тўхтатган эдилар. Бобирни Музаффар мирзонинг Ҳирот бўйича доругаси Юсуф Алибек кузатиб бормоқда эди. Қирқ ёшлардан ошган кўнгилчан бу бек девор тепасидаги қизни таниб кулди-ю:

— Ие, Моҳиммисиз?— деди.— Оббо, Моҳчучук-ей,
катта қиз бўлиб қолибсиз-а!

Қиз гўё энди ўзига келди, «лип» этиб, бошини девор
ортига олди-ю, кўздан фойиб бўлди.

Юзи қандайдир ички оловнинг тафтидан қизарган,
кўзлари ғалати чақнаган Бобир Юсуф Алибекдан шо-
шиб сўради:

— Ким? Ким дедингиз?

— Амирзодам, бу ҳовли Султон Соҳибқироннинг узоқ
қариндошларидан бирига қарашли. Қизнинг отаси
Ҳусайн Бойқаронинг нуфузли девонбошиларидан эди-
лар. Борди-келдимиз бор эди.

— Ҳозир бормилар?

— Борлару, лекин... давлат ишидан четланмишлар.

— Нечун?

— Билмадим, ҳозирги подшоҳларимиз билан оралари
яхши бўлмаса керак. Қандаҳоргами, Ғазнагами кўчиб
кетиши тараддусида эмишлар деб эшитдим.

Отлар юриб бормоқда эди. Бобир Моҳим деб аталган
қизнинг тобора узоқда қолаётганини ўйлаб, кўнглида
кучли бир армон сезди. Йигирма кун Ҳиротда юриб, бу
қизни нега фақат энди, жўнаб кетаётган пайтида кўрди?

Бобир ҳали ҳам қўлида ушлаб бораётган гулга қа-
ради. Бояги гўзал қиз Ҳиротнинг бутун нафосатини ўз
жозибаси билан бирга мана шу гулга муаттар ҳид каби
жойлаб берганга ўхшар эди.

Бобир гулни яна бир ҳидлади-да, бошидаги салла-
сининг қатига кўзга унча ташланмайдиган қилиб қисти-
риб қўйди.

5

Қиши осойишта ўтди-ю, авжи баҳор кунларида Шай-
бонийхон эллик минг қўшин билан Мургоб дарёсидан
ўтиб, Хурросонга бостириб кирди. Бадиузвазон мирзо
билан Музаффар мирзо Ҳиротнинг шимолида Қораработ
ва Тарноб деган жойларда икки бўлак қўшин, икки
алоҳида саркарда билан ланж бир аҳволда ўтирган эди-
лар.

Шайбонийхоннинг Убайдулла Султон ва Темир Сул-
тон бошлиқ отлиқ аскарлари бу икки қўшиннинг ораси-
га тифдай ёриб кирди-ю, кучли бир зарба билан икки
подшоҳни икки томонга улоқтириб ташлади. Мирзолар

кўпчилиқ бек ва навкарлари билан тумтарақай бўлиб қочдилар. Фақат Зунунбек аргун ўзининг Ҳизабрулла бўлишига ва Шайбонийхоннинг қиличини синдиришга ҳали ҳам ишонгани учун бир неча юз навкарини хон қўшини қаршисига бошлаб чиқиб, охирги нафаси қолгунча олишди. Убайдулла Султоннинг отлиқлари ҳаял ўтмай уни эгардан уриб туширдилар, бошини кесиб наизага санчдилару Шайбонийхон мингандан отнинг оёғи тагига элтиб ташладилар.

Жанг майдонидан ҳаллослаб қочган Бадиuzzамон мирзо Ҳиротга ҳаммадан олдин етиб келди, аммо шаҳар ичига кирмади. Боги Жаҳонорода бир неча соат тўхтаб, отларига дам берди-ю, олтин-кумуш ва жавоҳирларидан кўтарганича олди. Унинг хотин-болалари шаҳар ичидаги — аркда эди. Орқадан қувиб келаётган ёв таҳликасидан қўрқсан Бадиuzzамон мирзо шаҳар доругасини чақириб, қалъя дарвозаларини бекитиб олишни буюрди. «Қамалда қолишдан қўрқманглар, биз Қандаҳор томондан қўшин тўплаб келиб, сизларни халос қилурмиз», деган қуруқ ваъда билан хотинлари ва болаларини қўргон ичидаги қолдириб ўзи жанубга қараб шошилди.

Ҳиротга кечаси етиб келган Музаффар мирзо ҳатто енгилиш ва қочища ҳам акаси билан мусобақадашган каби иш қилди. У ҳам шаҳар ташқарисидаги Боги Сафидда бир неча соат тўхтаб, нафасини ростлагач, әнг керакли нарсаларини олди-ю, ёв етиб келиб қолишидан қўрқиб, аркка кирмади, онаси ва хотинларини қалъя ичидаги қолдириб, дарвозаларни бекитишни буюрди, у ҳам «Қамалда қолсаларинг ўзим келиб қутқарамен!»— деганича Астрободга қараб қочди.

Мирзоларини кутганидан ҳам осон енгган Шайбонийхон шаҳардан ўн беш чақиримча шарқдаги Қаҳдистон деган хушҳаво ўтлоққа тушиб шоҳона чодирларини тикдирди.

Хадича бегим Ҳиротда бор аъёнлар ва қўриқчи аскар саркардаларни тўплаб, қўргон дарвозаларини бекитишга уриниб қўрди. Аммо икки оға-ини подшодан биронтаси Ҳирот мудофаасига бош бўлмасдан қочиб кетганлиги ҳамманинг руҳига ёмон таъсир қилган, қамал азобини ҳеч ким зиммасига олишни истамас эди. Хоннинг ғазабига қолмаслик учун Ҳиротни унга жангсиз топширишни маъқул кўрувчилар кўп эди. Ахийри Ҳирот шайҳулисломи Тафтазани бир неча нуфузли ка-

шиларни ёнига олиб, Ҳирот шаҳрининг калитларини қимматбаҳо совға-саломлар билан бирга хонга элтиб топшириди.

Қаҳдистоннинг оромбахш баҳор ҳавосида улкан ғалабдан таъби очилиб юрган Шайбонийхон энди жозибали бир аёл билан қовушгиси келар эди. У Ҳиротнинг энг таърифи кетган гўзал жувони — Музаффар мирзонинг йигирма ўшлик суюкли хотини Қоракўз бегим деб эшитган эди. Тошкентда ва Андижонда Қоракўз бегим деб от чиқарган қиз-жувонлар қанчалик чиройли бўлганини хон яхши билар эди. Ҳиротлик Қоракўз бегимнинг асл номи бошқа бўлса ҳам қора кўзли гўзаллар орасида энг чиройлиси бўлгани учун эл орасида шу исм билан танилган эди.

Шайбонийхон доимий одатини қилиб, бу жувонга фойибона ошиқ бўлгани ҳақида қисқа бир ғазал ёзи-ю, шоир Муҳаммад Солиҳни орага қўйиб, шеърни бегимга етказдирди.

Музаффар мирзо номардлик қилиб хотинларини ташлаб кетганидан қаҳри келган Қоракўз бегим хоннинг ғазалини хуш қабул қилди. Хадича бегим бошлиқ бошқа келинлар Ҳиротнинг энг мустаҳкам истеҳкоми бўлган Ихтиёридин қалъасига кириб бекинганларида Қоракўз бегим улардан ажralиб қолди ва отасининг шаҳар ташқарисидаги чорбоғига кетди. Кейин бегимни ҳамомда ювинтиришиб, келинлардай ясантиришди-ю, хон юборган шоҳона маҳофага солишиб, Каҳдистонга олиб кетишиди.

Кечки пайт Ҳиротнинг шайхулисломи ва қозиси ҳам хон қароргоҳига чақирилди.

Бугун одатдагидан ёшроқ кўринаётган Шайбонийхон шариат пешволарини маҳфури¹ гилам тўшалган боргоҳда қабул қилди. Хоннинг ёнида турган Мулла Абдураҳим Қоракўз бегимни бугун имоми замонга никоҳлаш ҳақида гап очди.

— Бугунми? — деб шайхулислом қозига саросима бўлиб кўз ташлади. Қози бу қараашнинг маъносини тушиуни.

Қоракўз бегим Музаффар мирzonинг никоҳида эди. Эрининг ташлаб кетганига беш кун ҳам бўлгани йўқ.

¹ М а ҳ ф у р и — гулларига шеърий байтлар қўшиб тўқилган нодир ипак гилам.

Ҳолбуки, бир мусулмоннинг никоҳидаги хотининг илдаси бўлади, уч ой ўтмагунча бошқа кишига никобҳлаш мумкин эмас. Шариат буни қатъяян ман қилган!

Шайхулислом хоннинг оёғи тагидаги гиламни ўпиб, шу тўғрида гап бошлаган эди, хон унинг сўзини кесди:

— Шариатни бизга ўргатманг! Бегимни ҳезалак эри бундан тўрт ой олдин уч талоқ қўйган. Сиз уч ой дейсиз! Бегим тўрт ой боши очиқ юрган! Наҳотки, сиз, шариат пешволари, бундан бехабарсиз?

Хоннинг қаҳридан қўрқиб кетган шайхулислом оппоқ соқолини маҳфури гиламга суркаб яна ер ўпди:

— Хабардормиз, ҳазратим!

— Хабардормиз! — деди қози ҳам гиламни ўпио.

Улар Музаффар мирзонинг бундан тўрт ой бурун аччиқ устида хотинини уч талоқ қўйганини билар эдилар. Бироқ кейин мирзо хотини билан яна ярашганда шайхулислом билан қози бегимни эрига қайтадан никоҳлаб берган эдилар. Лекин бегимнинг аввалги ёш эри тилга олинганидан рашки келиб, сабр косаси тўлиб турган хонга буни айтиш — ўлимни бўйнига олиш билан баробар эди.

Шариат пешволари энди бу тўғрида «чурқ» этмасдан никоҳ ўқишга ҳозирландилар...

* * *

Салласига лаъл ва гавҳар билан бирга укпар ҳам қадалган Шайбонийхон кечаси бегимнинг хобгоҳига шаҳдам қадамлар билан кириб кетди. Хобгоҳнинг ташқи бўлмасида хоннинг ҳарамига қарайдиган кекса бека, иккита бичилган хабаш қул ва бегимга эргашиб келган иккита каниз навбатчилик қилиб қолишиди.

Бир вақт хобгоҳ эшиги шахт билан очилди-ю, елвағай тўн кийган, бошидаги оқ шабпўши¹ бир ёнга оғиб кетган Шайбонийхон чиқиб келди. Унинг ранг-қути ўчган, лаблари пирпирайди.

— Беҳаё экан бу! Бузилиб кетган экан! Безбет!

Ҳарам бекаси бегимнинг канизлари билан бирга шоша-пиша ичкарига кирдилар. Тўшак четида юзини қўл-

¹ Шабпўш — кечаси кийиб ётиладиган дўпписимон енгил бошкайими.

лари билан бекитиб олган гўзал жувон елқалари сил-
киниб, пиқ-пиқ йиғлар эди.

Маълум бўлишича, Қоракўз бегим Ҳиротнинг сўнгги подшолари яхши кўрадиган ва олий табақа аёллари «ғалвира» деб от қўйган шўх бир қилиқ қилади. Бу билан у эллик олти ёшлик хонни қойил қилмоқчи, балки унинг илҳомини оширмоқчи бўлади. Бироқ кўп марта уйланган, қанча қиз-жувонлар билан бир ёстиқ-қа бош қўйган хон умрида бундай қилиқларни кўрмаган экан. У аввал саросимага тушади, кейин Қоракўз бегимнинг аввалги ёш эрини эслайди. Бегим бундай қилиқларни аввалги эрига ҳам қилганларини кўз олдига келтиради-ю, ҳафсаласи бирдан пир бўлади ва сўкиниб ўрнидан туриб кетади.

Бегим бу шўхликни хонга ёқиш учунгина қилганини, Ҳирот аслзодалари орасида бу жоиз эканини канизлар ҳарам бекасига тушунтиридилар. Бегимга раҳми келган ҳарам бекаси хоннинг олдига чиққиб, уни жаҳлидан туширишга тиришди:

— Ҳазратим, айб фақат бу бегимда эмас! Айб унга шу қилиқни ўргатганларда! Ҳиротда беҳаёлар кўп экан!

— Бу шаҳар — диндан қайтган рофизийлар¹ уяси! — деди хон ҳам энди ғазабини бошқа томонга йўналтириб. — Бу жувоннинг қайнанаси Хадича бегим — безбетларнинг энг каттаси! Энг аввал ўшани тутиб жазосини бериш керак!

Шайбонийхон хобгоҳга қайтиб кирмади. Қоракўз бегимни тавфиқ ва ҳаёй йўлига қайтаришни ҳарам бекаси билан ҳабаш қулларга топширди-ю, ўзи боргоҳга жой солдириб ётди. Аммо тонг отгунча ухлай олмади.

Эрталаб аzonда боргоҳдан хиргоҳга ўтди-да, лашкарбошилардан Убайдулла Султонни, мулозимлардан Муҳаммад Солихни, Мулла Бинойни ва Мансур бахшини чақириди.

Энг аввал жияни Убайдулла Султонни сўроққа тутди:

— Ихтиёридин қалъаси олиндими, йўқми?

— Хон ҳазратлари, бугун-эрта олингусидир!

— Битта бузуқ хотин бекитиб ётган қалъани шунча лашқар билан ҳалигача ололмайсан! Ё ўзим бориб олайми?

¹ Рофизийлар — исломнинг сунний мазҳабидан шиа мазҳабига ўтганлар ва умуман, мусулмончиликдан чиққанлар.

Хонга кечаси бир бало бўлганини ҳамма сезди. Йигирма ёшли девқомат Убайдулла Султон улкан гавдасини эгиб, хонга икки букилиб таъзим қилди:

— Ҳазратим, қалъани шу бугун оламиз. Ҳозир мен ўзим бориб ҳамла қиласмен!

— Ҳамла қиласмен деб, лашкаринг деҳқонларнинг экинини топтаб кетибди. Биз Ҳиротга меҳмон бўлиб келганимиз йўқ! Деҳқоннинг ҳосили ўзимизга кёрак! Боғларни ҳам от босмасин! Мевасини ўзинг ейсан! Сен темурийзодаларнинг уруғини қурит! Ӯшаларга хизмат қилиб қутурган шиаларни бос!

— Барча айтганларингизни бажо келтирамиз, ҳазратим!

Убайдулла Султон кетишга чоғланди. Шунда Шайбонийхон:

— Агар қалъани бугун оладиган бўлсанг, Мансур бахшини ҳам олиб кет! — деди. — Бу бахши яна бўйдоқ юрибди. Бунга хотин чидамайди. Хадича бегим шунга ўхшаган зўр бир эр тополмай юрган эмиш. Қалъани олсанг, ўша хотинни Мансур бахшига никоҳлаб берасан!

Семириб, аввалгидан баттар йўғонлашиб кетган ўтовдай катта Мансур бахши:

— Айналайн сиздан, хон ҳазратлари! — деди. — Самарқандда никоҳлаб берган Зуҳра бегимингиз ўлгандан бери сўққабошлик жонимга тегиб юрган эди!

— Лекин сен бахши ҳадеб нафсингни ўйлай берма! — деди хон. — Ҳиротнинг энг катта бойликлари Хадича бегимнинг қўлида. Менга ахбороти келган, бу хотин олтиндан гул ясатган эмиш, барглари зумраддан эмиш. Гулга қўниб турган булбулнинг оғзида гавҳари бор эмиш.

— Хон ҳазратлари, бунисини мен сизга топтириб бераман! — деди Мансур бахши. — Ҳазинаси ҳам сизники! Менга ўзи бўлса бас!

Бу шўх гаплардан кейин Шайбонийхоннинг чеҳраси сал очилди-ю, Убайдулла Султон билан Мансур бахшига кетиш учун рухсат берди. Муҳаммад Солиҳ билан мавлоно Биной хон қаршисида ҳамон қўл қовуштириб, оёқ ўстида сукут сақлаб туришарди. Қизил кимхоб кўрпача ўстида чордана қуриб ўтирган хон Муҳаммад Солиҳга қараб:

— Сен, шоир, нуқул Ҳиротни мақтар эдинг, — деди. — Ҳиротнинг ҳаёсини йўқотган бетавфиқларнинг уяси эканкуй!

Муҳаммад Солиҳ хоннинг бошига кечаси қандай ҳангома тушганини аллақачон пайқаган эди. Шайбонийхон ҳозир кексалик заифлигига чора тополмай алами келаётгани ҳам сезилиб туарди.

Муҳаммад Солиҳ унинг ярасига туз сепмаслик учун гапни бошқа ёққа бурди:

— Ҳазратим! Ҳиротнинг ахлоқини темурийлар бузган. Сиз темурийларни жангда жисмонан енгдингиз, энди уларни маънан енгмоқдасиз! Имоми замонамизнинг ахлоқий покликлари ҳиротликларга ибрат бўлмоғи керак.

— Гапга чечансен! Лекин Ҳиротнинг ахлоқини шоирлар ҳам бузганини нега айтмайсен! Темурийларни мақтаб беҳаё шеърлар ёзиб, лаган-лаган олтин олган шоирларинг бўлмағанми?

— Бўлган, хон ҳазратлари. Мана, Мавлоно Биноийни Ҳиротдан ана ўшанақа шоирлар кеткизиб юборган!

Шайбонийхон Мавлоно Биноийга юзланди:

— Шундайми?

— Шундоқ, ҳазратим! — деди Биноий таъзим билан.

— Ундай бўлса Мавлоно Биноий адолат қиличини белига тақиб, ёмон шоирлардан қасдини олсин! — деди хон. — Бизнинг ғолиб навкарларимиздан эллик-олтмиништасини мавлононинг ихтиёрига беринг. Темурийларнинг олтинидан қутуриб юрган шоирларнинг молу мулки мусодара қилинсин! Барча олтинларини тортиб олиб хазинага топширинг! Кейин бу шоирларнинг кўзи очилиб, тавфиқу ҳаё йўлига қайтиши осон бўлади!

Мавлоно Биноий безовталаниб Муҳаммад Солиҳга қаради. У бир вақтлар ўзига алам ўтказган баъзи Ҳирот шоирларини ҳар қанча ёмон кўрса ҳам, лекин ёнига ас-кар олиб, бирорларнинг уйини тинтишни, молу мулкини мусодара қилишни ўзига муносиб кўрмас эди. Бироқ буни хонга рўй-рост айтиш ҳам мумкин эмас эди.

— Ҳазратим, шундай улуғ вазифани фақирга ишониб топширмоқ ниятингиздан сарафrozмен!.. Фақат бир андешам бор.

— Хўш?

— Ҳазратим, мен умримда қилич чопмаган кекса одаммен. Ёшим элликдан ошган. Бу фармони олийни жанговар бек шоир Муҳаммад Солиҳ жаноблари фақирдан юз ҳисса яхши бажарурлар! Фақир бу жанобга кучим етганича ёрдам берай!

Муҳаммад Солиҳ бу ишни ўзига йўлатгиси келмади.

— Мавлоно, мен Ҳирот шоирларини сизчалик яхши билмаймен!

Буйруғи сансалор бўлаётганини сезган Шайбонийхон, кўзлари таҳдидли ялтираб, Бинойга тикилди.

— От инъом қилдик — миндингиз. Тўн инъом қилдик — кийдингиз. Улуфа бердик — йўқ демадингиз. Энди иш буюрсак йўқ дейсизми?!

Бошқа эътиrozга ўрин қолмади. Олти йилдан бери хон хизматида юрган Биноий унинг ҳозирги буйруғини бажаришга мажбур эди...

* * *

Шайбонийхоннинг ўнг қўл вазири — олтмиш беш ёшлик Мулла Абдураҳим Ҳирот алломаларидан олтин унидиришнинг бошқа бир йўлини ўйлаб топди. Ҳирот атрофларидан ғолибларнинг қўлига тушган ўлжалар орасида сурув-сурув қўйлар ҳам бор эди. Мулла Абдураҳим шу қўйлардан олтмиштасини Ҳиротнинг Қипчоқ дарвозаси ташқарисидаги бозорга ҳайдаб тушишни хизматкорларига буюрди. Сўнг шаҳарга бир тўп навкар юбориб, темурйилар даврида машҳур бўлган Хондамирни, Бобирга яқинлиги билан танилган Мавлоно Фазлиддинни, Ҳусайн Бойқарога атаб шеърлар ёзган «кўса» лақаблик шоир Султон Муҳаммадни, яна шуларга ўхшаш беш-олти кишини қўй бозорига мажбуран олиб келтирди. Кейин Мулла Абдураҳимнинг ўзи ҳам бир тўп мулозимлари билан бозорга ўйноқи бир аргумоқни миниб кириб келди. Мулозимлардан бири пиёда қўл қовуштириб турган Хондамирга ва унинг ҳамроҳларига шундай деди:

— Судурлар садри Низомиддин Абдураҳим ҳазратлари ўзларининг бу қўйларини фақат сизларга сотмоқчилар!

Хондамир шерикларига «Шу билан қутулсак коши!» — дегандай қилиб қаради-ю, кейин судурлар садрига таъзим қилди:

— Бажонидил олурмиз. Нархини айтсинлар.

Мулозим овозига тантанали тус бериб деди:

— Бу қўйлар — судурлар садрининг нафаси теккан таббаррук қўйлардир. Сизлар темурийлар хизматида ҳа-

ромхўрликка ўрганиб, бузилиб кетган одамсизлар. Бу қўйларни сўйиб еб ҳалқумларингни поклашларинг керак. Шунинг учун бу қўйлардан ҳар бирининг нархи олти юз динор!

Олти юз динорга битта эмас, етти-саккизта қўй олиш мумкин эди. Бироқ қўйларни судурлар садри айтган нархда олмаслик — унинг ғазабига учраш ва шафқатсиз жазога гирифттор бўлиш демак эди.

Пулдан қийналироқ юрган Мавлоно Фазлиддин бе-зовталаниб сўради:

— Жаноблар, яқинда моли омон ҳам тўлаган эдик-ку?

Шоир Муҳаммад Султон истеҳзоли кулимсиради:

— Мавлоно, бу ноёб қўйларга ҳазратимизнинг мубо-рак назарлари тушган экан. Шунинг учун энди бу моли омон эмас, балки моли имондир!

Мулла Абдураҳим истеҳзони пайқаб қаҳри кёлди ва навкарларига буюрди:

— Буларнинг ҳар бирига қўйлардан ўнта-ўнта қў-шалоқлаб беринглар! Буларни темурийларнинг олтини қутуртирган! Ҳаммасининг димоги жуда баланд! Буларни осмондан ерга тушириб қўйиш керак. Қўйларни уй-ларигача ўzlари ҳайдаб кетсин! Ҳеч ким ҳайдашмасин! Уйларигача кузатиб бориб, пулини ундириб келинглар! Қайси бири буйруқни бажармаса молу мулкини мусо-дара қилиб, ўзини зиндонга ташланглар!

Навкарлар буйруқни бажаришга киришдилар.

Ҳиротда кўпчилик танийдиган шоир, олим ва меъмор иссиқ кунда ҳалпиллаб, сертупроқ, серчанг кўчалардан қўй ҳайдаб кетдилар. Кейин бу «табаррук» қўйларнинг пулини қарз-ҳавола қилиб бўлса ҳам тўлаб қутулдилар.

* * *

Убайдулла Султоннинг бир ярим минг навкари ўн кундан бери Ихтиёриддин қалъасининг атрофида ғивирлар, аммо ўқ ҳам, шоти ҳам етмайдиган баландликдаги қалъани олишнинг ҳеч иложини тополмас эди. Темир дарвозаларга тўпдан ўқ отиб кўришди, бўлмади. Кейин ер тагидан фор қазишга тушишди.

Шуни ҳисобга олмаганда, Ҳирот ҳозир бир. қадар тинчиб бормоқда эди. Мусодара қилинадиган хазиналар

бўшаб қолган, таланадиган молу-мулклар таланиб бўлган эди.

Шайбонийхон Қаҳдистондан Боғи Жаҳонорога кўчиб келиб, Ҳиротнинг машҳур санъаткорларини ўз ҳузурига чақиртирди. Санъат ишларини бошқараётган Муҳаммад Солиҳ воситачи бўлиб, Беҳзодни хон билан бир-икки марта учрашилди. Хоннинг маслаҳатгўйи Мулла Абдураҳим расм чизишни шиалар ва роғизийларнинг иши деб ёмон кўрса ҳам Шайбонийхон Беҳзоднинг расмлари Ҳусайн Бойқарони қанчалик машҳур қилганини билар, энди бу мусаввирнинг истеъдодидан ўз шуҳрати учун фойдаланишни истар эди.

Беҳзодга Шайбонийхоннинг расмини чизиш топширилди.

Мусаввирнинг илтимоси билан хонни қип-қизил қимхоб кўрпа устига ўтқаздилар, унинг орқасига қора баҳмал болиш қўйдилар, белига ингичка олтин камар боғлатдилар, олдига олтин муқовали кичик дафтар, қалам ва сиёҳдон қўйдилар. Ўттиз йилдан бери рассомлик қилиб юриб, кўпгина подшоҳларни кўрган ва улар билан муомала қилишни яхши биладиган Беҳзод Шайбонийхонга ҳам фақат мақтов ёқишини аллақачон пайқаган эди:

— Ҳазратимни арғумоқ от устида қилич яланғочлаган пайтларида тасвираш имкони. Бироқ ҳозир сизнинг энг зўр лашкарбоши эканлигинги ҳаммага аён. Аммо олам аҳли сизнинг кўп йил мадрасаларда ўқиган фозил имоми замон эканлигинги ҳам суратда кўрм阜и керак. Шу сабабли фақир сизни муқаддас китобу олтин қалам билан тасвир этмоқчимен!

— Маъқул,— деб хон бунга розилик берди.

Сурат тайёр бўлгандан кейин Шайбонийхон, Муҳаммад Солиҳ ва бошқа бир неча мулоғимлар Беҳзод ишлган хонага тўпландилар. Мулла Абдураҳим расмга, сўнг хонга қаради-ю, ҳайрон бўлиб:

— Ҳазратимнинг худди ўzlари-я!— деди.

Суратда Шайбонийхоннинг кўпни кўрган тажрибали одам эканлиги кўзга аниқ ташланиб турарди. Бўёқлар Беҳзодга хос улуғ бир маҳорат билан хилланган эди. Оддий одам расмдан ҳеч бир камчилик тополмас, Беҳзод хонни иззат-икром билан тасвиrlабди, деб ўйлар эди. Лекин Муҳаммад Солиҳ хоннинг тагидаги кўрпанинг ранги қип-қизил қон рангидаги эканини сезди. Хон кўрпа,

устида эмас, гүё қон дарёси устида ўтирганга ўхшарди. Хоннинг белига боғланган ингичка олтин камарнинг учи чалмашган сёқлар тагидан худди қорамтири бошли сариқ илонга ўхшаб буралиб чиқиб турар эди. Хон суюнган қора болиш ҳам қора кучларнинг тимсолига ўхшарди.

Шайбонийхоннинг барча ишларидан хабардор Беҳзод бу яширин рамзий бўёқлар билан нималар демоқчи бўлганини Муҳаммад Солиҳ пайқади-ю, қўрқиб кетди. Агар у сезган маънени хон сезиб қолса, Беҳзод ҳам омон қолмайди, орада воситачи бўлган Муҳаммад Солиҳ ҳам! Шунинг учун у суратга хомуш тикилиб турган Шайбонийхоннинг фикрини хатарли рамзий маънодан узоқроқ олиб кетишига интилди:

— Муҳаммад алайҳиссалом яшил рангни яхши кўрар эканлар. Имоми замон хон ҳазратлари ҳам яшил рангни суйишларини мусаввир дуруст пайқабдир. Қаранг, ҳазратимнинг кўйлаклари яшил рангда. Суянган деворлари ҳам яшил.

— Буниси маъқул,— деб хон энди оғзини очди.— Лекин... биз мавлоно Беҳзоднинг бошқа суратларини ҳам кўрган эдик...

Шайбонийхон Беҳзод тасвиридаги шертахлит Ҳусайн Бойқарони эслади. Ҳусайн Бойқаронинг сафарга чиққан пайтини тасвири этган бошқа бир расмда гүё булутлар ҳам, осмон ҳам, ҳатто тоғу тошлар ҳам подшонинг кетидан эргашиб, у кетаётган томонга интилиб бораётгандай кўрсатилган эди. Темурийларни бунчалик улуғлаган Беҳзод Шайбонийхонни жўн бир одам қилиб тасвириланга ўхшарди. Хон суратни кўрганда кўнглида қўзғалган мураккаб туйғуларни айтишга муносиб сўз тополмади-ю, Беҳзодга қараб:

— Мўйқаламни менга беринг!— деди.

Хоннинг авзойи ёмонлигини ҳамма сезди. Беҳзод маҳсус қаламдонда турли бўёқлар билан бирга турган мўйқаламларни хонга таъзим билан тутди. Шайбонийхон қорамтири қўнғир бўёққа ботириб қўйилган мўйқаламни олди. У Бухорода мадрасада ўқиб юрган пайтларида сурат чизишни ҳам анча машқ қилган, мўйқалам тутишини сал-пал билар эди. Беҳзод чизган суратда Шайбонийхоннинг соқол-мўйлови ҳаддан ташқари қисқа ва сийрак кўрсатилган, хоннинг назарида, тасвири шунинг учун жўнлашиб кетганга ўхшарди.

— Соқолни дурустроқ чизмоқ керак! — деб Шайбонийхон ўзининг суратида — қулоқ яқинида жуда сийрак кўрсатилган соқолни бир оз қалинлаштирмақчи бўлди. Аммо мўйқаламда бўёқ кўпроқ экан, қулоқ олдидаги соқол бирдан кигиздай қалинлашиб кетди. Беҳзод соғтиши суфуриб олинаётган одамдай:

— Иҳ! — деди.

Аммо Муҳаммад Солиҳ Беҳзоднинг билагини маънодор қилиб қисди-ю:

— О! О! Ҳазратим мўйқалам теккизишлари билан суратга яна файз кирди! — деди.

У Беҳзодни фалокатдан фақат хонни мақтаб қутқа-риш мумкин эканлигини сезиб шундай демоқда эди. У буни Беҳзодга ҳам сезидиргиси келиб:

— Мавлоно, тарихий бир ҳодиса юз берди! — деди. — Сиз чизган суратга имоми замон, Искандари соний ўз муборак қўлларини теккиздилар! Буни одамлар асрлар давомида бир-бирларига айтиб юргайлар!

Беҳзод хоннинг қилган ишини — санъаткорга аҳмоқона хўжайнлик қилишнинг намунаси деб билмоқда эди. «Шу маънода чиндан ҳам буни тарих унутмас, одамлар бир-бирларига кулиб айтиб юрурлар», — деган фикр Беҳзоднинг хаёлига энди келди. Муҳаммад Солиҳ расмдаги рамзий маънони аллақачон пайқаганини, энди хондан балога қолмаслик учун атайлаб шу гапларни айтаётганини Beҳzod тушунди-ю, ички бир истеҳзо билан хонга таъзим қилди:

— Қулингиз чизган суратга халифаи замонимизнинг назарлари тушганидан бошим кўкка етди!

— Баракалла! — деб хон уни энди мақтади.

Хоннинг қўли билан чапланган соқол қулоқ яқинига ёпиштириб қўйилган пўстак парчасига ўхшар эди. Beҳzod ичиде «Баттар бўлсин!» — деди-ю, хон бу соқолни қандай хунук чаплаган бўлса, шундайлигича қолдирди.

Хадиҷа бегим кириб бекинган Иҳтиёриддин қалъаси Убайдулла Султонни ўн етти кун овора қилди. Ниҳоят, қалъа деворининг отбозорига туташган ноchorроқ бир

жойини тагидан кавлаб, нақб солиб¹ бузиб кирдилар Қалъани мудофаа қилиб турган эллик-олтмиш йигит битта қолмай қириб ташланди. Қўлга тушган қиз-жувонлар ғолиб қўшиннинг бек ва навкарларига улашилди.

Хадича бегимнинг ўзи ҳарамнинг ичма-ич эшикларини орқасидан тамбалатиб, энг тўрдаги бир хонага кирди-ю, ёнида қолган канизларга буюрди:

— Тантанали маросимларда киядиган кийимларими ни келтиринг!

Убайдулла Султоннинг навкарлари ҳарамнинг ичдан танбаланган эшикларини бузиб киргунларича Хадича бегим катта гавҳар қадалган бинафшаранг тоқисини бошига кийиб, ясаниб, охирги эшикдан ўзи чиқиб келди. Олтин аралаш ипакдан тўқилган қабоси кўзни қамаштираси эди. Қаддини тик тутиб келаётган барваста аёл маликаларга хос улуғворлик билан шошилмай эшикдан чиқар экан, қилич ялангочлаган, ҳансираган навкарларни унинг салобати босди. Хадича бегим бошини мағрур тутиб яқин келганда навкарлар беихтиёр ўзларини четга олиб, унга йўл бердилар. Бегим ўларнинг саркардасини сўради.

Навкарлар уни ҳовлида отлиқ турган Убайдулла Султоннинг олдига бошлаб чиқдилар. Ҳамон канизлар қуршовида келаётган бегим енгил бир таъзим билан шошилмай гап бошлади:

— Султон жаноблари, тақдир экан, биз таслим бўлдик. Энди мени Шайбонийхон ҳазратларининг ҳузурига йўллашингизни илтимос қиласмен!

Убайдулла Султон бекларининг орасида турган Мансур бахши билан маъноли кўз уриштириб олди-ю, масхараомуз кулимсиради:

— Хон ҳазратлари бегимга айтадиган гапларини бизга тайинлаб юбордилар.

— Ундан бўлса қулоғимиз сизда, султон жаноблари!

Убайдула Султоннинг беклари орасида оқ саллалик бир эшон ҳам бор эди. Убайдулла Султоннинг ишораси билан Мансур бахши ва эшон отдан тушдилар. Мансур бахши зар ёқалик тўн, қизил этик кийиб, куёвлардай ясаниб келган эди. Йигитлардан етти-саккизтаси унинг

¹ Нақб солиш — таги кавланган деворни олов ва борут (порох) билан портлатиб қулатиш.

атрофини куёвнавкарлар каби ўраб олдилар. Шундан кейин Убайдулла Султон Хадича бегимга юзланди:

— Имоми замоннинг фармони билан сиз бугун Мансурбекнинг никоҳига ўтурсиз!

— Бегимнинг ўзлари ҳам билгандай ясаниб чиқибдилар!— деб кулди мулозимлардан бири.

Хадича бегим қоп-қора йўғон Мансур бахшининг чўтири юзига қаради-ю, даҳшатга келди:

— Мен... мен хон ҳазратлари билан ўзим сўзлашамен!

— Хоннинг сиз билан сўзлашишга вақтлари йўқ!

— Ахир мен ҳам подшоҳ оиласиданмен! Бу қандай хўрлик?

— Сиз рофизийлар оиласидансиз! Рофизийларни жазолаш — савоб!

— Султон жаноблари, сизнинг ҳам мендек кекса онангиз бордирлар. Ҳеч бўлмаса оналигимни ҳурмат қилинг!..

— Менинг онам сиз қилган разилликларни қилган эмас! Қайси она ўз неварасини ўзи ўлдиртирибди?! Сиз неварангиз Мўмин мирзонинг ўлимига сабаб бўлган хунхўрлардансиз!

Хадича бегимнинг бояги улуғвор ва мағрур қиёфаси энди бирдан аянчли тусга кирди, қадди букчайиб, қўллари осилиб қолди.

Убайдулла Султон навкарларига буюрди:

— Ичкарига олиб киринглар. Энди бунинг кўзини Мансур бахши очсин!

Хадича бегимнинг бўшашиб гўё тўкилиб кетаётган гавдасини икки каниз икки томонидан суяб ичкарига олиб кириб кетдилар.

Никоҳ ўқилгач, Мансур бахши канизларни ҳарамдан чиқариб юборди-ю, Хадича бегим билан яккама-якка қолди.

Тун сукунатида қандайдир мислсиз қийноқлардан чинқирган бегимнинг фарёди ҳарам атрофидаги уйларга ҳам эшитилиб турарди.

Ярим кечада Мансур бахши оёқда зўрга турган Хадича бегимни олдига солиб, ҳарамдан чиқди. Иккви ойдин қалъанинг бир четига қараб кетишиди.

— Олтин гул,— деб шивирлади Мансур бахши.— Олтин булбули бор. Оғзида гавҳари бор. Ана шуни топиб бермасанг ҳозиргидан бешбаттар қиласен. Топ тезроқ!

Ҳозир жонидан бошқа нарса кўзига кўринмаётган Хадича бегим Мансур баҳшини қўрғон четидаги яширин хазинага бошлаб келди. Ер остидаги бу хазинага салқин сув сақланадиган сардобанинг четидаги маҳфий йўлдан кирилар эди. Мансур баҳши қўлида ёқмасдан олиб келаётган машъалани ер тагига тушганда ёқди.

Ер остида беш-олтига темир сандиқ қатор турибди. Хадича бегим мадорсиз қўллар билан уларга бир-бир калит солиб, очиб, кўрди. Иккитасида кумуш тангалар, биттасида олтин тангалар. Биттасида қилич ва ханжарларнинг олтин дасталари. Яна бир сандиқда аёлларнинг қимматбаҳо тақинчоқлари. Мансур баҳши кўзлари ёниб, бу бойликларга бир-бир қўл уриб кўрди-ю:

— Олтин гул қани? — деди. — Барглари зумрад гул қаерда?

Ер остини ағдар-тўнтар қилиб қидирсалар ҳам бу гул топилмади. Хадича бегим:

— Воҳ! — деди мусибатли товуш билан. — Энг ишонган одамларим ҳам менга хиёнат қилмишлар. Гулни ўғирлаб кетмишлар! Сўнгги нажотимни ҳам ўғирлатибмен! Оҳ!

— Сен оҳ-воҳ деб, Ҳусайн Бойқарони алдаб ўргангансен. Лекин мени алдай олмайсен. Топ гулни! Қани, қаерга яширгансен?

— Мана шу четки сандиқда эди...

— Ёлғон! Сен уни бошқа жойга яширгансен! Кўрсат ўша жойни!

Мансур баҳши -Хадича бегимни зинапоядан юқорига — сардoba бўйига олиб чиқди.

— Мени алдай олмайсен! Кўрсат!

— Мен сизни алдаганим йўқ! Ўзим алдандим! Менинг паймонам тўлгани рост экан! Мени ўғлим алдаб кетди! Музaffer мирзони деб мен нималар қилмаган эдим! Оқибати шу бўлди! Мени бу қийноқларга ўғлим ташлаб кетди! Ўғлим!!

— Лекин сен олтин гулни ўғлингга ҳам бермагансен! Уни ўзинг яширгансен! Хон ҳазратлари менга айтдилар. «Гавҳар донасини тишлаб турган булбули бор», дедилар. Мен бу гулни олтин булбули билан хонга пешкаш қиласмен деб сўз берганимен. Топ ҳозир!

— Ўғирлатган бўлсан қандай топай?!

— Топмайсенми ҳали? Топмайсенми?! Мана тоимсанг!

Девдай зўр Мансур бахшининг бир зарбى билан Хадича бегим суви муздай сардобага шалоплаб қулаб тушди. Мансур бахши уни сочидан тортиб чиқариб олди-ю, ҳамрага томон судраб кетди.

Бу қийноқлар уч кун давом этди, аммо олтин гул топилмади. Тўртинчи куни кечаси Хадича бегим Мансур бахшининг хонасида жон берди.

7

«Наҳотки менинг ҳам паймонам тўлган бўлса?»— деган қўрқинчли ўй Шайбонийхоннинг хаёлига Мурғоб дарёсининг бўйида тўсатдан Шоҳ Исмоилнинг қўшинлари қўршовинга тушиб қолган пайтда келди.

Ачиқ изфирин эсиб, қор учқунлаб турган бу бадқовоқ кунда Шайбонийхон Мурғоб бўйига Шоҳ Исмоил Сафавийни таъқиб этиб бориб қолган эди. Бундан бир неча соатгина олдин Шоҳ Исмоил бор қўшини билан Марв қўрғонидан орқага чекинган пайтда Шайбонийхон ўзининг яна улкан ғалабага эришишига мутлақо ишонган эди. Чунки Марв қўрғони ичидан кўпдан бери куч сақлаб ўтирган Шайбонийхоннинг ўн беш минг қўшини бор эди. Хонга келган аниқ ахборотларга қараганда, Шоҳ Исмоилнинг Марв қўрғонини қамал қилиб, қиши совуғида изғиб юрган қўшини ўн икки мингдан ошмас эди. Совқотиб, орқага бетартиб чекинган лашкарга ичкарида иссиққина жойда куч тўплаб ётган лашкар ҳамла қиласа — Шайбонийхоннинг голиб чиқиши муқаррардек туюларди.

Сўнгги йилларда Шайбонийхоннинг энг зўр истаги — Шоҳ Исмоил устидан узил-кесил ғалаба қилиш эди. Ўзини «халифаи раҳмон» деб эълон қилган Шайбонийхон мусулмон оламига ягона диний раҳбар бўлиш ниятида эди. Эрон ва Озарбайжонда шиа мазҳабини давлаг дини қилиб кўтарган Шоҳ Исмоил Сафавий эса ўзини «соҳиби замон» деб эълон қилган эди. Демак, у ҳам мусулмон оламига раҳбар бўлишга интиларди. «Бир қинга икки қилич сифмагай, мусулмон оламига ё мен раҳбар бўлишим керак, ёки шоҳ Исмоил!»— Шайбонийхон шу эътиқод асосида Шоҳ Исмоил билан бултур астойдил белашмоқчи бўлди, Ҳиротдан эллик минг қўшин билан Эроннинг Кёрмон ва Гургон шаҳарларигача бостириб борди. Ушанда Шоҳ Исмоил ғарбдаги турк султо-

ни Боязид II билан жанг қилиб юрган эди. Гурғонда ва айниқса Кермонда шиалар ҳаракати жуда авжига чиққан эди. Шайбонийхон бу шаҳарлардаги шиаларнинг бошлиқларини аёвсиз қатл эттирди, уларнинг масжид ва зиёратгоҳларини буздирди, мол-мулкларини талаттирди. Бу ҳаммаси шиалар пешвоси. Шоҳ Исмоилни дарғазаб қилиши ва дарҳол жангга отлантириши керак эди. Ўша пайтда ҳал қилувчи жанг бўлса Шайбонийхон ғолиб чиқиши муқаррар эди, чунки Шоҳ Исмоилнинг ярим кучи турк сultonни билан урушда банд эди. Буни шоҳнинг ўзи ҳам сезган бўлса керакки, ҳамма аламини ичига ютиб, Шайбонийхонга яхши муомала қилди, маҳсус элчи юбориб, уни Мовароуннаҳр ва Хурросоннинг олий ҳукмдори деб тан олди ва орадаги адоватни урушсиз бартараф қилишга истак билдириди.

Шайбонийхоннинг ўғли Темур Султон, жияни Убайдулло Султонлар шоҳ элчисига иложи борича яхши муомала қилишни, унга ширин гаплар айтиб, шоҳга совғасаломлар юбориб, уни Самарқанддаги Султон Али мирзо ва Тошкентдаги Маҳмудхон каби ғафлатда қолдиришни кейин пайти келганда ўшаларга ўҳшатиб йўқ қилиб юборишини истар эдилар. Лекин орада дину мазҳаб низоси аждаҳога ўҳшаб оғзини очиб туарди. Шайбонийхон Хурросонда турган ўз қўшинининг шиалар таъсирида шу аждаҳонинг домига тортилиб кетишидан қўрқар, «дину имон йўлида муроса йўқ, кимки шиаларга қўл берса, диндан қайтиб, рофизий бўлғай» деган гапни кўп такрорларди. Энди агар Шайбонийхон ўғли ва жиянининг сўзига кириб, Шоҳ Исмоилни тан олса, унга яхши муоммалада бўлса, шу билан беихтиёр шиа мазҳабини тан олган бўлмайдими? Одамлар: «Хонимизнинг ўзи ҳам рофизийлик йўлига киряпти!»— демайдими? Йўқ! Шайбонийхон ўзининг пок эътиқодига доғ туширишни истамайди! Унингча, ғайридиндан ҳам рофизийлик ёмон. Чунки ғайридин — ҳали мусулмончиликдан бехабар. Рофизийлар эса аввал мусулмон бўлган, кейин чорёrlар номига хиёнат қилиб, улардан юз ўғирган. Шайбонийхон бундай одамларга шафқатсиз муносабатда бўлиши керак. Шу фикр асосида у шоҳ элчисини беҳурмат қилиб қайтарди. Шоҳнинг мактубига эса осмондан келиб жавоб ёзди. «Сен бир шайхнинг ўғлисан, тожу тахтни сенга ким қўйибди, белингга кашкулингни боғлаб, қаландарлигинги қилсанг-чи!»— деган маънода унга кашкул

ва ҳасса «совға» қилиб юборди. Бу воқеадан кейин Шоҳ Исмоил турк султони билан сулҳ тузди-ю, Шайбонийхонга қарши жангга тайёрлана бошлади. Хоннинг Кермандаги шиа масжидларини буздиргани устига энди Шоҳ Исмоилнинг элчисини беҳурмат қилиб қайтаргани қўшилгач, Шайбонийхондан қасос олишни истовчиларнинг сони кўпайиб кетди.

Худди шу пайтларда Мовароуннаҳрдан ҳам ташвишли хабарлар кела бошлади — қўчманчи султонлар зулмига чидай олмаган Тошкент, Фарғона, Бухоро аҳолиси уларга қарши исён кўтарадилар. Ғалаёнлар Самарқандда ҳам, Ҳисорда ҳам бўлаётганини эшигтан Шайбонийхон Ҳиротдаги қўшинларидан ўтиз мингини Мовароуннаҳрдаги султонларга ёрдамга юборди. Бу ғалаёнларнинг сабабини билишга юборилган маҳсус кишилар Туркистон, Ҳисор ва Бухоро султонларининг ўзбошимчалик йўлига ўтганларини аниқлаб келдилар. Шайбонийхон уч йилдан бери Ҳиротда яшамоқда эди. Унинг узоқдалигидан фойдаланган султонлар ўзларини хон кўланкалари майдон билиб иш олиб бормоқда эдилар. Хуфиялар уларнинг ифво гапларини ҳам Шайбонийхонга ётказиб туар ҳадислар. Ҳусусан, Убайдулла Султон, Кўч-кинчихон ва Ҳамза Султонлар Шайбонийхоннинг Шоҳ Исмоил билан қалтис сиёsat олиб бораётганидан норози эдилар. «Жангни биз қиласиз, ғалабани биз келтирамиз, хонимиз фақат ёш қизчаларни никоҳига олиб, лаззатланишни билади, ҳеч қайсимизнинг маслаҳатимизни олмайди, шундай бўлгач биз ҳам бу ерда истаганимизча даврон сурайлик-да». Султонларнинг бу гаплари Шайбонийхоннинг ғазабини авжига чиқарди. У ички низоларни бир зарба билан бартараф қилмоқчи бўлди-ю, Убайдулла Султонни Бухоро ҳокимлигидан, Кўч-кинчихонни Туркистон ҳокимлигидан, Ҳамза Султонни Ҳисор ҳокимлигидан олиб ташлади ва уларнинг ўринлагида бошқа итоаткор одамларни қўйди. Албатта, бу кескин тадбир хон қўшини орасида катта обрўга эга бўлган Убайдулла Султон ва Ҳамза Султонларнинг тарафдорларини қаттиқ норози қилди.

Мовароуннаҳрдаги ғалаёнлар ва хон саройидаги ички низолардан хабар топган Шоҳ Исмоил бу қулай фурратдан фойдаланиб қолишга интилди. Одатда, катта ҳарбий юришлар баҳор ва ёз ойларида бошланар, Шайбонийхон ҳам шоҳнинг ҳужумини «бўлса, қиши ўтгандан ке-

йин бўлар», деб ўйлар эди. Унгача Мовароуннаҳрга жўнатилган ўттиз минг қўшин Ҳиротга қайтиб улгуриши мумкин эди. Лекин шоҳ Исмоил хон кутмаган кеч куз пайтида Ҳирот устига қўшин тортиб келаётгани маълум бўлди. Хурросонда Шайбонийхондан норози одамлар жуда кўп, Шоҳ Исмоил яқинлашса улар бош кўтариши муқаррар. Хоннинг асосий кучлари эса Амударёдан нарида. Шайбонийхон шошилини равишда Мурғоб бўйига — Марв қўргонига чекинишга мажбур бўлди.

Хоннинг бундай сесканиб чекинишини кўпдан бери кўрмаган аъёнлари қаттиқ саросимага туша бошладилар. Шунда хон уларнинг ўпкасини босадиган битта важ кўрсатди:

«Уша ғаддор рофизийлар юртидан узоқроқ кетганимиз маъқул. Шоҳ бизга эргашиб Мовароуннаҳрга яқинроқ борсин. Ўзимизнинг пок мазҳабли суннийлар юртидан мадад олурмиз. Унгача ўттиз минг лашкар етиб келгай. Бу шоҳга Марвда қопқон қўйиб, тумшуғидан илнитиргаймиз!»

Хоннинг бу режасини барча мулозимлари ва аъёнлари дарҳол «Доно тадбир!»— деб мақтадилар. Бироқ улар Марв қалъасида бекиниб ўтирган пайтларида Шоҳ Исмоил қўргонни қамал қилиб, Шайбонийхон номига кинояли мактублар йўллади. «Хон юборган ҳассани суюниб, кашкулни белимизга боғлаб келдик, қани энди хонда юрак бўлса қўргондан чиқсин, шайхнинг ўғли билан беллашсин!»— деган заҳарханда гаплар Шайбонийхоннинг иззат-нафсига қанчалик қаттиқ тегмасин, у тишинишига қўйиб, ҳафталар давомида қўргонда ўтирди. У тажрибали лашкарбоши сифатида шуни яхши билар эдик, йигирма тўрт ёшли Шоҳ Исмоил қанчалик уринмасин, эртами-кечми қиши совуқлари ва изфириллари уни илиқ жой излашга мажбур қиласди. Очиқ ҳавода дийдирраб юрган аскарлар қўли қовушга келмай қунишиб чекинишга тушса, ана ўшанда Шайбонийхон иссиқ қўргонда куч тўплаб ётган ўз аскарларини бошлаб чиқади. Унгача албатта Мовароуннаҳрдаги лашкар ҳам келиб қолади. Икки томондан берилган зарба Шоҳ Исмоилни тамом қилиши аниқ. Ана ундан кейин Эрон ҳам Шайбонийхонники бўлади, нарёғи Бағдодга ва Маккаю Мадинага йўл очилади... Шайбонийхон чиндан ҳам бутун мусулмон оламига халифаи раҳмон ва Искандари соний бўлади!..

Хоннинг бу ширин ўйларини фақат бир нарса таҳир қилмоқда эди. Чопар кетидан чопар бориб, Мовароуннахрдаги қўшинни тезроқ Марвга етиб келишга ундаётган бўлса ҳам ўттиз минг лашкар ҳамон Амударёдан нарида имиллаб юрар эди. Хон бу имиллашнинг сабабини биларди. Қўшинда ҳали ҳам Убайдулла Султон ва Ҳамза Султонларнинг таъсири зўр. Улар ҳокимликдан туширилганликлари учун хондан жуда хафа. «Мана энди онҳазратимиз бизсиз жанг қилиб кўрсинлар!»— дегандек аразлаб юришибди.

«Лекин мен бўлмасам ҳамманг кучукбаччадай хор бўлиб ўласен-ку!— ичида султонларини сўкарди Шайбонийхон.— Ҳозир бутун давлатимиз, бутун сулоламиз хавф остида-я, наҳотки шуни фаҳмламасанглар? Ҳаёт мамотинг ҳал бўладиган пайтда, ё шоҳ мени йўқ қиласидиган, ёки мен шоҳни нест-нобуд қиласидиган аснода шундай аразлаб юришларинг итлик эмасми? Сен итлар ҳали кўрасенлар, шу қамалдан эсон-омон қутулсак, ҳаммангни тавбангга таянтиргаймен!».

Ниҳоят, изфиринли совуқ қунларнинг бирида Шоҳ И smoil хонга яна бир мактуб йўллаб, унинг қўрғондан чиқмаганини қўрқоқлик деб атади, баҳорда яна қайтиб келажагини билдириди, сўнг Марвнинг гарбижанубидаги Маҳмуди деган қишлоқ томонга чекина бошлиди.

Шайбонийхон ўн беш минг қўшинни дарҳол отлантириди. Уч юзтacha навкарни қалъада қўриқчилик қилиш учун қолдириди-ю, қолганларини қўрғон дарвозаларидан ташқарига бошлаб чиқди. Узоқда шоҳ аскарлари чодир ва ўтовларини араваларга ортиб, бетартиб чекиниб бормоқда.

Шайбонийхон баланд бир жойга чиқиб, Амударё томонга узоқ тикилиб қаради. Қани эди ўша ўттиз минг қўшини ҳозир етиб келса! Лекин ўша ёқдан отини елдириб келган чопар қўшиннинг ҳали ҳам Амударёдан нарида юрганини айтди.

Шоҳ И smoil аскарлари ҳамон чекиниб бормоқда. Наҳотки Шайбонийхон шундай қулай фурсатни бой бериши керак? Одамлар «хон қўрқоқлик қилган, бўлмаса унинг қўшини шоҳницидан кўп эди, дадил ҳамла қилса енгар эди», дейишмайдими? Нариги султонлар эса, «Ана, бизсиз хон ҳеч вақт жанг қилолмайди!»— дейиши ҳам турган гап. Эҳ, агар шу гал хон ғалабани нариги Убай

дулла Султон ва Темур Султонларсиз қўлга кирилса эди, қолган бутун умри шон-шуҳрат ичидан ўтмасмиди?

Хон иккиланиб турганини кўрган Мулла Абдураҳим изғиринда лаблари кўкариб, илтимос қилди:

— Ҳазратим, биз сизнинг улуғ жонингизни хавф-хатардан узоқроқ тутмоғимиз даркор. Мовароунаҳрдан келадиган қўшинни кутайлик.

Хон қаҳр билан сўради:

— Қани ўша қўшин! Қани?!

— Қишиз изғиринида дарёдан ўтмоқ мушкул. Бироқ Убайдулла Султон билан Темур Султонлар ҳадемай келиб қолурлар.

— Шоҳ Исмоил Табризига етганда келурми? Агар бу ит-султонлар истаса аллақачон етиб келмасмиди? Бу султонларинг жўрттага мени ёлғиз ташлаб қўйди! «Ҳамма ғалабани биз қўлга киритамиш!»— деб мақтанаар эмишлар, аглаҳлар! Мен бўлмасам ғалабани тушларидан ҳам кўришмас эди!

— Ҳақ гапни айтдингиз, ҳазратим!

— Мен мана бу шунқорларим билан эришганмен бутун ғалabalарга!—Шайбонийхон шундай деди-ю, жангга шай бўлиб турган ўн тўрт мингдан ортиқ қўшиннинг сафлари орасига от чоптириб кирди:

— Шунқорларим, ёғийнинг сафи бузилиб чекинганини кўрдиларинг. Улар сон жиҳатдан ҳам биздан оз! Ўзлари совуқда дийдирағ ҳолдан кетган. Мен ишонамен: оллоҳу таоло бизга яна бир улкан ғалабани инъом этгусидир! Муҳаммад алайҳиссаломнинг арвоҳлари пок сунниний мазҳабидагиларни қўллаб-қувватлагусидир! Чорёни босафолар мададкорингиз бўлсин, шунқорларим. Душман ўз сафларини қайта тузиб улгурмасидан етиб боринглар! Худо омадларингни берсин! Омин оллоҳу акбар!

Минглаб овозларнинг:

— Оллоҳу акбар!

— Оллоҳу акбар!— деган ҳайқириғи барча сафлар бўйлаб тараалди.

Кўпакбий ва Қамбарбийлар олдинда, Шайбонийхон қўшиннинг ўртароғида қизилбошлар кетидан от чоптириб кетдилар.

Илгари хонга аниқ ахборотлар бериб турадиган махсус одамлар бу гал Шоҳ Исмоилнинг ёлғондакам чеки-

наётганини ва ҳарбий найранг ишлатмоқчи эканини бил-
май қолган эдилар.

Шоҳ Исмоил Марвни қамал қилиш учун аскарларнинг
оэроқ бир қисмини бошлаб борган эди. Унинг яна йи-
гирма минг кишилик сараланган аскарлари Марвдан
йигирма чақиримча наридаги қумтепалар ортига пис-
тирма қилиб қўйилган эди.

Бундай ҳарбий найранги Шайбонийхоннинг ўзи ўн
икки йил муқаддам Бухоронинг Қоракўл шаҳрида қўз-
ғолон кўтарган исёнчиларга қарши ишлатган эди. У
ҳам қўшинининг асосий қисмини Қоракўлнинг шар-
қидаги пана жойларга бекитиб қўйиб, озгина аскари би-
лан ҳужумга борган, қалъа ичидаги исёнчилар ёвнинг
озлигидан дадилланиб ташқарига чиқсан эдилар. Шун-
да хоннинг қўшини жўрттага тумтарақай бўлиб қочган,
исёнчилар эса уларни «енгдик» деб, кетларидан қувган
эди. Бироқ қалъадан беш-олти чақирим узоқлашганла-
ридан кейин пиистирмадаги хон аскарлари ёпирилиб
чиқсан ва исёнчиларни қириб ташлаган эди. Кейин
Шайбонийхон қалъа ичida қолганларни ҳам қатлиом
қилиб, Қоракўлнинг отбозорида одам калласидан ул-
кан минора ясатган эди.

Хозир ўз кучига ортиқ даражада ишонадиган Шай-
бонийхон бу ҳийлани бошқа лашкарбошилар унга нисба-
тап ҳам ишлатишлари мумкинлигини хаёлига келтирмас
эди. Шоҳ Исмоилнинг Марвга кўриниш берган ўн минг
чоғлик қўшини Маҳмуди деган жойда Мурғаб дарёси ус-
тига қурилган кўприкдан шоша-пиша ўтиб кетди. Шоҳ
Исмоил гўё бу кўприкни ҳимоя қилиб туриш учун уч юз-
тacha аскар қолдирган эди. Шайбонийхон кўприкка яқин-
лашгач, бу уч юз қизилбош хўжакўрсинга тирақайлаб
қочди. Дарёдан фақат шу кўприк орқали ўтиш мумкин
эди — ҳар икки қирғоқ ҳам баланд жар, кечув йўқ, бу-
нинг устига, қишки дарёнинг суви жуда совуқ, тўнғиб
қолиш ҳеч гап эмас эди. Шайбонийхоннинг бутун қўши-
ни кўприкдан ўтиб бўлгунча Шоҳ Исмоилнинг пиистирма-
да ётган кучлари ўзини сездирмади. Шайбонийхон узоқ-
да «қочиб кетаётган» Шоҳ Исмоил қўшинининг изидан
тушиб, кўприкдан анча узоқлашгандан кейин пиистирма-
да ётган кучлар бирдан майдонга чиқди. Үқлаб қўйилган
замбараклар хон аскарлари устига тўсатдан ўқ ёғдирди.
Тўрт тарафни қизилбошлар тутиб кетди.

Шайбонийхон ўзининг Қоракўлда ишлатган ҳарбий

Ҳийласини энди эслади-ю, орқада қолган кўприкка қараб чекинди. Аммо ёғоч кўприк аллақачон бузиб ташланган эди. Чекиниб борган қўшиннинг бир қисми жардан дарёга қулаб тушди. Дарёниг ўзанини отлар ва одамларнинг ўлиги тутиб кетди. Хоннинг ўзи сараланган хос навкарлари билан моллар қишилайдиган атрофи ёпиқ бир қўрага кирди. Қўрани қизилбошларнинг олов ҳалқаси ўраб олди. Хоннинг хос навкарлари қизилбошлар қуршовида ўлган-қолганларига қарамай жанг қилдилар. Қўра дарвозасининг олдилари, пахса деворларнинг таглари ҳар икки томондан қирилганларнинг жасадига тўлиб кетди. Хон ҳимояда қаттиқ турганини кўрган Шоҳ И smoil замбаракларни қўранинг атрофига ўрнаттириб, девор оша ўқ оттира бошлади.

Замбарак гумбурлашидан ҳурккан, ярадор бўлиб қутурган отлар бир-бирларини уриб, йиқитиб, ўзларини у ёқдан-бу ёқса ташлай бошладилар. Қўра ичидан даҳшатли тиқилинч, ур-сур, тўполон бошланди. Шайбонийхон қўлида қиличи билан одамларига ҳайқириб, тўполнни босмоқчи бўлаётганда тўпнинг тош ўқларидан бири хон мингандан отнинг бошига келиб тегди. От гандирлаб бир ёнига йиқилди-ю, эгасини ҳам ерга отиб урди. Шайбонийхон оёғини узангидан чиқаришга улгурмади — бир оёғи отининг тагида қолди. Шу заҳоти яна бир от суриниб йиқилди-да, ўмрови билан хоннинг кўкрагидан босиб тушди. Шайбонийхон, қовурғалари синиб, вужуди эзилиб, нафас ололмай қолди-ю, ҳушидан кетди.

Жанг тугагандан кейин хонни танийдиган қизилбош беклардан бири унинг жасадини қалашиб ётган от ва одам ўликлар орасидан аранг қидириб топди. Абдураҳим Туркистоний, Мансур бахши кўтарувчи ва бошқа жуда кўп мулозимлар, навкарлар ҳам хоннинг нари-берисида ўлиб ётар эдилар.

Фолиблар Шайбонийхоннинг бошини кесиб, найзага санчдилару Шоҳ И smoil миниб турган отнинг оёғи тагига элтиб ташладилар. Кейин қизилбошлар Шайбонийхон қирган шиалар қасдига унинг кесик бошидан терисини шилиб олиб ичига сомон тиқдилар. Фарбда шиаларни қувғин қилаётган ва Шоҳ И smoilга алам ўтказган суннитпарастлардан яна бири — турк сultonи Боязид II эди. Шоҳ И smoil Шайбонийхоннинг сомон тиқилган бошини турк сultonига «Мен билан қасдлаш-

ган сүннийлар қай аҳволга тушишини кўриб қўй!»— деган маънода «совға» қилиб юбортирди.

Сунний — шиа душманлиги шу даражага етган эдик, қизилбошлар бунга ҳам қаноат қилмай, Шайбонийхоннинг бош суюгига олтин қоплатиб, ундан май ичадиган коса ясайдилар¹.

ҚУНДУЗ. САМАРҚАНД. Икки қилич орасида

1

Заррин попуклар билан безатилган оқ түяниг устида — маликалар ўтирадиган баҳмал соябонли кажавада Хонзода бегим тўққиз яшар ўғилчаси Хуррамшоҳ билан Балхдан тог ошиб, сув кечиб Қундузга бормоқда эди. Бегимни беш-олтита канизлари, хизматкорлари ва юзга яқин шоҳ навкарлари кузатиб келмоқда эдилар.

Шайбонийхондан шунчалик шафқатсиз ўч олган Шоҳ Исмоил хоннинг Марвда асир тушган хотинларидан бири — Бобир мирзонинг эгачиси эканлигини эшитиб, унга алоҳида илтифот кўрсатгани тасодифий эмас эди.

Марвдаги воқеаларни Қундузда туриб эшитган Бобир Шоҳ Исмоилга махсус мактуб йўллаб, уни Шайбонийхон устидан эришган катта ғалабаси билан табриклиган, сўнг хон ҳарамидаги эгачиси Хонзода бегимни бешикаст Қундузга жўнатиб юоришини илтимос қилган эди.

Бобирни Шайбонийхон билан дадил олишганлиги учун ҳурмат қиласидиган Исмоил Сафавий энди уни ўзига иттифоқдош қиласи келди-ю, Хонзода бегимга қўшиб, энг ишонган кишиларидан бири — Муҳаммаджон эшик оғасини Бобир ҳузурига элчи қилиб жўнатди.

Хонзода бегим шоҳнинг яширин ниятларини билмаса ҳам яна аллақандай хатарлар уни ёш ўғилчаси билан бирга ўз гирдобига тортмоқчи эканини элас-элас сезар ва номаълум бир таҳлиқадан юраги дам-бадам увшар эди.

¹ Ақл бовар қилиши қийин бўлган бу тафсилотлар Шоҳ Исмоилнинг душманлари томонидан ёзиб қолдирилса муболага деб ўйлаш мумкин эди. Лекин бу тафсилотлар Шоҳ Исмоилнинг хайриҳоҳлари ёзган «Тарихи олам оройи Аббосий»да ва Хондамирнинг «Ҳабиб уссияри» да ҳам келтирилган.

▶ Шоҳнинг элчиси ва навкарлари бутун йўл давомида Хонзода бегимни ҳам, унинг ўғли ва канизларини ҳам ўз одамлари каби астойдил авайлаб ва қўриқлаб келмоқда эдилар. Уларниг аёллар билан муомаладаги одобларини, олижаноб эҳтиромларини бегим кўп марта сезди. Шоҳ Исмоилдан бошқа подшоҳ бўлса, Шайбонийхондай ашаддий душманинг норасида ўғлини йўқ қилиб юбориши, хоннинг хотинини ўзи ҳарамининг асирасига айлантириши ёки бирорта бекига никоҳлаб бериши мумкин эди. Шоҳ Исмоил шундай қилмагани, аксинча, Хонзода бегимни маликалардай иззат-икром қилиб, ёнига мўътабар элчилару ўнлаб навкарларини қўшиб, Бобирнинг ҳузурига юборгани, бу жабрдийда жувоннинг қалбида умрбод унтилмайдиган бир миннатдорлик туйфуси уйғотган эди.

Хонзода бегимни бутун йўл бўйи сергаклантириб бораётган номаълум хавф гўё баҳайбат тоғлар ва ўрмонларда яшириниб тўрганга ўхшарди. Қиши энди чиққан, тоғларда ҳали қор кўп. Баланд довонлардан, тор тангилардан ўтаётганларида Хонзода бегимнинг назарида, тоғдан кўчки тушиб, ҳаммаларини босиб қоладигандай бўларди. Момақалдироқли ёмғирлар ёққанда дараларнинг селлари бегимнинг ёнидаги ўғилласини оқизиб кетадигандай ваҳмини келтиради. Бир кечада Амударёнинг чап қирғоғидаги ўрмоннинг четида — Сурбайтал деган жойда тунадилар. Хонзода бегим ўрмонда кийик овлаб юрган йўлбарсларнинг йўғон ҳайбатли бўкиришларини эшитиб, туни билан ухлай олмай чиқди.

Илгари Шайбонийхоннинг укаси — жуда кўп хатарли жангларда ўлмаган Маҳмуд Султон мана шу Қундузга келгандა аллақандай ёмон безгакка учраб, бир неча кун ичида ўлиб қолган, кейин уни Қаршига элтиб кўмишган эди.

Қундузга яқинлашгандарига Фўри дарёси Қундуз дарёси билан қўшилиб, Амударёга қараб кетган серқамиш ботқоқлик жойда нафас олиш оғирлашиб, бирдан ҳавонинг рутубати кучайиб кетди. Хонзода бегим энди ўша ёмон безгакни эслаб, ўғилласига яна хавотирланиб қараб қўйди.

У илгари «ўлгинг келса Қундузга бор» деган ағончча мақол эшигига ва буни ҳазил гап деб кулган эди. Энди бу мақол унга чиндек туюла бошлади. У ўзидан ҳам кўра мурғак боласидан — хон ҳарамида ўн йил асоратда

яшаб орттирган мана шу ягона жигарпорасидан хаво~~т~~ тирланарди. «Борди-ю, Бобир мирзо Қундузда бўлмасалар, тоғ ошиб Андижонга ўтган бўлсалар ёки Қобулга қайтган бўлсалар, унда не қилурмиз?»— дерди Хонзода бегим ўзича. Шу ўй таъсирида Помир ва Ҳиндикуш тоғлари билан қуршалган, Амударё ва унинг асов ирмоқлари бўйига жойлашган Қундуз воҳаси Хонзода бегимнинг кўзига жуда бадваҳима кўринарди.

Кечки пайт йўл дарёдан узоқлашиб баландликка кўтарилиб бораётганда қаршиларидан бир тўп қуролли кишилар чиқиб, уларни тўхтатиши. Сўраб-суринтиришлардан сўнг булар — Бобир томонидан йўлларга қўйилган қоровуллар экани маълум бўлди-ю, Хонзода бегим бирдан енгил торти. Қоровулларнинг бошлиғи мәҳмонларнинг олдига тушиб, уларни Қундузнинг баланд бир жойидаги қалъага бошлаб борар экан, энди атроф Хонзода бегимга алланечук бошқача кўриниб кетди. Мовий тоғлардан эсаётган шабада юзини ёқимли силаб ўтди. Амударё бўйидаги ўрмонлар узоқдан нечоғлик хушманзара кўринишини у энди пайқади.

Қундузнинг илгариги хонлари баҳаво бир жойга қурдирган мустаҳкам қалъа ва унинг ичидағи қаср ҳам Хонзода бегимга узоқдан хийла файзли кўринди. Бу қаср ичидаги ҳозир у ўзининг суюкли иниси билан учрашишини ўйлаганда шодлиги кўксига сифмай энтиқди.

Уларни кутиб олган мулозимлар Хонзода бегимни ўғли ва канизлари билан бирга мәҳмонхонанинг яхши бе-затилган алоҳида бир хонасига киритиб қўйдилару Бобирга хабар бериш учун қўрғоннинг тўрига қараб кетдилар.

Анчадан кейин Хонзода бегим ўтирган хонанинг эшигидан чиройли соқол-мўйлов қўйған ўттиз ёшлардаги бир йигит шошилиб кириб келди. Бегим уни Бобирнинг мулозимларидан деб ўлади, секин ўрнидан туриб, саломига алиқ олди. Йигит унга томон юриб келар экан, овози титраб:

— Бегим, қадамингиз қутлуғ бўлсин! — деди.

Бу — Бобир эди. Лекин Хонзода бегим укасини соқол-мўйлов қўймаган ўн тўққиз ёшли силлиқцина йигит қиёфасида заслаб қолган эди. Ҳозир унинг қаршисида турган кенг елкали соқол-мўйлови текис тараашланган йигитнинг кийимлари ҳам шоҳона эмас эди: бошида бе-заксиз оддий симоби салла, эгнида зира беқасам тўн

Бегим яна уни Бобирнинг бекларидан бири деб ўйлади-ю, ҳаяжонланиб айтган сўзларига босиқ жавоб қилди:

— Қуллуқ!

Девони хосда ёзув-чизув ишларини қилиб ўтирган Бобир опасининг хабарини эшишиб хонаки кийиқмда чопиб келган эди. Хонзода бегим эса ҳали ҳам подшоҳ укасининг киришини кутиб, эшикка ола-зарак бўлиб қарап эди. Бобир опасига ағрайиб қараб қолди. Эшикдан Мұхаммад Кўкалдош деган мулозим киргандага бегим ундан:

— Амирзодам қанилар? — деб сўради.

Мұхаммад Кўкалдош ҳайрон бўлиб Бобирга қаради. Бобир гап нимадалигини энди тушунди-ю, томоғига бир нарса тиқилиб, овози бўғилди:

— Мени танимадингизми?

— Сиз... Сиз...

— Мен Бобирмен!

— Наҳот?!

— Мен сизнинг инингизмен! Гуноҳкор инингиз Бобир!

Хонзода бегим бобирона кўзларни, бобирона овозни энди таниди-ю, ўзини инисининг бағрига отди. Қўлларини юзи билан бирга Бобирнинг кўкрагига босди. Бобир опасининг елкаларидан қучди, унинг соғинч ва қуонч билан айтган сўзларини қулоғи билан эмас, гўё кўкси билан эшилди:

— Бобиржон, Сиз... Сиз ўшанда мендан ранжиган-сиз!.. Биламен... Бошингизга таъна тошлари ёғилган... Мен... айтолмаган эдим. Ўзим учун эмас, сиз учун...

— Мен ҳам буни кейин билдим. Сиз мени қутқариш учун ўзингизни хонга тутиб бермишсиз. Мен сиздан умрбод қарздормен!

— Ўшал қарзингизни мана энди уздингиз, Бобиржон. Бу дафъа мени сиз қутқардингиз! Агар Шоҳ Исмоилга ёзган номангиз бормаса, мени ҳам, хон ҳарами билан асир тушган аёллар қатори, бирон бек ёки мулозимга тутқун қилиб берур эдилар. Шоҳ Исмоил сиз туфайли мени шунчалар иззат-икром билан озод қилиб, кузатиб қўйди. Сиздек иним борлиги учун худога минг шукурлар қилдим!

Хонзода бегим юзини Бобирнинг кўксидан олди-ю:

— Ҳазрат онамлар қайдалар? — деди. — Бултур бир аумхабар эшилдим, ростми?

— Беш йил бурун... Хасба¹дан жон бердилар. Кобул-нинг Боги Наврўзийсиға қўйдик.

— Э воҳ, элликка ҳам тўлмай кетибдилар-а!..

— Менга ҳам шуниси беҳад алам қилди! Саксонга, тўқсонга киргандар озми?

— Онамни ғаму гурбат адо қилган, амирзодам? Бизни деб озмунча кулфат чекдиларми!

Муҳаммад Кўкалдош гапни бошқа ёққа бурди:

— Тақдирга чора йўқ, бегим Мана бугун сиз подшоҳ ҳазратлари билан зла топишганингиздан ҳазрат онангизнинг арвоҳлари шод бўлуғ! Қани, ўтирсинлар. Фотиха ўқийлик.

Зарбоф кўрпачалар устига ўтиб ўтирдилар. Бу орада ташқаридан бегимни кўриш учун кирган Қосимбек қавчин Қутлуғ Нигор хонимнинг руҳига бағишилаб тиловат қилди.

Кейин Хонзода бегим канизлари орасида ҳаммани жимгина кузатиб ўтирган ўғилчаси Хуррамшоҳни имлаб чақирди.

Боланинг оқ-сарғищ юзи, кўзининг кўкимтирилиги, қисқа бўйни ва сийрак қошлиари худди Шайбонийхонни кига ўхшар эди. Бобир Шайбонийхонни кўрмаган бўлса ҳам Хонзода бегим ўғлини унга таништираётганда боланинг қиёфасида хон отасидан мерос қолган аломатларни аниқ кўргандай бўлди.

Хуррамшоҳ етти ёшга кирап-кирмас отаси уни Балх вилоятига ҳоким қилиб қўйган эди. Ҳокимликни болага атка қилиб белгиланган Мадҳи Султон қилса ҳам Хуррамшоҳ ўз қаршисида катта-катта одамларнинг бош эгиб таъзим қилишларига анчагина ўрганган эди. Хонзода бегим ўғлига Бобирни кўрсатиб:

— Тогойингиз мана шу кишилар!— деганда, Хуррамшоҳ Бобирнинг хаёлидан ўтган нарсани сезиб ётсирадими ёки унинг кийимлари жўнлигини кўриб, назарига илмадими, истар-истамас бош ирғаб салом берди. Аммо тоғасига яқин бормади. Шунда Хонзода бегим уни елкасидан секин итариб қулоғига шивирлади:

— Эсингизни йигинг, подшоҳ Бобир мирзо ҳузурин дасиз! Шоҳ Исмоил шу ҳазрат туфайли сизни озод қилиди!

«Подшоҳ» ва «ҳазрат» деган сўзлардан боланинг кўз-

¹ Хасба — ичтерлама, тиф.

►Лари гўё чарақлаб очилиб кетди. Шу пайт Бобир жиянинг кўзлари ойисиникидай йирик-йирик эканини сезди.

Тождорлар билан муомала қилишнинг машқини яхши олган бола энди тиззачасини гиламга тираб, Бобир қаршисида юкунди, сўнг икки қўлини кўксига қўйиб, эгилиб таъзим қиласр экан, чучук тил билан:

— Хон ҳазратим, мен сизга.., сизга хизматқа келдим!— деди.

Бобир унинг бурни ҳам Хонзода бегимники каби қиррали эканини энди кўрди ва бу болага нисбатан қалбидан тутун аралашган оловдай мураккаб бир илиқлик сезди.

— Хизматга келган бўлсангиз хуш кўрдик, шаҳзода,— деди-ю, болани қўлидан олиб, ўнг ёнига ўтқазди.

Шу пайт ташқаридан эллик ёшлардаги семиз ҳарам бекаси таъзим қилиб кирди:

— Подшоҳ ҳазратлари, Моҳим бегим олинасаб эгачингиз ҳузурига келишга ижозат сўрадилар!

Бобир Хонзода бегимга қараб сирли бир тарзда жилмайди. Сўнг ҳарам бекасига буюрди:

— Айтинг, келсинлар! Мирзо Ҳумоюнни ҳам ола келсинлар.

Бобирнинг ёш хотини Моҳим бегим кекса Қосимбек ўтирган хонага киришдан ийманиб келолмаётганини ҳамма сезди. Қосимбек ва Мұхаммад Кўкалдош Бобирдан рухсат олиб, секин эшикдан чиқдилар.

Меҳмонхона олдида одам кўп. Марғилонлик Хўжа Калонбек, унинг укаси Қичик Хўжа, қувалик Тоҳир қўрчи, тошкентлик Саидхон, самарқандлик Мажид барлос, Юсуф Андижоний деган бир навкар,— ҳаммалари вантларининг дарагини олиб келган Хонзода бегимни кўрмоқчи бўлишар, аммо ичкарига киришдан истиҳола қилиб туришар эди. Қосимбек уларга:

— Аввал ҳарам аҳли билан кўришсинглар, кейин сизларга ҳам рухсат сўрармиз,— деб уларни тарқатиб юборди.

• 2

Шафтоли гулли ипак қабоси ингичка белига, назо катли қадди-қоматига жуда ярашган бир жувон шаҳзодаларча ясантириялган уч яшар болани қўлидан етаклаб, эшикдан оҳиста кириб келди. Болачанинг юз-кўзи Бо-

бирга ўхшашинӣ Хонзода бегим бир қарашдаёқ сезди-ю, тез ўрнидан турди. Моҳим бегим келинлик наэокати билан эгилиб таъзим қилди. Хонзода бегим унга пешвоз чиқиб аввал елкасига қўлларини қўйиб кўришди. Сўнг жувоннинг юзидағи нафис оқ пардан секин кўтариб қаради-да, унинг ажиди бир латофатини юракдан ҳис қилиб завқи келди. Келинини пешонасидан, кўзларидан қувониб ўпди, сўнг шодликдан балқиган юзини Бобирга ўгирди.

— Муборак бўлсин! Бир-бирларингизга бениҳоя муносиблизлар! Бахти бўлинглар!

Кичкина Ҳумоюқ бир қўлчаси билан онасининг этағидан тутиб пастдан юқорига мароқ билан қараб турарди. Хонзода бегим уни қўлига кўтариб олди. Бола аммасини биринчи марта кўраётган бўлса ҳам, бу истараси иссиқ аёлни кўпдан бери биладигандек бегонасирамас эди. Хонзода бегим боланинг лўппи юзига юзини қўйиб эркалатганда Ҳумоюн буни ёқтириб кулимсиради.

Хонзода бегим уни ўзининг ўғилчаси олдига кўтариб олиб борди-да, ерга қўйди:

— Қани, кичкина тоғача «катта» жиянча билан танишсинлар-чи!

Уч яшар бобирийзода билан тўққиз яшар шайбонийзода аввал бир-бирларига жим тикилиб турдилар. Кейин Ҳумоюн Ҳуррамшоҳнинг белидаги кичкина безакдор ханжарчасига қизиқиб қўл чўзди. Ҳуррамшоҳ унинг қўлини олиб кўришди-ю, аммо ханжарини бергиси келмай орқага чекинди. Буни кўрган катталар кулиб юбордилар.

Хонзода бегимнинг бошидан кечган барча даҳшатлар, Қундуз йўлида унинг юрагини титратган номаълум хавфу хатарлар шу бир қувноқ кулги билан гўё узоқ ўтмишга айланди. Хонзода бегим ийманиб табассум қиласаётган кёлинини бир ёнига ўтқазди. Иккинчи ёнида хушчақчақ кулимсираб болаларга қараётган Бобирни кўрди. Яқингинада ўzlари ҳам мана шу тоғача-жиян каби ёш бола бўлган пайтлари эсига тушди. Оғир айрилиқ йилларида опа-ука икковлари ҳам фарзандлик бўлганлари, душман хонадонларидан чиққан бу болалар энди гўдакларча бир маъсумлик билан танишаётганлари қаҳратон қиш кетидан келган баҳордек беҳад ёқимили эди.

▶ Хонзода бегим келининг яна бир қараб олди-да, көттин Бобирга шўх назар тацлади:

— Толе сизга энди кулиб боқибди, амирзодам! Ўзиңгизга бунчалик муносиб маликани қандай учратдингиз! Моҳим бегим, қаерликсиз?

— Хурросонлик, ҳазрат бегим.

Моҳим бегим Бобирга «Боғкӯча деворидан гул ташлаганимни айтиб мени уялтириб қўйманг яна!»— дегандек илтимоскорона қараб олди. Бобир унинг бу қарашидаги маънони сезиб, завқли жилмайди. Сўнг Моҳим бегимнинг Ҳусайн Бойқарога қариндошлиги борлигини, оталари бундан тўрт йил бурун Бадиузвазмон Мирзо билан чиқишолмай Ғазнига келиб қолишганини опасига айтиб берди. Бобир Моҳимнинг ота ва оғаларини Ғазнидан Қобулга таклиф қилган, кейин бу ерда Моҳим билан яна кўришиб унга уйланган эди.

— Ҳирот билан Мурғоб оралиғида Ҳазрати Жом деган шаҳр бор, кўрганмисиз?— сўради Бобир опасидан.

— Кўрганмен. Ўлуғ шоир Аҳмади Жомийнинг номларига қўйилган.

— Бегимнинг она авлодлари ана ўшал Ҳазрат Жомийга хеш эканлар. Устод Абдураҳмон Жомийга ҳам шаҳр эканлар.

Бобир ҳазиломуз кулиб қўшиб қўйди:

— Бегимнинг ўзлари ҳам шундай шоирпарвару шеършуносларки, Жомий билан Навоийнинг барча ғазалларини ёд билурлар. Аммо биз шеър ёзсан мұнаққидлик¹ қилиб, нуқсини кўрсатурлар.

Моҳим эрининг ҳазилига ҳазил билан жавоб берди:

— Мұнаққид бўлмай иложим йўқ, чунки ҳазратим менинг таърифимда кўп муболаға қилурлар!

Хонзода бегим эр-хотиннинг ҳазилкашлигидан завқланиб кулади:

— Лекин таърифингизда қанча муболаға қилсалар ҳам оз!

— Миннатдормен, ҳазрат бегим!— Моҳим энди ҳаяжонли товуш билан гапирди:— Мен сизнинг жасоратингизни, фидойилигингизни ҳазратимдан эшитиб, ўзингизни кўриш орзусида эдим. Тангirimга шукур, бугун шу орзўйим рўёбга чиқди. Ҳазрат бегим, мен сизни афсонавий бир малика деб ўйлар эдим. Бироқ ўзингизни кўр-

¹ Мұнаққидлик — танқидчилик.

диму сиздаги меҳригиё афсонавий маликаларда ҳам бўлмас, деб ўйладим! Энди уйимизнинг пешгоҳи ҳам, кўнглимизнинг тўри ҳам сизники!

Моҳим бегим бу гапларни самимий бир ихлос билан айтганини сезган Хонзода бегим:

— Бизга сиздек келин берган тангримга шукур! — деб қўйди.

Хонзода бегим бирдан Ойиша бегимни эслади ва уни Моҳим бегимга таққослаб кўрди. «Бир ҳисобда, Бобиржон аввалги хотини билан ажрашиб кетгани ҳам яхши бўлган экан», деб қўйди ўзича. Сўнг хон ҳарамида ўзининг тортган азобларини эслаб кетди.

Бобир ўттиз тўрт ёшли Хонзода бегимнинг соchlariга битта-яримта оқ оралаб қолганини энди кўрди. Шу туришда спаси Бобирга онасининг энди бева қолган ўттиз етти-ўттиз саккиз яшарли пайтларини эслатди. Хонзода бегим ҳам энди бева эди. Бобир шуни ўйлади-ю:

— Сиз мени деб кўп азоб тортгансиз! — деди. — Сизни эсон-омон даргоҳимизга етказдирган Шоҳ Исмоилнинг яхшилигини ҳеч вақт унутмасмен!

Шоҳ Исмоил тилга олиниши билан Хонзода бегимнинг чехраси яна очилди.

— Шоҳнинг Тожли хоним деган ёшгина, кўҳликкина хотини бор экан, — деб ҳикоя қила бошлади. — Шу жувон мени шоҳнинг ҳузурига бошлаб кирди. «Шоҳ Исмоил сунний мазҳабидагиларни ўлдириб, терисига сомон тиқдирамиши» деган ваҳимали гапларни кўп эшигтан эдим. «Бадҳайбат бир одам бўлса керак», деб титраб-қалтираб бордим. Қарасам йигирма тўрт-йигирма беш ёшли хушсурат бир йигит тахтда ўлтирибди. Соқол қўйган эмас, фақат узун, ингичка мўйлови бор. Бургутбурун. Кўзлари катта-катта. Озарий тилда гапирди, сўзларининг ҳаммасига тушундим. Шиаларнинг имомлари биби Фотиманинг авлодлари бўлган эмасми, шунинг учун улар аёл зотини жуда ҳурмат қилар эканлар. Мен буни йўлда ҳам кўп сездим.

— Лекин ўзимизда ҳам илгари аёлларга эҳтиром кучли бўлган, — деди Бобир. — Самарқандда Биби Хоним номли мадраса қурилган. Унинг қаршисида Сарой Мулк хоним мадрасаси бўлган. Шоҳи Зиннада Шоди Мулк хоним мақбараси, Туман оқа мақбараси бор. Ҳиротда Гавҳаршод бегим мадрасаси машҳур.

— Билмадим, у замонларда улуғ аёллар кўп бўлган-

— ми ёки уларнинг илму санъатга иштироклари катта бўлганми? — деди Моҳим бегим эрига қараб. — Ҳозир нечукдир ундоқ эмас-да, ҳазратим?

— Фалакнинг гардиши ажиб! — деди Бобир. — Аёлларга муносабат ҳамиша илму санъатга муносабат билан рост келур. Илму санъат барқ урган даврларда аёлларнинг ҳурмати ҳам баланд. Чунки илму санъат аёлларнинг иштироки билангина астойдил юксалган. Маънавий инқироз даврларида олимлару санъаткорлар нечоғлиқ хор бўлса, аёллар ҳам шунчалик камситилимишdir.

— Сиз айтган шу инқироз ҳозир Мовароуннаҳрни чирмаб олган, ҳазратим! — деди Хонзода бегим. — Кўчманчи хону султонлар мамлакатнинг қуруқ гавдасини эгаллаб олмишлар. Унинг руҳи билан ишлари йўқ. Улган одамнинг арвоҳини ранжитиш адолатдан эмас. Шайбонийхон пароканда бўлиб ётган ўлкаларни бирлаштири, Самарқандда ўз номига мадраса қурдирди. Кўҳак¹ дарёсининг устига кўприк қурдирди. Савоб ишлари шу бўлди. Лекин олимлару санъаткорларга муомаласи қандоқ дуруст бўлса, аёлларга ҳам шундоқ эди. Темурийлар аёлларнинг номига мадраса-ю, мақбаралар қурдирганини айтсангиш ғазаби келур эди. Унингча, Улугбек илму санъатга берилиб, дину имонни унутган эмиш, аёлларни талтайтириб, халқнинг ахлоқини бузган эмиш. Хон ёздирган «Шайбонийнома», «Нусратнома» деган китобларнинг биронтасида бирорта аёлнинг номи тилга олинган эмас. Шаҳзода-ю, султонларнинг оналари ёки хотинлари ҳақида сўзлаш зарур бўлиб қолса, «фalonчининг қизи», «фalonчининг хотини» деб, фақат отаси ёки эрининг номини ёзурлар. Чунки аёлларнинг номини номаҳрамлар тилга олсалар гуноҳ бўлур эмиш! Ҳали бу — мадраса кўрган илмлик хоннинг даврида бўлган ишлар. Ҳозир тирик қолганларида шу илм ҳам йўқ.Faқат дағал бир кучу бидъату хурофот. Илму санъат аҳли султонлар зулмидан қочиб, бири Хуросонга, бири Истамбулга кетди, бири Кобулга келди. Энди бутун умидимиз сиздан, Бобиржон! Сиз Мовароуннаҳрнинг улуғ руҳини тикларсиз, илму маърифат қуёшини юртимизга қайтариб олиб борурсиз деб, йўлингизга кўз тикканлар кўп!

Бобир опасининг айтганлари қуруқ гап эмаслигини биларди. Шайбонийхон ўлгандан кейин Самарқанддан,

¹ Кўҳак — ҳозирги Зарафшон.

Бухордан, Тошкентдан Бобирга махфий хатлар ва чо-парлар келган эди. Кўчманчи султонлар зулмидан беэган одамлар Бобирни тезроқ юртига қайтишга чорлар эдилар.

— Утган ҳафта Андижондан хушхабар келди,— деди Бобир опасига мамнун кўз ташлаб.— Тоға авлодимиздан бўлмиш Сайд Муҳаммад дуглат Фарғона водийсидағи барча хайриҳоҳларимизни атрофига тўплабдиру водий-дан кўчманчи султонларни қувиб юборибдир. Менга китобат ёзибдирки, «Қоратегин орқали Андижонга тезроқ етиб келинг, ота юртингиз сизга мунтазир!»

Хонзода бегим қувонч билан:

— Такгримга минг қатла шукур!— деди.

— Ҳазратим бизни Кобулдан Қундузга олиб келганинг бойиси ҳам шуки,— деди Моҳим бегим овозини пасайтириб,— тезроқ ватанларига қайтмоқчилар!

— Андижонгами?— шивирлади Хонзода бегим инисига.

Бобир ўйчан кулимсираб бош чайқади — у Андижонга ишончли бир кишисини юбормоқчи, ўзи эса Ҳисор орқали Самарқандга юриш қилмоқчи эди. Лекин Бобир ўзининг бу ниятини тарих саҳнасида пайдо бўлган янги бир куч — Шоҳ Исмоил билан келишмасдан амалга оширомаслигини сезиб туради. Чунки Шоҳ Исмоил кўчманчи султонларга қарши курашни давом эттириш ва уларни Мовароуннаҳдан қувиб чиқариш учун Бобир билан иттифоқ тузмоқчи эди. Бугун Хонзода бегим билан келган элчининг қандай нияти борлигини Бобир тахминан билар эди.

Башарти у Шоҳ Исмоил таклиф қилаётган иттифоқни рад этиб, Андижонга ёки Самарқандга ўзича юриш қилса, шоҳ ундан айниб, шайбонийзодалар билан иттифоқ тузиши мумкин эди. Шайбонийхоннинг ўғли Темур Султон шоҳга элчилар ва совғалар юбориб, музокара олиб борганидан Бобир хабардор эди. Бу икки зўр кучга Бобир ёлғиз бас келолмаслиги эса ўз-ўзидан аён эди...

У аёлларга бу мураккаб муаммоларни айтиб ўлтирамади-ю, Шоҳ Исмоилнинг шоирлигидан гап очди.

— Мирзохон менга шоҳнинг шеърларидан келтириб кўрсатди,— деди опасига.— Таъби назми баланд, озарбайжон туркийсида жуда чиройли ғазаллар битибдир.

Яна камтарлик билан «Хатой» деган тахаллус танлабадир.

— Катта шоирлиги рост,— деди Хонзода бегим.— Фазалларини одамлар қўшиқ қилиб айтганларини эшитдим. Шоҳ мени қабул, қилганда «Бобир подшоҳнинг шоҳлигини ҳам, шоирлигини ҳам эҳтиром эдюрмиз», деди. Кейин ҳазратимнинг Ҳиротда куйга солинган ғазалларидан икки сатрини ёд айтиб, «Чўх яхши!»— деб қўйди.

Бобир шоҳнинг бу мақтovидан кўнгли ийиб, уялинқираб:

— Қайси ғазал экан?— деди.

Хонзода бегим бармоқларини лабларига қўйиб ғазални сўзма-сўз эслашга тиришар экан, Моҳим бегим унга кўмаклаша бошлади.

— «Менинг кўнглимки, гулнинг ғунчасидек таҳ-баҳтаҳ қондир» деб бошланурми?

— Ҳа, ҳа, худди шу!— деб Хонзода бегим иккинчи сатрини ўзи айтди:— «Агар юз минг баҳор ўлса очилмоғи но имкондир».

— Шоҳга бу матлаънинг ёққани бежиз бўлмаса керак,— деди Бобир.— У ҳам бизга ўхшаб, отасидан ёш қолган экан, қувфинларга учраб, кўп кулфат чеккан экан. Менга унинг тарихини Мирзохон айтиб берди. Энди Шоҳ Исмоил дунёда адолат ўрнатмоқчи эмиш.

— Шоҳ менга ҳам шуни айтди,— деди Хонзода бегим.— «Адолатни суннийлар ўн икки имом билан бирга ўлдирмишлар», деди. Лекин ўн иккинчи имом — Ҳазрати Мадҳи ўлган эмас эмишлар, ҳозир осмондан ерга тушиб, суннийларнинг жазосини берар эмишлар. Шунинг учун шиалар шоҳни «соҳиби замон» деб улуғлар эмишлар.

Бобир бу ясама эътиқодлардан фashi келиб, бош чайқади-ю:

— Таажжуб!— деб қўйди.— Марҳум Шайбонийхон ўзини «Халифаи раҳмон, имоми замон» деб юриб, охири нима бўлди? Динни сиёсатга айлантириш не ҳожат?

— Лекин шиалар билан суннийларнинг адовати аслида ҳокимият таләшишдан келиб чиққан эмасми, ҳазратим?— деди Моҳим.

Ислом тарихини яхши биладиган Бобир суннийлар билан шиаларнинг қонли курашларини хаёлидан ўтказа бошлади.

Бу кураш Бобир яшаган даврдан салкам тўққиз юз

йил аввал — Мұҳаммад пайғамбарнің ўлыми билан бошланган эди. Мұҳаммад пайғамбар түзгән давлатни ким бошқариши керак? Ким унинг давомчиси — халифи бўлиши керак?

Энг яқин қариндошни ворис қилиш тарафдори бўлганлар Алини биринчи халиф қилиб кўтармоқчи эдилар. Чунки Али пайғамбарнинг амакивачаси эди ва унинг ягона фарзанди Биби Фотимага уйланган эди. Аммо Али чорёрлар орасида энг ёши эди. Қабила удуми, яъни суннийга биноан энг ёши улуғ ва обрўси баланд ўтағаси мусулмон оламига бош бўлиши керак эди. Шу сабабли кекса Абубакирни биринчи халиф қилиб кўтардилар. Шу билан бирга Али ҳам пайғамбарнинг тўртта энг яқин салафларидан — чорёрларидан бири деб тан олинди, фақат ёшига қараб уни Абубакир, Умар ва Усмондан кейинги тўртинчи ўринга қўйдилар.

Душманлари аввал Умарни, кейин Усмонни суиқасд билан ўлдирадилар. Ниҳоят Али халиф бўлади. Аммо орадан беш йил ўтар-ўтмас душман тараф қасдма-қасдига Алини ҳам ўлдириди.

Али тарафдорлари унинг ўрнига ўғиллари — Биби Фотимадан туғилган Ҳасан ва Ҳусанни мусулмон оламининг бошлиғи деб эълон қиласидилар. Аммо Имом Ҳасан касалланиб ўлди. Имом Ҳусан Карбало даштида суннийлар билан қилинган жангда ҳалок бўлди. Шундан кейин халифалик яна суннийлар қўлига ўтди-ю, Алиниң авлодига мансуб бўлган барча имомлар бирин-кетин ўлдирилаверди. Фақат ўн иккинчи Имом Мұҳаммад ёшлигида сирли бир тарзда йўқолди, унинг ўлик-тириги топилмади. Муҳолифлари уни ўғирлаб кетиб ўлдиранлари тахмин қилинса ҳам унинг тарафдорлари халқ орасида «Имом Мұҳаммад осмонга чиқиб кетган, бир кун Имом Мадҳи номи билан қайтиб тушиб, дунёда адолат ўрнатади» деган бир диний эътиқодни тарқатдилар. Адолатсизликдан азоб тортиб юрган жуда кўп содда одамлар бу гапга ишонадилар. Шиалар мусулмон оламидаги барча баҳтсизликларга Алидан олдинги уч халифни ва уларнинг кейинги авлодларини сабабчи қилиб кўрсатдилар. Суннийлар узоқ вақт давлат тепасида турган ва мусулмон динини жуда кўп мамлакатларга тарқатган ҳоким куч бўлганликлари учун уларнинг зулмларидан порози бўлган кўпгина олимлар, санъаткорлар, деҳқонлар, косиблар ва бошқа турли табақа вакиллари ҳам

► шиалар томонига ўтдиilar. Қадимий маданият маркази бўлган Эрон ва Озарбайжонда шиаларнинг суннийларга қарши кураши тобора ўсиб борди. Шоҳ Исмоил шиаларнинг мана шу курашидан фойдаланиб, давлат тепасига келди, тарихда биринчи марта шиа мазҳабини катта бир давлатнинг динига айлантириди ва суннийларга қарши ғазоват ёълон қилди.

— Рост, шиа-сунний адоварати қандай хунрезликларга сабаб бўлганини мен Ҳиротда кўриб даҳшатга келдим! — деди Хонзода бегим ва бир воқеани ҳикоя қилиб берди.

Марвдан кейин Ҳирот қизилбошлар қўлига ўтгач, бу ерда Шайбонийхон даврида қатағон қилинган шиалар қасоскорона бош кўтарадилар. Улар Ҳиротда Шайбонийхоннинг барча ишларига фатво берган саксон ёшли шайхулислом Тафтазанини шиаларга тутиб бердилар. Шиалар чолни кўчага —халойик орасига судраб олиб чиқдилар ва дарҳол сунний мазҳабидан шиа мазҳабига ўтишини буюрдилар Тафтазани бунга кўнмади. Шундан кейин шиалар уни кўчадаги бир дараҳтга осиб ўлдирдилар ва жасадини дараҳт билан бирга ёқиб юбордилар.

Бўни кўрган холис одамлар шиа-сунний душманлигидан безор бўлиб, Абдураҳмон Жомий тириклигида ёзин кетган ўткир рубонийни бир-бирларига шивирлаб айтадилар:

Эй муғбачан даҳр, бидеҳ жоми маям,
Ки омад зи низойи сунни-ю, шиа қаям.
Гўяндки, Жомиё, чи мазҳаб дори?
Сад шукурки, саги сунни-ю, ҳар шиа наям!¹

Бу рубонийнинг сўзлари оғиздан-оғизга ўтиб, шиаларнинг қулогига ҳам етиб боради. Айниқса «шианинг эшаги» деган ибора уларнинг жонини чиқаради. Қизилбошлар бидъатга берилган ҳиротлик шиалар ва ёш безорилар тўдасини Абдураҳмон Жомийнинг мақбарасига бошлаб борадилар. Қабр устига қўйилган мармар тошни кўчириб ташлайдилар. Тошга ўйилган «Жомий» сўзидаги

¹ Таржимаси: Эй дунёнинг ёш оташпари, менга майим жомини бергилки, сунний ва шиа низоларидан қусгим келмоқда. Десалэр: Жомиё, сен қайси мазҳабдансен? Юз шукурки, суннийнинг ити-ю, шианинг эшаги эмасман!

арабча «Ҷ» нинг нуқтасини ўчириб, «Ҷ» тарзида ҳарф-нинг юқорисига қўядилар. Натижада улуғ шоирнинг номи «Ҳомий» деб ўқиладиган бўлади. Жоҳиллар бу билан ҳам қаноат қилмайдилар. Жомий мақбарасига Навоий ўрнаттирган заррин ўймакорлик гўзал эшикни синдириб, мақбара билан бирга ёндириб юборадилар.

Бу воқеани опасидан эшитган Бобир ғазаб аралаш ҳайрат билан сўради:

— Наҳотки Шоҳ Исмоил шундай жаҳолатга йўл берган бўлса?

— Менинг билишимча, бу ишдан шоҳ бехабар қолган. Ҳиротдаги мудҳиш ишларга шоҳнинг Ҳурсон бўйича ноиби Нажми соний бошчилик қилган.

— Не бўлганда ҳам Ҳазрати Жомий минг марта ҳақлар: шиа-сунний низолари кўнгилни оздирадиган даражада хунук!.. Ҳайҳот, дунёнинг ишлари ҳамиша чигал! Туғишгандардан-ку, дўст-ёр тополмадим. Энди тақдир менга Шоҳ Исмоилдек бир мард, танти, фозил дўст берди, деб суюнсам, бунинг ҳам ишкал ишлари бор экан.

Моҳим бегим Бобирнинг кўнглига чўккан ғуборни тарқатгиси келиб, кулимсираб гапирди:

— Гул тикансиз бўлмас экан-да, ҳазратим!

Бобир хотинининг жилмайган юзига тикилиб қарди-ю, ўзининг ҳам чеҳраси очила бошлади. Шунча айрилиқлардан кейин севимли опаси билан яна учрашгани, бу қувончга Шоҳ Исмоил туфайли мұяссар бўлгани такрор эсига тушди. Қундузда шайбонийзодалардан ихлоси қайтган йигирма минг кишилик қўшин мўфул беклари бошчилигида Бобир ҳузурига келгани ва унинг хизматига ўтгани яна ёдига тушди-ю, кўнглини яйратиб ўтди.

Бобир кўзини Моҳим бегимдан олиб опасига қаради:

— Энди ҳеч бир гулнинг тиканидан қўрқмасмиз! Мажкол борки, гули учун тикани ҳам ноилож сугорилур... Шоҳ Исмоил шунчалик одамгарчилик қилибди! Майли!

Бобир ўрнидан турди. У шоҳдан келган элчи билан учрашиши керак эди. Моҳим уни эшик олдигача кузатиб борди. Бобир эшикдан чиқаётib, Хонзода бегимни қаерга жойлаштириш ва қандай эъзозлаш ҳақида хотинига кўп гапириб ўтирамади-ю:

— Эгачимни онам ўрнида кўргайсиз!— деди. Шу бир оғиз гапдан ҳамма нарсани англаган Моҳим:

— Жоним билан! — деб қўлини кўнсига қўйди. — Сиздан ҳам бир илтимос, ҳазратим.

— Ҳўш?

— Биз тикан деб ўйлаган нарсалар оғули тиғлар бўлиб чиқмасин. Эҳтиёт бўлинг!

Бобир хотинининг ҳамма нарсага фаҳми етадиган зийрак бир дўст эканини ҳозир яна бир марта сезди-ю, унга меҳри тобланаб:

— Хотиржам бўлинг! — деди.

Сўнг қалби учрашув қувончига, меҳрибон аёллар нафосатига ва масъум болалар завқига тўлиб қўрғон ҳовлисига чиқди.

Девонхонага яқинлашганда элчилар билан бўладиган муомалани кўз олдига келтирди-ю: «молу дунёни аямаслик керак» деган ниятни кўнглига тугди.

3

Бобирниг буйруғи билан Вали хазиначи бисотида бор энг қимматбаҳо дуру гавҳарлардан, Бадахшон лаъллари-ю, олтин безакли кийимлардан, камёб тиғлар ва буюмлардан шоҳга алоҳида, унинг элчисига алоҳида инъомлар ҳозирлади. Сарой бовурчилари, баковул ва ясовуллари икки кечаки-ю, икки кундуз югуриб-елиб, Қундузда ҳали мисли кўрилмаган шоҳона зиёфат ва базмга ҳозирлик кўрдилар. Улкан зиёфат учун ҳисорий қўйларнинг ўзидан етмиш-саксонтаси сўйилди. Тоғлардан, ўрмон ва дарёлардан овлаб келинган ғозлар, какликлар, оҳулар сони бундан ҳам кўпроқ эди.

Шоҳ Исмоилнинг меҳмондорчиликларини кўп кўрган одамлардан бири — Бобирниг холаваччаси, илгариги Уратепа ҳокимининг ўғли Мирзохон эди. У Бобирга бир неча марта:

— Шоҳ элчилари чоғирсиз зиёфатни зиёфат ўрнида кўрмаслар, — деб айтди.

Бобирниг эшик оғаси Қосимбек эса ичкиликини жуда ёмон кўрарди. Бобирниг ўзи ҳам ҳали беклари билан бирор марта ичкилик базми ўтказган эмас, фақат Ко-булда Моҳимга уйлангандан кейин хушбўй чоғирлардан бир-икки марта татиб кўрган эди.

Ҳозир ушинг кўнглида кўнириб турган қувонч билан бирга Шоҳ Исмоилга ва шиалар билан суннийларнинг душман муносабатларига бориб тақаладиган қандайдир

ғашлик, чигаллик бор эди. Ёу ғашликни бугун фақат май билан тарқатиш мумкинга ўхшарди. Бундан ташқари меҳмонларнинг кўнгли учун ҳам Бобирнинг ичиши зарур эди.

Унинг амри билан Қундуздан топиши мумкин бўлган энг тоза чоғирлар, энг ўткир майлар топтириб келтирилди.

Гулгун парчадан зар ёқали або кийган ўспирин соқийлар олтин кўзалардан олтин-кумуш суроҳийларга май қўйиб, аввал Бобирга, сўнг унинг ёнида ўтирган шоҳ элчиси Муҳаммаджон эшик оғасига, элчидан нарига чўқкалаган Мирзохонга навбатма-навбат узатдилар.

Зиёфатда Бобир томонидан юздан ортиқ аъёнлар, беклар ва мулоғимлар қатнашмоқда эдилар. Аввалги зиёфатларда Бобирдан ва Қосимбекдан яшириб май ичадиган кўпчилик беклар энди чоғир тўла қадаҳларини қўлларида бемалол тутган ҳолда бир-бирлари билан шўх-шўх кўз уриштиришар, қувноқ илжайишар ва подшоҳнинг ишорасини кутишар эди. Пойгаҳда кичик беклар орасида ўтирган Тоҳир ҳам қўлидаги май тўла кумуш қадаҳга жонли бир нарсага қарагандай эҳтиёт билан қараб қўярди.

Мирзохон ёнидаги элчига шивирлаб изоҳ берди:

— Олий меҳмон, сиз ғаройиб бир ҳөдисанинг гувходидирсиз. Бобир подшоҳ саройида бугун биринчи марта чоғир мажлиси!. Эътибор беринг: мажлиса фавқулодда бир ҳаяжон ҳукмрон!

Бошига қизил жигалик катта салла ўраган, соқоли хина билан бўяб қизартирилган бургутбурун элчи Бобирга мароқ билан тикилди.

Бобир қўлидаги қадаҳни учиб кетиши ёки чўқиб олиши мумкин бўлган нотаниш бир қуш каби авайлаб ушлаб турарди. Одамлар унинг сўзини кутаётганларини сезиб, овози товланиб гапира бошлади:

— Олий зотлар даврасида шодиёна кунларда узум сувидан ҳалолу покиза қилиб тайёрланган чоғир ичмоқ ота-боболаримиздан қолган одатdir. Ҳаётимизда шодликдан кўра ғаму ғурбат кўпроқ эди, шунинг учун ҳанузгача чоғир мажлисига майл кўрсатмадик. Ҳиротда Бадиуззамон мирзо билан Музаффар мирзодек тождор хешларимиз биз учун ороста базмлар бериб, чоғир таклиф қилганлари мажлис аҳлига маълум бўлса керак. Ушанда ҳам биз узрлар айтиб, чоғирдан ўзимизни торт-

ган эдик, чунки у маҳалларда май ичиб хурсандчилик қилғудек шодмон әмас эдик. Тангрим бизни шод-хуррам кунларга мана энди етказди. Биз бу масъуд кунларга Шоҳ Исмоил ҳазратларининг шарофатлари билан етишдик. Бугунги шод-хуррамликни бизга олий меҳмонимиз Мұҳаммаджон эшик оғаси жаноблари келтирдилар! Шунинг учун бизнинг биринчи чоғир мажлисими Шоҳ Исмоил ҳазратларига чексиз ишонч ва эҳтиромларимиздан кичик бир нишона бўлгай! Биринчи қадаҳимиз эса шоҳнинг мўътабар элчиси Мұҳаммаджон эшик оғаси жанобларига юксак ҳурматимизнинг исботи бўлгай!

Бу сўзлардан кўнгли ийиб, чуқур кўзлари оловланиб кетган элчи ўрнидан туриб, Бобирга әгилиб таъзим қилди. Сўнг жойига ўтириб, қўлидаги чоғирни охиригача сипқарди.

Пастда ўтирган созандалар «Сарвон намо» куйини ча-ла бошладилар. Дастурхонга кийик ва каклик кабобла-ри тортилди. Энг мазали таомлар орасида яна икки-уч қайта май ичилди. Одамлар энди ўзларини бояғидан хийла эркин сеза бошладилар. Қаҳқаҳа, ўйин-кулги ав-жига чиқди. Қувноқ, шўх куйлар кетидан яна алёрлар айтилди. Ниҳоят, сўз навбати шоҳ элчисига яқинлашди. Шунда Мұҳаммаджон эшик оғаси ёнидаги мулоzимига нимадир деб шивирлади. Мулоzим бош ирғаб, ён эшик-дан чиқиб кетди-ю, навбатдаги қувноқ куй тугаган пайт-да устига бир неча қават оқ ипак ёпилган қандайдир совғани олтин баркашга солиб кўтариб кирди.

Мұҳаммаджон эшик оғаси Шоҳ Исмоилнинг Бобирга бериб юборган мактубини ва олтин-кумуш инъомларини кундуз топширган эди. «Энди бу яна нима экан?»— деб ҳамма ўтирганлар олтин баркашга тикилиб қолди. Уму-мий жимликда қизилбош бек баркашдаги совға билан Бобирнинг қаршисига таъзим қилиб келди. Бобирга яқин ўтирган Мұҳаммаджон эшик оғаси ўрнидан туриб гап бошлади:

— Султон Захириддин Мұҳаммад Бобир баҳодир ҳазратларининг соҳиби замон Шоҳ Исмоил ҳазратлари— йа чўх юксак, чўх семимий ҳурматлари варлиғина алҳол бизим ишончимиз қамил ўлди. Шу себебли Шоҳ Исмоил ҳазратлари юбормиш мұқаддас инъомни Бобир подшоҳ ҳазратларийа топширмоға ижоза вергайсиз!

Элчи олтин баркашдаги совғанинг устидан ипак пар-данি олди. Бобир ёқут ва дур билан безалган нафис оқ

иپак саллани кўрди. Салланинг тёпасига ўн икки имом-жининг қонини өслатувчи қизил жиға суқиб қўйилган эди. Салла анча катта — Бобир ўрамларнинг сони ҳам шаҳид бўлган имомлар каби ўн иккита эканини тахмин қилиб билди. Шиаларнинг эътиқодига биноан, бу ўрамларнинг ҳар бири — бир имомнинг руҳи учун муқаддас макон эди.

Ичган чоғиридан юзи қизариб, кўзлари ялтиллаб турган Бобир ўзининг аъёнлари орасида шивир-шивир бошланганини пайқади-ю, кулимсираб Қосимбек томонга қаради. Аммо Қосимбек ва ундан нарида ўтирган Хўжа Халифа номли шайхулислом олтин баркашдаги дасторга жирканиб ва ҳатто қўрқиб қарамоқда эдилар.

Чунки Бобирнинг ўзи ҳам, Қосимбек ҳам, зиёфатда ўлтирган бошқа сунний аъёнлар, мулозимлар ҳам чорёрларнинг ҳурмати учун бошларига тўрт ўрам қилинган салла ўтар эдилар. Кичиклигидан оллоҳу таолога, пайғамбар ва чорёрларга чексиз ишонч ва эътиқод руҳида тарбияланган одамлар бошларидаги саллаларининг тўрт ўрамида тўрт чорёрнинг руҳи яшайди, деб ишонар эдилар. Шиалар шу чорёрларнинг учтасини тан олмай ҳақорат қилишар, уларнинг ўн икки ўрамлик саллалари эса Абубакир, Умар ва Усмонларнинг авлодларига қарши курашган шиа имомларини улуғлар эди.

Шиаликни — муқаддас чорёрлардан юз ўгириш, диндан чиқиб,рофизий бўлиш деб ўргангандек кекса Қосимбекка олтин баркашдаги салланинг майнин йилтираган ипаги — илон тेरисининг йилтирашидек кўринди. Қосимбекнинг назарида, саллага қадалган ёқутларнинг чўрдай ёниши заҳарли илоннинг қизғиш кўзлари қонга тўлиб ёнишига ўхшарди.

Муҳаммаджон эшик оғаси Бобирга яна бир марта таъзим қилди-ю, Шоҳ Исмоил шахсан бериб юборган шу муқаддас дасторни қўлига олиб бошига кийишини ундан илтимос қила бошлади.

Ўнлаб кўзлар Бобирга «Не қиласкин?» — деб тикилди, Қосимбек Хўжа Халифага таҳлика билан шивирлаб!

— Макру ҳийла билан ҳазратимни шиа мазҳабига ўтказмоқчиларми? — дегани Бобирнинг қулоғига чалинди.

Бобир агар шу дасторни бошига қўйса шиа мазҳабига ўтгандай кўриниши мумкинлигини энди пайқади. У

иначан чогиридан дурустгина кайф қилган эди. Ҳозир ва-
зият унга Қосимбек қўрқанчалик ваҳимали туюлмас
эди. Чорёрлар ҳам, ўн икки имом ҳам Бобир учун бун-
дан тўққиз аср бурун ўтган тарихий шахслар эди. Узоқ
ўтмишга айланган қонли душманликни бугун давом эт-
тириш кимга керак?

Қизилбош бек ҳамон Бобирнинг қаршиисида тиз чў-
киб, олтин баркашдаги саллани унга тутиб турибди. Шоҳ элчиси унга илтимоскорона таъзим қиляпти. Улар
орқали Шоҳ Исломил гўё Бобирга ҳамкорона қўл чўзяп-
ти. Бобир бу қўлни қайтарса, шоҳ билан орани узиши
керак бўлади. Кейин шайбонийзодалар шоҳ билан
иттифоқ тузишади-ю, Бобирнинг ватанга қайтадиган
йўлларини яна бекитищади. Бобир эса ҳозир бутун ву-
жуви билан ватанига қайтишни истайди. Бу истаги йў-
лида тоғ келса кемириб, сув келса симириб ўтмоқчи бў-
лади.

Бобир элчига мулойим кўз ташлаб:

— Шоҳ Исломил ҳазратларининг инъомлари биз учун
беҳад азиз,— деди ва баркашдаги саллага қўл чўзмоқ-
чи бўлди.

Шунда Қосимбек оғзини унинг қулоғига яқинлашти-
риб, хавотир билан шивирлади:

— Ҳазратим, зинҳор бошингизга кийманг! Зинҳор!

Бу сўзлар элчига ҳам эшитилди ва уни ранжитгани
авзойи ўзгариб кетганидан сезилди.

Сув қуйгандай жимжитликда Бобир Муҳаммаджон
эшик оғасига майин қулимсираб қаради:

— Олий меҳмонимиз имомия¹ мазҳабиданлар, шун-
дайми?

Элчи тасдиқ маъносида бош иргади. Бобир яна ўшан-
дай мулойимлик билан сўзида давом этди:

— Имомиялар ҳам Муҳаммад алайҳиссаломнинг ум-
матларими?

— Алҳамдулилло!— деб элчи дарҳол калима кел-
тирди.

Шундан кейин Бобир Қосимбек томонга ўгирилди:

— Сиз ҳам Муҳаммад умматимисиз, жаноби амирал
умаро?

Қосимбек ҳам калима келтирди-ю, охирида:

¹ Имомия — шиа мазҳабининг расмий номи.

— Ҳазратим, сизни илоҳа чоҳорёри босафблар қўл-
лаб-қувватласинлар! — деб қўшиб қўйди.

Чорёллар тилга олиниши билан элчининг ранги ўчиб,
лаби асабий пирпиради.

— Жаноб Муҳаммаджон эшик оғаси! — деди Бобир
тез. — Қуръони шарифда айтилганки, «қулли муслимина
ихватун». Яъни, барча мусулмонлар оға-инилардир. Биз
ҳаммамиз бир диндамиз. Демак, ҳаммамиз оға-инилар-
дек яқин бўлмоғимиз керак. Биз сизнинг мусулмонлик
эътиқодларингизни ҳурмат қилганимиз каби, сиз ҳам
бизнинг, — деб Бобир икки қўлини ёйиб, барча бек ва
мулозимларини кўрсатди, — мусулмонлик эътиқодлари-
мизни ҳурмат қилурсиз деб ишонамиз!

Элчи энди бир оз юмшаб устма-уст бош иргади:

— Ушбу муқаддас армуғон ҳам бизим сизлара буюк
әҳтиромимиз аломатидир!

Бобир энди Қосимбекка юзланди.

— Ҳазрати Алини сизу биз ҳамиша бошимиз устида
олиб юрибмиз, шундоқми?

Қосимбек — салласидаги тўрт ўрамнинг бироғ Ҳаз-
рати Алиниң руҳига макон эканини ўйлаб, қўлинй қўк-
сига қўйди:

— Шундоқ, ҳазратим.

— Муҳаммад алайҳиссаломнинг ягона фарзандлари
бўлган Биби Фотима-биз учун ҳам муқаддас волидадир-
лар, шундоқми?

— Шундоқ, ҳазратим!

— Шундоқ бўлса, Ҳазрати Али билан Биби Фотима-
нинг азиз авлодлари бўлган имомларни биз ҳам эъзоз-
ласак, мусулмончиликка тўғри келурми, йўқми?

Боя Бобирга жон куйдириб ҳалиги гапни унинг қу-
логига шивирлаган Қосимбек подшони ниятидан қайта-
ролмаслигини, шоҳнинг бу маҳсус совфасини Бобир қа-
бул қилмай иложи йўқлигини энди сезди. У кўпчилик-
нинг олдида Бобирга тан бергандай бўлиб, аслида уни
ёқлагиси келиб бош эгди;

— Подшоҳ ҳазратлари сиз ҳақсиз, қулингизни гус-
тоҳлигим учун афв этинг!

Бобир Қосимбекка мамнун кўз ташлаб:

— Маъзурсиз, — деди. Сўнг дастор солинган оғир
баркашни тутиб туравериб қўллари толиб кетган қизил-
бош бек томонга ўгирилди. Бобир дасторни дадил бир
ҳаракат бўйлан икки қўллаб баркашдан олганда унинг

ўнлаб бек ва мулозимлари ваҳима билан: «о!» деб юбо-
ришиди. Бобир дасторни қўлида тутган ҳолда:

— Шоҳ Исмоил ҳазратлари ўз муборак иликлари би-
лан юборган бу армуғонни биз кўзга сургаймиз! — де-
ди-ю, дасторни кўзи аралаш пешонасига теккизиб олди.

Муҳаммаджон эшик оғасининг юзи қувончдан бал-
қиб кетди:

— Муташаккирам, подшоҳ ҳазратлари, муташакки-
рам!

Лекин Бобирнинг бек ва мулозимлари орасида, хусу-
сан, яқинда унга келиб қўшилган мӯғул беклари ораси-
да ҳайрат, қўрқув ва койиниш оҳангларига тўла бир
шовур-шувур эшитилди.

Бу ғовурдан Қосимбекнинг ранги оқариб кетди. Mu-
ҳаммаджон эшик оғаси эса Бобирни шиа мазҳабига ўт-
казиб, катта ғалабага эришгандай шодланиб гапирди:

— Подшоҳ ҳазратлари, биз умид эдюрмизки, сиз шоҳ
ҳазратларининг буюқ мададлари ила яна Самарқанд
тахтия чиққанингизда азиз бошингизда шу муқаддас
дасторни кўришга мұяссар ўлurmиз!

— Тангри бизни сиз айтган бахтиёр кунга еткиса,
бу дасторни тож ўрнида киюрмиз. Шоҳ Исмоил ҳазрат-
ларига шу аҳдимизни бориб айтгайсиз!

Бу гаплардан сўнг мӯғул беклари орасидаги асабий
шовур-шувур яна кучайди. Шоҳ элчиси эса Бобирнинг
дадил одам эканига, Шоҳ Исмоил билан мустаҳкам
иттифоқ тузиш учун суннийпараст бекларининг ҳар қандай
қаршиликларини енгигиб ўтиши мумкинлигига энди
ишонди.

Мана шу ишонч Бобирнинг шоҳ элчиси билан эртаси
куни олиб борган музокараларини анча енгиллаштириди.

Шоҳ Исмоилнинг Бобир билан иттифоқ тузишдан
мақсади — Мовароуннаҳрга у билан бирга қўшинн тор-
тиб бориш ва шайбонийзодаларни бирга тор-мор қилиш
эди. Бобир шайбонийзодалар устидан ғалаба қилишини
нечоқлик истамасин, Мовароуннаҳрга ўз қўшини билап
мустақил кириб боришни истарди. Чунки агар у асосий
ғалабани ўзи мустақил қўлга киритмаса, ватанига обрў
билан қайтолмаслигини, ёвлари уни «Шоҳ Исмоилнинг
пайзасига миниб кириб келди!» — деб маломат қилишлари
рини сезиб турарди.

Бобир шоҳ Исмоилнинг Марвда эришган ғалабаси
етарли эканини, энди улар дам олишлари кераклигини,

шайбонийзодаларни Ҳисордан, сўнгра Самарқанддан қувиб чиқариши энди Бобир зиммасига олиши кераклигини элчига қайта-қайта айтиб кўрди. Лекин Шоҳ Исмоил ҳам Самарқандга интилмоқда эди, агар унинг бу интилиши амалга ошмаса Бобир билан иттифоқ тузишнинг қизиги қолмас эди. Элчининг гапидан буни сезган Бобир музокарани бошқа йўналишга бурди.

Шоҳ Исмоилнинг аскарлари тоғ йўлларида қийналиб, минглаб чақирим ортиқча йўл юриб, Қундуз ва Ҳисорга келиб юриши не керак? Шоҳ қўшини карвон йўли билан Термиз ва Бойсун орқали Самарқандга қараб отлансин. Бобир эса ҳозир Ҳисорга яқин турибди. Бир ҳамла билан Ҳисорни кўчманчи сultonлар қўлидан тортиб олишга кучи етади. Қейин у Самарқандга жануб томондан йўл очади ва Шоҳ Исмоилнинг қўшини билан Шаҳрисабз — Қарши атрофларида учрашади.

Мантиқан асосли бўлган бу фикрга шоҳ элчиси эътиroz қилолмади-ю, Бобирнинг таклифини қабул қилди,

4

Бобир элчи билан тузган бу битимни Шоҳ Исмоилнинг тасдиғидан ўтказиш учун Мирзохонни Табризга вакил қилиб юборди-ю, ўзи Ҳиндикуш тоғининг шимолигарбий этакларига тўпланган қўшинларини жангга тайёрлай бошлади.

Баҳор охирлаб қолган кунларнинг бирида Бобир Қосимбек билан адир йўлидан мўғул бекларининг қароргоҳларига отлиқ кетмоқда эдилар. Шунда Қосимбек Бобирни йўлдан четроқقا бошлаб чиқиб, бир шумхабарни айтди.

Шоҳ Исмоил юборган шиа дасторини Бобир кўзига сурниб, элчига қуюқ ваъдалар берганидан мўғул беклари қаттиқ ранжиган эмишлар, уни «чорёлардан воз кечиб, имомия мазхабига ўтди», деб фитна уюштирган эмишлар. Бундан беш-тўрт йил бурун Қобулда Эгу Салим, Шеркули деган мўғул беклари Бобирга сунқасд қилмоқчи бўлган пайтларида қўлга тушган, Бобир уларни яқин тарафдорлари билан қатл эттирган эди. Шайбонийзодалардан айниб, яқинда Бобирга келиб қўшилган мўғул бекларининг орасида ўша ўлдирилганларнинг уругдошлиари бор экан, улар кек сақлаб юрган эканлар. Энди шу беклар яширинча тил биритириб, Бобирни Қундузда ўлдирмоқчи ёки Қобулга қувиб юбормоқчи эмишлар.

Унинг ўрнига Бобирниг қўлида ўсган төғаваҷчаси, мәрҳум Олачаҳоннинг ўн ети яшар ўғли Сайдхонни таҳтга чиқармоқчи эмишлар.

— Қимлар шундай қилмоқчи? Қимлар?! — деб Бобир ғазабдан титраб сўради.

Қосимбек орқасига ўгирилиб қаради, Мулозим ва хос навкарлар узоқда қолган, овоз уларга эшитилмайди. Шундай бўлса ҳам Қосимбек товушини пасайтириб:

— Қамбарали Саллоҳ, Сайидали Шакма,— деб бир қанча фитначиларнинг номларини айтди.

— Иблислар! Қачонгача булар менинг елкамга тир урурлар?! Андижондаги Аҳмад Танбал ҳам шу тоифадан эди! Бас! Ҳаммасини туттиринг! Пора-пора қилиб, гўштларини қузғуларга ташлатурмиз!

Қосимбек отининг жиловини тортиб, тоғ этакларидағи минглаб ўтовларга хавотир билан кўз югуртириб чиқди.

— Ҳазратим қаранг, булар жуда кўп. Навкарлари билан йигирма минг!

Кўп асрдан бери Мовароуннаҳрда яшайдиган, туркий тилда сўзлашадиган, мусулмон динини қабул қилиб, унинг хурофотига қаттиқ берилган бу мўғул беклари ва навкарларининг касби ҳарбий иш эди. Қайси подшоҳ улуфани кўпроқ берса, қайси жангдан ўлжа яхшироқ тушадиган бўлса, буларнинг кўпини ўша подшоҳ ва ўша жанг ўзига жалб қиласр эди. Хисравшоҳ хизматидан Шайбонийхонга ўтган, унинг мағлубиятидан сўнг Бобирга келиб қўшилган бу ёлланма аскарлар беқарорликка ўрганган эдилар.

Агар Бобир фитначи бекларни туттириб жазолатадиган бўлса, уларнинг уруғ-аймоқлари аразлаб кетиб қолиши, сўнг қасд олишнинг пайига тушиши аниқ эди. Агар ички уруш бошланиб кетса, кейин Бобир шайбонийзодалар қархисида заифлашиб, енгилиши муқаррар эди.

Бобир шуни ўйлаганда қалбидаги ғазаб ўрнини оғир хавотирлик туйғуси эгаллади.

— Ҷудом инсоғу имонга хилоф хиёнатлар шу мўғул бекларидан содир бўлур! Яна булар дину мазҳабни ҳимоя қилмоқчиларми?

— Бутун жаҳолат ана шундоқ нодонлардан чиқадида, ҳазратим! Қулингиз ана ўша жоҳилларнинг кайфиятини сезиб, дасторни олманг, деган эдим.

— Лекин олмай иложим бормиди?

— Йўқ эди, ҳазратим, сиз мутлақо тўғри қилдингиз! Энди буни ҳаммага яхшилаб уқтириш керак. Мўғулларнинг орасида ҳам яхшилари бор, фитна тайёрланганини менга мўғул авлодидан чиққан тоғаваччангиз Сайдхоннинг ўзи келиб айтди. «Ҳазратимдан илтимос қилинг, иложи бўлса мени Андижонга юборсинлар», деди.

— Лекин Сайдхон..., берган тузимизни оқлабдир... Дуруст!

— Бошқа инсофлик мўғуллар ҳам кўп, ҳазратим. Сиз бир пора ёмон бекларнинг фитнасидан кўп маъюсланманг. Фақир чорасини ўйлаб қўймишмен.

— Хўш, қани?

— Сайдхон сизга садоқатини исбот қилди. Уни хон кўтармоқчи бўлган беш-ўнта фитначи бекларга бир-икки минг навкарлари билан рухсат берайлик. «Бор, Андижонни шайбонийзодалардан ҳимоя қилиб ол!»— дейлигу ҳаммаларини Қоратегин орқали жўнатиб юборайлик. Шу билан биз ҳам фитначилардан ҳалос бўлурмиз, улар ҳам истаган хонларининг хизматига ўтиб тинчирлар.

— Қолганлари яна бир кун хиёнат йўлига ўтса-чи?

— Қолганлари билан кейин мен ўзим яккама-якка гаплашиб чиқурмен. «Подшоҳдан гуноҳларингни сўраб олдим, бир марта шафе бўлдим, иккинчи марта бўлмасмен», деб тушунтиурмен. Бу ҳам кифоя қилмаса, шубҳалироқларининг кетига зийрак махфийлардан қўйиб қўйғанмен. Агар яна бузуқлик қилсалар унда тутиб келтиурмен, кейин истаганингизча жазо берурсиз!

* * *

Ниҳоят, барча режалар гаплашилган тарзда амалга ошди-ю, Бобирнинг мўғуллар билан биргаликда йигирма беш мингдан ошадиган қўшини ёз кунларида Амударёнинг Панж деб аталадиган юқори оқимидан ўтиб; Кўлоб орқали Вахш водийсига йўналди.

Шайбонийзодалар Шоҳ Исмоил қўшинининг Термиз томондан келаётганини, улар Бобир аскарлари билан қўшилса, енгиш мушқул бўлишини билар эдилар. Шунинг учун улар Убайдулла Султон бошлиқ бир қисм қўшинларини Қарши ва Самарқандда қолдиришиб, асосий кучларини Ҳисорга йиғиб келдилар. Темур Султон, Жонибек Султон, Ҳамза Султон ва Мамак Султон бош-

лиқ ўттиз минг отлиқ қўшин чўл ва водийлардан чиқиб, баланд тоғ оралиқларига шитоб билан кўтарилиб келмоқда эди. Улар Бобир қўшинини Вахш дарёсидан ўтказмасликка интилар эдилар.

Бироқ юқоридан тез тушиб келаётган Бобир бутун аскарлари билан Вахш бўйига душманидан анча олдин етиб борди ва Пули Сангин¹ деган кўприкдан ўтди. Сўнг одам оёғи тегмаган тик қоятошлар ва зовлар орасидаги баҳайбат даранинг даҳанасини² ва ҳарбий жиҳатдан қулай баландликларни эгаллаб олди. Пастдан ёпирилиб чиқиб келган ёв қўшини торгина йўл билан даранинг ичига киришга журъат этолмай тўхтади.

Султонлар от устида туриб анча вақт кенгашганларидан кейин Темур Султон бошлиқ ўн мингтacha аскар даҳананинг ўнг томонига ўтди-ю, Бобир турган баландликка орқадан айланиб келмоқчи бўлди. Темур Султоннинг орқадан чиқиб келиб тўлғама ишлатишни Сарипул жангига кўрган Бобир унинг ниятини фаҳмлаб қолди. Дарҳол Мирзохон бошлиқ ўн минг отлиқни ёв айланиб ўтаётган томонга жўнатди. Айланиб ўтаётгандардан кўра тўғридан бораётгандар мўлжаллаган жойга тезроқ етдилар ва баландликнинг Вахш дарёсигача бориб тақаладиган ҳамма муҳим нуқталарини ишғол қилдилар. Вахш учуримли қоялар орасидан шундай даҳшат солиб оқар эдики, унинг қирғонини ёқалаб ўтиб бўлмас эди. Темур Султон қаршисидан чиқсан аскарларнинг сафини ёриб ўтмоқчи бўлиб, пешингача жанг қилди, лекин муҳолиф томок юқоридан тош юмалатиб, ўқ ёғдириб, уларга йўл бермади.

Очиқ чўлларда ўсган, текис водийларда дадил ҳаракат қиладиган султонлар ҳамма ёғи бекик даралар ва тик қоятошли тоғлар орасида жуда қийналиб қолдилар. Уларнинг даштий отлари ҳам тоғда дуруст чополмас эди. Баъзилари тик ёнадан тушаётгандан тоғда юришга мўлжалланмаган қуюшқон ва айиллари узилиб кетар, эгалари отларидан йиқилиб тушишар эди. Шундай йиқилиб тушганлардан бирини тутиб олиб, Бобирнинг олдига «тил» тариқасида келтирдилар. Бобир «тил»ни сўроқ қилдириб, шайбонийзодалар орасида уларнинг энг истеъдодли саркардаси бўлган Убайдулла Султон

¹ Пули Сангин — «Тош кўприк». Ҳозирги Норак шаҳрининг яқинида бўлган.

² Даҳана — даранинг оғзи, кириб-чиқиладиган жойи

йўқлигини, бошқалари дурустроқ олишишнинг эпини тополмай, чекинишга ҳам журъат этолмай, иккиланиб тұрғанини аниқлади.

Бобир ёв қүшини сафланиб турган пастликнинг яқинда сув йўқлигини билар эди. Ҳаво иссиқ. Куни бўйи югуриб-елиб чарчаган одамлар ва отлар ҳали-замон чанқаб, сув қидиришга тушиши мұқаррар. Сув эса ёв турган жойдан беш-олти чақирим орқада эди.

Кеч кириб, кун бота бошлаганда Бобир одамларига «Бугун ғонди жанг бўлмади, эртани кутамиз» дегандай қилиб, отидан тушди. Тепаликда Бобирнинг ёнида турган мингдан ортиқ аскарлар ҳам отдан намойишкорона туша бошладилар.

Бўни даранинг ташқарисидаги шайбонийзода султонлар кўриб турар эдилар. Лекин даранинг ичида — сultonларга кўринмайдиган жойда Бобирнинг асосий кучлари отдан тушмай, саф тортиб, ҳужумга шайланиб турар эдилар.

Тепаликда турган Бобир ён-веридаги барча навкарлари билан кечки пайтда отдан тушганини ва навкарлар сафини тарқатиб юборганини кўрган сultonлар «буғун чиндан ҳам жанг бўлмайди» деб ўйлаган бўлсалар керак. Улар ҳам сафларини бузиб, баъзилари отларини етаклаган ҳолда орқага бурилишди ва сув излай бошлашди.

Бобирга шу керак эди. У сакраб отига минди-ю, дара ичида ёвга кўринмай тайёр турган бек ва навкарларига қараб қичқирди:

— Ёний чекинди! Зафар, бизники бўлур! Таъқиб ётинг!

Бу буйруқ оғиздан-оғизга ўтиб, бир лаҳзада бутун сафларга тарқалди. «Ёв қочса ботир кўпаяди» деганларидек, ёв чекинганига ишонган дарадаги аскарлар даҳана ташқарисига шердай дадил ҳамла қилиб чиқдилар. Бобир ҳам қилич яланғочлаб, тепадаги туғбардорлари ва хос навкарлари билан пастга отилди.

Шайбонийзодалар дара ичидан ва тепадан тоғ кўчкисидай отилиб тушиб келаётган ўн беш минг қўшин қаршисида шошиб қолдилар. Улар бузилган сафларига қайтадан тартиб беришга улгуролмай, ваҳима ичида қочишига тушдилар.

Бу қочиши ўнг томонда Мирзохон билан олишаётган Темур Сultonнинг одамлари ҳам кўрдилару яккаланиб,

уршовга түшиб қолышдан қўрқиб, нариги бир дарага қараб чекиндилар.

Бобир хос навкарлари билан бирга ёвнинг асосий кучларини таъқиб қилиб бормоқда эди. Фира-шира қорон-ғилик тушганда унинг Мұҳаммад Султон Дўлдай деган беки Ҳамза Султоннинг қўшинини тор-мор қилиб, ўзини асир олиб келди. Хуфтон кечроқ Ҳўжа Қалон бошлиқ навкарлар Маҳди Султонни ҳам қўлга тушириб келдилар.

Қоракўл ва Андижонда бўлган кўпгина қирғинларнинг сабабчилари мана шу султонлар эди. Бобир уларни ўлимга ҳукм қилди.

5

Тиниқ куз осмонида оқ ипакдан ҳам нафис мезонлар учади. Самарқанд боғларида катта дона анорлар етилган, соҳиби узумлар ва нақш олмаларнинг энг ширинлари қолган пайт. Шаҳарнинг барча дарвозалари очиқ, кирди-чиқди бемалол. Ўн кундан бери Самарқандда на қўшин бор, на бир ҳокимият. Шайбонийзодалар Вахш бўйида Бобирдан енгилгандаридан кейин Ғузор ва Қарши атрофларида яна астойдил бир жанг қилмоқчи бўлиб, куч тўплаб кўрдилар. Бироқ Бойсун тоғларидан нарида Бобир қўшинига Шоҳ Исмоил юборган ўттиз минг қизилбош аскари келиб қўшилгани маълум бўлгандан кейин султонлар иккинчи марта мағлубиятга учрашдан қўрқидилару, Қарши, Бухоро ва Самарқандни жангсиз ташлаб чиқдилар. Фақат улар душманларига заҳира қолдирмасликка тиришиб қўлларига тушган ҳамма отулов, мол-ҳол, дон-дунни талаб олиб кетдилар. Шу муносабат билан кўчманчи қабилаларнинг яна бир талонторожини бошдан кечирган ва уларга қарши нафроти бениҳоя ошган ўтроқ аҳоли энди бутун нажотни Бобирдан кутиб, унинг йўлига умид билан кўз тика бошлади.

Бобир иттифоқдошлари билан Ғузордан Қаршига, ундан Бухорога ўтган, бу қўрғонларга ишончли одамларни қўйиб, энди Самарқандга келмоқда эди. Бундан хабар топган самарқандликлар Чорраҳа дарвозасини, унга келиб кирадиган Бухоро йўлининг иккичетини дорпеч, гилам ва палаклар билан безатдилар. Йўл бўйига ўнлаб муваққат дўконлар қурилди, ҳайит кунларидаги кабиғайил бошланди.

Шаҳарнинг энг обрўли одамларидан йигирма-ўттизаси қўргон калитлари ва қимматбаҳо пешкашлар билан Бобирни бир кунлик йўлда пешвоз олдилар. Эртаси куни Бобир саф-саф отлиқ қўшин олдида мулозимлари билан Самарқандга яқинлашар экан, йўлнинг икки бўйини халойиқ тутиб кетганини, ҳаммаёқ байрам тусинъ олганини, том устларида, дарвоза олдиларида карнайлар ва нақоралар чалинаётганини кўрди.

Бобирнинг Ҳисордаги ғалабаси шарафига ёзилган шеърий тарихлар¹, унинг Самарқандга келишини қутлайдиган сатрлар хаттотлар томонидан йирик-йирик ҳарфлар билан оқ ипак матоларга ёзилиб, йўл бўйларига, дўкон тепаларига, қўргон ичининг кўзга кўринарли жойларига осиб қўйилган эди. Бобир хор-зор бўлиб чиқиб кетган ватанида бунчалик иззат-икром билан қарши олинишини хаёлига келтирмаган эди. У мавқаби билан шаҳарнинг марказий хиёбонидан Кўксаройга қараб ўтаётганда Улугбек мадрасасининг баланд пештоқи ва миноралари устида қўшкарнайлар чалиб, нақораларни сайратиб, қувонч билдираётган ватандошларини кўрди. Шунда бирдан эти жимиirlаб, қўзига ёш келди. Ёнида бораётган Қосимбекка қараб:

— Ишонгим келмас, тушимми бу, ўнгим? — деди.
— Унгингиз, ҳазратим! Унгингиз!

Хос навкарлардан сал кейинроқда саллаларига қизил ўтағалар қадалган Шоҳ Исмоилнинг беклари Аҳмадбек сўфи ўғли, Шоҳруҳбек Афшар, Муҳаммаджон эшик оғаси ўз мулозимлари билан бир тўп бўлиб келмоқда эдилар. Улар от устида ғолибларга хос виқор билан ўтиришар, юзларидан: «Биз бўлмасак Бобир Самарқандга қайтиб кўрсинг эди!» — деган бир маъно англашилар эди.

Самарқандликлар эса бутун карнай-сурнайларини Бобирга қаратиб чалишарди. Шоҳ Исмоилнинг бек ва навкарлари халойиқ олдидан ўта бошлаганда карнайлар ва нақоралар бирин-кетин тиниб қолар эди. Қизилбошларнинг шафқатсиз ишлари ва шиа мазҳабини зўрлик билан тарқатиш борасидаги ҳаракатлари Самарқандга жуда ваҳимали овозалар тарзида етиб келган эди. Шаҳарнинг сунний аҳолиси саф-саф бўлиб ўтаётган қуролли шиаларга хавотирли, нохуш назар билан қарап

¹ Шеърий тарих — маҳсус бир шеърий жанр бўлиб, ҳарфларидан абжад ҳисоби билан маълум йил ва ой келиб чиқади.

Эди. Ҳалойиқнинг совуқ муносабатидан қизилбош бекларининг қовоқлари осилиб борар, Бобирга кўрсатилаётган иззат-икромлар уларниг ғашларини келтирап эди.

Бундай мураккаб ҳолатлар Қарши ва Бухорода ҳам бўлган эди. Бобир ватандошлирининг меҳмондўстлик туйғусини уйғотиш учун шу куниёқ Самарқанднинг майдон ва кўчаларига жарчи чиқартириб, «Шоҳ Исмоилнинг ғозийлари бизнинг мўътабар меҳмонларимиздан-дир!»— деб эълон қилди. Сўнг қувончли айём муносабати билан меҳмонларга ва шаҳар аҳолисига уч кунгача ош беришни буюрди.

Бобир ва унинг одамлари бундан ўн йил муқаддам қамалда қолиб, очликдан интиҳосиз машаққатлар чеккан Бўстонсарайда, маҳалла ва гузарларда, боғ ва сайдоҳларда юзлаб тандирларда осиёги нонлар, ширмойлар, натирлар, чаватилар ёпилди, минглаб товоқ ошлар тортилди, беҳисоб кўп қўйларнинг гўштларидан қовурдоқлар, кабоблар, шўрвалар тайёрланди, асл чоғирларга тўла хумлар очилди.

Бобир ҳар куни меҳмонлари ва мусоҳиблари билан чоғир ичиб хурсандчилик қилас эди. Тўй-томуша устига яна тўрт тарафдан хушхабарлар келиб турарди. Андижон, Марғилон, Ўш ва Ўзгант ҳаммаси бирин-кетин шайбонийзодалар ҳукмидан чиқиб, Бобир томонига ўтган эди. Жанубда Қундуз, Қобул, Газни барчаси энди Бобирнинг қаламравидаги ягона мамлакатга айланган эди. Унинг назарида, ҳаётининг энг баҳти даври бошланган, барча орзулари энди бекаму кўст рўёбга чиқиши керак эди.

Бироқ бу баҳтнинг жуда омонат, жуда муваққат эканлиги энг аввал масжид билан бозорда билинди.

* * *

Самарқанд қўрғонининг Оҳанин дарвозаси яқинидаги улкан мармар масжиднинг текис тош тўшалган саҳнига йигирма минг намозхон тўпланган. Бугунги жума намозида хутба қандай ўқилишини кўпчилик самарқандликлар ўз қулоқлари билан эшитгилари келади. Чунки «Бобир подшоҳ шиалар томонига ўтганмиш, чорёлардан юз ўгириб, ўн икки имомни тан олганмиш!»— деган мишишлар кўпайган, Бобирни қувониб қарши

олган сунний мазҳабидаги одамлар, бу овозага ишонгизлари келмас, бироқ унинг муҳолифлари аҳолининг асабига тегадиган мишишларни тобора кўп тарқатишар эди. Бугун жоме масжидида ўқиладиган хутба бу овозаларнинг қанчалик рост, қанчалик ёлғонлигини аниқлаб бериши керак эди — қондага биноан, хутбага ёки чорёларнинг номи, ёки ўн икки имомнинг номи, албатта, кўшиб ўқилар эди. Буни биладиган одамлар жоме масжидининг ич-ташини тўлдириб юборган эдилар. Хутба ўқилишига бир соат қолганда масжид саҳнида бўш жой қолмади. Шундан кейин эшик ва дарвозалар олдида турган қуролли соқчилар ичкарига ҳеч кимни киргизмай қўйдилар.

Бир вақт масжиднинг орқа эшигидан садрлар судури Хўжа Халифа, Бобир, Қосимбек ва уч-тўртта қизилбош беклар кириб келишди. Бобир масжиднинг ич-ташига одам бениҳоя кўп тўпланганини кўриб, юраги изтироб билан «шиғ» этди. Бу одамлар унинг ҳозир қилмоқчи бўлган қалтис иши — муваққат бир чора эканини тушунишармикан? Самарқандга у билан бирга келган ўттиз минг қизилбошни меҳмон қилиш, ҳар куни зиёфат бериб боқиши осон эмас. Ўттиз минг қизилбошнинг эллик-олтмиш минг отига ҳам ем-хашак топиб бериш керак эди. Куз охирлаб, қиши яқинлашмоқда. Шайбонийзодалар хазинани шипшийдам қилиб, бор захираларни ҳам олиб кетган эдилар. Бозорда нархи наво кўтарилиб бормоқда эди. Агар Бобир ҳозирдан эҳтиётини қилмаса, қиши ва баҳорда худди аввалги галлардагидек танқислик ва очлик балосига учраши мумкин эди.

Мана шу вазиятда энг тўғри йўл — ўттиз минг кишилик шоҳ қўшинини «отанг яхши, онанг яхши» деб силаб-сийпаб, ватанига жўнатиб юбориш эди. Аввалдан келишилган шартларга биноан, Бобир Шоҳ Исмоилни олий ҳоким деб эълон қилиши, хутбага унинг ва ўн икки имомнинг номини қўшиб ўқитиши кейин шоҳнинг номидан пул зарб қилиши керак эди. Шу шартлар бажарилса, Шоҳ Исмоилнинг беклари ўз қўшинларини Мовароуннаҳрдан олиб чиқиб кетишга кўнар эдилар. Ўттиз минг қизилбошни боқаман деб абгор бўлгунча юқоридаги шартларни хўжа кўрсинга бўлса ҳам бажариб, бегона қўшиндан тезроқ ҳалос бўлиш тўғрироқ эканини Қосимбек ҳам, бошқа сирдош аъёнлар ҳам тушунган эди. Хўжа Халифа ҳам бугунги хутбани Бобир истаган тарзда ўқиш-

За рози бўлган ёди. Режага биноан, Хўжа Халифа самарқандлик сунний намозхонларнинг ғазабига қолмаслик учун чорёрларни умумий бир тарзда номларни тилга олмай айтиб ўтиши, ўн икки имомни эса қизилбош бекларни қониқтирадиган оҳангда номма-ном тилга олиши керак ёди.

Узун мош-гурунч соқоли киндигига тушадиган Хўжа Халифа барча қавмларнинг олдида туриб, жума намозини ўқиди-ю, кейин қўлига ҳассасини олиб, масжид тўридаги мармар зинапояли минбарга кўтарила бошлади.

Йигирма минг намозхон ҳаммаси жим. Масжид саҳнини тўлдирган одамларнинг ҳаммаси гўё ўзларининг сунний мазҳабларини намойиш қилмоқчи бўлгандек бошларига тўрт ўрамлик саллалар ўраган эдилар. Сунний саллаларнинг саноқсиз кўплигидан ғаши келган элчи Хўжа Халифанинг бошидаги дасторга қаради. Ўрамлари тўрттадан кўп, аммо ўн иккита ҳам эмас. Санаб бўлмайди. Муҳаммаджон эшик оғаси Бобир ва Қосимбекнинг бошларидаги саллаларга қаради. Буларнинг ўрамлари ҳам тўрттадан кўп, аммо ўн иккитадан оз. Бу саллалар шундай ўралганки, ўрамини сана什 мумкин эмас. Муҳаммаджон эшик оғаси бунда қандайдир маъно борлигини сезиб, сергакланди. Наҳотки Бобир Қундузда берган ваъдасини бажаришдан бош тортмоқчи бўлса?

Муҳаммаджон эшик оғаси Хўжа Халифанинг ҳаракатларини сергак туриб кузата бошлади. Масжид саҳнидаги одамлар ҳам нафасларини ичларига олиб хутбанинг бошланишини кутмоқда эдилар. Умумий жимликда Хўжа Халифанинг йўғон товуши алланечук титраб, изтиробга тўлиб эшитилди:

— Бисмилла-аҳу раҳмо-онур-раҳим!

Минбарда турған Хўжа Халифа йигирма минг сунний намозхоннинг ўзига сергакланиб тикилаётганини кўрди-ю, тиззаси ҳам қалтирай бошлади. Мана, у оллоҳ шаънига, пайғамбар щаънига битилган сурани ўқиб тугатяпти. Энди чорёрлар ғилга одиши керак. Наҳотки, Хўжа Халифа — ёшлидан сунний мазҳабида чорёрларга зўр эътиқод билан тарбияланган одам — энди шунча намозхоннинг умидини пучга чиқарса? Унинг қаршисида йигирма минг салла турибди. Бу саллалардан ҳар бирининг қатларида чорёрларнинг руҳи яشاшига

Хўжа Халифа болаликдан ишонади. Ҳозир намозхонлар нинг бошлари сабрсизлик билан қимиrlагандага Хўжа Халифага салла ўрамларидаги арвоҳлар қимиrlагандай туюлди. Агар у чорёрларга ҳурматсизлик қилса, арвоҳ уриб кетадигандай бўлди.

Йўқ, Хўжа Халифа чорёрларнинг арвоҳидан қўрқади. Шунинг учун:

— Чорёри босафолар Ҳазрати Абубакир! Ҳазрати Умар!— деб ҳозир айтиши керак бўлмаган номларни бирдан хутбага қўша бошлади.

Бобирнинг орқасида турган минглаб намозхонларнинг қувонч билан енгил нафас олгани эшитилди. Муҳаммаджон эшик оғасининг эса ранги ўчиб кетди. Ўнинг нариги ёғида турган Шоҳруҳбек Афшар қиличининг сопини чангллаб, минбарга томон интилди.

Шиалар Абубакир, Умар ва Усмонни бугунги тирик душманларидек ёмон кўришар, масжидда уларни улуғлаган ҳар бир суннийни чопиб ташлагилари келар эди. Ҳиротнинг жоме масжидида чорёрларни улуғлаган Зайнiddин деган хотибни қизилбошлар намозхонларнинг кўзлари олдида қилич билан чопиб парчалаб ташлаганини Бобир эшитган эди. Ҳозир у Шоҳруҳбекнинг билагидан олиб, илтимоскорона товуш билан:

— Бек жаноблари, сабр қилинг, сабр!— деди. Бу орада **Хўжа Халифа** чорёрларнинг номини айтиб бўлди-ю, қизилбошлар севадиган имомларни хутбага қўша бошлади:

— Ҳазрати Имом Ҳасан! Ҳазрати Имом Ҳусайн! Ҳазрати Зайналиддин Али!

Шоҳруҳбек Афшар бу номларни эшитиб қўлинни қиличининг сопидан олди-да, қаторга қайтиб кирди. Аммо орқадаги намозхонлар орасида шундай бир асабий шовур-шувур бошландики, Хўжа Халифа қолган имомларнинг номини бақириб айтишга мажбур бўлди.

Орқадан кимдир:

— Э, бас, бас!— деб қичқирди. Бироқ намозхонлар орасига тартиб ўрнатиш учун қўйилган девқомат навкарлардан бири: «бас!»— деб қичқирган одамнинг оғзини улкан кафти билан бекитиб, бўйнидан судраб олиб чиқиб кетди.

Хотиб ўн икки имомни номма-ном санаб бўлиб, уларнинг муқаддас ишини бугун давом эттираётган соҳиби замон Шоҳ Исмоил Сафавийни мақтаб сўзлай бош-

лаганда масжид саҳни яна ҳам асабийроқ жунбишга келди. Фақат Хўжа Халифа Бобирни Мовароунаҳрнинг подшоси деб эълон қилганда шовқин хиёл босилди.

Хутбадан сўнг уй-уйига тарқаган намозхонларнинг баъзилари «Бобир мирзо Мовароунаҳрнинг подшоси бўлди, тахтини келгиндига бермади», деб тасалли топмоқчи бўлса, бошқалар:

— Пок мазҳабимиэга рофизийлик аралашди,— деб шивирларди.— Ҳаром бўлдик! Чорёрларнинг қарғишига қолдик! Яна қимматчилик бўлгай! Яна очарчилик бошлангай!

* * *

Бобир қизилбошларнинг шартларини адо этиб, уларни тезроқ жўнатиб қўйиш учун Шоҳ Исмоил инъом қилган ўша машҳур дасторни таҳтга чиққанда бошига кийиб кўриниш берди. Сўнг Шоҳ Исмоилнинг тамғаси билан бир неча минг танга пул зарб қилдириб, бу пулларни қизилбошларнинг ўзларига тарқатди.

Шу муносабат билан шаҳару қишлоқларда ҳар хил мишишлар аввалгидан ҳам кўпайиб кетди. Гўё афсо-навий китобларда битилган Яъжуж-Маъжужлар мана шу қизилбошлар эмиш. Бобир қизилбошларнинг салласини Кўктошга кийиб чиққанда муқаддас тошнинг бир чети ёрилиб кетган эмиш. Энди Шоҳ Исмоил Самарқандга келиб мана шу Кўктошга чиқармиш. Ўшанда қиёмат-қойим бошланармиш.

Шайбонийзодалар Самарқандда қолдириб кетган мулла ва дарвеш кийимидағи хуфялар маҳалла-кўйларда, бозорларда ваҳимали овозалар тарқатиб, шиа-сунниний низоларини мумкин қадар аланглантиришга тиришар эдилар. Бозорда нарх-наво ошиб кетаётганини ҳам шиаларнинг касофатидан кўраётган оми кишилар қизилбошларга нафрат билан қарар эдилар.

Битимдаги шартлар бажарилгандан кейин қизилбошлар ѹртларига қайтиб кетишга ҳозирлана бошладилар. Уларнинг беш-олтитаси Самарқанднинг Чорсусидаги атлас дўконига совға сотиб олиш учун келди.

Бозор куни, Чорсуда одам жуда кўп. Қизилбош навкарлар етти хил ранг билан товланаётган Самарқанд атласига харидор бўлиб қолишли. Мулла ёқа кўйлак

кийган семиз бazzозгá қараб, тўрт кийимлик атлас сиши буюришди.

Бazzоз ёғоч газни қўлига олди-ю, қизилбош навкарларга истеҳзоли кўз ташлаб:

— Аввал пулингни кўрсат,— деди.— Ақчанг қандоқа? Танганг?

Катта чўгирма кийган бир йигит чарм ҳамёнидан учтўртта кумуш танга олиб, бazzозга берди.

Бazzоз тангаларнинг олд томонига Шоҳ Исмоилнинг тамғаси, орқа томонига шиа имомларининг номи зарб берилганини кўрди-ю; қўрқиб кетди. У сунний муллаларнинг «шиа пули ҳаром, уни олган одам чорёлларнинг қарфишига учрайди» деган гапларини эшитган эди. Шунинг учун қўлига тангани эмас, заҳарли чаёнларни олгандай жирканиб ва шошиб, пулинни эгасига қайтарди.

Белига қилич ва ханжар таққан девқомат қизилбош навкар аввал кафтидаги янги кумуш тангаларга, сўнг бazzозга таажжуб билан тикилди.

— Не ўлди?! Бу оқчада не иллат ва-ар?

— Бизда бу тангалар ўтмайди. Ҳеч ким олмайди.

— Нечун олмассан? Нечун?— куйиб-пишиб сўради қизилбош навкар.

— Ўтмайди.

— Нечун ўтмас?!

Бу саволга четроқда турган безоринамо бир йигит жавоб берди:

— Келгинидиларнинг пули ҳаром!

— Ҳаром?!— деб қизилбош навкар ҳалиги йигитга қараб интилди. Аммо у йигит ўзини бозор тўла халойикнинг орасига урди. Шунда дўконлар орасидан кимdir қизилбош навкарга тош отди:

— Рофизийлар, кет юрtingга!— деган товуш эшитилди.

Қўзларидан олов чақнаётган иккинчи қизилбош баззоздан таҳдид билан чўзиб сўради:

— Бизим ақчани олмас-са-ан?!

Бazzоз энди унинг ғазабидан қўрқиб мулоимроқ гапирди:

— Олсан куйгаймен, меҳмон. Биз эски ақчада савдо қилиб ўтганимиз.

— Эски ақча? Шайбонийхоннинг ақчаси керакми?

Ҳозир Самарқанд бозорида чиндан ҳам Шайбонийхон чиқарган тангалар яхши ўтарди. Бу тангаларга сунний

лар сифинадиган чорёрларнинг номи битилган эди. Сави-
догарлар учун бундан ҳам муҳими—Шайбонийхон танга-
ларининг вазни оғирроқ, демак қиймати баландроқ эди.

Шайбонийхон ўлимидан учтўрт йил бурун Ҳиротдан
то Тошкент ва Туркистонгача бўлган вилоятларда пул
ислоҳоти ўтказган, рақибларидан молия соҳасида ҳам
устун келиш учун ўз тангаларининг оғирлигини тему-
рийлар чиқарган тангаларнинг вазнига — нисбатан бир
данг¹ оширган эди. Шунинг учун ҳозиргача бутун Ҳуро-
сон ва Мовароунича бозорларида Шайбонийхон тан-
галарининг харидори кўпроқ эди. Лекин бazzоз ғазаби
келиб турган қизилбош навкарига буни очиқ айтмади:

— Шайбонийхон йўқ, ўлган,— деди.

Шу пайт кимдир узоқдан!

— Самарқандни бўшат, келгинди! — деди-ю, дўкон
олдида турган қизилбошга кесак отди. Кесак унинг
теплагига тегиб ушалди-да, чанги юзига тушди. Халойиқ
орасидан аллакимларнинг кулгани эшитилди. Қизилбош
навкар эгри қиличини қинидан суғуриб, кесак отган
одамни кўзларӣ билан қидирди, аммо тополмади. Сўнг
яна семиз бazzозга юзланди. Сўзининг охирги бўғинини
чўзиб сўради:

— Шоҳ Исмоилин ақчасин алмас-сан?

Бazzоз унинг қиличидан қўрқиб, титраб гапирди:

— Мен олсам балога қоламен.

Қизилбош яна бир марта:

— Алмасса-ан?! — деб чўзиб сўради-ю, кейин четдан
отилган тош ва кесакларнинг аламини ҳам бazzоздан
олиб, унинг елкасига бор кучи билан қилич урди. Уткир
қилич бazzознинг гўштдор елкасини бўйининг олди-
дан киндигигача кесиб тушди. Шунда иккинчи қизилбош
ҳам қиличини яланғочлади-ю, чўқкалаб қолган бazzоз-
нинг бошини бир зарб билан танасидан жудо қилди. Се-
миз бazzознинг бошсиз бўйнидан шариллаб отилган қон
дўкон ичидаги атласлар ва ипак матоларга сақради.

Буни кўрган одамлар қий-чув кўтариб, ваҳима ичидаги
қоча бошладилар.

6

Шиа-сунний низолари бундай қонли тўқнашувларни
тобора кўп келтириб чиқараётгани қизилбош бекларни

¹ Бирда ниг—«олтидан бир» демакдир. Темурийлар тангасининг
вазни 4,6 грамм бўлса, Шайбонийхоннинг тангаси 5,2 грамм бўлган.

ҳам ташвишга солиб қўйди. Бобир ўзининг Шоҳ Исмоил билан тузган иттифоқига содик эканини уларга қайта-қайта уқтириб, нуғузли бекларга қимматбаҳо саруполар, отлар, олтин-кумуш пуллар инъом бериб, ниҳоят, қиши чилласи чиққандан ўттиз минг қўшинни Мовароуннахрдан Эронга жўнатиб юборди,

Шундан сўнг Самарқанд анча тинчид қолди. Тошкент, Хўжанд, Уратепа ҳам шайбонийлар. ҳукмидан чиқиб, Бобир томонига ўтганлиги ҳақида хушхабарлар келди. Қизилбошларни уч ой давомида боқиши ва қимматбаҳо совғалар билан кузатиш пайтида анча бўшаб қолган ҳазина ўша шаҳарлардан келган пешкашлар билан яна анча тўлишди.

Самарқанд боғлари оқ пушти бодом гуллари билан безана бошлаган илк баҳор кунларида Бобир бир тўп яқинлари билан отланиб, Улуғбек расадхонаси томонга сайдрга чиқди.

Ўнтача қўрчи навкарларни тўриқ қашқа от мингдан Тоҳир бошқариб бормоқда эди. Оқ отлиқ Бобирнинг икки ёнида Қосимбек билан марғилонлик Хўжа Қалонбек. Улардан орқароқда ўтган ҳафта Ҳиротдан келган Мавлоно Фазлиддин ювош қора отга миниб ўйчан келмоқда. Ички беклар орасида мунши ҳам, мактаб-мадраса ишлари билан шуғулланувчи бир мударрис ҳам бор. Отлиқлар Обираҳмат ариғига етмай Бофи Майдон томонга бурилдилар. Улуғбек замонида жуда обод ва машҳур бўлган, бундан ўн беш йил олдин ҳам файзлик турган Бофи Майдон шайбонийлар даврида қаровсиз қолиб, ички ариқлари бекиilib кетган, сувсизликдан кўпгина дараҳтлар қуриб қолган эди. Икки қаватлик нақшин кўшк — Чиннихонанинг шифтидан томчилар ўтиб, ажойиб расмларнинг анчаси ўнгид кетган эди.

Бобир бунинг ҳаммасини кўриб чиққач, мавлоно Фазлиддинга юзланди:

— Мавлоно, биз сизни Ҳиротдан чорлаб келтирганда янги қасрлар, чорбоғлар қурдириш умидида эдик. Аммо оламга машҳур қадимий обидаларимизнинг бу аҳволини кўриб ўзингиз ҳам таассуф этсангиз керак!

— Ҳазратим, Улуғбек мирзонинг оламда ягона расадхонаси ҳам мана шу Чиннихона каби ташландиқ аҳволдадир,— деди Мавлоно Фазлиддин.— Кеча кўриб кўнглим вайрон бўлди. Олтмиш йилдан бери қаровсиз. Нодир асбоб-олотлари таланганд. Деворларидан кошин

лари, мармар тошлари қўчириб кетилган. Шу аҳволда ташлаб қўйилса уч ошиёнлик мұхташам расадхона кўп вақт ўтмай харобага айланур.

— Демак, шошилинч чоралар кўрмоғимиз даркор, жаноб Қосимбек. Бизнинг хос меъморимиз Мавлоно Фазлиддин қандай маблагу кўмак талаб қиласалар берайлик, Улугбек мирзодан ёдгор қолган Чиннихона-ю, расадхоналар дарҳол таъмир этилиб, аслидек тиклансин.

Қосимбек енгил бир таъзим билан:

— Ҳазратим, амрингизни жоним билан адо этгаймен!—деди.—Чиннихонани таъмирлаш унча мушкул эмас. Бонгинг кўмилиб кетган ариқларини ҳам очгаймиз, гуллар ўстирурмиз.

— Наврўз байрамигача улгургаймисиз? — сўради Бобир.—Бу йилги наврўз базмини мана шу Чиннихона-да ўtkазайликми, а жаноб Қалонбек?

Ичкилик базмларини яхши кўрадиган Хўжа Қалонбек мамнун жилмайди:

— Доно фикр айтдингиз, ҳазратим!—деди.—Самарқандда боғбонлару наққошлар етарлик. Ҳамма ҳунарпешаларга Мавлоно Фазлиддин саркор бўлурлар. Наврўзгача бу боғ обод қилинмоғи керак.

Мавлоно Фазлиддин қўлини кўксига қўйиб, Бобирга юзланди:

— Чиннихонани тиклаш мумкин, ҳазратим, аммо расадхонани не қилурмиз?

— Уни ҳам тикламоқ зарур, жаноб Қосимбек,—деди Бобир.

Қосимбек расадхонани тиклашдан қўрқарди. Чунки шайхлар сўнгги ўн йилликлар давомида расадхонани динсизлар макони деб лаънатлаб, авом ҳалқни шунга ишонтириб қўйган эди. Агар Бобир расадхонани қайта тиклаб, яна ишга солиб юборса, Улугбекнинг бошини еган қора кучлар унинг жонига ҳам қасд қилиши мумкин эди. Қосимбек шуни ўйлаб:

— Ҳазратим, ётган илоннинг думини босмайлик,—деди.—Расадхонани таъмирлаганимиз билан унда иш олиб борадиган етук олимларни қайдан топгаймиз? Олтмиш йилдан бери кекса авлод олимлар ўлиб, ёшлари бошқа юрталарга кетиб қолмишdir.

— Кетганларни чорлаб келтириш мумкин, жаноб Қосимбек.—деди Бобир ва муншига юзланди:—Бизнинг номимиздан қадағалар битинг.

Мунши дарҳол қўйнидан дафтар-қалам олиб, тикка турган кўйича ёза бошлади.

— Улуғбек яратган фалакиёт илмидан хабардор олимлар Ҳиротдами, Румдами, Табриздами, қаердаки бўлсалар, бизнинг номимиздан уларни Самарқандга тақлиф этинг. Расадхонани қайта очмоқчи эканлигимизни, кимда-ким Мирзо Улуғбекнинг буюк ишини давом эттироқчи бўлса, барча имкониятларни яратиб беражагимизни маълум қилинг. Агар келсалар йўл харажатларини биз зиммамизга олурмиз. Бу қадағаларни элчиларимиз орқали Ҳиротга ҳам, Румга ҳам тезда жўнатмоқ сизга топширилди, жаноб мунши!

Мунши Бобир айтганларни дафтарига ёзиб бўлиб:

— Амрингизни бажаришга дарҳол киришурмен!— дея таъзим қилди-да, Чиннихонадан пастга тушиб кетди.

* * *

Мавлоно Фазлиддин саркор бўлиб, Боғи Майдоннинг кўмилган ариқларини қайта кавлатишда, қуриган дарахтларни олиб ташлаб, ўрнига майса ва гуллар ўстиришда, Чиннихонани таъмирлаб ораста қилишда унча қийналмади — инсоф билан ҳақ тўланса ишлаб чарчамайдиган ҳунарпешалар, боғбон ва деҳқонлар жуда кўп эди. Лекин усталарни расадхонага олиб бориб ишлатиш ва уч қаватли улуғвор доира шакл бинонинг нураган, бузилган жойларини таъмир этиш бениҳоя мушкул бўлди. Тепадан ер қаърига тушиб кетган ярим доира шаклидаги зинапояларга яқин борган усталар худди ҳозир жаҳаннам қаърига қулаб тушадигандек қўрқа бошларди. Диндорлар расадхонани «Дўзахийлар макони, ким унга кирса жин чалиб, арвоҳ уриб кетади!» деб, аҳолининг катта бир қисмини бунга ишонтириб қўйган эдилар. Улуғбекнинг вафотидан сўнгги олтмиш йил ичida Самарқандда жуда кўп мактаб ва мадрасалар бекилган, саводсиз жоҳил кишилар кўпайиб кетган, уларга нақшбандий шайхларининг таъсирлари бениҳоя кучайган эди.

Шундай бўлса ҳам Мавлоно Фазлиддин ишсиз юрган уста ва коргарлар¹га яхши ҳақ тўлаб, дастлабки кунлари элликтacha одамни расадхонадаги таъмир ишларига

¹ Коргар — қурувчи ишчи.

олиб чиқди. Иккинчи-учинчи қаватнинг шифт ва деворларида нураган жойларини тузатиш учун ҳавозалар қурилди. Лекин ўша кундан бошлаб расадхона атрофларида нақшбандий қаландарлар тўдаси ҳам кўпайиб кетди. Улар давра тортиб, зикр тушиб, «Ҳақ дўст ё олло!»ни муттасил такрорлаб, диндан қайтганлар худонинг ғазабига учрашини, чорёларнинг руҳига шак келтирганларни арвоҳ уришини шеърга солиб, «каромат» қила бошладилар. Бу қаландарлар орасида шайбонийзодаларнинг жосуслари ҳам бор эди. Ана шу жосуслардан бири коргар бўлиб ёлланиб, расадхонанинг ичидаги шифт ташиб ишламоқда эди. Бу жосус уч-тўрт кун таъмирчилар ичидаги юриб, уларнинг энг дадили ва Бобир миззога ихлосмайди қирқ бешлардаги бир кошинкор уста эканини аниқлади. Нақшбандий жосус мана шу устани учинчи қаватда ҳавоза устида ишлаётган пайтида киши билмас қилиб ҳавозадан пастга итариб юборди. Учинчи қаватдан тош уюми устига боши билан қулаб тушган уста ўша заҳоти жон берди.

Кўчаларда зикр тушиб юрган қаландарлар «Устанни арвоҳ урди!», «Худо ғазабини кўрсатди!» — деб вайсай бошладилар. Бу фалокатдан сўнг қолган уста ва коргарлар расадхонага келмай қўйишиди. Мавлоно Фазлиддин ишга зор бўлиб ярим оч юрган бошқа уста ва коргарларни ёлламоқчи бўлса, нуқул: «Расадхонада ишлаб топилган пул ҳаром эмиш! Борган одамни арвоҳ уриб ўлдирмиш!» деган ваҳимали гаплар эшитар, оми одамлар ундан балодан қочгандай қочар эди...

* * *

Бўйтонсаройнинг тиллакори қабулхонасида Амударё бўйидаги Урганч ва Қоракўл шаҳарларидан хушхабарлар билан келган бек ва аъёнлар шарафига зиёфат берилимоқда эди. Шайбонийзодалардан кўп жабр кўрган бу шаҳарлар ҳам Бобирни ўзларига олий ҳукмдор деб тан олишган ва қимматбаҳо совфалар берниб юборишган эди. Ўз вақтида Шайбонийхон Қоракўл ва Урганчни забт этиш учун ойлар давомида жанг қилган, беҳад кўп қон тўкиб уларни олган эди. Мана энди бу шаҳарлар жангу жадалсиз элчи юбориб, Бобир томонига ўтганлиги унда зўр бир ифтихор туйғуси уйғотди. Бобир ёшликтан кўнглига туккан орзусига — бутун Мовароуннаҳри бирлаш-

тириш, Улуғбек давридаги улкан давлатни қайта тиклашга — мана энди мұяссар бўлаётганидан бениҳся шод. Қундузда биринчи марта бошланган ичкилик базмлари Самарқандда давом этиб, авжига чиқмоқда. Эришилаётган ғалабалар шарафига бек ва аъёнлар навбатма-навбат зиёфат беришиб, Бобирни деярли ҳар куни таклиф қилишади, унга энг нодир, энг ажойиб майларни ичириб, хурсанд қилишда бир-бирларидан ўзишга интилишади.

Фақат Қосимбек ҳамон ичкиликни оғзига олмас, пайтини топса Бобирни ҳам ҳушёрликка ундар, мамлакат ичидә қора күчлар бош кўтараётганини, шимолдаги даштда эса шайбонийзодалар ҳаёт-мамот жангига тайёрланаётганини такрор-такрор эслатар эди.

Лекин Бобир унга жавобан сўнгги пайтда ёзган бир ғазалидан тўрт сатр ўқиб берди:

Ез фасли, ёр васли, дўстларнинг суҳбати,
Шеър баҳси, ишқ дарди, боданинг кайфияти.
Ез фаслида чоғир ичмакнинг ўзгача ҳоли бор,
Кимга бу нашъа мұяссар бўлса бордир давлати.

Бу ғазалга куй басталаниб, қабул маросимларида ҳам айтиладиган бўлган эди. Ширақайф Бобир:

— Жаноб Қосимбек! — деди. — Эщитдингизми, Самарқанд мактабларида болалар мен ихтиро қилган хат билан жуда тез саводхон бўлмоқда эмишлар. Мана, мударрис жанобларидан сўранг...

Бошида салла-ю, қўлида май тўла қадаҳ билан таъзим қилиб турган мударрис:

— Жаноб Қосимбек, — деди, — халқимизни жаҳолат панжасидан қутқариб олишда ҳазратим ихтиро қилган Хатти Бобурий ажойиб бир восита бўлиши аниқ! — деди. — Қуръон хати гарчи биз учун азиз, аммо зеру забарлари, шикаста усувлари савод чиқаришга беҳад мушкул. Хатти Бобурий эса зеру забарсиз, ўрганишга осон.

Қосимбек Бобирнинг бундан уч йил олдин Кобулда ихтиро қилган хатти Сирдарё бўйидаги Сигноқдан топилган қадимий туркий ёзувга¹ асосланганини билар эди. Араб ёзувини «Қуръон хати муқаддас» деб ҳисоб-

¹ Бу ёзув аслида Үрхун-Енисей руник ёзувининг Бобир даврида Сигноққа етиб келган бир тури бўлиши керак.

Майдиган руҳонийлар ислом динидан олдин тарқалган қадимий ёзувларни қаттиқ қоралаб, топилган жойида ўчириб ташлашни буюрар эдилар. Бобир эса буни жаҳолат ҳисоблар, қадим замонда ихтиро қилингандай туркӣ ёзувнинг динга алоқаси йўқлигини айтар, Хатти Бобурийни шунинг учун халқ орасида тарқатмоқчи бўлар эди.

Ичкилик базми пайтида бу мураккаб мавзуларда гапиришни ёқтирумайдиган Қосимбек орадан икки кун ўтгач, девони хосда ўтирган Бобирнинг ҳузурига Мавлоно Фазлиддин билан Хатти Бобурийни тарқатиб юрган мударрисини бошлаб кирди.

Уларнинг учови ҳам алланарсадан жуда безовта эканини сезган Бобир:

— Тинчликми, жаноблар? — деди.

— Ҳазратим, — деди мударрис. — Хатти Бобурийни тарғиб қилиб мактаб очган бир мактабдорни авбошлар тошбўрон қилиб ўлдирмишлар.

— Ўлдирмишлар?! — деб Бобир ўрнидан туриб кетди. — Бу не жаҳолат, жаноб Қосимбек? Бизга қарши фулуми!

— Ҳазратим, нақшбандий шайхлар билан қаландарлар ҳамма жойда бизга қарши иш олиб бормоқдалар. Расадхонада бир уста ҳавозадан йиқилиб ўлгандан бери таъмир ишларига одам ёллаш мумкин бўлмай қолди. Масжидда ваъз айтган муллалар Хатти Бобурийни «Шоҳ Исмоил юборган шиалар хатти» деб эълон қилган эмишлар. Шу овоза бутун шаҳарга тарқалиб, охири ҳалиги мактабдорнинг тошбўрон бўлишига олиб келмишdir.

— Бу ёлғон овозани тарқатганларни нега ҳибсга олмадингиз? — қаҳр билан сўради Бобир. — Ахир бу хатнинг Шоҳ Исмоилга мутлақо алоқаси йўқ-ку.

— Хўжа Халифа шуни масжиди жомеда минбарга чиқиб айтмоқчи бўлган экан, «Ёлғон! Кофирилар хатти ҳаром! Қуръон урсин сен Халифани!» — дейишиб, жоҳиллар уни минбардан тортиб туширмишлар. Агар Тоҳирбек бошлиқ соқчиларимиз Хўжа Халифани қутқариб қолмасалар, жоҳиллар уни ҳам ўлдиришлари мумкин экан. Авбошлардан йигирма-ўттизтасини ҳибсга олдик. Аммо Хўжа Халифага қарши ваъз айтган муллалар Хўжа Аҳори валийнинг авлодларидан экан. Уларни сиздан бемаслаҳат ҳибсга олишга журъят этмадим.

Бобир аҳволнинг нақадар жиддийлашиб кетганини энди сезди. Хўжа Аҳрор авлодини ҳибсга олиш — ёнай деб турган оловни пуфлаб алаңгалатиш билан баробар ёди.

— Қўшиннинг кайфияти ҳам яхши эмас, ҳазратим,— деб давом этди Қосимбек.— Ҳозир ичак узилди пайт, нарх-наво кўтарилиган. Шайбонийзодалар чиқарган олтин-кумуш тангаларнинг вазни биз чиқарган тангалар вазнидан ортиқ бўлғанлиги учун уларнинг бозори чаққон. Беку навкарлар улуфани оширишни талаб қилмоқдалар. Уларга улуфа оширилса хазинада пулимиз етмас.

— Ундоқ бўлса таклифингиз недур?

— Таклифим шуки, ҳазратим, бекларни дарҳол машваратга тўплаб, фавқулодда чоралар кўрмоқ лозим.

— Биламен, беклар даштда изғиб юрган шайбонийзодаларга қарши урушмоқ қасдидалар. Янги вилоятлар олинса, беку навкарлар ўлжадор бўлурлар. Беш ойдан бери Самарқандда жангиз туриб қиличлари қонсираган.

— Уларнинг касблари уруш бўлгандан сўнг бекор тургилари келмайди-да. Ҳозир шайбонийзодалар шимолдан Бухорога яқинлашиб келмоқда эмишлар.

— Аниқ аҳборот борми?

— Кўрган одам келиб айтди. Саркардалари Убайдулла Султон эмиш. Ўн минг қўшини бор эмиш. Буни Самарқанддаги шайху қаландарлар ҳам эшиитган бўлсалар керак. Шайбонийзодалар ташқарида жонланган сари ичкарида булар бизни «Шиага сотилган рофизийлар!»— деб халқقا ёмонлаб, қора кучларни қўзғатмоқдалар.

Бобир Мавлоно Фазлиддин билан мударрисга афсусли бир назар ташлади-да:

— Жаноблар, маърифат муаммоларини бу аҳволда ҳал этолмайдиган кўринамиз,— деди.— Хатти Бобурийни мактабда ўқитиш ҳозирча тўхтатилсан. Расадхонани ҳам кейинроқ тиклагаймиз... Биз энди бутун эътиборни ҳарбий ишларга беришга мажбурмиз.

Мударрис билан Мавлоно Фазлиддин маъюс қиёфада орқалари билан юриб чиқиб кетдилар. Қосимбек билан Бобир Убайдулла Султонга қарши Бухоро томонга қўшин тортиб боришнинг маслаҳатини қила бошлади-пар...

* * *

Бухорога ҳужум қилган Убайдулла Султоннинг ўп минг кишилик қўшини Бобирнинг Самарқанддан ўттиз минг қўшин билан келаётганидан хабар топиб Қизилқум саҳросига қараб чекинди. Бобир қўшини Бухоро атрофида тўхтаб, душманнинг яна қайтиб келишини кутиши мумкин эди. Лекин душман аскарлари сон жиҳатидан уч баробар кам бўлгани учун Бобир уни дадил таъқиб этишга қарор берди-ю, қўшинини қўмтепалар орасига бошлаб кирди. Убайдулла Султонга шу керак эди. Бобир қўшинининг энг садоқатли қисми тоғлиқ жойда яхши жанг қилиб ўрганган, отлари чўлда, қўмтепалар орасида дуруст чополмайдиган жангчилар эди. Бундан ташқари шия-сунний зиддиятлари Бобирга Қундузда қўшилган йигирма минг кишилик мўғул қўшинининг руҳига ёмон таъсир қилган эди. Уларнинг орасига кириб борган суннийпараст нақшбандий муллалар «Бобиршоҳ шиалар билан иттифоқ тузиб, пок мазҳабини булғади, энди пайғамбаримиз уни эмас, суннийни пок тутган шайбонизодаларни қўллаб-қувватлагай» деган эътиқодга кўпларни ишонтирган эдилар.

Барханлар ичидаги замбарак ортилган аравалар қумга ботиб, отлар яхши чополмай, Бобир қўшинининг сафи чувалиб кетди. Пайтдан фойдаланган беш мингга яқин қундузлик мўғуллар Убайдулла Султон томонига қочиб ўтиб кетди.

Қизилқумда кўп юриб, унинг пасти баландини биладиган, Қўли Малик¹ деган жойда отлиқ жанг учун энг қулай ўринларни эгаллаб ётган Убайдулла Султоннинг қўшини яна тўлғама усулинни ишлатиб, Бобир қўшинининг икки қанотини букди-ю, орқасига ўтиб олди. Тўрт томондан бериладиган зарбалар устига беш минг хоиннинг бирдан ёв томонига ўтиб кетиши жанг тақдирини бир неча соатдаёқ ҳал қилиб қўйди.

Бобир Қизилқумда мағлубиятга учраб, қолган-қутган аскарлари билан Самарқандга, ундан Ҳисорга чекиниб борганда қаршисидан Шоҳ Исмоил юборган Нажми Соний олтмиш минг қизилбош аскари билан таҳдидли суратда чиқиб келди.

¹ Қўли Малик — ҳозир қуриб қолган. Бухоро обlastining Xайробод деган жойида.

Оғизда Нажми соний Бобирга ёрдамга келган эди. Бироқ аслида у Бобирга жазо бермоқчи эди. У қизилбаш қўшинларининг Самарқанддан тез қайтариб юборилганидан норози эди. Бобир Мовароуннаҳрда мустақил давлат тузатганини, унинг шиаларга ён босиши — муваққат чоралигини хуфялар Шоҳ Исмоилга аллақачон етказган эдилар. Шоҳ Исмоил Мовароуннаҳрга оид ҳамма ишларни Нажми сонийга ишониб топширган эди. Нажми соний шайбонийзодаларни бартараф қилгандан кейин Бобирни ҳам ҳокимиятдан четлатиши ва Самарқанд тахтига бошқа ишончли одамни ўтқазиб, Мовароуннаҳрда қизилбошлар ҳокимиятини узил-кесил барқарор қилиши керак эди.

Бу режа қаттиқ сир тутилар, Бобир билан иттифоқ ҳозирча давом этар, аммо қалондимоғ Нажми соний Бобирни ҳам, унинг ўн мингтагина қолган аскарларини ҳам назар-писанд қилмаслиги ошкора сезилар эди.

Бобирни икки томондан чирмаб келган икки даҳшатли қилич Фиждувонда бир-бирига зарб билан урилдй. Нажми сонийга қўшилиб жанг қилган Бобир шайбонийзодаларнинг қўли баланд келаётганини сезди-ю, қонли қиличлар орасидан чиқиб, яна Ҳисор томонга чекинди.

Босқинчи қўшин саркардаси Нажми соний Фиждувон жангида ўлдирилди. Қизилбошлар тор-мор бўлди, олтмиш минг қўшиннинг бир қисми ўлди, бир қисми асир олинди, омон қолиб қочганларини эса ғолиблар Амударёгача қувиб бордилар ва дарёга чўқтириб юбордилар.

7

Бундан бир ярим йил аввал Хонзода бегим ёлғиз ўғилчаси билан Балхдан Қундузга келаётганда унинг юрагини титратган номаълум хавф-хатарлар гўё мана шу оғир чекиниш пайтини кутиб ётган экан.

Тун ярмидан ошган эди. Бойсун орқали Ҳисорнинг Қоратоғига чекиниб келган Бобир етти минг аскар ва уғруғи¹ билан сайҳон бир ўтлоқда тунамоқда эди. Хонзода бегим ўғли ва канизи билан ухлаб ётган ўтов Бобирнинг чодирига ёнма-ён эди.

¹ Уғруғ — оила аъзолари, кўчлари.

Саҳарга яқин бирдан тўполон кутарилди. Хонзода бегим отларнинг тасир-тусур қилиб чопиши ва итларнинг асабий ҳуришидан чўчиб уйғонди. Фазабли товушлар:

— Ур! Ур!

— Рофизийларни аямай қир! — деб қичқирап эди.

Хонзода бегим сапчиб турди. Ўтов тўрида хира қора-чироқ липиллаб ёнмоқда эди. Бегим қаттиқ ухлаб ётган ўғли Хуррамшоҳни қучоқлаб оёққа турғизди.

— Ефий босди! Ефий! — деб, ўғлига этигини кийдириб, тўнининг енгига қўлларини тиқаётганда ўтовнинг кигизига алланарса «тарс» этиб урилди. Ёй ўқининг чархланган учи кигизни кесиб ўтди, лекин қаноти кигиз жунига ўралиб туриб қолди. Кўрқиб кетган Хонзода бегим ўғлини бағрига босди.

Бу йил ўн бирга қадам қўйган Хуррамшоҳнинг бўйи онасининг елкасидан ошиб қолган эди. У учи пастга осилиб қолган ёй ўқига қизиқиб қараб турарди.

Ташқаридан Бобирнинг саросимали товуши эшитилди.

— Тўфангандозлар қани? Хўжа Қалонбек! Тўфанг отилсин! Қосимбек! Тоҳирбек! Ҳарамга қаранг! Болалар тезроқ олиб чиқилсин!.. Тўфанг!

Ўша замоннинг чақмоқли милтифи бўлган тўфанг яқин бир жойда гумбурлаб отилди. Бобир қизилбошлар билан иттироқ бўлиб орттирган бир нарсаси — ўша даврнинг энг замонавий қуроли бўлган мана шу тўфанглар эди. Ҳали жуда кам тарқалган тўфанглар фақат Бобирнинг хос навкарларида бор эди.

Бир нечта тўфангнинг устма-уст отилгани эшитилди. Хонзода бегим энди сал дадилланиб, ўғлининг тўни устидан бежирим ханжарчаси осилган камарини ҳам боғлатди.

Хуррамшоҳ ўтовнинг бир четига ўнтача ёй ўқи солинган кичкина соқдогини осиб қўйган эди. Онасининг қўлидан чиқиб шу соқдогини елкасига осди-да, камонини қўлига олди.

Онасини ваҳимага солган жанг болада қўрқув аралаш бир мароқ уйғотган эди. У кичиклигидан жанговор руҳ билан ўсган, тезроқ катта бўлиб, урушда ботирликлар кўрсатгиси келар эди. Самарқандда турган пайтларида Хуррамшоҳ Бобир тоғасининг Бухоро томонда қилган жангларига қатиашмоқчи бўлиб, онасиининг ол-

дидан қочиб ҳам кетган эди. Лекин Бобир уни бек атка-
сига қўшиб, йўлдан қайтариб юборган эди. Хонзода бе-
гимнинг Бобирга қўйган меҳри ўғлига ҳам юқсан эди.
Болага дарс берадиган ва ҳарбий машқ ўргатадиган
кишилар ҳаммаси Бобирнинг ихлосмандлари эдилар.
Хуррамшоҳ онасидан ва мураббийларидан Бобир ҳақи-
да жуда кўп яхши гаплар эшитар, ўзи ҳам тоғасини ҳар
кўрганда унга болаларча жўшқин бир меҳр ва ишонч
 билан қарап эди. У тоғасини оғир аҳволларга солаётган
 шайбонийзодаларни — гарчи ўзининг Шайбонийхонга
 ўғил бўлишини билса ҳам — кун сайин ёмон кўриб бо-
 рап эди. Унинг тасаввурида, ҳозир Бобир қароргоҳига
 ҳужум қилиб келган «Ур, қир!» деб қичқираётганлар
 ҳам ўша кўчманчи сultonлар эди. Хуррамшоҳ соқдоғида
 бор ўқларини тоғасининг мана шу душманларига қараб
 отгиси келди-ю, ўтов эшигини очиб чиқа бошлади.

— Ҳой, шаҳзода, тўхтанг!

Хонзода бегимнинг кекса қанизи югуриб бориб бола-
ни камаридан тутди-да, ичкарига тортди. Бола қарши-
лик қилиб кирмади. Уни узоқда бўлган жангларга юбор-
маган эдилар. Энди жанг ўзи Хуррамшоҳ ётган жойга
 етиб келганда яна қўйишмайдими?

— Қўйворинг мени! Ҳазрат тоғойимга кўмак бера-
мен! Қўйворинг!

Бу борада Бобирнинг хос навкарлари тўғанг ота-ота,
 ёв отлиқларини аёллар ва болалар ётган ўтовлардан
 узоққа сурис ташлаган эдилар. Тоҳир Хонзода бегим-
 нинг ўтови олдига иккита от етаклаб келди:

— Ҳазрат бегим! Шаҳзода! Тезроқ чиқинглар!

Хонзода бегим сандиқ ва бўғчаларига қаради.

— Кўч-кўронлар қолурми?

— Э, жон омон бўлса буюм топилар! Чиқинг тезроқ!
 Ҳазратим буюрдилар!

Хонзода бегим қанизи билан чиққунча Хуррамшоҳ
 отларнинг кичикроқ кўринган биттасига миниб олди.

Осмонда шом еган саккиз кунлик ой бор эди. Шунинг
 ёруғида оқ ўтвдан беш яшар Ҳумоюнни бағрига босиб
 чиқсан Моҳим бегим кўринди. От устида турган Қосим-
 бек тез энгашиб болани онасининг кўлидан авайлаб ол-
 ди-да, елкаларини чакмани билан ўради.

Бегимнинг ёнида ўн яшар ўғилчаси Сафарни қўли-
 дан етаклаб келаётган Робия ҳам бор эди. Тоҳир ўғли
 билан хотинини тез бир бияга мингаштириди.

Қосимбек бошлиқ әллик-олтмишта хос навкарлар аёллар ва болалар минган отларни ўртага олиб, жануб томонга йўналдилар.

Уч томонни ёв ҳалқаси ўраб олган, фақат жануб томон очикроқ эди. Тўфанг гумбурлаши, ярадор бўлганинг додлаши, отларнинг пишқириши ва кишинаши орасидан кимларнингдир асабий бақириқлари эши-тиларди:

— Ҳаммамиз шу подшонинг касофатига қолдик!

— Шиаларга сотилиб бизни хароб қилди!

— Иўқолсин Бобир!

— Уруғини қурит! Қир ҳаммасини!

Хонзода бегим ҳеч нарсага тушунолмай ёнида бора-ётган Қосимбекдан сўради:

— Бу қанақа ёғий?

— Үзимиздан ўт чиқди, бегим! Бурноғи йил Қундузда шайбонийзодалардан бизга қочиб ўтган мўғул беклари исён кўтарди! Қузғунлар ҳазратимни уйқуда тутиб ўлдирмоқчи эканлар. Хайрият, Тоҳирбекнинг қўрчилари пайқаб қолибди!

— Фалокат устига фалокат!

— Ҳа, булар биздан икки баробар кўп. Ҳаммаси олдиндан тайёрланиб чиқсан! Ўртада юринглар! Ўртада!

Шу пайт исёнчи отлиқлар жануб томонга ҳам чопиб ўтдилар. Ўша томондан Бобирнинг овози эшитилди:

— Устод Али! Тўфангандозларни олдинга бошланг! Олдинга!

Тўфанглардан отилган ўқлар жиба ва дубулғаларни бемалол тешиб ўтар, шунинг учун фитначилар тўфанг қаршисида туриш беролмас эди. Бобир тўфанглар ва энг ишонган хос навкарлари ёрдамида ёв ҳалқасини жануб томондан ёриб ўтмоқчи, сўнг Боботогнинг шарқида-ги Ҳисор қалъасига етиб олмоқчи эди. Бироқ фитначи беклар уни қалъага ўтказмоқчи эмас эдилар — улар бу мустаҳкам қўргонни ўzlари эгаллаш мақсадида исён кўтарган эдилар.

Уч-тўрт марта ўқ отилгандан кейин тўфангларнинг қувурлари қизиб кетиб, иш бермай қўйди. Ёв сафлари шарқ томонда сал сийраклашганини кўрган Бобир Хўжа Қалонбек бошлиқ мингтacha навкарини ўша томонга ташлади.

Хос навкарлар қуршовида бораётган Хуррамшоҳ гондоқиличларнинг бир-бирига шақ-шуқ урилғанини эши-

тиб қоларди. Бу тунги жанг унга жуда қўрқинчли туюлса ҳам, аммо у ваҳимани енгишга тиришарди. Тоғасига шундай пайтда сүиқасд қилган хоинларниг ҳеч бўлмаса биттасини соқдоқидаги ўқлари билан отиб йиқитгиси келар эди.

Ёв қуршовини ёриб ўтаётганларида болалар ва аёлларни ўраб бораётган навкарлар ҳам жангга тушишга мажбур бўлдилар. Шунда Хуррамшоҳ уларнинг ёнига кирди-ю, отининг жиловини қўйиб юбориб, камонидан устма-уст учта ўқ отди. Хонзода бегим тунги тўполонда уни бир лаҳза кўздан йўқотиб қўйди. Кейин боланинг навкарлар ёнида ўқ отаётганини кўриб, отини унга томон чоптирди. У ўғлига етиб борган ҳам эдики, қаршидан отилган бир дайди ўқ боланинг ўнг биқинига «шарт» этиб санчилди. Хуррамшоҳ инграб, камонини қўлидан тушириб юборди ва эгардан оғиб туша бошлади.

— Вой, болам! — деб Хонзода бегим қичқириб ўғлига томон интилди.

Тоҳир ҳам шу яқин жойда эди, отидан сирғалиб тушаётган Хуррамшоҳни ушлаб қолди, сўнг уни эгари устига кўтариб ўтқазди.

Бола беҳуш эди. Тоҳир билан Хонзода бегим уни Бобирнинг овози келаётган томонга олиб чопдилар. Бу томонда ёв қолмаган, Хўжа Қалонбекнинг навкарлари подшоҳ учун йўл очиб, унинг кетидан ҳарам аҳлини ҳам олиб ўта бошлаган, орқадан таъқиб этишга уринган душманларнинг эса йўлини тўсган эдилар.

Бобир Ҳисор қўргонидан воз кечиб, Вахш водийси томонга йўл олганини сезган фитначилар уни бошқа таъқиб этмай, орқага қайтдилар ва шоҳона чодирлар ичидан эгасиз қолган бойликларни талашга тушдилар.

Тонг ёришиб қолган эди. Бобир ярадор жиянини қўлига олар экан, унинг биқинидан иссиқ қон оқаётганини сезди.

— Табибни чақиринг! — қичқирди у. — Табиб!

Подшоҳнинг хос табиби болани чакман устига ётқизиб, ярасига дори қўйиб боғлади. Хуррамшоҳ ҳамон ҳушига келмас, фақат ўқтин-ўқтин инграр эди.

Унинг биқинига санчилган ўқ ўпка ва қорин оралиғидаги парданӣ йиртиб, ички аъзоларига ёмон зарар етказган эди. Табиб унга мўмиёйи асиldан сув билан ичирмоқчи бўлди. Бироқ беҳуш боланинг томоғидан сув

ҳам, дори ҳам ўтмади. Хонзода бегим буни кўрди-ю, боласини қучоқлаб, қичқира бошлади:

— Хуррамжон! Ёлғизим! Хуррамим!

Боланинг кўзлари ола-кула бўлиб бир очилди, кейин қорачиқлари тепасига қараб кетди-ю, киприклари яrim юмуқ ҳолда тўхтаб қолди.

Бобир боланинг жон берганини сезди-да, опасини қу-
чоқлаб, жасаднинг тепасидан олиб кетмоқчи бўлди. Лекин Хонзода бегим унинг қўлидан юлқиниб чиқди. Уғлини
нинг ўлганига ишонгиси келмас эди. У боласини қучоқлаб даст кўтарди-ю, дод солиб, яна уни чақира бошлади:

— Хуррам! Хуррамжон, қанисан? Қанисан, болам!
Болам қани?!

Бобир ҳўнграб йиғлар экан, болани опасининг қўли-
дан олди-да, яна чакман устига ётқизди. Қосимбек бола-
нинг яrim очиқ қолган кўзларини юммоқчи бўлиб, қош-
ларини силади, киприкларини ётқизишга уриниб кўрди.
Лекин киприклар ётмади, мурғак кўзлар яrim очиқли-
гича қолди. Хонзода бегим ўғлининг ўлганига энди ишонди-ю, ўзининг чаккаларига мушт уриб йиғлади:

— Сени бу ерларга олиб келмай онанг ўлсин, болам!
Сени асраб ололмаган онагинанг ўлсин!!

Бобир опасининг мушт бўлиб туғилган қўлларини икки қўлига олди-да, юзини юзига қаратди.

— Қарғаш керак бўлса мени қарғанг! — деди. — Сиз яна менинг касофатимга қолдингиз! Ажалда адолат бўлса бу бегуноҳ боладан аввал мен гуноҳкорни олсин эди! Буни икки қилич орасига мен олиб кирдим!
Сизларни дину мазҳаб балосига мен гирифтор қилдим!

Қосимбек Бобирнинг елкасидан қучоқлади. У бур-
ноғи йил Қундузда мўғул бекларининг Бобирга қарши фитнаси илк бор маълум бўлганда орага тушиб хато қилганини, бугунги гулу — ўшандагесиб ташланма-
ган яранинг хатоси эканини ўйлади:

— Гуноҳкорни изласангиз, ҳаммамиз ҳам айбдор-
миз, ҳазратим! Дунё ўзи шундоқ яратилган бўлса биз қандоқ қиласайлик?

Хонзода бегим яна ўғилчасининг жасадини қучоқ-
лади:

— Тўйдим бу дунёдан! Бас! Тўйдим! Мени болам
билан бирга кўминглар!..

Хуррамшоҳнинг жасадини арчадан ясалган тобутга солиб, шу куни кечгача қўлма-қўл кўтариб бордилар. Кейин уни Помир тоғининг этакларидағи кўкаlam бир тепаликка кўмдилару қабри устига оқ байроқча қадаб қўйдилар.

Тирик мурдага ўхшаб қолган Хонзода бегимни бир амаллаб Қундузга, ундан Кобулга олиб кетдилар.

КОБУЛ. Тошган дарё ўзан излайди

1

Кечки пайт Кобул қальясининг жанубидаги кўлдан бир тўп ўрдак учди. Кўл бўйидаги бўлиқ ўт-ўланлар орасида писиб ўтирган Мирзо Ҳумоюн камондан кетмакет иккита ўқ отди. Осмонга кўтарилиб бораётган тумшуғи узун ўрдаклардан бири тўпидан айрилиб пастлай бошлади, сўнг қанотларини мажолсиз ёйиб, кўлнинг нариги четига қулаб тушди.

Кўлнинг ўша томонида подшоҳнинг саккиз эшкакли, соябонли кемаси сузиб юрган эди. Ҳумоюн бу ёқдан то отланиб, аткаси ва мулозимлари билан кўл соҳилини айланиб ўтиб боргунича кемадагилар ўқ теккан ўрдакни сувдан олиб, қирғоқча чиқдилар.

Уларнинг орасида Бобир ҳам бор эди. Ҳумоюн ўзи отган ўрдакни отаси қўлига олиб қараётганини кўрди-ю, отидан сакраб тушди ва анча берида таъзим қилиб тўхтади.

Бобир ўрдакнинг тўшига қадалиб қолган ёй ўқини кескин бир ҳаракат билан суфуриб олди-ю, ўғлига кўзларини сузиб қаради:

— Бу ўқ сеникими?

Ҳумоюн отасининг кайфи борлигини сезди. Бобир сўнгги пайтларда кўп ичадиган бўлган, бугун ҳам улфат беклари билан кемада чоғир ичиб ўтирган эди. Ҳумоюн кўл ва унинг атрофлари подшоҳнинг дахлсиз, хос ерлари эканини эслади. Отаси олдида одобсизлик қилиб қўйгандай кўзлари жавдираб:

— Ҳазратим,— деди,— афв этинг, бемаврид ўқ отмишмен.

— Аммо ўқни яхши отмишсен,— деб Бобир ўғлига ғиди кулимсираб гапирди.— Ма, ҳалолинг бўлсин!

Ҳумоюн чап қўлини кўксига қўйганича, ўнг қўли

билан овини отасидан олди-ю, мулозимларидан бирига берди.

Бобирдан орқароқда турган кўзлари катта-катта озғин қора йигит — Ҳиндубек тифиз оқ тишларини очиб кулди:

— Амирзодам мерганликда ҳазрат оталарига тортмешлар.

Ширакайф Ҳўжа Қалонбек бу гапга дарҳол қўшилди:

— Падари бузрукворга муносаб ўғил!

Бобир эса бир четда жим қўл қовуштириб турган Қосимбекка мамнун назар ташлади. Ёши олтмишдан ошиб, эшик оғалик лавозимидан кетган Қосимбек ҳозир Ҳумоюнга аткалик қиммоқда эди. Бобирнинг ўзига шунча йил содик хизмат қилган бу одам энди бўй етиб келаётган Ҳумоюнни ҳам оталарча меҳр билан тарбиялаётгани билиниб турарди.

— Жаноб Қосимбек Ҳумоюнга мерганликдан яхши таълим бермишлар,— деди Бобир.— Бироқ амирзодам чавандозликда нечуклар?

Қосимбек Ҳумоюнга «жавоб беринг!» дегандай қилиб қаради. Ҳумоюн кўзлари гўё илҳом билан ёниб:

— Ҳазратим, ижозат беринг,— деди-да, отларни қўли билан кўрсатди. Бобир унинг сўнгги йилларда ўрганган чавандозлик машқларидан бирини кўрсатмоқчи эканини сезди.

— Қани, қани,— деди мароқ билан.

Ҳумоюннинг ёши ўн учга бориб, бўйи отасининг бўйига етай деб қолган. Юриш-туриши ҳам Бобирнинг ўсмирлик пайтини эслатар эди. Қосимбекнинг ишораси билан навкарлар иккита ювошроқ отни бир четга етак-лаб чиқдилар-да, ёнма-ён тутиб турдилар. Ҳумоюн ўзининг серёл қора қашқа отига сакраб минди, жиловни кескин буриб, хиёл орқага кетди. Сўнг нариги икки отга шитоб билан яқинлаши-да, жиловни қўйиб юборди. Отлар жипс келганда иккинчи отнинг эгаридан икки қўл-лаб тутганича, эгардан-эгарга сакраб ўтди. Шунда учинчи от жойидан қўзғалиб кетди. Ҳумоюн мингтан отининг жиловини тез қўлга олаётib, учинчи отнинг юганидан тутган навカリга:

— Маҳкам ушланг! — деди.

Сўнг тагидаги отни наригисига жипс келтирди-ю, иккинчи эгардан учинчисига сакраб ўтди.

Ширакайф беклар даврасидан:

— Офарин! Тасанно! — деган хитоблар эшитилди.

Хумоюн ҳансирағ отдан тушди-да, отаси томонга кела бошлади. Бобир ўзининг ўсмирик пайтида Андижон чорбоғида эгардан-эгарга сакраб ўтолмай оёғи ерга тапиллаб тушганини эслади-ю:

— Тангрим Хумоюнни ёмон кўздан асрасин,— деди.— Чавандозлиқда биздан ўтадиган кўринадир.

— Ҳазратим, Мирзо Хумоюн ҳар ишда сиздан ибрат өлишга интилурлар,— деди Қосимбек.

Бобир ўнғайсизланиб бош чайқади:

— Менинг шаҳзодага ибрат бўлгудек ҳолим йўқ.

Хумоюн отасининг маъюс юзига таажжуб билан тикилди.

— Нечун ҳазратим! Аткам менга барча жангларинингизни айтиб бердилар. Рустаму Сухроблар ҳам, Гўр ўғлию Алпомишлар ҳам сизчалик кўп жанг кўрган бўл масалар керак!

— Жанг ҳисоб эмас, амирзодам, жангнинг натижаси ҳисоб,— деди Бобир ўзининг мағлубиятларини эслаб.

Лекин Хумоюн учун энг муҳими — отасининг мислиз даҳшатларга дуч келиб, барча ўлимларни енгиб ўта олгани ва ҳамма қирғинлардан омон чиққани эди. Бобирга астойдил ихлос қўйган Қосимбек «Ҳазратимга дуо кетган, у кишини ўқ олмайди, тиф кесмайди», дерди ва бу содда эътиқодини Хумоюннинг қалбига ҳам сингдирган эди. Хумоюн отасининг Кобул билан Ҳирот оралиғидаги баланд тоғлардан одам зоти ўтолмайдиган қаҳратон қиши кунларида юрак ютиб ўтганини, кўпчилик бек ва навкарлар ҳолдан кетиб, отлар ҳам юролмайдиган бўлиб қолган пайтларда Бобир ўзи олдинга чиқиб, кўкрагигача қорга ботиб, ҳаммага йўл очиб борганини, ўшанда унинг қулоғини совуқ олиб, юзи кўмирдай қораёнб, таниб бўлмас аҳволга келганини Қосимбекдан яқинда эшитган эди.

Хумоюн ўша пайтларда бўлган бир ғалати ҳодисани отасидан тасдиқлатиб олгиси келди:

— Ҳазратим, Кобул чорбоғида Дўст деган бир паҳлавон навкар сизни танимай қилич билан чопгани ростми?

— Рост. Қейин таниб қолиб, қиличини ташлаб қочди. Шукурки, ҳеч шикаст етмади. Бўлмаса Дўст паҳлавон тиф урган одам ҳаргиз тирик қолмагай эди,

— Худонинг құдратини қаранг-а! — деди эшик оға
Муҳаммад Дўлдай хушомад оҳанги билан.

Ҳумоюн унинг кайфдан қизариб, кўпчиб турган юзи-
га нохуш назар ташлади-ю, яна отасига юзланди. У
фақат отаси билан гаплашишни истарди. Бобир тўғри-
сида Қосимбекдан ва бошқа одамлардан шунча ғаройиб
ҳикоялар эшитиб ўсган бола энди унинг ўзи билан
юракдан яқинлашишини истарди.

Лекин Бобир доим давлат иши-ю, ёзиш-чизиш билан
банд бўлар, бўш қолганда беклари чоғир мажлисини
бошлишар. Ҳумоюнга эса улар ҳали ҳамсуҳбат бўлол-
майдиган ёш бола деб қарашар эди. Бироқ Ҳумоюнда
отаси билан суҳбатлашиш иштиёқи кун сайин ортиб бор-
моқда эди.

— Ҳазратим, бултур Синд дарёсининг бўйида йўл-
барс билан олишган экансиз...

— Қайдан билдингиз?

— Ҳазратимнинг хонаи хосларида йўлбарс терисини
кўрдим.

Бобир кетида турган бекларга ишора қилди:

— Йўлбарсни биз кўплашиб енгганмиз.

Ҳиндубек кулиб эътиroz қилди:

— Ҳазратим бўлмаганларида биз йўлбарсга рўбарў
бўлломас эдик.

Ҳумоюн Ҳиндубекнинг гапини маъқуллаган каби
бош ирғади ва отасига болаларча соф бир ифтихор би-
лан қараб қўйди.

Бобир Бухоро атрофларида ва Ҳисорда бошига туш-
ган кулфатларни ҳамон унугомас, ўшандаги мағлуби-
ятлар алами аввалгиларига қўшилиб, юрагини ҳалигача
тимдалар, дунё ғамларини хаёлидан узоқлаштириш учун
ҳам у тез-тез чоғир ичар эди. Унинг руҳи тушиб, ўз
тақдиридан ихлоси қайтиб юрган мана шу кунларда
ўғли Ҳумоюн отаси қилган яхши ишларни бунчалик
эъзозлаб тилга олиши Бобирга ғалати таъсир кўрсатди.

Бир лаҳза у ўзини ўғлиниң кўзи билан кўр-
гандай бўлди. Ҳумоюн фахр билан тилга олган воқеалар
чиндан ҳам бўлган воқеалар эканлиги тўсатдан Бобир-
нинг кўнглини кўтарди. Шу дақиқагача унга бутун ҳа-
ёти қоп-қоронғи бир тун бўлиб туюлган бўлса, энди у
бу тунга гўё Ҳумоюннинг кўзи билан қаради-ю, қорон-
ғи осмоннинг у ер-бу ерида юлдузлар милтиллаётга-
нини кўрди.

Ҳумоюн отаси билан яkkама-якка гаплашгиси келиб, овозини пасайтириб:

— Ҳазратим,— деди — инъом қилган девонингиздаги барча шеърларни ёд олмишмен. Лозим кўрсангиз имтиҳон қилинг.

Бобир орқароқда жим турган бек ва мулозимларга ўгирилиб қаради. Улар Бобирнинг ўғли билан гапини тезроқ тугатишини ва кемага қайтишини кутмоқда эдилар. Лекин Бобирга энди чоғир мажлисидан кўра ўғли билан бирга бўлиш ёқимлироқ туюла бошлади.

— Жанблар,— деди у бекларига юзланиб,— бугун бизга кема сайри бас. Энди Мирзо Ҳумоюн билан шеър машғулоти ўтказмоқчимен. От келтирилсин!

Бобир отлангандан кейин Ҳумоюн ҳам отига қувонч билан сакраб минди. Ота-бола ёнма-ён Кобул аркига қараб йўл олдилар. Қосимбек ва бошқа мулозимлар орқароқда одоб сақлаб жим бормоқда эдилар.

Бобир кемада ичган чоғирнинг тафти ва карахтлиги унинг ялтираган сузук кўзларидан билинар эди.

— Қани, амирзода, эшитайлик,— деди у Ҳумоюнга кайф аралаш кулимсираб қааркан.

Отаси бирга кетаётганидан ўзида йўқ қувонган Ҳумоюн Бобирнинг девонидан ёд олган бир рубоийни шошилироқ ўқиди:

Озор ила неча гуфтигў¹ қилғайсиз
Озурда бўлурни жустижў² қилғайсиз.
Мунчаки кўнгулларга етишди озор,
Май била магарки шустишў³ қилғайсиз.

Ҳумоюн бу шеър билан отасининг май ичиш сабабини тушунишлигини ва ҳозир кайфи борлиги ҳам узрли эканини айтмоқчи эди Бобир буни фаҳмлади-ю.

— Маъқул, маъқул,— деб кулди.— Фақат аввалги икки сатрнинг вазнини бузиброқ ўқидинг. Афтидан сен бу сатрлардаги кинояни яхши фаҳмламагансен.

— Қандоқ... киноя?— деб бу сатрларни камоли жиддият билан ўқиган Ҳумоюн таажжубланди.

— Кинояки, одамлар бир-бирларига озор берадиган

¹ Гуфтигў — гаплашиш.

² Жустижў — қидириш.

³ Шустишў — ювиш, яъни май билан дил ғуборини ювиш.

гапни кўп гапиурлар. Гоҳо озор берадиган нарсани ўзимиз жустижў қилиб топурмиз. Ундан кейин бу озорни кўнгилдан май билан ювмоқчи бўлиб ичишга ружу қилурмиз.

Отаси ўзининг май ичишига киноя билан қарашини Ҳумоюн энди сезди ва яна ҳайрон бўлди:

— Нечун шундай?

— Сенинг ёшингда бунинг сабабини тушуниб бўлмас. Мен ҳам ўттиз ёшимгача чоғирга эҳтиёж сезган эмасмен. Сен қалайсен?. Кўнглингда чоғирга иштиёқ борми?

Ҳумоюн уялиб бош чайқади. Сўнг отасининг ичкиликдан шишган қовоқларига жиддий бир қараб олдида:

— Мен чоғирни ёмон кўрамен,— деди.

Ўн уч ёшида Бобир ўзи ҳам ичкиликдан ҳазар қилишини эслади-ю, ўғлининг жавобини маъқуллаб бош ирғади.

— Хўш, неларни яхши кўурсан?

— Менми?— деб Ҳумоюн бир лаҳза ўйланиб олди. Унинг яхши кўрган нарсалари кўп эди:— Сафарда юришни, саёҳатни яхши кўурмен, яхши китоб бўлса эртаю кеч ўқигим келур...

«Бу жиҳатлари менга ўхшабдир», деди Бобир ичидава ўғлининг қамчи дастасини тутган қўлларига қаради. Ҳумоюннинг юз-кўзи ҳам, қўллари ҳам Бобирнидан қорароқ эди. Балки жанубда туғилиб ўсаётгани учун шундайдир? Лекин панжасининг шакли отасиникига жуда ўхшаш. Бобир ўғлини билагидан олиб:

— Қани, кафтингни оч,— деди.

Ҳумоюн қамчини тақимига қистирди-да, кафтини отасига очиб кўрсатди. Бобир унинг кафтидаги чизикларга қаради-да, кейин ўз панжасини очиб, ўғлининг кафтига кафтини ёнма-ён тутди. Катта ва кичик ҳар икки кафтдаги кўндаланг чизиклар бир-бирининг айнан такрори эди. Отасига ўхшашни жуда-жуда истайдиган Ҳумоюн мамнун жилмайди. Бобир чуқур тин олди-да:

— Илоҳим, мен кўрган балоларни сен кўрмагин! — деди.

— Лекин мен сизнинг барча ишларингизни ўрганмоқчимен.

Бобирнинг яхши-ёмон ишлари хаёлидан аралаш-ку

ралаш бўлиб ўта бошлади. Бераҳм муҳит уни ҳам шафқатсиз бўлишга ўргатарди. Мана шу Кобул вилоятининг ўзида хирилчи қабиласига мансуб талай одамлар карвон йўлларида талончилик қилганликлари учун Бобир аскарлари томонидан аёвсиз ўлдирилган, ҳазора қабиласининг ўнлаб жанговар йигитлари чопқин пайтида қириб ташланган эди... Бобир бу қонли лавҳаларни умр китоби бўлмиш «Вақоиъ»га бирма-бир ёзиб борар эди. Аммо ҳали балоғатга етмаган ва оламга болаларча мусаффо бир ишонч билан қараётган Ҳумоюнни бундай шафқатсизликлардан мумкин қадар узоқ тутгиси келарди.

— Сен ҳушёр бўл, — деди Бобир, — менинг ҳавас қилиб бўлмайдиган ишларим ҳам бор!

— Қайси ишларингиз, ҳазратим?

— Қайгули, фожиали ишларим. Бутун тақдирим...

— Буни бир ғазалда ҳам айтмишсиз.

Ҳумоюн яна ёддан отасининг сатрларини айта бошлади:

Ҳар ёнғаки азм этсам, ёнимда борур меҳнат,

Ҳар сёрики юзлансан, ўтрумга келур қайғу.

Юз жавру ситам кўрган, минг меҳнату ғам кўрган,

Осоиниши кам кўрган мендек яна бир борму?

Шеърнинг ғамгин ва сеҳрли оҳангидан таъсирланган Бобир:

— Яхши ўқидинг,— деди ўғлига.— Истайменки, мен кўрган қайғулару, шафқатсизликларни илоҳим сен кўрмагин.

— Хўп, ҳазратим, мен фақат сиз билган ажойиботларни билсам бас!

Ота-бала сухбатга берилиб аркка қандай етганилари ни сезмай қолдилар. Кейин улар даричалари Шоҳи Кобул тоғига қараб очиладиган хушҳаво хонаи хосда ўтирганларида Ҳумоюн қўлига қофоз ва қалам олди-ю, отаси ихтиро қилган Хатти Бобирий ҳарфлари билан бир байт шеър ёзди:

Турклар хатти насибинг бўлмаса, Бобир, не тонг,
Бобирий хатти эмасдур, хатти Сифноқийдуур.

¹ Сифноқ — Туркистондан шимолроқда Сирдарё яқинида жойлашган қадимий шаҳар.

Бобир сўнгги дафъа Самарқандда юз берган машъум воқеаларни ва Хатти Бобурийни мактабда болаларга ўргатган муаллимнинг тошбўрон қилиб ўлдирилишини эслаб «уҳ» тортди.

Бир вақтлар Улуғбекни ҳалок этган ёвуз кучлар унинг расадхонасини қайта тикламоқчи бўлган Бобирни ҳам динсизликда ва рофизийликда айблаб, ҳатто қўшиннинг кўп қисмини шунга ишонтиргани Қизилқўмдаги мағлубиятга замин яратган эди. Шундан бери Бобир ўзи ихтиро этган хатни жорий этиш фикридан бутунлай қайтган эди.

— Сенга буни қайси муаллиминг ўргатди? — сўради Бобир Ҳумоюннинг ёзувига кўз югуртириб.

— Мирбадал хаттотдан ўргандим...

Ҳумоюннинг ёзувида хато бўлмаса ҳам, лекин ҳали бу хатга қўли ўрганмаганлигидан ҳарфлар нотекис чиқкан эди.

— Сенга манзурми?

— Жуда! Белгилари оз. Тез ёзиш мумкин. Ўқиши жўн.

— Ундай бўлса кўпроқ машқ қил. Минбаъд менга мактуб ёсанг шу хат билан бит. Мен ҳам сенга шу хат билан жавоб ёзурмен. Махфий тутмоқ осон бўлур.

Ҳумоюн подшоҳ отаси билан махфий хатлар ёзишини кўз олдига келтириди-ю, кўнглида яна иссиқ бир ифтихор туйгуси мавж урди. Отасига меҳри тобланиб, унинг кўнглига ёқадиган яна бир иш қилгиси келди.

— Ҳазратим, лозим бўлса, энди мусиқадан бир имтиҳон қилиб кўринг.

— Қани, қани!

Ҳумоюн савдарбошига аффон рубобини келтиришни буюрди. Сўнг дур ва садаф билан безатилган, тоғлар садосини эслатувчи улуғвор товуш берадиган бағри кенг рубобни созлаб, аввал наво йўлида бир куй чалди, кейин савтга ўтди. Бобир қулоғига жуда ёқимли туюлган бу савтни дарҳол таниди.

«Чоргоҳ савти» деб аталган бу куйни бултур Бобирнинг ўзи басталаган эди. Ҳумоюн буни ҳам излаб топибди-да! Ёки мураббийлари унга атайлаб отаси ёзган шеърларни ёдлатиб, отаси басталаган куйни ўргатиб, шу йўл билан подшоҳдан таҳсин эшитмоқчимикинлар?

Мураббийларда шундай бир хушомад бўлганда ҳам Ҳумоюннинг ўзи куйни самимий ихлос билан чалаётгани

билиниб турарди. Бола ўзининг бояги сўзини — отаси-
нинг ижодидан ибрат олишга ҳаваси зўрлигини ҳозир
чиндан исбот қилмоқда эди.

Бобир ўғли чалаётган гўзал куйга қулоқ солиб ту-
риб, кўнгли завқли туйғуларга тўлиб кетди.

Энди ўзининг ҳаёти ҳам унга энг ёруғ ва тиниқ то-
монлари билан кўрина бошлади. Ахир у ҳам бир вақт-
лар Ҳумоюн каби беғубор, мусаффо ёшлик дамларини
бошдан кечирмаганими? Унинг ҳаёти ҳам тиниқ бир
булоқ бўлиб оқмаганими? Кейин бу булоқнинг устига
жарлар қулаб, уни лойқалатди. Лекин ҳали бу булоқ
қуриган эмас, унинг оби ҳаёти Ҳумоюннинг қалбини
ҳам обод қилгани мана ҳозир билиниб турибди.

Бобир ўзи билан ўғлининг орасида ажаб бир боғ-
ланиш борлигини бугун биринчи марта аниқ сезди. Отаси-
нинг ҳаёти ўғлининг ҳаётида айнан такрорланмаса ҳам,
лекин янги бир тарзда давом этиши мумкинлигига,
агар ўғил астайдил отага содиқ бўлса, унга тортса,
отанинг умри ўғилнинг умрига уланиб кетишига Бобир-
нинг энди кўзи етди. Шундай бўлгач, Ҳумоюнни аткаси,
онаси ва мураббийлари Бобирга ихлосманд қилиб тар-
биялаганлари, унга отасининг фазилатларини саралаб
олиб беришга интилаётганлари катта бир неъмат эмас-
ми? Бобирнинг ўзи ҳам ўғлига фақат фазилатларини
раво кўради-ку. Фақат шундагина ўғли у қилган хатоларни
қилмаслиги, у тортган азобларни тортмаслиги
мумкин.

Фазилатлар... Бобир ўз фазилатларини бугун ўғли
орқали алланечук сараланган ҳолда кўриб, кўнгли кў-
тарилди, ўзига бирдан ҳурмати ортди.

Кейин у Ҳумоюннинг аткаси Қосимбекни саройга
чақиритириб, унга бош-оёқ сарупо ва от инъом қилди.
Шаҳзоданинг бошқа мураббийлари ва муаллимлари ҳам
катта-катта ҳадялар олдилар.

— Сенга не инъом қилай, айт! — деб Бобир ўғлига
кулимсираб тикилди.

Ҳумоюн китоб йигишни яхши кўрарди. Унинг алоҳи-
да бўлмани эгаллаган хос кутубхонасидан ташқари,
хобгоҳида ҳам китоб тўла жавонлар бор эди. Тўшаги-
нинг бош томонига хушбўй сандал дараҳтидан ишлан-
ган жавон қўйилган, отасининг шеърий девони жавон-
нинг алоҳида токчасида ёлғиз турар эди.

— Яна янги шеърий китоблар ёсанги,— деди Ҳу-

моюн отасига уялинқираб кўз ташларкан,— мана шу алоҳида токча сизнинг асарларингиз билан тўлса...
Ўғлингизнинг тилаги шу!

Бобир завқ билан қаҳ-қаҳ уриб:

— Э-ҳа, сенинг бу тилагингни ўринлатмоқ учун мен бир умр меҳнат қилмоғим керак-ку!..— деди.— Майли, яхши ният-ярим давлат дерлар. Бугундан бошлаб сен учун бир шеърий китоб бошлагаймен. Қани, дафтарингни бер...

Ҳумоюн муқоваси олтин суви билан зийнатланган, нафис варақларига ҳали ҳеч нарса ёзилмаган янги дафтарини отасига икки қўллаб тутди.

Бобир хона тўридаги миз ёнига келиб ўлтириди-ю, бирдан ўғлига меҳри тобланиб, ҳаяжон ичидা:

«Жигарим билан жонимга пайванд фарзандим!»— деб ёзди.

Ўзидаги оталик меҳри ва Ҳумоюндаги фарзандлик садоқати тождор оталар ва валиаҳд ўғиллар орасида жуда кам учрайдиган нодир туйғулар эканини, Улуғбек билан Абдуллатиф орасида бўлиб ўтган фожиаларга солиштирганда, у ўз ўғлидаги самимий ҳисларни қанчалик қадрлаши, қанчалик асраб-авайлаб, камолга етказиши зарурлигини шу лаҳзада бутун вужуди билан ҳис қилди. Қалбини тўлдирган оталик туйғуси шеърий оҳанг билан қофозга туша бошлади: «Давлату баҳт била Ҳумоюн бўл, комрон бўл, жаҳонда, юз туман обрўйн иззат кўр!»

Бобир ёзишдан тўхтаб ўрнидан турди:

— Давомини кейин битгаймен!. Китобнинг номи сенинг исминнга қофия бўлғусидир!..

Бобир ўша йили ёзиб тугалланган шеърий китоб — «Мубайин»— Ҳумоюннинг номига чиндан ҳам қофия дош эди. У ўғлининг дафтариға битган эзгу тилакларини ҳам шу китобга шеърий сатрлар шаклида жойлаб, ҳам-масини санъаткор хаттотга кўчиритирди-да, Ҳумоюнга тақдим қилди.

Ҳумоюн шу вақтгача отасидан олган совғалар орасида энг улкани ва бебаҳоси — мана шу шеърий китоб эканини сезиб, уни қайта-қайта кўзларига сурди...

У араб тилида ёзилган, мураккаб фиқҳ китобларини тушунолмай қийналиб юрар эди. Отаси тақдим қилган «Мубайин» фиқхнинг қонун-қоидаларини равон туркий тилда гўзал маснавийлардан ифодалаб, Ҳумоюн учун

ҳам дарслик вазифасини бажарар, ҳам унга шеърий завқ берарди. Энг муҳими, ўнинг отасига бўлган мөхри, ихлоси шу китоб туфайли янги бир куч билан ўсиб борарди.

Ҳумоюн ўн беш ёшга кирганда унинг китоб жавонида отасининг яна бир асари — аruz илмига бағишиланган «Мухтасар» пайдо бўлди. Ҳумоюннинг эндиғи истаги — отасининг ўсмирилик йилларидан бери ёзиб юрган «Вақоиъ» номли китобини ўқиш эди. У отасининг энг катта, энъ мароқли асари мана шу эканини онаси Мөҳим бегимдан эшитган эди.

Ҳумоюн ўн олти яшарлигига отаси унга Бадахшон вилоятини бериб, аскар ва савдари билан Қобулдан кузатиб қўйди. Ҳумоюн тоғлар орасида отаси билан хайрлашаётганда оила аъзолари ўзаро «Бобирнома» деб атай бошлаган ўша «Вақоиъ» китобидан бир нусха кўчиририб юборишни илтимос қилди.

Ўғлининг бошқа кўп илтимосларини сўзсиз қабул қилган Бобир бу гал ерга қараб бош чайқади:

— Ҳали у китоб битган эмас. Үлда-жўлда ётган асарни кўчиририб бўлмас.

— Қачон биткуурурсиз, ҳазратим? Мен интизормен!

Бобир ўғлининг юзига хомуш назар билан тикилди.

— Кўп интизор бўлма. Чунки у китобнинг битиши учун менинг умрим тугаши керак.

Ҳумоюн сесканиб тушди:

— Нечун бундай дейсиз?

«Бобирнома»нинг давоми анча вақтдан бери ёзилмай юрар эди. Қизилбошлар билан тузилган иттифоқ, Бобир ватанига бегона қўшинни бошлаб бориб, мағлубиятга учраганлари... буни ёзиш у ёқда турсин, ҳатто эслашдан ҳам юраги безиллар эди. Наҳотки умр китобининг сўнгги боби шу бўлса? Бобир энг йирик асарини бу тарзда ёзиб тутаголмаслигини сезарди. уни кўнгилдагидек тутгallaш учун эса ўша мағлубиятлар заҳрини ювиб кетадиган катта ғалабаларга эришиши керак эди. Мана энди ўғли Ҳумоюн улғайиб, ёнига киряпти.

У Ҳумоюннинг сўнгги гапдан изтиробга тушганини сезиб:

— Менинг сўзимдан ташвишланма,— деди.— Мен «Вақоиъ»ни умрим бўйи ёзмоқчи бўлганим учун шундай дедим. Орзуйим борки, унинг келгуси бобларига сенинг

ҳам яхши ишларинг битилгай. Зора ўзим ҳам... бу ки тобнинг поёнига ёруғ юз билан етсам.

— Ҳазратим, ундоқ бўлса, илоҳим «Бобирнома»ни яна эллик йил ёзинг, юз йил ёзинг!

— Ушангача кутишга сабр-тоқатинг етурмикин?— деб кулди Бобир.

Ҳумоюн жиддий туриб:

— Тангрим олдида онт ичиб айтаменки, сабр-тоқатим умрим етгунича етур!— деди.

2

Кобул дарёсининг бўйида Бобир эгачиси Хонзода бегим учун қурдирган Боги Дилкушонинг кўк мармар кўшкида Мавлоно Фазлидин чўкка тушиб ўлтириби. Ундан пастроқда мавлононинг соқол-мўйлови кўзга кўриниб қолган ўғли одоб билан қўл қовуштириб, ердан кўзини олмай сукут сақлади.

Нафармон қабо кийган, юзига оқ ҳарир парда тутган Хонзода бегим синиқ товуш билан тўхтаб-тўхтаб сўзлади:

— Ҳаммадан кўра... ўлган одамга қийин экан, мавлоно. Ўлган қайтиб келмас экан... Тириклар... оҳ-воҳ қилиб, минг куйиб-ёнсалар ҳам, ахийри бир кун... тасалли топар эканлар. Мана, ўзимдан қиёс...

— Бегим, бу замонда тирикларга ҳам осон эмас. Менинг Андижондан бош олиб чиқиб кетганимга йигрма уч йил бўлди. Шундан бери сизнинг бошингизга қанча кулфатлар тушди! Биз қанча балоларни кўрдик.

Хонзода бегим Андижонда қолиб кетган ёшлик йилларини кўз олдига келтира бошлади. Мавлоно Фазлидин ўшанда қанчалик кўхлик йигит бўлганига ҳозир ишониш қийин. Азоб-уқубатларга тўлиб-тошган сўнгги ўн йилликлар унинг бўйинларига ҳам ажинлардан тўр солиб кетган, қўлларини суяқдай қотириб, томирларини бўрттирган, елкасини буқчайтиб, олтмиш ёшлик мўйсафидга ўхшатиб кетган. Ҳолбуки у энди эллик уч ёшга киргани Хонзода бегимга маълум эди. «Ўзим-чи?» деб бегим ҳар куни кўзгуда кўрадиган аксини хаёлидан ўтказди. Хонзода бегимнинг олд тишларидан уч-тўрттаси тушиб кетиб, лаблари буриша бошлаган, сочи сийраклашиб, кулранг тусга кириб қолган эди.

Гўзал ёшликлари энди ҳеч қачон қайтиб келмасли-

ги, умрларининг энг яхши йиллари очилмай сўлган гулдай умрбод ҳазон бўлганлиги Хонзода бегимнинг юрак-бағрини тимдалаб ўтди.

— Мавлоно, ўғлингиз неча ёшдалар?

— Ингирма бирда, бегим.

Хонзода бегим ҳалок бўлган ўғли Хуррамшоҳнинг тирик бўлса ҳозир йигирма икки ёшга киришини эслади. Бу йўқотишининг унтилмас алами кейинги дарди устига қўшилди-ю, кўзига ёш қуилиб келди:

— Ишқилиб, ўғлингизнинг умри узоқ бўлсин. Мен кўрган мусибат сизнинг бошингизга ҳеч вақт тушмасин, мавлоно. Мен энди тирик қолмаймен деган эдим. Ёлғиз ўғлимнинг кетидан кетамен деган эдим. Лекин жоним қаттиқ экан.

Мавлоно бегимнинг йифисидан саросимага тушиб ўғлига бир қараб олди. Сўнг бегимнинг хаёlinи бошқа ёқقا буриш учун ўзининг бошига тушган азоб-уқубатлардан сўзлашга тушди:

— Ҳиротлар ҳам жуда нотинч бўлиб кетди, бегим. Шоҳ Исмоил шаҳарни олиб, суннийларни қувғин қилди. Кейин яна шайбонийзодалар шаҳарни босиб олиб, шиа тарафдорларини қатағон қилди. Шиа мозорларини очириб Марвда Шайбонийхонни ўлдирирган руҳонийларнинг суюкларини тўпларга солиб оттирдилар. Кейин кўп ўтмай Ҳиротни яна қизилбошлар улардан тортиб олиши. Қасд олиш қайтатдан бошланди. Ҳаммаёқ алғовдалғов. Қамолиддин Беҳзод Ҳиротдан Табризга шоҳ саройига хизматга олиб кетилди. Мавлоно Хондамир шаҳардаги тўполонлардан беziб, ота юртларидағи узоқ бир қишлоққа чиқиб кетдилар. Бизга ўхшаган мусофириларнинг аҳволи бундан ҳам баттар бўлди... Ўғлимиз Аловиддин Ҳиротда сангтарошлиқ санъатини ўрганган эди. Лекин санъат билан кимнинг иши бор? Ахийри, шоир Муҳаммад Султон билан маслаҳатни бир жойга қўйдигу Бобир мирзодан паноҳ истаб Қобулга келдик.

Бу гаплар давомида Хонзода бегим кўз ёшларини артиб, ўзини анча босиб олди:

— Келиб беҳад яхши қилгансиз, мавлоно... мен сизга бир омонатингизни қандай қайтаришни билмай юрган эдим.

Мавлоно Фазлиддин кўзлари пирпираб:

— Қайси омонатим? — деди.

Хонзода бегим маъюс кулимсираб:

— Ҳозир,— деди-ю, ўрнидан кўтарилиди ва тўрдаги ўймакор эшикдан ичкарига кириб қетди!

Кўп ўтмай у бир хизматкорга оқ ипак матога ўралган нарсани кўтаририб қайтиб чиқди. Бегимнинг ишораси билан хизматкор ҳалиги нарсани Мавлоно Фазлидиннинг олдига қўйди-да, таъзим қила-қила орқаси билан юриб чиқиб кетди.

— Мавлоно, очиб кўринг,— деди Хонзода бегим.

Мавлоно Фазлиддин ўрамни секин очди-ю, четлари саргайиб кетган чизмакашлик қофозларини кўрди. Сўнг уларни авайлаб варақлар экан, ўзининг Андижонда қурмоқчи бўлиб, Хонзода бегим билан бамаслаҳат чизган лойиҳаларини таниди. Йигитлик орзулари хаёлида қайтадан уйгониб, кўзлари чақнаб кетди. Андижонда қурилмай қолган обидаларнинг лойиҳасини шунча йилдан бери асраб олиб юрган Хонзода бегим унга ҳозир ўша ошиқлик пайтидагидек нафис ва жозибали кўринди. Ушда, қоятош устида нохосдан бегимнинг белидан олган пайтидаги ширин туйғулари уйғонди-ю, юрагини завққа тўлдирди:

— Ҳазрат бегим, сиз менга жонимни қайтариб бергандек бўлдингиз! Мўъжизани қаранг! Орада шунча йиллар! Шунча йўллар! Шунча тоғу дарёлар!

— Мавлоно Фазлиддинни тўлқинлантирган завқ ва қувонч Хонзода беғимга ҳам ўтди. Унинг товушида шодлик жаранг эшитилди:

— Ростдан, бу лойиҳалар менга қўшилиб жуда кўп балоларни бошдан кечирди. Мен қанча жойга борган бўлсам, булар ҳам бисотлариму жавоҳирларим орасида мен билан саргардон бўлиб юрди: Фақат охирги марта Қундуздан Самарқандга жўнаганимизда тоғлару дарёлардан кўп юк олиб ўтиб бўлмади. Сандиқларимдан бир қисми Қундуз қўргонида қолди. Шуларнинг ичida бу лойиҳа ҳам қолган экан. Самарқандга бориб кўп ачиндим. Ёз келса Қундузга одам юбориб олиб келтирмоқчи эдим... Кейин ҳалиги фалокатлар бўлди... Қундузда қолгани яхши бўлган экан. Бошқа сандиқларимнинг ҳаммаси Ҳисорда фитначи мўғулларнинг илкида қолди... Мавлоно, қаранг-чи, ҳамма варақлари жойидами?

Шундай деб, Хонзода бегим юзидан ҳарир пардасини боши устига кўтариб қўйди-ю, лойиҳаларга тикилиб қаради.

— Ҳаммаси жойида!— деди Мавлоно Фазлиддин

унинг юзига миннатдорона кўз ташлаб.— Самарқандда фақир сизнинг ҳузурингизга киришга журъат этолмаган эдим.

— Ўзим сизни чорламоқчи бўлдим, Аммо лойиҳалар Қундузда қолганлиги учун андеша қилдим...

Мавлоно Фазлиддин Андижонда Хонзода бегимнинг суратини ҳам чизганини, ҳозир лойиҳалар орасида ўша сурат йўқлигини бегимга эслатгиси келиб:

— Балки... Суратлар йўқолиб кетгандир?— деди.

Хонзода бегимнинг юзига нафис қизиллик югуруди:

— Ҳали ҳам мусаввирлик қилмоқдамисиз, мавлоно?

— Ҳазрат бегим, кўп йил машқ қилинмаса қўл мусаввирлиқдан чиқиб қолар экан... Ҳозир фақат меъморлик билан машғулмен.

— Андижонда чизган суратларингизни мен алоҳида сақламоқдамен,— деб Хонзода бегим мавлононинг ўғлига ийманиб кўз ташлади.

Бўй етиб қолган бу йигит олдида ўзларининг ёшлик муҳаббатларини эслатувчи суратни Хонзода бегим атайлаб олиб чиқмаганини Мавлоно Фазлиддин энди сезди.

— Лутфан сиз ҳақсиз, ҳазрат бегим... Уша суратлар энди умрбод сизники бўлгай!

Буни жуда истаб турган Хонзода бегим:

— Саховатингиздан то абад миннатдормен!— деди:

Мавлоно Фазлиддин қўлини кўксига қўйиб, одоб билан бош эгди. Сўнг гапни яна очиқ турган эски лойиҳалари устига бурди:

— Мен энди буларни Ҳиротда ўрганган янгиликларим билан тўлдиргаймен. Ана ундан сўнг бемалол амалга оширсам бўлур... фақат... бу мадраса-ю, қасрлар, қаерга қурилмоғи мумкин? Андижон... узоқда қолди. Кобулгами?

Хонзода бегим маъюс бош чайқади:

— Кобул — биз орзу қилгандек қурдатли давлат эмас, мавлоно. «Улуғ меъморлик обидалари қурмоқ учун улкан давлатнинг қурдатига суюнмоқ керак» деганлар ҳақ эканлар. Начора?..

Мавлоно Фазлиддин олдида очиқ турган тарҳларга ғамгин кўз тикиб:

— Ҳа, тақдир бизни нотавон қилиб яратмишdir,— деди. Овози кексаларникидек ғижирлаб эшитилганини ўзи ҳам сезди-ю, қўшиб қўйди:— Мен энди қариб қолдим, Қирғинлар, тўполонлар, фаторатлар билан умрим

Уди. Лекин наҳотки бу ҳаммаси узлуксиз давом эта-
верса? Ахир бир мен эмас, ўнлаб заковатли олимлар,
ҳунарпешалар, шоирлар жаҳолат довули билан Моваро-
уннахру Хуросондан қувилмишлар. Йлгари қора кучлар
бизни Андижондан қувсалар, Самарқанддан паноҳ то-
пар эдик. Самарқанд жоҳиллари кун бермасалар Ҳирот-
дан нажот излар эдик. Энди Андижону Самарқанд ҳам,
Бухорою Ҳирот ҳам — барчаси кўчманчи сultonлару
диний адватлар довулидан зир титрамоқда. Довул учир-
ган хазондай ватанидан қувилган қанча маърифатлик
олиму санъаткорлар, қанча нодир истеъоддлар беҳуда
ҳайф бўлиб кетмоқдалар. Бизнинг ватандан айрилиши-
миз — дарёнинг ўзанини йўқотиб, дашту биёбонга тошиб
чиқиб кетишига ўхшайдир. Амударё бир вақтлар шу
кўйга тушган экану то ўзига янги йўл солиб, бошқа бир
денгизга бориб қуйилгунча у ёқдан-бу ёққа бош уриб,
тошиб юрган экан. Биз ҳам умр бўйи у ёқдан-бу ёққа
бош уриб, муносиб ўзанимизни тополмаймиз. Энди бу
кажрафтор фалак ҳеч бўлмаса фарзандларимизга раҳм
қилсин! Биз бўлмасак булар ўзларига муносиб ўзан то-
пиб, янги бир маданият денгизига бориб қуйилсинлар!

Умр бўйи ўз ижодий режаларини амалга оширомай
куйиб юрган истеъодднинг бу аламли нишони Ҳонзода
Бегимни титратиб юборди.

— Мавлоно, фақат сиз эмас, Бобир мирзо ҳам ўзани-
ни йўқотган дарёдек безовталар!

— Биламен, тақдир ул ҳазратга ҳам ўгайлик қил-
мишдир!

— Аммо Бобир мирзо саргардон бўлиб юрган истеъ-
оддлар дарёсини бир жойга йифмоқчилар, насиб бўлса,
илму санъатнинг янги бир денгизини барпо қилмоқчи-
лар.

— Биз учун сўнгги умид ҳали ҳам Бобир мирзодир-
лар. Шунинг учун ўғлим билан Кобулга келдик.

— Қаерга жойлашдиларингиз, мавлоно?

— Жияним Тоҳирбекникига тушдик. Ўзи сафарда
екан...

Ота-бала икковлари ҳам эски кийим кийишган, ранг-
ларини жуда олдириб қўйган. Уларнинг моддий жиҳат-
дан ҳам қийналиб юрганларини сезган Ҳонзода бегим
яна ўрнидан туриб, ичкари хонага кириб кетди. Қабо-
сининг чўнтагидан калит олиб, токчада турган пўлат
ондики очди.

Иниси Бобир мирзо Хонзода бегимга энг нуфузли аъёнлари қатори улуфа тайинлаган эди. Ҳар ойда хазинадан чарм ҳамёнга солинган минг дирҳам олтин келиб турар эди. Ҳизматкорлар бегимга берилган мулкнинг экин-текини билан тирикчилик ўтказишарди. Бегимнинг бир ўзига кўп пул кетмас, шунинг учун хазинадан келган олтин тўла ҳамёнларнинг анчаси пўлат сандиқда тахланиб турар эди.

Хонзода бегим Мавлоно Фазлиддиннинг кичикроқ бир ҳовли ва от сотиб олиши, кийим-кечаги, уч-тўрт ойлик тирикчилиги учун қанча пул кетишини чамалаб кўрди-да, минг дирҳамлик ҳамёнлардан иккитасини олди. Сўнг уларни бояги хизматкорга бериб, олтин баркашда кўтартирганича ота-боланинг олдига қайтиб чиқди.

Мавлоно Фазлиддин ҳамённи кўриб, хижолат чека бошлади. Хонзода бегимдан пул олиш унга оғир эди.

— Мавлоно, бу ҳамёнлар Бобир мэрзонинг хазиналаридан келмишdir. Ўзлари бўлмаганликлари учун улуфаларини мен сизга топширмоқчимен. Бири — ўғлингиз Аловиддинга. Марҳамат! Олингиз!

Аловиддин қўлини кўксига қўйиб, энди биринчи марта оғиз очиб гапирди:

— Раҳмат, ҳазрат бегим, биз сиздан беҳад миннатдормиз!

Унинг ёқимли товуши ва сўёларни майин талаффуз қилиши Мавлоно Фазлиддиннинг йигитлик пайтини эслатар эди... Шу туфайли ота-бала иккови ҳам бегимга бениҳоя азиҳ кўринарди.

3

Амударё томондан тоғ ошиб учиб келган турналар Кобулнинг устидан жануб-шарқ томонга ўтмоқда эдилар. Аркнинг тиллакори айвонида Моҳим бегим билан ионушта қилиб ўлтирган Бобир турналарнинг қисқа ва сирли товуш билан «қур-ей», «қур-ей»лашини эшилди-ю, ўрнидан туриб, айвон четига борди ва осмоннинг овоз келаётган томонига тикилди. Кўкда эгилиб-чайқалиб келаётган бир шода қора маржонни кўзлари билан қидириб топгандан кейин турналарнинг товуши унга гўё аниқроқ эшитила бошлади.

Гўзал ва тиниқ «қур-ей», «қур-ей»ларда қандайдир

ҳорғинлик оҳанглари борга ўхшарди ва турналарнинг узоқ-узоқлардан учиб келаётгани эсга тушар эди. Балки улар шу келишда Андижоннинг устидан учиб ўтгандирлар? Ёки Тошкент ва Самарқанд атрофларидағи сокин сувлар бўйига қўниб дам олгандирлар?

Бу ўйдан Бобирнинг қалбини аламли бир соғинч туйғуси чулғаб олди. Ҳатто шу турналар кўриб келаётган жойларни у энди бориб кўролмайди. Кўли Маликда ва Фиждувонда енгилиб, Ҳиротда фитначилар хиёнатидан аборг бўлиб қайтганига, мана, ўн уч йил бўляпти. Бобир шундан бери қалтис ҳарбий юришлардан ўзини тийиб юрибди. Мўғул бекларининг хиёнатларини Қундуздаёқ била туриб, яна ўшаларга ва қизилбошларга таваккалчилик билан суюниб иш қилгани унинг ватанига қайтадан барча йўлларини бекитиб ташлаган эди.

Турналарнинг узоқлашиб сўниб бораётган товушлари таъсирида Бобирнинг кўнглига: «энди туғилиб-ўсанг юртингга умрбод қайтолмайсан!»— деган аламли ўй келди-ю, юзи бирдан тундлашди. Орқасига ўгирилиб, савдарбошига чоғир келтиришни буюрди.

Моҳим бегим дастурхон ёнидан Бобирга томон келар экан:

— Ҳазратим, эрталабдан чоғир?— деб таажжубланди.— Ҳозир фарзандларингиз саломга келурлар... Ана, Мирзо Ҳиндол аткалари билан келмоқдалар.

Бошига кичкина ипак салла ўраган, мурассаъ қамрига кичкина қилич тақилган саккиз ёшли Мирзо Ҳиндол айвоннинг баланд зинапоясидан катталардай қўл қовуштириб, таъзим қилиб чиқди. Отаси буни кўриб беихтиёр жилмайди. Ҳиндолни елкасидан қучиб эркалатди, кейин уни ёнига олиб, зарбоф кўрпача устига ўлтирди.

— Қилич тақиб олибсиз, амирзодам, жангга бормоқ-чимисиз?— деб ҳазиллашди.

Ҳиндол катта-катта кўзларини чақнатиб Моҳим бегимга бир қараб олди. Моҳим бегим «Айтинг!» дегандай бош ирғади. Шунда Ҳиндол бурро тил билан отасига:

- Мени ҳам олиб боринг,— деди.
- Қаерга?
- Ҳин... Ҳиндистонга.
- Ҳиндистонда нима қилмоқчисиз?
- Йўл... йўлбарсни кўрамен...

— Ана холос! — деб Бобир кулди. — Биз сизга Ҳиндол исмини берсак, сиз фақат Ҳинд йўлбарсини томоша қилмоқчисиз холосми?

Бола қизариб:

— Йўқ, — деди ва жажжи қиличининг сопини қисимига олди: — Агар йўлбарс... «ейман» деса, мен мана шу қилич билан уни урамен!

Бобир Ҳиндолини яна елкасидан қучиб эркалатди:

— Баракалло! Ундаи бўлса сизни Ҳиндистонга албатта олиб борурмиз...

Шу пайт айвон зинапоясидан олтин кўзачада чоғир олиб чиқаётган шарбатчи кўринди. Моҳим унга қўли билан «Қайтинг!» ишорасини қилди. Шарбатчи Бобирга қўрқа-писа кўз ташлади-да, унинг ўғли билан овуниб, чоғирни эсидан чиқарганини сезди ва зинадан сенин қайтиб тушиб кетди.

Бобир Ҳиндолдан хат-саводни қанчалик ўрганганини, қанақа шеърлар ёд билишини сўради.

— Мен қуръон оятларидан ёд билурмен. Қулҳу оллоҳу аҳад...

— Ҳиндолнинг шеърга унчалик ишқи йўқ, — деб изоҳ берди Моҳим бегим. — Бунга ўйин бўлса, ёйдан ўқ отса, от чопса бас. Китобга хуши йўқ.

— Балки ёши кичик бўлгани учундир?

— Гулбадан бундан уч ёш кичик. Аммо саводи Ҳиндолдан яхши. Ҳозир кўурсиз... Қизча китобга шунчалик ўчки, таажжубдан ёқамни ушлаймен.

Бобир ўйчан товуш билан:

— Наҳот Ҳиндол ўша тоғаларига тортса? — деди.

Бобирнинг бу сўзларида қанчалик мураккаб маъно борлигини фақат Моҳим бегим тушунарди. Чунки Ҳиндол Моҳим бегимдан эмас, Бобирнинг кичик хотини Дилдор оғачадан туғилган эди. Шариат берадиган рухсат бўйича Бобир ҳам уч хотинлик бўлиб олган, авлоддан-авлодга ўтиб келаётган бу бераҳм одат Моҳим бегимни қанчалик эзмасин, аламини ичига ютиб чидаб келар эди. Бобирнинг иккинчи хотини Гулруҳ бегимдан Мирзо Комрон ва Мирзо Аскарий отлиқ икки ўғил туғилди. Булар Ҳумоюндан кейинги тахт ворислари эдилар. Гулруҳ бегим шу сабабли Моҳим бегимга кундошларча совуқ муомала қиласр эди. Уч хотин Қобулнинг уч чеккасида ҳар бири алоҳида кўшкда турса ҳам бирбирларининг аҳволларидан хабардор эдилар. Дилдор

оғача беш йилда икки қиз туғди. Мөҳим бегим эса уч марта фарзанд доғини бошдан кечирди. Унинг Ҳумоюндан кейин туққан икки ўғил, бир қизи бирин-кетин ўлиб кетди. Кейин умуман бўйида бўлмай қолди. Бунинг ҳаммасидан Мөҳим бегим жуда қаттиқ куйиб юрганини сезган Бобир унга қандай тасалли беришни билмас эди. Бир кун мана шу айвонда ўтирганларида Мөҳим бегимнинг ўзи «Дилдор оғача яна ҳомиладор эмишлар,— деб қолди.— Мен куйиб адо бўлдим. Энди... Дилдор оғача шу гал ўғил тұғса ҳам, қиз туғса ҳам, агар менга берсангиз ўз фарзандимдек тарбиялаб ўстирар эдим».

Дилдор оғача ўз фарзандини кундошига ишониб топширишини тасаввур қилиб бўлмас эди. Лекин Мөҳим бегим Ҳумоюнни қанчалик яхши тарбиялаганини ҳамма билар, унинг яна фарзанд ўстириш иштиёқи зўрлигини Бобир ҳам сезар эди.

Дилдор оғача Кобулнинг Боги Йўнгичқасида мана шу Ҳиндолни туққанда Бобирнинг маҳсус фармони билан уч кунлик чақалоқни аркда турадиган Мөҳим бегимнинг тарбиясига келтириб бердилар.

Бу болани тўққиз ой қалби тагида кўтариб юрган Дилдор оғача «ўғлимдан тириклай жудо бўлдим»,— деб анча вақт йиғлаб-сиқтаб юрди. Бобир унга:

«Азалдан удум шундоқ,— деб важ кўрсатди.— Подшоҳ оиласида ўғилларни катта хотин тарбият этмоғи керак. Мөҳим Ҳумоюнни қандоқ вояга етказди, кўрдингми? Ҳозир Бадахшонда энг обрўлик ҳоким! Худо хоҳласа Мөҳим Ҳиндолни ҳам шундоқ вояга етқизгусидир!»

Мөҳим бегим Ҳиндолни ўз фарзандидан ҳам зиёда тарбия қилаётгани Бобирга маълум эди-ю, лекин боланинг тоға авлодлари жоҳил ва маърифатсиз одамлар эди. Дилдор оғача Ҳисор ва Самарқандда кўп ёмон ишлар қилган Султон Маҳмуд мирзонинг авлодларидан эди, Шайбонийхон томонидан ўлдирилган Султон Али мирзога ҳам хешлиги бор эди. Бобир Самарқандга сўнгти гал ғалаба билан борганда ва қизилбошлар билан май ичиб юрган кунларида Дилдор оғачанинг ҳуснини, ҳусусан, дутор чалиб ашула айтгандаги ширин овозини ёқтириб қолиб, кайф устида уни ҳарамига олган эди. Бунинг ҳаммасидан хабардор бўлган Мөҳим бегим Бобирнинг «Ҳиндол маърифатсиз тоғаларига тортмасин, тағин!»— деган ҳадигини тарқатишга интилди;

— Ҳазратим, Ҳумоюннинг кўп фазилатлари Ҳиндолда ҳам бор. Қалби тўла меҳр. Ишонаменки, Ҳиндол ҳам сизга тортгай. Эгачингиз Ҳонзода бегимдан эшигманмен. Сиз ҳам мана шу ёшда «уруш-уруш» ўйнашни беҳад яхши кўрар экансиз.

Бобир яна Ҳиндолга юзланди:

— Мен сенга қитоблар совға қилсан ўқурмисен?

— Ўқу... ўқурмен!— деб Ҳиндол тутилиброқ жавоб берди.

Бобир муншини чақириб, Кобул кутубхонасидан Ҳиндолга керакли китобларни Моҳим бегимга келтириб беришни буюрди. Шундан кейин савдарбоши ички хонадан боланинг бўй-бастига мослаб ишланган олтин дастали Қамони Шоший олиб чиқди. Чиройли соқдоқда ўн иккита олтин безакли ёй ўқи ҳам бор эди. Бундай чиройли ўқ-ёйни биринчи марта кўраётган бола нодир совғани қўлига олганда кўзлари қувончдан ялтираб кетди.

— Ана, тирандозлиқни машқ қил, аммо китоб ўқиши ҳам унутма!— деб тайинлади Бобир.

Ҳиндол таъзим билан отасига қуллуқ қилди, зинапоядан пастга тушиб кетди. Орадан сал ўтмай айвоннинг ички эшигидан эллик ёшлардаги энага аёл кичкина Гулбаданни қўлидан етаклаб чиқди. Бу истараси иссиқ аёл — Тоҳирнинг хотини Робия эди. Авваллари Қутлуғ Нигор хоним хизматида бўлган Робия ҳозир Моҳим бегим ҳузурида беш яшар Гулбаданга энагалик қилмоқда эди.

Бобир ўз оиласига йигирма тўрт йиллик қадрдон бўлган Робиянинг таъзим билан берган саломига алик олиб, у билан илиқ сўрашди. Сўнг қизчаси Гулбаданга юзланди.

Қўғирчоқдай ясантирилган жажжи қизчанинг қошкўзи беихтиёр Дилдор оғачани эслатди. Гулбаданни ҳам ўша гўзал жувон туқсан эди. Моҳим бегим Ҳиндолни оналарча суйиб парвариш қилаётганини йиллар давомида кузатиб юрган Дилдор оғача бу аёлнинг тантилигига қойил бўлган ва Гулбаданни унга ўзи фарзандлика берган эди. Бу икки аёл энди калондимоғ Гулруҳ бегимга қарши гўё болалар орқали иттифоқ тузган эдилар. Гулруҳ бегим эса бир эмас, икки ўғли бўй етиб келаётганидан беҳад мағуруланар, Комрон мирзо ва Мирзо Аскарийларни тахт вориси Ҳумоюнга қарши ра-

қобат туйғуси билан тарбиялар эди. Шу ёабабли Бобир ҳам Гулруҳ бегимдан кўп ранжир, лёкин орадаги қундошлик балосини бутунлай даф қилиш қўлидан келмас эди.

Мурғак қизчасини кўрган заҳоти эсига тушган бу мураккабликлар Гулбаданинг эгилиб таъзим қилиши ва ширин «ассаломи» билан хәёлидан узоқлаша бошлади. Бобир қизчасини қўлида кўтариб олиб, пешонасадан ўпди, сўнг дастурхон олдига келиб, уни тиззасига олиб ўтирди. Дастурхон тўла ноз-неъматларни, Одина-пурдаги Боги Вафода ўсган чиройли норинж¹ларни кўрсатиб:

— Не ейсан? — деб сўради.

Гулбадан одоб билан бош чайқади — у подшоҳ отасининг олдида овқат чайнаб ўтиришдан ийманар эди. Лекин дадасининг зар қўшиб тўқилган қимматбаҳо абосидаги олтин тугмалар уни жуда қизиқтириб қўйди. Бу тугмалардан бирининг юз томонига кичкина қилиб йўлбарс шакли ўйилган. Йўлбарснинг кўзлари ўрнига зифирдан ҳам кичик ёқут доналари ўрнатилган. Иккинчи олтин тугманинг юзида афсонавий бир қуш қанотлари ни ёзиб, тумшуғида кичкина гавҳарни олиб учиб боряпти. Умрида бундай ғалати тугмаларни кўрмаган қизча уларнинг биттасини қўлчаси билан секин ушлаб кўрди.

— Сенга тугмалар маъқулми? — деб сўради дадаси, Гулбадан «ҳа», деб жилмайди. Бобир қизчаси ушлаб кўрган юқориги тумани юлиб олмоқчи бўлиб бир тортиди. Лекин тугма жуда маҳкам тикилган экан, узилмади.

— Ҳазратим, не қилмоқчисиз? — ҳайратланиб сўради Моҳим бегим. — Қўйинг, тумани узманг, ахир бу сизнинг шоҳона либосингиз!

— Ҳечқиси йўқ. Заргарга буюрсалар, яна битта шундоқ тумга ясад бергай.

Бобир камарига осилган қиндан кичкина қаламтарош олди-ю, ўша тумани ипидан қирқиб олиб, қизчасига берди:

— Лекин йўқотма. Бу қуш — Ҳумо. Илоҳим сенга баҳт келтирсин.

Гулбадан қувониб ва ҳаяжонланиб:

¹ Одина пур — Афғонистоннинг жаһнубидаги шаҳар, ҳозирги Жалолобод. Норинж — апельсини.

— Раҳмат, ҳазрати... оли... — деди-ю, лекин жумла-нинг охирини унча келиштиrolмади.

— Мени ота дея қол, қизим.

Гулбадан онаси Моҳим бегимга савол назари билан қаради. Моҳим «ҳа, айт!» дегандек бош ирғади. Шунда Гулбадан қўлчалари билан отасининг бўйнидан қучди-да:

— Отажон! — деб унинг ёноғидан ўпди.

Бобир кўпдан бери ҳис қилмаган болаларча бир поклик ва маъсумлик борлиғига гўё нур бўлиб тараалди.

— Гули,— деди Моҳим бегим,— энди ҳазрат отангга битта ҳикоят айтиб бергин.

Гулбадан секин отасининг тиззасидан паётга тушдида, худди мўаллимга жавоб бераётган талабадек тик туриб, тошбақа ва чаён ҳақидаги машҳур ҳикоятни айтиб берди. Хусусан, тошбақа чаёнга яхшилик қилиб, уни дарёдан ўтказиб қўймоқчи бўлганда, чаён унга заҳар солишга тиришганини, сўнг бу ёмонлиги учун дарёга чўкиб ўлганини шундай келиштириб айтдики, Бобир завқ қилиб кулди-да:

— Сиз сўзлаб берганмидингиз? — деб Моҳимдан сўради.

— Йўқ, ўзи «Тўтинома»ни бемалол фаҳмлаб ўқиди. Беш ёшга етмай савод чиқарган қизчани мен биринчи кўришим.

— Гулбаданга кўз тегмасин, зеҳну муҳофазаси беназир.

— Саъдийнинг «Гулистан»идан хийла ҳикоятларни ёд билур. Ашъорга унча ўч эмас. Аммо насрый ҳикоя хотирасига сўзма-сўз нақшланиб қолур. Боғда, кўчада кўрганларини ҳам келиштириб ҳикоя қилур. Мен ўзимча орзу қилурменки, Гулбадан шоира бўлмаса ҳам ҳазрат оталариниң насрнавислигини мерос олса не ажаб?

— О, наср ёзмоқ учун қанчалик кўп савдоларни бошдан кечирмоқ керак, Моҳим!

Гулбадан ота-онасининг гапларига яхши тушунаёт-гандай сёргакланиб қулоқ солмоқда эди. Унинг катта-катта шаҳло кўзларида қандайдир умид, айни вақтда, хавотирлик борга ўхшарди. Гўё унинг отасидан кутган умидлари пучга чиқса кўнгли қаттиқ озорланишини се-зиб хавотирланаётгандек кўринарди.

— Зукко қизим, ҳазрат онанг сендаги ажиб бир қобилиятни яхши пайқабдир. Агар Гулининг насрга иш-

ки зўр бўлса,— деб Бобир Моҳим бегимга қараб давом этди — «Вақонъ»нинг осонроқ бобларидан берай, хаттот қизчамизга бир нусха кўчириб берсин.

— Мен ҳам сиздан шуни илтимос қилмоқчи эдим. Гули туркий тилни ҳазрат оталарининг китобларидан ўргангани яхши. Мен, оқизангиз, орзумандменки, фатта Ҳумоюндек ўғилларингиз эмас, Гулбадандек қизларингиз ҳам тарихда сизга муносиб ном қолдирсалар¹.

Бу сўзларнинг самимилигини бутун вужуди билан сезган Бобир нохосдан тўлқинланиб кетди. Моҳим бегим кундоши Дилдор оғачанинг бир эмас, икки фарзандини шунчалик меҳр билан тарбиялаши учун ва уларнинг келажагига шу даражада жон куйдириши учун қанча катта бардош, тантилик, бағри кенглик керак бўлганикин? Бобир ёши қирқдан ошган сари келажак авлод ҳақида кўп ўйлар, фарзандлар айниқса шу ўшда одамнинг ҳаёттида ҳал қилувчи кучлардан бирига айланишини сезарди. Шу сабабдан ҳам Моҳим бегимнинг биргина Ҳумоюнни эмас, мана Ҳиндол билан Гулбаданин ҳам оталарига садоқатли ва меҳр оқибатли фарзандлар қилиб тарбиялаётгани хотин кишининг ўз эрига қилиши мумкин бўлган энг улуғ яхшилиги эканини ҳозир бутун борлиғи билан ҳис қилди. Бобир подшоҳлик удумига ён бериб, Моҳим бегимнинг устига яна икки хотин олган бўлса ҳам Моҳим буни бағри кенглик билан кечиргани, яна ўзиниң унга шунчалик фидо қиласётгани — тенгсиз бир муҳаббат ва садоқатнинг нишоналари эмасми?

Бобир тез ўрнидан туриб, кўрпачада ўлтирган Моҳим бегимнинг устига энгашди-ю, социдан, пешонасидан, юзидаи ўпа бошлади.

— Моҳим, сиз менинг беназир малагимсиз! — деб эҳтирос билан шивирлади: — Мен шоҳ бўлсан ҳам улуғ қалбингиз ўтрусида қулмен!

Моҳим ҳам тез ўрнидан кўтарилиди. Гулбадан ота-оналарига ийманиб қараб турганини кўрди-ю, атрофга олазарак бўлиб кўз ташлади.

Робия уларни холи қолдириб ичкарига кириб кет-

¹ Олдинроққа кетиб айтиш мумкинки, Моҳим бегим Гулбаданин чиндан ҳам Бобир насли руҳида тарбиялади. Гулбадан бегим вояга етганда «Бобирнома»нинг энг яхши фазилатларидан ибрат олиб, ўзининг машҳур «Ҳумоюннома» асарини ёзди. Ўша замонларда аёлларни камситувчи диний ақидаларга қарши бориб ёзилган «Ҳумоюннома» тарихимизнинг нодир маданий обидаларидан бирига айланди.

таг. Савдарбошилар ҳам йўқ. Бобир Моҳим бегимнинг кўзларидан ҳам ўпид:

— Буюринг,— деди,— неки истасангиз мен бажо келтирай!

Моҳим бегим уялиб шивирлади:

— Гулбаданга жавоб берайлик...

Бобир яна савдарбошини чақирди ва Гулбаданга Хиндистоёндан келтирилган тўтиқушларни ҳадя қилишни буюрди.

Чиройли олтин қафасларга солинган тўтиқушларнинг камалакдай товланган патлари Гулбаданинг эътиборини дарҳол ўзига тортди. Тўтиқушлар сўзлашни билар эди, каттароғи ўшанги товуш билан:

— Ассалом, бегим!— деди.

Гулбадан бундан завқ қилиб болаларча соддалик билан:

— Ассалом, тўти!— деди.

Шунда ҳаммалари беихтиёр кулиб юбордилар. Гулбадан дадасининг олдига чопиб келди, бу ажойиб совғаси учун унинг қўлинини ўпди. Бу орада ичкаридан чиққан Робия қизчани секин қўлидан олди-да, тўтиқуш солинган қафас билан бирга зинапоядан пастга олиб тушиб кетди.

Бобир ва Моҳим бегим икковлари ичкари хонага йўналдилар. Катта танобий уйнинг тўридаги шаҳнишинга эроний гидамлар ва зарбоф кўрпачалар тўшалган эди. Бобир Моҳим бегимнинг хипча белидан қучиб ўша томонга бошлаб борар экан:

— Ҳали ҳам келинчаклик пайтларингиздагидек сарвқоматсиз, Моҳим,— деди.

— Чунки сиз мен учун ҳамон йигирма ёшлик йигитсиз!

Моҳим бегим шундай деб, ички уйнинг очиқ эшигидан кўриниб турган шоҳона тўшакларига оловли бир нигоҳ ташлаб олди. Бугунги эҳтиросли тун, икковлари худди алана тилларидек гоҳ бутун борлиқлари бирлашиб, гоҳ яна ажрашиб, сўнг қайтадан олов мавжидга бирлашиб, икки тан бир вужудга айланган пайтлари хаёлига титроқ солиб ўтди. Ўша дақиқаларда Моҳим эрининг қулоғига: «Сиз менинг кўз очиб кўрган ягона ёримсиз, сочиниздан тирноғингизгача бутун борлиғингиз менга жонимдан ҳам азиз, энди сизни бошқа ҳеч кимга бермасмен!» — деб шивирлаган эди. Бобирнинг ҳозир уни ўпид: «Мен

шоҳ бўлсан ҳам сизнинг улур қалбингиз ўтруғида қула мен!»— дегани Моҳимнинг ўша тунги сўзларига жавобдек эшитилди. Бу сўзлар ва ўпичлар Моҳим бегимнинг борлигини шундай яйратиб юбордики, ёши ўттиз еттига борган бўлса ҳам ҳозир йигирма ёшли жувондек ҳусни жамоли очилиб кўзларидан ўт чақнаб, шўх оҳангда сўради.

— Мен ҳозир неки тиласам бажо келтиурмисиз?

Бобир Моҳимнинг янги бир кўшк қуриб беришни ёки катта харажатлар учун хазинадан қўшимча олтин сўрашини кутган эди. Унинг бунаقا истакларини сўзсиз баъжаргиси келиб турган Бобир:

— Сиздан молу жонни аямасмен, буюринг!— деди.

Моҳим бир лаҳза тараддуланиб турди-ю, паст ва жиддий товуш билан деди:

— Сиздан молу жон эмас, фарзандимиз Ҳумоюнни... Кобулга қайтаришингизни илтимос қилмоқчимен.

Бобир ҳам энди жиддийлашиб:

— Нечук?— деди.— Бутунлай Кобулга қайтсинми?

— Ҳа, сиздан ўтинамен!

— Моҳим, Ҳумоюн ёнимизда бўлишига мен ҳам ташнамен. Бироқ шимолий чегараларимизни Ҳумоюндек ишончли одам қўриқлаб турмаса, шайбонийзодаларни ўзингиз билурсиз...

— Билганим учун туну кун хавотирдамен. Икки йилдан бери Ҳумоюн Бадахшонда. Мен уни шунчалик соғинаменки, турган хоналарига кирсам, ўқиган китобларини варақласам кўзимга ёш келур.

— Моҳим, сиз билурсизки, тождорлару валиаҳдларга она бўлишнинг мashaққати беҳисоб... Шукр қилинг, менинг раҳматлик онам тортган азобларни худо сизнинг бошингизга солган эмас. Ҳумоюн мирзонинг ишлари жуда тараққида. Бадахшонлик содиқ йигитлардан тўртбеш минги уни асраб-авайлаб юрурлар. Шайбонийзодалар ҳам биз билан муроса қилишга мажбур, чунки ҳозир улар ички низоларини тинчтолмай, ўзлари билан ўзлари овора.

— Ундоқ бўлса Бадахшонга энди Қомрон мирзони юбора қолинг. Ахир у киши ҳам ўн олтига кирдилар, Гулруҳ бегим доим ўғилларининг эр етганидан фахрланиб гапиурлар.

Бобир хотинларининг орасидаги рақобатни жуда ёмон кўрарди. Чунки кундошлиқ рақобати болаларга таъ-

сир қилса, улар бора-бора бир-бирләрига душман бўлиб
қолишлари мумкинлигини биларди.

— Сиз Гулруҳ бегимнинг гапига эътибор бермайт
деган эдим-ку, Моҳим!

— Эътибор бермай иложим йўқ, ҳазратим! Чунки
Гулруҳ бегимнинг икки ўғли ҳам ёнларида. Мен бўлсан
узоқдаги Ҳумоюнни соғиниб қон ютурмен!

— Оббо!.. Майли, мен сизнинг тилагингизни бажо
келтирамен деб сўз бердим. Сўзимда турмоғим керак.
Ҳумоюнни жуда соғинган бўлсангиз, икки-уч ҳафтадан
сўнг уни албатта кўурсиз.

— Қаерда кўурмэн?— овози титраб сўради Мо
ҳим.— Кобулдами?

Бобир овозини пасайтириб:

— Одинапурда,— деди.

Одинапур Ҳиндистон чегарасига яқин жойда эди. Мо
ҳим бегим Бобирнинг ўша жойда қўшин тўплаётганини
эшитган эди. Афтидан, Ҳумоюннинг Кобулга келиб юр-
масдан, бор қўшини билан Бадахшондан тўғри Одина-
пурга ўтиб бориши ҳарбий мақсадларга мувофиқроқ ке-
лар эди.

Моҳим бегим энди хавотирли овоз билан сўради:

— Ҳазратим Ҳумоюнни ҳам Ҳинд юришига олиб бор-
моқчиларми?

Сир сақланаётган мавзуда гап очилгани учун Бобир
атрофга кўз ташлаб, бир лаҳза жим қулоқ солди. Ай-
вонда ҳам, ички уйларда ҳам икковларидан бошқа одам
йўқ эди.

— Сиз билурсиз, мен Мовароуннаҳдан умидимни
узганимдан берли ёруғ бир истиқболни Ҳиндистон то-
мондан изламоқдамен. Үн йилдан бери бир неча қайта
ишончли одамларимни Ҳиндга юбордим. Бизга хайриҳоҳ
кишилар ҳам бор экан, олти йилдан бери Ҳиндистон ро-
жаларидан саккиз марта элчилар келди. Улар Иброҳим
Лоди¹нинг зулмидан норози бўлиб, менй Ҳиндга устма-
уст чорламоқдалар. Иброҳим беҳад хасис эмиш. Мамла-
катлари хароб, ободончилик йўқ, улуслари пароканда...
Ўзаро урушлардан ҳаммалари безган. «Ҳинднинг қади-
мий маданиятини тикламоқ учун бизга сиздек маърифат-

¹ И б р о ҳ и м Л оди — афғоний мусулмон қабилаларидан чиқ-
қан подшоҳ.

лик тождор керак», деб панжоблик Давлатхон ўз ўғли Диловархонни бизга вакил қилиб юборибди.

Моҳим бегим Бобирнинг Давлатхон билан иттифоқ тузганини билар эди. Бобирни Иброҳим Лоди зулмига қарши чорлаётганлар орасида ҳиндиштонлик машҳур рожа Рано Санграм Синх ҳам бор эди. Бундан уч куй олдин Бобир шу рожанинг элчисини қабул қилган, лекин унга нима жавоб берганини ҳали кўпчилик билмас эди. Моҳим эрига майин тикилиб:

— Бир саволга ижозат беринг, ҳазратим,— деди.

— Марҳамат.

— Рано Синх билан ҳам иттифоқ туздингизми?

Бобир тасдиқ маъносида бош иргади.

— Мен Ҳиндга борсам, уни талаб келиш учун эмас, балки умр бўйи интилиб етишмаётгай орзуларимни ўша ерда рӯёбга чиқариш учун бормоқчимен! Қудратли бир давлат тузиб, пароканда ўлкаларни бирлаштириш умидидамен. Ҳозир шу мақсадга етишиш учун қулай фурсат келди.

— Бироқ бу мақсадингиз йўлида даҳшатли бир чоҳ — қонли уруш бор!

— Биз бу чоҳдан от сакратиб ўтмоғимиз мумкин.

— Ҳазратим, сиз от сакратиб ўтганингизда ҳам бу чоҳга минг-минг беваю сафирапарнинг кўз ёшлари тўкилгай! Бегона юртнинг оналари-ю, бевалари сиз билан урушда ўлган фарзандлари-ю, эрларининг ўлимини ке-чириармиккинлар?

— Ушал оналару беваларнинг фарзандлари-ю, эрлари ўша пароканда юртнинг ички урушларида озмунча ҳалок бўлмоқдами? Иброҳим Лоди гоҳ Панжоб билан, гоҳ Гвалиор билан, гоҳ Бангола билан, гоҳ бошқалар билан жанг қилур. Наригилар ҳам бир-бирлари билан таҳт талашиб урушурлар. Ҳар йили ўн минглаб навкар бу ўзаро урушларда беҳуда ҳалок бўлур. Мамлакат бизнинг Мовароуннаҳрдек хароб. Бу тўполонлардан безган қанча ҳинд беклари қочиб келиб мендан паноҳ топдилар. Шулардан бири Ҳиндубек беш йилдан бери менинг нуфузли амирларим қаторида юрганини билўрсиз. Улар ҳам мени Ҳинд сари чорлайдилар, мамлакатни обод қилишни, илму маърифатни юксалтиришни ўйладилар.

— Агар бундай маърифатлик подшоҳ ўз юртларидан чиқса эди, улуғ давлат тузиш йўлида ноилож тўкиладиган қонлар осонроқ унутилмоғи мумкин эди. Аммо бошқа

юртдан борған фотиҳларнинг тўккай қонлари, фотиҳлик қиличидан етган дил яралари асрлар давомида унут бўлмағай, тузалмағай! Мен ана шундан изтиробдамен, ҳазратим!

Моҳимнинг сўнгги сўзлари Бобирнинг дилидаги оғрийдиган жойига тегиб кетгандай бўлди. У озорланиб ўрнидан турди-да:

— Тақдир қиличи бизнинг дилимиён озмунча яраладими?! — деди. — Қани бу яраларнинг унут бўлгани? Қани тузалгани?!

Бобир кафтини кафтига қаҳр билан уриб, савдарбошини чақирди:

— Мен боя айвонда чоғир келтиришни буюрган эдим! Нечун келтирмади?!

Унинг авзойи кескин ўзгарганини, ҳозир савдарбоши кирса бирон жазо олиши мумкинлигини Моҳим бегим сезди-ю, тез ўрнидан турди.

— Ҳазратим, чоғир ичгингиз келса, марҳамат, мен сақлаб қўймишмен, — деб ипак парда билан тўсилган токчадан олтин кўзача тўла май ва иккита нафис чинни пиёла олди. Бошқа токчада гулдор дастурхон билан бир лаган норинж турган эди. Дастурхонни апил-тапил шаҳнишинга ёзиг, норинжни унга қўйди-да, Бобирни ўтиришга таклиф қилди. Кўзачадан чинни пиёлага хушбўй олтин ранг майни қуяр экан:

— Ижозат берсангиз, мен ҳозир соқийлик қилсам! — деди.

Бобир ўтирас экан, ижозат маъносида бош ирғади. Моҳим пиёлага ярмидан ошириброқ май қўйди-ю, чап қўли кўксида, ўнг қўли билан Бобирга узатди:

— Олинг, ҳазратим, сизга узоқ умр, баҳту саодат ёр бўлғай!

Пиёладаги тиниқ хушбўй ичимлик Моҳимнинг қўли билан бирға хиёл титраб турибди. Бобир пиёлани олар экан, хотини илиқ бир гап кутаётганини сезди. Лекин ҳозир унинг қалбида қандайдир совуқ изфирин хуруж қўлмоқда эди. Ҳарбий ва сиёсий ишларнинг қор бўрони хаёлларини чирмаб, гоҳ ҳазора қабилалари билан бўлган қонли тўқнашувларга олиб кетар, гоҳ Панжобга борниқ чигал муаммолар, гоҳ қарвон йўлларида талончилик қилган қароқчиларни жазолаш ташвишлари эсига тушар, гоҳ оғир замбаракларни синовдан ўтказиш пайтида ўларнинг йўғон мис қувури ёрилиб кетгани ва тўпчилар-

дан беш киши ўша жойда ҳалок бўлгани кўз олдига келар эди. У совуқ изфирин чангалидан чиқиб кетишга ва аввалги илиқ руҳий ҳолатига қайтишга интилиб, дардли товуш билан деди:

— Моҳим, узоқ умру баҳтли ҳаёт мен учун ушалмайдиган орзу бўлса керак.

— Нечун? Агар тангрим насиб қилса, ушалиши ҳеч таг эмас. Илоҳим насиб қилсин!

— Айтганингиз келсин...

Бобир майни сипқорди-ю, пиёланни Моҳим бегимга қайтариб берди. Норинждан биттасини пўчоғини қўли билан арчиб, ярим палласини еди. Сўнг Моҳим бегимга «Яна қуинг!» ишорасини қилди.

Иккинчи пиёладан кейин вужудига майнин бир илиқлик таралди, бояги совуқ изфирин хаёлидан узоқлашгандай бўлди-ю, Моҳимга кўнглини очиб гапиргиси келди:

— Бу амирлар, элчилар, иттифоқдошлару ёғийлар, яна юз хил давлат ишлари қалбимни юз бўлак қилиб, юз томонга тортадир, Моҳим! Гоҳо менинг кўнглим ҳам парчаланиб кетган, ўзаро урушларда азоб тортаётган мамлакат каби алғов-далғов бўладир! Ҳаётимда гўё шундай бир қутб борки, унга барча амирлару элчилар, чопқинлару урушлар тўпланишишdir. Бу қутбда мен совуққонликка ўрганишишмен, чунки сиёсат бобида одамларга худди шатранж тахтаси устидаги пиёдаю сипоҳийларга қилған шафқатсиз муомилани қилсанг, уларни ақлу фаросат, ҳисобу китоб билан идора этмасанг, муродга етолмассен. Аммо бу шафқатсиз сиёсатнинг совуқ изфиринидан ўзим ҳам тўнғиб кетурмен. Сўнг май ичиб исингим келур. Бу совуқ қутбда шеър ёзишга ҳам ҳафсалам қолмас!

— Ўшал нохуш қутб ўртусида бошқа илиқ маконингиз йўқми, ҳазратим?

— Бугун... мана ҳозир яна бир марта пайқадимким..., мен учун оламда энг илиқ қутб — Сиз, Ҳумоюн, Гулбадан... Сизлар билан бўлганда туйғуларим жўшиб, ижод қилгим келур.

— Үндоқ бўлса, доим биз билан бирга бўлинг! Бундан биз ҳам беҳад баҳтиёр бўлурмиз!

— Қани эди!.. Аммо бунинг учун мен давлат ишларидан бутунлай воз кечмоғим керак.

— Бутунлай воз кечишингизга ҳожат йўқ, ҳазратим.

Ахир сиз Кобулда катта давлат барпо этдингиз. Қундуздан Қандаҳоргача, Бадахшондан Синд дарёсигача бўлган пароканда ўлкаларни бир марказ атрофига бирлаштиргингиз. Кобул ўз тарихида биринчи марта шундай улкан мамлакатнинг пойтахтига айланди. Бу ерда сиз янги кўшклар қурдирдингиз, янги боғлар барпо этдингиз, янги ариқлар қаздириб, кўп жойларни обод қилдингиз. Шу ҳаммаси сиз учун азиз эмасми?

— Ношукурлик бўлмасин, мен Кобулда кўп масъуд купларни кўрдим. Бироқ катта орзуларимни рўёбга чиқаришга ҳамон ожизмен. Шу менга тинчлик бермайдир. Кобул атрофидаги кўп жойлар ҳали қаламий эмас, сайфий...¹ Ана, Фазнида неча асрдан бери бузилиб ётган улуг банд² бор. Маҳмуд Фазнавий банди дерлар. Агар шу банд тикланса, чўл бўлиб қолган катта бир водий яна яшнаб кетгай. Мен шу бандни тузаттироқчи бўлдим. Лекин сарфини ҳисоблаб кўрсам, хазинам етмас экан... Бу аҳволда мен Қамолиддин Беҳзоддек улуг истеъдодларни қайси давлатимга таклиф этамен? Беҳзодни Шоҳ Исмоил Табризга олиб кетмишdir. Чунки ҳозир шоҳ мендан қудратлироқ. Қанчадан-қанча илму ҳунар аҳли, меъморлару муҳандислар бор, агар чорласам, кўплари келурлар. Лекин... Кобулга ўзи келган меъмор Мавлоно Фазлиддинга муносиб иш топиб берганим йўғу бошқаларни қандоқ чорлай?

Моҳим бегим Бобирнинг Ҳиндистонга интилишига нақадар кўп ва мураккаб сабаблар борлигини сезиб:

— Хоразмлик ватандошингиз Беруний ҳам Ҳиндистонга борган,— деди.— Ҳазратим, сиз унинг «Ҳиндистон» отлиқ китобини қандай ўқиганингиз эсингиждами?

Бобир Фазнидан топиб келинган бу китобнинг эски араб тилидаги нусхасини қийналиб ўқиган бўлса ҳам мазмунини жуда ёқтирган эди.

— Ҳа, Ҳинд ҳаётини Берунийчалик теран таҳлил ётган олим кам бўлса керак. Беруний ҳам менинг Ҳиндни кўриш иштиёқимни оширди.

— Биламен. Ҳиндда сизни оҳанрабодай ўзига тортиган яна бир сиймо Ҳисрав Деҳлавийдир.

¹ Қаламий — амри фармон билан солиқ тўлайдиган қаламрав ерлар. Сайфий — ҳали бўйсунмаган, қилич кучи билан солиқ тўлайдиган ерлар.

² Банд — сув омборининг тўғони.

— Сўзингиз чин, Моҳим. Мен Деҳлавийнинг кўп ашъорларйни «Муҳтасар» китобимда келтирмишмен. Деҳлавийнинг отаси амир Маҳмуд Қарши билан Шаҳрисабз оралиғида яшаган лочин исмли туркий қабиладан экан. Мен буни яқинда билдим. Лочин қабиласи Чингизхон истилосидан қочиб, Ҳиндга бориб қолган экан. Хисрав Деҳлавий Давлатноз исмли ҳинд муслима-сидан туғилмишdir.

— Ҳазратим,— деди Моҳим Бобирга мулоийим тикилиб,— сиз ҳам шоирсиз, ҳам олимсиз. Мен орзу қилардимки, барча эл-улуслар сизни ҳам Берунийдек, Деҳлавийдек фақат яхши сўзлар билан тилга олсалар...

Бобир Моҳим бегимнинг ботиниб айттолмаган сўзларини тушунди-ю, юзи тундлашди. Ҳаёлида яна ўша соvuқ изғирин қўзгалди.

— Сиз менинг подшоҳ ҳам эканимни нечун эслатмоқчи эмассиз?

— Чунки мен сизни ижодингиз олови ёнган илиқ қутбда муқим туришга чорламоқчимен!

— Мен ижод қутбida умрбод қолмоқчи бўлиб, Даҳкатда, Осмон Яйловда яланг оёқ юрганимда нечун учрамадингиз? Энди кеч!.. Подшоҳни барча эл-улуслар фақат яхши сўзлар билан тилга олиши — ушалмайдиган бир орзу. Мен одамларнинг мақтовига ҳам, таъна-ю, ма-ломатига ҳам роса тўйганмен!

Бобир яқинда ёзган бир ғазалидан икки сатрини жўн сўзга ўхшатиб оҳангисиз айтди:

— Улуснинг таъну таърифи¹ менга, Бобир, баробар-дур, бу оламда ўзимни чун ёмон-яхшидин ўткардим.

— Рост, бизнинг ҳеч биримиз дунёning аччиқ-чучугини сизчалик кўп татиб кўрган эмасмиз... Оламнинг бераҳм дағал жабру жафоларини бунчалик кўп кўра туриб шу қадар нафис шеърлар битишингиз, шунчалик назокатли оҳангда куйлашингиз мени доим бир мўъжизадек ҳайратга солур. Ҳазратим, сиз улуғ шоирлар даврасидан жой олмоғингиз керак. Мен гоҳо қўрқаменки, жаҳонгирилик сизнинг шоирлигингизга соя ташлаб қўймасмикин?

— Ҳинд юришидан воз кечинг демоқчимисиз?

Моҳим бегим Бобирни бу ниятидан қайтаролмаслигини энди аниқ сезди.

¹ Таъну таъриф — таънаси-ю, мақтови.

— Ҳазратим, ҳеч бўлмаса Ҳумоюнни Кобулда қолдиринг! Ахир сиз Ҳиндга кетсангиз кимдир Кобулни бошқариши зарур-ку!

— Мен йўғимда Кобулни сиз идора этгайсиз, бегим!

— Наҳот! Ахир мей аёл кишимен! Шариатга биноан хотининг мавқеидий ўғилларнинг мавқеи баландроқ бўлур, Кобулда ўғилларингиз Мирзо Комрон билан Мирзо Аскарий борлар,

Бобир бу муаммонй бирпасда совуқонлик билан ҳал қилди:

— Мирзо Комронга Қандаҳорни бергаймен. Аскарий иккаласи шу ҳафта Қандаҳорга кетурлар.

Қандаҳор бу ердан отда бир ҳафталиқ йўл. Ўғиллари кетса Гулруҳ бегимнинг ҳовури пасайиб қолиши аниқ.

— Қобул менинг хос шаҳрим,— деб давом этди Бобир.— Уни ҳаргиз ўғилларга бермасмен, фақат сизга топшириб кетгаймен. Қосимбек қавчин хизматингизда бўлур. Барча ҳарам аҳли мен йўғимда сизга бўйсунғусидир!

Кутилмаган бу иноятдан Моҳим бегим энди ҳаяжонга тушди. Подшоҳ ўз хотинига бунчалик катта ишонч билдириши жуда кам учрайдиган ҳодиса эди. Айниқса, бутун ҳарам, ҳатто Гулруҳ бегим ҳам Бобир йўғида Моҳим бегимга бўйсуниши, бунга халақит бериши мумкин бўлган Мирзо Комрон ва Мирзо Аскарийларнинг Қандаҳорга жўнатилиши Моҳим бегимни қийнаб юрган ишқал тугунни бирдан ечиб юборадигандек енгиллик берди:

— Ҳазратим, иноятингиздан бошим кўкка етди! Аммо билурсизки, ожизангиз ҳокимликка ташна эмасмен.

— Қимки ҳокимликка ташна бўлмаса, мен ўшал зотга кўпроқ ишониб ҳокимият бергаймен. Барча ташқи ишларга Қосимбек мутасадди бўлғай. Ҳиндол ёнингизда. Сиз унинг номидан ҳам амру фармон берсангиз, шариатга мос келур.

Моҳим бегимнинг бояги изтиробли ўйлари бир лаҳзага бўлса ҳам хаёлидан узоқлашди. Бобирнинг катта ишончи қалбига шунчалик ёқиб тушгани бегимнинг ўзини ҳам хиёл таажжублантириди. Қандаҳорга ҳоким бўлиш Комрон мирзога ҳам ёқиб тушишини ўйлади. Бобир икки томонни ҳам тинчтадиган нозик бир сиёsat юргизаётганини бегим энди сезди. Одамлардаги ички

манфаат туйғусини бехато топиб, шу туйғуга суюнган ҳолда уларни моҳирона бошқара билиш катта бир санъат экани, Бобир йиллар давомида мана шу санъатни қанчалик яхши әгаллаганини бегим ҳозир жуда яқиндан кўрди ва гўё ўз тажрибасидан ўтказди. Комрон мирзони Қандаҳорга жўнатиш, Моҳим бегимга Кобул ихтиёрини бериш, бошқа кўп амиру бекларнинг кўнглидагини топиб, ўринларини алмаштириш — бу ҳаммаси шатранж доналарини уларга жуда мос келадиган бир маҳорат билан суриш ва ўринларини алмаштиришга ўхшаб кетарди. Шундай бўлса ҳам Бобир Моҳим бегимнинг кўнглидаги энг нозик дардни пайқаб, уни кундоши Гулруҳ бегимнинг қўли етмайдиган юксак марта-бага муносиб кўргани беҳад ёқимли эди.

— Ҳазратим, сизнинг улуғ ишончингиз менинг танимга янги бир жон ато қилди! Бироқ... не қиласки, мен дунёдаги барча неъматлардан, ҳатто ўз жонимдан ҳам сиз билан Ҳумоюнни ортиқ кўурмэн. Сиз ҳозир раҳнамолик санъатида беназирсиз. Шундай бўлса ҳам фотиҳларнинг фаними кўп бўлур. Ҳиндда беадад эл. Беадад ёғий. Ўйласам ваҳмим келур!

— Жанг хатарсиз бўлмас. Сиз мунча изтиробга тушмоқдасиз, Моҳим? Сизга не бўлди?

— Мен Ҳумоюн учун ҳам изтироб чекмоқдамен... Ҳеч бўлмаса Ҳумоюн Қобулда қолсин, сиздан ўтина-мен, ҳазратим!

Бобир Моҳим бегимга энди озорланиб кўз ташлади: наҳотки у «эрим хатарли жангда ўлса ҳам ўғлим ёнимда тирик қолсин» демоқчи?

— Ҳумоюн тахт вориси,— деди Бобир ранжиган товуш билан.— Шунинг учун қўшинда мен билан бирга бориши шарт... Эскидан одат шундайлигини нечун унунтингиз?

Бу одатнинг маъноси шу эдикки, агар узоқ юртдаги жангда подшоҳ ҳалок бўлса, тахт вориси дарҳол қўшинга бош бўлиши керак эди, акс ҳолда қўшин бошқа даъвогарлар томонига ўтиб кетиши мумкин эди. Бобир бу одатни эслатиш билан «мен агар оламдан ўтсам, ўрнимга Ҳумоюн қолишини истаб, уни бирга олиб кетмоқчиман» демоқчи эди.

Моҳим бегим Бобирнинг гапидаги бу маънони фаҳмлади-ю, изтироби баттар ошди. Назаридা, Бобир Ҳиндистондан умрбод қайтиб келолмайдигандай, олдинда-

ги юриш «борса келмас» юриши бўладигандай туюлди.
Моҳим бегимнинг юраги эзилиб, кўзлари жиққа ёшга
тўлди.

— Э худойим! Дунё нечун бундай беомон яратилган?
Қачон бехатар кунларга етгаймиз?

Бобир жим эди.

ЛАХУР. ПАНИПАТ. ДЕҲЛИ. Янги қирғоқлар.

1

Кўшин илгарилаган сари ўрмон қалинлашиб борар эди. Чинордай баланд банъян дараҳтларининг очиқ илдиздари шохларидан пастга осилиб тушиб, ерга кириб кетган. Йўғон чирмовуқлар дараҳтдан-дараҳтга ўтиб, ҳаммаёқни ўраб-чирмаб ташлаган. Оёқ тагида ўсиқ буталар. Ҳаво дим ва рутубатли.

От устида келаётган Бобир енгил шоҳи кўйлак кийган бўлса ҳам терлаб-пишиб кетган. У банъянларининг шамолдан шовуллаётган баланд шохларига термилиб қарайди. Тепада эсиб турган шамол чангальзор ўрмон ичида бораётганларга шабадасини ҳам теккизолмайди.

Ўрмондан маймунларнинг шўх қий-чувлари эшитилиб туради. Гоҳо товусларнинг «қў-ў-ўв» деб кескин ва ноҳуш овоз билан қичқиргани қулоққа чалинади.

Бир пайт ўрмон ичида тuya етаклаб пиёда кетаётган навкарлардан аллақайсисининг жон аччиғи билан чинқиргани эшитилди. Сўнг сафдан-сафга:

— Илон чақибди!

— Кўзойнакли илон! — деган шивир-шивир тарқалди.

Тўп ортилган аравалар томондан оти лойга ботган уста Алиқул ташвишланиб чиқиб келди-ю, Бобирга арз қилди:

— Подшо ҳазратлари, оғир тўпларни бу чангальзор ўрмондан ўтқазиб бўлмас! Оёқ таги лой! Тўп ортилган аравалар ҳаммаси тиқилиб қолди!

Бобир орқароқда келаётган Тоҳирга ўгирилиб қарди:

— Раҳнамони чорланг, бек!

Йўл бошловчи Лаъл Кумар олдинда фил миниб бормоқда эди. Тоҳир уни чақириб келганда Бобир минган саман от филдан ҳуркиб асабий пишқирди. Лаъл Кумар филини тўхтатиб, унинг қулогига бир нима деган эди.

— фил хартумини юқорига чўзиб, эгасини пастга тушириб қўйди:

Лаъл Кумар кафтларини бир-бирига қўйиб, кўзи аралаш пешонасига тегизди-да, Бобирга таъзим қилди. Бобир унга форсча гапирди:

— Бу йўл бизга тўғри келмади. Бошқа йўл топиш керак.

— Ҳазрат олийлари, бошқа йўлларни сув босган. Бу ер Панжоб. Бешта дарёмиз бор. Ҳаммаси тошган.

— Панжобда аравалар ўтадиган йўл кўп деб эшиганимиз. Бу йўлда аравалар тиқилиб юролмай қолди. Биз адашдикми?

— Адашганимиз йўқ, ҳазратим. Аравалар қаерда тиқилди?.. Рухсат беринг, фил билан чиқарай. Бугун юрсак, эртага яхши йўлларга чиқамиз. Лахур яқин.

— Филни бошлаб боринг, араваларни чиқариб берсин,— деди Бобир уста Алиқулга. Кичкина жуссали озғин Лаъл Кумар тоғдай баланд қора филга яна унинг хартуми ёрдамида минди. Сўнг филнинг супрадай катта қулоқларига тиззалари билан ниқтаб, қўлидаги учи қайрилган темир хилла — кажак ёрдамида уни ўнгу сўлга йўналтириб, тўп ортилган араваларга қараб кетди.

Туялар тортолмай қолган араваларни фил бирпасда балчиқдан чиқариб берди.

Араваларнинг бирида оёғини илон чаққан навкар кўм-кўк қўкариб, инграб ётибди. Унинг тирик қолини гумон бўлса ҳам яланг оёғининг илон заҳар солган жоийига доривор барглар қўйиб боғлашган, заҳар баданга кўп тарқалмаслиги учун тиззасини ола чилвир билан танғиб ташлашган эди.

Аравалар қўзғалди. Фил мингган йўл бошловчи яна олдинга ўтиб кетди. Йўл юрганлари сари рутубат кучайиб, нафас олиш оғирлашиб борар эди.

Кун оққанда Рави дарёси томондан юзтacha қуролли одами билан Ҳиндубек чиқиб келди. Хос навкарлар уни яхши билишарди. Асли деҳлилил сипоҳийлардан бўлган Ҳиндубек Иброҳим Лоди билан келишолмай бундан етти йил бурун Қобулга борган ва Бобирнинг хизматига кирган эди. Қирқ ўшлардан ошган бу йигит Бобирнинг Ҳиндистонга қилган аввалги юришида кўп жасорат кўрсатган эди. Бобирга унинг довюраклиги билан бирга ватанидаги ички парокандаликни тугатниш йўлида кўп қон тўқмасликка, иложи бўлган жойларни жангиз олишга

астойдил интилиши ҳам жуда маъқул тушган эди. Ҳин-
дубек туркий, форсий тилларни ҳам мукаммал ўрганган,
имлли, маърифатли, дилкаш киши бўлганлиги учун Бо-
бирнинг энг яқин мусоҳиб беклари қаторига кирган эди.
Бундан олдинги юришда Қашмирдан оқиб келадиган
Жилом дарёси бўйидаги Бҳира Ҳиндубекнинг ҳаракат-
лари билан жангсиз олингандаги Бобир бу обод вилоятга
Ҳиндубекнинг ўзини ҳоким тайинлаб, Кобулга қайтиб
кетган эди. Ҳозирги юришда Бобир Лахўрни ҳам қон
тўқмасдан жангсиз олиш умидида эди ва Ҳиндубекни
воситачи қилиб, Лахўр амирлари билан музокара олиб
бормоқда эди.

Бобир Ҳиндубекни узоқдан таниди ва у билан якка-
ма-якка гаплашиш учун отини йўлдан четроққа бурди.
Ҳиндубек отдан тушиб, таъзим қилди.

— Сўзланг, бек!

— Ҳазратим, Давлатхоннинг авзойи бузук. Мени тут-
тирмақчи бўлганини сезиб қочиб келдим.

— Нечун? Ахир Кобулга ўғли Диловархонни юбориб,
биз билан иттифоқ тузган эди-ку. Мен уни отам деган
эдим! Қанча яхшиликлар қилган эдим!

— Давлатхон ҳаммасини унуглан. Белига иккита қи-
лич тақиб олган. Мен бунинг сирини ўғли Диловархон-
дан сўраб билдим. Бир қилични Деҳли сultonни Ибро-
ҳим Лодига қарши тақсан эмиш. Иккинчи қилични
сизга қарши.

— Ўғиллари ҳам ёғийлик мақомидами?

— Диловархон сизга хоҳон, келиб мулозимат қилмоқ-
чи, Лахўрни жангсиз бермоқчи. Отаси мени туттирмақчи
эканини Диловархон айтиб, бир фалокатдан қутқарди.
Лекин катта ўғли Фозихон отаси томонида.

— Оламхон-чи?

— Оламхон Иброҳим Лоди билан урушиб мағлуб
бўлгандан бери қайта урушишга журъати йўқ. Лахўрга
борганингизда чиқиб мулозамат қилишга сўз берди. Агар
Фозихон шикаст еса, кўпчилик беклар бўйин эгурлар, Лахўр
жангсиз олинур. Лекин... ҳазратим, нечун Лахўрга
бундай ёмон йўллардан бормоқдасиз?

— Панжоблик иттифоқдошларимиз пешвоз чиқарган
раҳнамо бизни шу йўлга бошлади.

— Қани ўшал раҳнамо? Ижозат беринг, мен бир таф-
тиш қилиб кўрай.

Фил минган йўл бошловчини яна чақириб келдилар.

Лаъл Кумар филини чангальзорга яқинроқ бир жойда тұхтатди ва яна жуфтланған құлини пешонасига қўйиб, эгилиб саломлашди. Ҳиндубек ҳам кафтини жуфтлаб, пешонасига теккизди-да, ўзини осойишта тутиб, ҳиндча гапириша бошлади:

- Асли қаерликсиз?
- Агралиман, соҳиб.
- Панжобга қандай келиб қолгансиз?
- Иш излаб келганман.
- Шундай зўр филингиз бор экан. Иброҳим Лоди сизга иш топиб бермадими?
- Иброҳим Лоди хасис. Бутун мамлакатнинг олтинларини йиғиб, ҳазинасига яшириб қўйган. Қурилишга сарфлаш йўқ. Одамларни ишлатиб, рози қилиш йўқ! Безор бўлдик!
- Тўғри айтасиз,— деди Ҳиндубек.— Мен ҳам Лодиларнинг зулмидан қочиб келганман. Искандар Лодименинг отамни саркашликда айблаб, қутирган филнинг оёғи тагига ташлаб ўлдирган.

Филбон Ҳиндубекка мароқ билан тикилди-ю:

- Қшатрий² ларданмисиз?— деди.
- Ҳа, асли отим Индри. Бобир ҳазратлари Ҳиндубек деб атадилар. Бу ном ҳаммага маъқул бўлди. Ҳўш, сизнинг отингиз нима?
- Лаъл Кумар.
- Сиз ҳам Иброҳим Лодининг зулмидан қочиб келган экансиз. Энди бу зулмдан бизни ким қутқаради деб ўйлайсиз?
- Худо.
- Бандаларидан-чи?
- Лаъл Кумар ўйланиб қолди:
- Давлатхонми?— деди Ҳиндубек.
- Давлатхон сахий одам. Фозихон ҳам Иброҳимдан яхши.
- Ҳиндубек овозини пасайтириб сўради:
- Ростини айтинг, сиз бу қўшинни нега бу йўлдан бошлаб боряпсиз?
- Фозихон айтган йўл шу.

¹ Искандар Лоди—Иброҳим Лодининг отаси. 1517 йилда ўлган.

² Қшатрий—ҳиндлардаги асосий тўрт табақанинг бири, ҳарбийлар.

— Фозихон нега ўтиб бўлмайдиган ёмон йўлдан юргин деган, биласизми?

— Булар учун яхши йўл шу.

— Нега? Булар сизга нима ёмонлиқ қилди?

— Битта золим подшоҳ — Иброҳим бизга озмиди?

Яна биттаси келяпти!

— Фозихон сени алдаган!

Лаъл Кумар филини чангалзор томонга кескин бурди-ю, қичқирди:

— Булар босқинчилар! Булар Бажур қўрғонида уч минг йигитимизни қиличдан ўтказган! Шаҳару қишлоқларимизни талатган!

Лаъл Кумар шундай деяр экан, филини чоптириб, ўрмон ичига қараб қочди.

— Ҳазратим, бу раҳнамони туттиринг! Бу ёғий кишиси! Сизни хароб қилмоқ учун ёмон йўлга бошлаган!

— Тутинг уни! — қаҳрланиб қичқирди Бобир.— Нобакорни олдидан тўсиб чиқинг! Тез!

Отиқлар филнинг кетидан интилдилар. Улардан учтаси катта башнян дарахтини айланиб ўтиб, филнинг йўлини тўсиб чиқдилар. Филбон қўлидаги темир кажак билан филни қаттиқ хиллалаб, бир нарса деб қичқирди. Фил отларнинг бирини оёғи билан тепиб йиқитди, иккинчи отнинг бўйнига хартумини ўраб, силтаб итқитиб юборди. Буни кўрган учинчи отлик дарахт панасига қочиб, зўрға қутулиб қолди.

Қаҳри келган фил баҳайбат товуш билан наъра тортиб, йўлида учраган йўғон чирмовуқларни узиб ўтар, катта-катта шоҳларни қарсиллатиб синдирадар ва отликлар киролмайдиган қалин чангалзорда тобора узоқлашиб борар эди.

— Ўқланг! — деб қичқирди Бобир.

Лаъл Кумар филнинг улкан бўйнига бағрини бёриб, унинг баланд сағриси ва қулоқлари панасида биқиниб ётар эди. Орқадан ёғдирилган ёй ўқларидан кўпчилигини дарахтларнинг шоҳлари ва чирмовуқлар ўтказмади. Уч-тўртта ўқ шоҳлар орасидан ўтиб филнинг орқасига урилди, лекин пўлатдай қаттиқ ва қалин фил терисига ботолмай, ерга учеб тушди.

Уста Алиқулнинг тўғанга дозлари милтиқларини ўрмонга тўғриладилар. Бироқ барқандозлар чақмоқ чақниб, то милтиқ пилтасини ёндиргунларича Лаъл Кумар минган фил йўғон ва қалин дарахтлар панасига ўтиб кўзга

Қуринмай кетди. Фил зарбасидан йиқилган ҳар икки отердан туролмай уялаб ётар, уларнинг устидаги навкарлар ўлган бўлмаса ҳам оёқ-қўллари шикастланган эди.

— Ярадорлар аравага олинсин! — буюрди Бобир. — Бизни адаштириб ҳалок қилмоқчи бўлган нобакор жазоланмоги керак! Тўғандозлар отланиб, ўрмонни айланниб ўтсинглар!

Тўғандозлар шоша-пиша отланиб, айланма йўл излай бошладилар. Аммо ҳаммаёқ чангальзор, ботқоқлик эди.

— Қани, Ҳиндубек, энди бизга сиз раҳнамолик қилинг!

— Бош устига, ҳазратим!

Ҳиндубек кечки пайт уларни кенг бир кўкаламзор во-дийга бошлаб чиқди. Беҳад ҷарчаган Бобир шу кўка-ламзорга чодир тикирди.

Ўрмонда кийимлари тириалиб йиртилган, отлари лойга беланган тўғандозлар Лаъл Кумарни тополмай қайтдилар. Шунинг устига Лахўрдан амир Давлатхон, унинг ўғли Диловархон эллик-олтмишта мулоғим ва навкарлари билан Бобирнинг қароргоҳига яқинлашиши. Диловархоннинг аввалдан хайриҳоҳлигини яхши била-диган Бобир хиргоҳда уни ўрнидан туриб кутиб олди ва ўнг томонда ўтирган эътиборли беклари орасидан жой кўрсатди.

— Жаноб Диловархон, падари бузрукворингиз нечун иттифоқни бузниб, бизга ёғийлик мақомида қилич қайрамишлар?

— Ҳазрати олийлари, отамни оғам Фозихон йўлдан урди. «Ёт қўшин келса Лахўр биздан кетади, булар ҳам бизга Иброҳим Лодидай душман» деб ишонтириди.

— Шунинг учун Давлатхон алдамчи раҳнамо юбо-риб, бизни ўрмон ичидаги адаштирган экан-да?

— Аммо бу фитнадан отамнинг хабарлари йўқ, ҳазрати олийлари! Бу — Фозихоннинг иши. Агар отам шундай қилганларида бу ерга ўзлари келмас эдилар. Лахўрда қон тўкилмасин деб, сиздан иноят истаб келдилар.

— Бизнинг иноятларимизга фақат сиз муносибсиз, жаноб Диловархон! Аммо отангиз қилмишларига яра-ша жазо олгусидир! — Бобир шифовулгә юзланди: — Давлатхон сўнгги пайтларда белларига иккита қилич-тақиб юрган эмиш. Қани, ўша қиличларини биз ҳам бир кўрайлик... Ҳар икки қиличини бўйнига осиб киритинглар!

Қўп ўтмай икки зўр навкар сппоқ соқолли кекса Давлатхонни икки билагидан маҳкам ушлаб чодирга олиб кирди. Чол навкарларнинг қўлидан бўшамоқчи бўлиб асабий силтанар, унинг бўйнига осилган иккита узун қилич кўкрагига урилиб селанглар эди. Давлатхон Бобирга алам билан тикилиб деди.

— Подшоҳ ҳазратлари, мен асир олинган эмасман, ўзим келдим! Бу қандай шафқатсизлик?

— Сиз мендан элчи бўлиб борган Ҳиндубекни туттиromoқчи бўлибсиз! Агар ниятингизга етганингизда, Ҳиндубек омон қолмас эди! Кейин биз ҳам чангалзорда балчиққа ботиб, Фозихоннинг қопқонида жон берармилик? Бизга шафқат қилганларинг шуми? Шафқатсизларга биз ҳам шафқатсизмиз!— Бобир шифовулга буюрди:— Бу одам оиласи билан бирга Лахўрдан Бхирага бадарға этилсин. Бхиранинг Милват қўргонида ҳисбда сақлансин!

Бўшашиб ҳеч нарса дёёлмай қолган Давлатхонни олиб чиқиб кетдилар.

2

Қуз ва қищ ўтиб бораётган бўлса ҳам, дарахтлар яшил либосини ечмас, «дун» деб аталадиган бағри кене, сайдон Ҳинд водийлари йил бўйи баҳордагидай кўкалам бўлиб туар эди.

Жамна дарёси бўйлаб жанубга томон ҳаракат қилиб бораётган Бобир қўшини Деҳлидан эллик чақиримча шимолдаги Панипат шаҳрига келиб тўхтади. Деҳли сultonи Иброҳим Лоди юз мингга яқин аскар ва бир ярим минг ҳарбий фил билан Агра томондан яқинлашиб келмоқда эди. Иброҳим Лоди шу филлари ва аскарлари билан бултур Деҳли бўсағасида Оламхон, Диловархон ва бошқа душманларининг қирқ минг кишилик қўшинини торморм келтирган эди, Бобирнинг қўшини эса ўн икки мингдан ошмас эди. Ёвнинг сон жиҳатидан беқиёс даражада устунлиги кўпчилик бек ва навкарларнинг қалбига ғулғула солар бўлишса, атроф ҳаммаси нотаниш ерлар, бегона юрт, қаерда жон сақлашади?

Ички беклар орасида юрган Тоҳир кўпроқ Бобирнинг ҳарбий тажрибасига ва уста Алиқул бошлиқ тўғанган дозлар ва тўпчиларнинг қуролларига умид боғлаган эди. Жаҳонда ҳали жуда кам тарқалган бундай қурол-

Бобир Иброҳимийиг қўшийнида йўқ эди. Бобир ўзида йўқ ҳарбий филлар ҳужумини мана шу қуроллар кучи билан бартараф қилиш фикрида эканини Тоҳир билар эди.

Улар Панипат шаҳри билан Жамна дарёсининг оралидан тўғанг ва тўп отиш учун қулай бўлган бир жойни топишиди-ю, яқин-йироқлардан олиб келинган барча араваларни ярим доира шаклида саф қилдиришди. Етти юздан ортиқ арава бир-бирига занжирдай маҳкам тиркишлар¹ билан боғланди. Араваларнинг олди ва орала-рига ёй ўқи ўтмайдиган темир қалқонлар ўрнатилди. Тўғандозлар ва тўпчилар шу қалқонлар ортига бекиниб ўқ отишни машқ қилдилар.

Аравалар баланд бир тепаликнинг этагига — олди нишаб жойга келтирилди. Улар ўз-ўзларидан юриб кетмаслиги учун фидиракларнинг тагига ёғоч тўсиқлар тираб қўйилди.

Ҳарбий машқлар ўтказилган куни Бобир аравалар ортидаги тепаликда отлиқ туриб, фидираклар олдидаги ёғоч тўсиқларни бирваракайига олишни ва барча араваларни баробар юргизиб кўришни буюрди.

Мулозимлар қаторида юрган Тоҳир аравалар сафи-нинг нариги четига от чоптириб бориб, саркарданинг буйруғини Мустафо тўпчига етказди. Ҳамма пиёдалар, тўпчилар, зарбзан ва барқзанлар² буйруқни бажаришга ҳозирландилар. Ҳаммага кўринадиган жойда турган уста Алиқул:

— Аравалар сурисин! — деб қичқирди.

Аравалар баъзиси ҳадеганда ўрнидан жилмади, баъзилари эса бирдан тезлаб кетди. Аравалар сафи эгри-бугри бўла бошлади, ора-орага боғланган тирқишлирдан бир қанчаси узилди, темир қалқонлар қулаб тушди.

— Тўхтанг! — буюрди Бобир. — Машқни такрорла-ting, жаноб Алиқулбек, токи бирорта тиркиш узилма-син, бирорта қалқон ҳам қуламасин!

Одамлар терлаб-пишиб, араваларни юқорига судраб чиқа бошладилар.

Бу оғир ишдан баъзи навкарлар ўзларини четга олса, ўнбошилар аямай сўкар, ҳатто урар эдилар.

¹ Тиркиш — ҳўқизнинг хом терицидан эшилган арқонсимон нарса.

² Барқзан — чақмоқ чақиб, милтиқнинг пилтасини ёндиради-дан одам.

— Машқ пайтида навкарни аямай,— деди Бобир Алиқулбекка.— Ҳозир аясангиз жангда мағлуб бўлиб ўлиб кетур.

Бобир тепаликдан тушиб, дарё томонга йўл олди. У ёқда фил ўтолмайдиган чуқур хандақлар қазилган, энди баъзи жойларга шох-шабба босиб, иҳота ясашмоқда эди.

Хизмати юзасидан Бобирга эргашиб, уни қўриқлаб юрадиган Тоҳир хандақлар ва шох-шаббаларга қараб ўзича ўйланди: «Шунча тайёргарликларга яраша ёғий тўғримиздан келса яхши-я! Агар шаҳарни айланиб ўтиб орқадан келса ҳаммаси бехуда-да!»

Бироқ шаҳарнинг нариги томонига бориб келган чифдовуллар у ёқдаги ботқоқлик ва чангалзорлардан катта қўшин ўтолмаслигини аниқлаб келдилар. Үнг томонда Жамна дарёси. Чапда Панипат шаҳрининг аҳолиси тифиз маҳаллалари. Иброҳим Лоди бу маҳаллаларни қўшинига топтатиб, шаҳар оралаб келмас. Демак, уни факат тўғридан кутиш мумкин. Лекин салкам ўн баробар катта куч билан келаётган ёвга бу аравалару хандақлар туриш берармикин?

Бир вақтлар Кобулда юрганда Андижон ва Қуваларни эсласа юраги эзиладиган Тоҳир, энди Кобулини эсласа юраги соғинчдан орзиқади. Кобулда унинг ўн беш йил истиқомат қилган уйи бор, хотини Робия, мадрасада ўқиётган ўғли Сафарбек, ёлғиз тоғаси Мавлоно Фазлиддин бор. Олдиндаги жанг таҳликасидан кўнгли безовта бўлиб юрган Тоҳир «ишқилиб ўлим бўлмасин-да», дейди ўзича. Агар шу гал ҳам тирик қолсам, сипоҳийликни бас қиласдим-да. Ёш ҳам элликка бориб қолди. Қачонгача бегона юртларда тентираб юрамен? Сафарбек катта йигит бўлиб қолди, бу йил мадрасани хатм қилиб, муҳандис¹ бўлади. Қейин бошини иккита қилиб қўйсам... Э худо! Ўғлимнинг тўйини кўриш менга насиб қилганикин-а? Робияни яна кўрарманмикин-а?»

Юракка ғулғула солувчи бу изтиробли ўйларни ичкилик бир оз босар эди. Тоҳир кўпдан бери беклар даврасида юриб, кўнглининг чигалини ичкилик билан тарқатишга анчагина одатланиб қолган эди. Ҳиндистонда узум қам, шунинг учун чоғир танқис, лекин маҳва деган дарахтнинг баргидан олинадиган ўткир ароқ учраб турар эди.

¹ Ҳатм қилиш — тугатиш. Муҳандис — инженер.

Иброҳим Лоди билан жаіг бўлишидан бир кун олдин Тоҳир шу ароқдан кўпроқ ичган эди. Саҳар палла бадани тиришиб уйғонди. Оғзи тахир, боши лўқиллаб оғрийди. У ёқ-бу ёққа ағдарилиб, яна ухламоқчи бўлиб кўрди, лекин ухлай олмади. Шундан кейин туриб, сопол кўзанинг тагида қолган ароқдан уч-тўрт қултум ичди-да, сабуҳий қиласи.

Шу пайт бирдан довуллар ва нақоралар чалиниб, ҳаммани сафланишга чорлай бошлади.

Чиғдовуллар Иброҳим Лодининг бостириб келаётгани ҳақида хабар берган эдилар.

Сабуҳийдан яна кайф қила бошлаган Тоҳир этиги билан жибасини анча вақт имиллаб кийди. Бир қулоғи Самарқандда кесилган Мамат сўнгги йилларда Тоҳирнинг отбоқарига айланган, лекин эски қадрдонлиги ва бир-икки ёш катталиги туфайли гоҳо уни койиб ҳам қўяр эди.

— Саҳари мардондан ичиб нима қилар эдингиз, бек! — деб пўнғиллади Мамат.

— Гапни кўпайтирмай қўк отни тезроқ келтиринг! — буюрди Тоҳир.

Сўнгги йилларда хийла озиб, юз кўзлари аввалгидан ҳам ортиқроқ бўртиб қолган Мамат отлар боғланган томонга чопиб кетди. Ёв яқинлашиб келаётгани ҳақидаги хабардан кўп одам жонсарак бўлиб у ёқдан-бу ёқ ёққа югурмоқда эди.

Мамат кечаси ечилиб кетган кўк отни тутиб олгунчай анча овора бўлди. Одатда от кечаси эгарлоғлиқ қолса, айнили, қоринбоги бўшатиб қўйилларди. Тўполонда Мамат шошилиб айилни маҳкамлашни хаёлидан қочирди.

Тезроқ Бобирнинг ҳузурига етиб бориши керак бўлган Тоҳир узангини излаб ўтирмади-ю, отнинг бўйнидан олиб, устига сакраб минди. Шунда эгар бир чайқалди. Тоҳирнинг кайфи бўлмаганда эҳтимол, эгарнинг яхши урилмаганини тез сезган бўларди, отдан тушиб айилни маҳкамлаб олар эди. Лекин у эгарда чайқалганини сабуҳийдан кўрди-да, узангига оёқ тираб, отни тез орқага бурди.

Анчадан бери боқувда ётиб кучи танасига сифмай кетган кўк бедов орқа оёқларига тикка туриб, оғзидан кўпик сочиб, бурилди. Шунда бирдан эгар оғиб отнинг қорнига тушди-ю, Тоҳир елкаси билан ерга гурсиллаб йиқилди.

Мамат чопиб келиб, бир қўли билан отнинг жиловида олди ва иккинчи қўли билан Тоҳирни суюб турғизди. У Тоҳирни кайфи борлиги учун йиқилди деб ўйлаб кулиб гапирди:

— Тоҳиржон, бек бўлдингизу ичадиган ҳунар чиғардингиз-да! Бу сабилни кўп ичманг демаганимидим!

Тоҳир юмшоқ ерга йиқилгани учун ҳеч қаери лат емади. Лекин катта жанг арафасида шундай аҳмоқона йиқилиши унга машъум бир фалокатнинг хабарчисидек туюлди. У қаҳр билан сўкиниб, Маматга эгарни кўрсатди.

— Айилни ким бўшатиб қўйган эди?

Мамат кечаси от дам олсин деб бўшатиб қўйган айиллини эрталаб маҳкамламаганини энди пайқади.

— Тўполонда эсимдан чиқибди-я! Ҳей, мен хомкалла!

Мамат энди ўзидан кулиб, айилни торта бошлади. Тоҳирнинг ароқдан лойқаланган тасаввуррида Мамат уни йиқитиб, устидан кулиш учун айилни атайлаб бўшатиб қўйгандай кўринди. Илгари иккови ҳам навкар бўлган пайтларида Тоҳир бундай ҳазилларга кулиб кетаверар эди. Лекин ҳозир...

— Сен менинг бек бўлганимга баҳиллигинг келиб шундай қилгансан! — деб у бирдан Маматни сенсираб сўка бошлади: — Сен менга ўлим тилаганингми бу?

Тоҳир ғазабдан титраб, белини пайпаслади-ю, қамчини қидирди. Қамчи ерда ётар эди.

Гуноҳ қилган навкарларни сўкиш, уриш беклар орасида кенг тарқалган одат эди. Бу одат Тоҳирга ҳам озими-кўпми юқсан эди. Лекин у ўттиз йиллик қадрдони Маматга ҳали бирор марта мушт кўтартмаган эди.

Мамат ерда ётган қамчини олиб Тоҳирга узатди:

— Манг, гуноҳим учун қамчиланг, лекин бундай гапларни айтманг! Мен сизга ўлим тилайдиган баҳиллардан эмасман!

Мамат яна Тоҳирдан кулаётгандай, ўзини ундан олижаноброқ қилиб кўрсатаётгандай туюлди. Тоҳир:

— Шундай кунда йиқитганинг — ўлим тилаганинг эмасми? — дедиу уннинг пешонаси аралаш бошига қулочкашлаб мушт урди.

Мамат уч-тўрт қадам нарига учиб кетди ва кўзи тиниб ерга ўтириб қолди.

Пешона суюги Тоҳирнинг қўлига тошдай қаттиқ тегди, бош бармоғи «қирс» этди-ю, ўткир бир оғриқ миясигача чиқиб борди.

«Бошмалдоқ синди-ёв!»— деди Тоҳир ичида.— «Ки-
лич тутадиган ўнг қўлнинг бошмалдоғи... Бунга ҳам ма-
на шу сабабчи!»

Бу ўйдан унинг ғазаби яна бир даража ошди. Ўр-
нидан туришга интилаётган Маматни чап қўли билан
ҳам уриб ерга йиқитди.

Орқадан етиб келган барваста бир йигит орага туш-
ди.

— Қўйинг, бек оға, бир марта кечиринг! Мамат оға-
сиз учун жонини беради-я! Айилни мен бошқатдан тор-
тиб берай! Мана, ҳозир, ҳозир...

Тоҳир айили тортиб боғланган отга мингандан қат-
тиқ оғриётган қўлига тикилиб қаради. Бош бармоғи
шишиб кетган, қимирлатса оғриғига чидаб бўлмас эди.

«Мендан омад кетди!»— ўйлади Тоҳир мулозимлар
тўпланаётган томонга от чоптириб борар экан.

Унинг кетидан эргашган йигирматача отлиқ навкар-
лари орасида пешонаси ғурра бўлган, юзи бўздай оқар-
ган Мамат ҳам бор эди. Бек минг уриб-сўкканда ҳам
навкар унинг қолмаслиги керак эди.

* * *

Жамна дарёсининг чап томонидан чиққан офтоб най-
за бўйи кўтарилиганда ёв қўшинининг тифиз сафлари
аниқ кўрина бошлади. Охири уфқа бориб тақалган бе-
ҳисоб кўп қўшинининг ҳар ер-ҳар еридан ҳарбий филлар-
нинг улкан гавдалари чўққиларга ўхшаб чиқиб туради.
Энг катта оқ филнинг устида ўтирган Иброҳим Лоди
атрофга худди тепалик устидан қараётгандек ҳаммаёқни
баҳузур кўрар эди.

Бобир бир-бирига боғлаб ташланган аравалар орти-
даги тепаликда туриб, ёнинг яқинлашишини кутмоқда.
Унинг ўнг қанотига ўғли Ҳумоюн жавобгар эди. Ҳўжа
Калонбек, Ҳиндубек каби энг синалган беклар барча
навкарлари билан Ҳумоюннинг ихтиёрига берилган.
Марказни тўпчилар ва тўғангандозлар эгаллаган. Ҳар
икки қанотнинг икки четида тўлғама учун ажратилган
отлиқлар тайёр турибди. Иброҳимнинг ҳарбий филлар
ҳимоясига таяниб урушадиган қўшинида пиёдалар кўп-
лиги ва сафлар тифиз бўлиши маълум эди. Бундай ҳол-
ларда Шайбонийхон тажрибадац ўтказган тўлғама усу-

ли қўл келишини Бобир яхши биларди. У ҳам Шайбонийхонга ўхшаб, тўлғамага ажратилган аскарларга отларнинг энг чопқирларини саралаб берган эди.

Тоҳир ички беклар ва хос навкарлар билан бирга подшоҳдан орқада турибди. Бобирнинг икки ёнини алоқачи беклар, ясовуллар ва чопарлар эгаллаганлар. Бобир уларга иш буюрар экан, овози ички бир куч ва ишонч билан жаранглаб эшитиларди. «Шу одамнинг паноҳида неча қирғинлардан омон чиқдинг,— деди Тоҳир ўзига-ўзи тасалли бериб.— Бобир мирзо бор экан, сенга ҳеч нима қилмайди».

Дарё билан шаҳар оралигини тўлдириб ваҳимали қора булатга ўхшаб келаётган Иброҳим Лодининг қўшинини қаршисида ҳаракатсиз тек туриб кутиш оғир эди. Кўпчилик бек ва навкарлар фурсатни бой бериб қўяётгандек сабрсизланишар, лекин Бобир:

— Ҳеч ким буйруқсиз қўзғалмасин!— деб ҳаммани қаттиқ тутиб туарди.

Иброҳим Лоди Бобирнинг қўзғалмасдан кутиб турганини, икки орада юзлаб аравалардан ясалган мустаҳкам девор ва чуқур хандақлар борлигини кўрди-ю, қўшинини тўхтатди. Лашкарбошиларни чақириб, асосий зарбани ёвнинг ўнг қанотига бериш ва шаҳар томондан айланисиб ўтиш ҳақида буйруқ берди. Бироқ юз минг қўшинга то янги буйруқни тарқатиб, уни шаҳар томонга бургунча анча вақт ўтди.

Бобир дарҳол мана шу вақтдан фойдаланди. Унинг буйруғи билан тўлғамага ажратилган икки минг отлиқ жойидан қўзғалди. Чопқир отлар ёв қўшинининг икки қанотига тегмай ўтди-ю, бехавотир келаётган орқадаги отлиқлар ва пиёдаларга ҳамма қилди.

Ҳумоюн бошлиқ тўрт минг отлиқ ўнг томондан ёвнинг йўлини тўсиб чиқди. Чап қанот ҳам жангга тушди. Марказдаги араваларнинг ора-орасидан тўплар устмасут ўқ ёғдира бошладилар.

Тўрт томондан яшин тезлигига бирваракайига қилинган ҳамлани тепадан кузатиб турган Тоҳир Бобирнинг саркардалик тажрибасига ўзича қойил бўлиб қўйди. У ҳарбий санъатни фақат дўстларидан эмас, душманларидан ҳам ўрганган эди. Бобир тўп ва милтиқ ишлатишнинг аҳамиятини биринчи марта иттифоқдош Шоҳ Исмоилга қараб билган бўлса, тўлғама ишлатишда ашаддий ёвлари Шайбонийхон ва Убайдуллаҳоннинг

тажрибасини ўзлаштирган эди. У аччиқ мағлубиятлар жараёнида орттирган барча ҳарбий тажрибаларини бугун гўё ягона бир муштга тушиб, майдонга усталик билан ташлади-ю, ташаббусни дарҳол қўлга олди.

Бобирнинг бутун режаси — ёв қўшинини тўрт томондан ўраб олишга ва қанотларини ичкарига қайириб ташлашга қаратилган эди. Лекин ўраб олинган ёв Бобир қўшинига нисбатан етти-саккиз баробар кўп эди, чопқир отлар баҳайбат филларнинг бир зарбасидан умбaloқ ошиб йиқилиб кетарди. Шу сабабли Иброҳим Лоди аскарлари ҳали ўнгда, ҳали сўлда Бобир қўшининг ҳалқасини ёриб чиқарди. Бобир ёнида турган алоқачи беклар ва ясовулларни кетма-кет жанг майдонига чоптирас, ёвнинг қўли баланд кела бошлаган қанотларга марказдан кўмак юбортирас эди. У марказни ёвга атайлаб очиқ қолдирмоқда эди, чунки ҳали ҳаракатсиз турган аравалар ва тўғанглар марказга қўйилган эди.

Икки томондан ва орқадан устма-уст зарба берила-вергандан кейин Иброҳим Лодининг асосий кучлари ва ҳарбий филлари марказга ташландилар. Шунда Бобир араваларнинг филдираклари тагидаги ёғочларни олиши буюрди.

Етти юз арава жойидан қўзғалиб ёв қўшинининг рўпарасидан чиқди. Аравалар устидан тўплар, ора-орадан эса тўғанглар яқин келиб қолган ёвга ўқ ота бошлади. Тўпларнинг гумбурлаши, милтиқларнинг қарсиллаши, борут тутуни, ҳар қандай қалқонни тешиб ўтадиган оловли ўқлар зарбаси ва яна бунинг ҳаммаси беҳисоб аравалар шаклига кириб ўз-ўзидан юриб келаётгани ёв қўшинини даҳшатга келтириди. Филлар ярадор бўлиб бўкира бошлади. Филбонлар талвасага тушиб, филларни орқага бурдилар. Орқада эса ғуж-ғуж отлиқлару пиёдалар бир-бирига аралашиб кетган эди. Итар-итар, ур-сур бошланди. Яраланиб қутурган филлар отлиқларни йиқитиб, пиёдаларни босиб, янчиб ўта бошлади.

Тўплар ва милтиқлар ҳамон ўқ отмоқда. Тўп ўқи теккан филлардан бир қанчаси пиёдалар устига ағанаб тушди. Орқадан келаётган отлар ва филлар ўзларини тўхтатолмасдан ағанаб ётган филларга суриниб йиқилишарди. Кетма-кет бир-бирини итариб, суриб келгандари олдин йиқилганларнинг устига қулашар ва ўтиб бўлмайдиган тўсиққа айланишарди.

Бу қиёмат ур-йиқитдан қочиб қутулишнинг иложи-

ни топган филбонлару отлиқлар жон-жаҳдлари билан қочишга тушдилар. Орқада тўлғама ишлатган отлиқларнинг сафи анча сийраклашиб қолган эди. Филлар бу сафни бирпасда ёриб ўтдилару Деҳли томонга интилдилар.

Тепалик устидан бунинг ҳаммасини кўриб турган Бобир:

— Егий Деҳлинини бекитмоқчи! — деди ва алоқачи беклари турадиган ўнг томонга ўгирилди. Бироқ алоқачи беклар, чопарлар ва ясовуллар ҳаммаси бирин-кетин жанг майдонига маҳсус топшириқлар билан юборилганича қайтиб келишмаган эди. Эҳтимол, уларнинг баъзилари ўлгандир ёки яралангандир — жанг бусиз бўлмайди. Бобир отини буриб, ички беклари ва навкарлари томонга юзланди. Шунда унинг кўзи Тоҳирга тушди. Тоҳир маҳсус фармонларни ҳамиша яхши адo этиб келганини эслади:

— Тоҳирбек, Иброҳим Лоди қочдими ёки жанг майдонида қолдими, шуни аниқламоқ керак. Агар қочган бўлса хосса тобин¹дан қувғинчи юборгаймиз.

Тоҳир чанг-тутунга бурканиб жаҳаннам бўлиб ётган жанг майдонига кўзи жавдираб қаради-ю, синган бошмалдоғини эслаб, овози қалтираб деди:

— Бош устига, ҳазратим!

Шу пайт жанг бўлаётган томондан оёғига ўқ тегиб, узангисидан қон сирқиб оқаётган бир ясовул от чоптириб келди.

— Ҳазратим, зафар бизники! — деди у ҳансира. — Егий қочди!

— Иброҳим ҳам қочдими?

— Қочган филлар орасида Иброҳимнинг оқ филини кўрдим! Қочди!

— Бўлмаса дарҳол изига тушмоқ керак! Тоҳирбек, сиз тўхтанг! Жаноб Қосимтой мирзо!

— Лаббай, ҳазратим! — деб қирқ ёшлардаги норғул бек сафдан олдинга чиқди. Туркистонда туғилиб-ўсан бу бекнинг Улугбек мирзога узоқ қариндошлиги бор эди. У ўн беш йилдан бери Бобир ҳузурида хизматда эди.

— Агар Иброҳим Лоди Деҳли ёки Аграга етиб, бу қалъаларни бекитса, муҳориба-ю, муҳосора қайтатдан

¹ Тобин — резерв.

Бешланур,— деди Бобир Қосимтой мирзога.— Ҳолбуки, биз Деҳли билан Аграви жангсиз олиш умидидамиз. Ефийнинг бизга ҳамла қилиш эҳтимоли энди бартараф бўлди. Жаноб Қосимтой, хосса тобиндан минг кишини олинг. Беклардан Бобочуҳра... Тоҳирбек, навкарлари билан... Иброҳимни қувланглар. Агар Деҳлида тўхтамай яна қочса, Арагача кетидан қолманглар, токи бу шаҳарларни беркита олмасин. Кетларингиздан биз ҳам изма-из етиб борумиз!

— Фармони олийга жонимиз фидо!— деди Қосимтой мирзо.

— Сиз бизнинг илфоримизсиз. Тангрим ёрингиз бўлсин! Енгингу енгилманг!

— Омин!

Шундай ғолибона жангда илфор сафда бўлиш Тоҳирнинг кўнглини кўтарди-ю, синган бошмалдоғининг оғриғи ҳам сезилмай қолди. У навкарларини ёнига олиб, жанг майдонига ҳаммадан олдин кириб келди.

Офтоб тиккага келган. Кун иссиқ. Чекинаётган ёв беш-олти бўлакка бўлинниб кетган. Баъзиларини Ҳумояннинг одамлари, баъзиларини Хўжа Қалонбекнинг навкарлари таъқиб этмоқда. Лекин уларнинг отлари эрталабдан бери у ёқдан-бу ёққа чопиб, чарчаб қолган. Тоҳирларнинг тобинда дам олиб турган отлари жангдан толиқиб қолган отлиқлардан ўтиб, ёвга бирпасда етиб олди.

Енгилган қўшин бўлиниб-бўлиниб қочаётган бўлса ҳам чўғи жуда катта экани Тоҳирга яқин борганда билинди. Ҳар тўпда етти минг-саккиз минг келадиган қўшин. Уларга нисбатан қувиб келаётганларнинг тўпи жуда кичик. Ёвнинг ҳар тўпида қатор-қатор филлар келяпти. Лекин уларнинг орасида оқ фил йўқ. Балки Иброҳим филдан тушиб, от миниб кетаётгандир?

Қосимтой билан Тоҳир ўзаро маслаҳатлашишди-ю, ёвнинг кичикроқ кўринган бир тўпини икки ёнидан айланиб ўтиб, олдиларидан тўсиб чиқиши ва бир сурув филни эгалари билан асир олиши. Уларнинг орасида Иброҳим Лоди йўқ эди.

Қосимтой филбонларни ҳинд таржимон орқали сўроқ қила бошлади.

— Айт, Иброҳим Лодининг қайси тўпда кетаётганини кўрсатиб берса озод қиласамен!

Филбонлардан бири орқада қолган жанг майдоннинг кўрсатиб, куйиб-пишиб алланарса деди.

— Иброҳим минган фил яраланиб йиқилган эмиш, унинг ўзи ўлганиши,— деди таржимон.

Лекин Қосимтой бунга ишонмади:

— Бизнинг одамлар Иброҳимнинг қочганини кўрган. Сўра, ростини айтсин, бўлмаса боши кесилгай!

Биринчи филбон яна аввалги гапини таクロлади. Чиндан ҳам Иброҳим жанг майдонида ўлган эди. Лекин Қосимтой филбоннинг гапидан кўра боя Бобирга ахборот берган ясовулнинг гапига кўпроқ ишонар эди. Қосимтой сиқишири бергандан кейин бошқа бир филбон тусмол билан Иброҳимнинг дарё бўйлаб кетиб бораётган катта тўлда эканини айтди. Учинчи бир филбон ўнг томонда кетаётган тўпни кўрсатди.

Қосимтой ҳамма филбонларни филлари билан бирга маҳсус навкарларга топшириб, Бобирнинг ихтиёрига юборди. Кейин дарё бўйлаб чекинаётган тўпнинг кетидан тушдилар. Бу тўпда фил минган, от минган ва Лоди қўшинининг энг жанговар қисми ҳисобланадиган ражпутлар кўп эди. Қосимтой дарё томонда, Бобобек билан Тоҳир ўнгдан айланиб ўтиб, уларнинг йўлларини тўсиб чиқдилар. Ражпутлар таъқиб этаётганларнинг нисбатан оз эканлигини кўрдилару камонларига ўқ ўрнатиб, қилич яланғочлаб, дадил жанг қила бошладилар.

Тоҳир камонига ўқ ўрнатиб отаётганда синган бармоғининг жонсизланиб, ишламай қолганини сезди. Ўқнинг учини бошқа бармоқлари билан тутиб, камонни тортиб отди. Ўқ қилич яланғочлаб келаётган қора бир одамнинг кўзи аралаш юзига тегди. Ўқ еган ражпут бир қўли билан юзини чанглаб, отдан йиқилиб тушкиди. Бу орада полвонтахлит бир ражпут Тоҳирга яқин келиб қолди. Тоҳир камонга қайта ўқ ўрнатишга улгурмаслигини сезди-ю, қиличини суғурди. Ражпут полвони олтига кескир тифи бор чакра деган қуролини кўтарди. Тоҳир унинг чакра тутган қўлига қараб қилич сермади. Қилич чакрага қарсиллаб текканда Тоҳирнинг синган бошмалдоғидан баданига шундай оғриқ тарқалдик, вужуди зирқираб кетди. Шишиб кетган бошмалдоқ қиличининг дастасини қўлидан қандай чиқариб юборганини билмайди. Фақат қилич ерга учеб тушганини кўриб, белидан ханжарини олмоқчи бўлди, лекин улгурмади. Олти тифли кескир чакра унинг бўйни ва ўн-

сласига шундай бир зарб билан урилдики, кифтидан энгагигача ҳамма жойини қиймалаб ташлагандай туюлди. Тоҳир кўзи тиниб отнинг ёли устига кўкраги билан тушганда чакранинг яна бир зарбаси унинг зирҳли кийнигига қарсиллаб урилди. Тоҳир даҳшатли оғриқ ичиди: «Энди бу мени отдан йиқитмагунча қўймайди!»—деб ўйлади. У отдан йиқилса жасади туёқлар тагида қандай мажақланишини тасаввур қилди-ю, «Тезроқ ҳушимдан кетсан эди!»—деди.

Шу пайт Мамат етиб келиб, дастаси узун ойболтани чакра кўтарган ражпутнинг қўлига урди. Чакра ерга тушиб кетди. Мамат қонга беланиб, эгардан сирғалиб туша бошлиган Тоҳирни тез ўнгариб олди-ю, жанг майдонидан қочиб чиқди.

3

Деҳлига отасидан олдин кириб келган Ҳумоюн Жамна дарёсининг ўнг қирғоғидаги қизил деворли улкан қалъани жангсиз эгаллади. Иброҳим Лодининг қалъадаги хазиналарини муҳрлаб, ишончли посбонларга топширди-да, уч юзтacha хос навкари билан шаҳарни айланышга чиқди.

Унда-бунда учрайдиган паст-баланд тепаликларни ҳисобга олмаганда, Деҳли — кўкалам бир текисликка жойлашган ва четларини кўз илғамайдиган катта шаҳар эди. Тифиз жойлашган уйлар, маҳалла-куйлар беҳисоб, лекин кўчаларда одам кам— нотаниш фотиҳлардан чўчиб, уйларидан чиқмай ўтирганлар кўп.

Ҳумоюн қайси кўчадан ўтмасин, бесаранжом бир синчковлик билан эшик-деразалар тирқишидан, девор тепаларидан қараб турган ўнлаб кўзларни кўради.

Муқаддас дарё ҳисобланган Жамна бўйида тўп-тўп одамлар дағн маросими ўтказмоқдалар. Улар ўликларни хушбўй ўсимлик мойи сепилган ўтиналар устига қўйиб куйдирадилару кулини секин дарёга оқизадилар. Нариги дунёга оид бу иш билан бўлиб, бу дунёниг ташвишларига, ҳатто шаҳарни эгаллаётган бегона қўшинга ҳам кўпда эътибор бермасликка тиришадилар.

Чорсу бозорида билакларига ва бўйинларига шода-шода гул осган яланг оёқ болалар, аёллар кўринади. Ҳатто соч-соқоли оқарган баъзи бир кексалар ҳам би-

лакларига қизғиши-сариқ рангли гулшодалар солиб олишган эди.

— Бу — Чандни Чоук бозори,— деб изоҳ берди Ҳумоюннинг ёнида бораётган Ҳиндубек. — Ойдин Чорсу деган маъноси бор.

— Бугун ҳайитми, гул кўп? — сўради Ҳумоюн.

— Ҳа, баҳорги экинларнинг униб чиқишини қутлаб ўтказиладиган ҳайит. Ҳиндистонда ҳайит кўп. Бирон ой ҳайитсиз ўтмайди.

— Фаройиб эл! — деди Ҳумоюн ўйчан кулимсираб.

Эски бир қасрнинг том ва деворлари устида оёқ-қўллари узун маймунлар бемалол сайр қилиб юрар эди. Юзлари, қўллари қора, қоринлари сарғиш, бошқа ҳамма жойлари оқиши-кулранг. Жажжи маймун болалари томдан башни ва ним дараҳтларининг шоҳларига сакраб ўтишар, бир-бирлари билан қувлашиб, дараҳтдан ерга ҳам тушишар эди. Қасрнинг ич-ташида одамлар юрибди, лекин маймунлар билан ҳеч кимнинг иши йўқ.

Ҳумоюннинг кетидан бораётган юзбошининг қўзлари бирдан овчилик эҳтироси билан ёна бошлади. Ӯ камонини қўлига олаётганини кўрган Ҳиндубек:

— Маймуннинг уволи ёмон бўлади, — деди. — Буни овлаган одам бахтсизликка учрагай.

Ҳумоюннинг ўнг ёнида бораётган Ҳўжа Калонбек-кулиб сўради:

— Сигирни ҳам шунаقا эъзозлашимиз керакми, жаноб Ҳиндубек?

— Неки тансиқ бўлса, элга азиз кўринур, — деди Ҳиндубек. — Бу ернинг иссиқ иқлимида сигир асраш осон эмас.

— Ҳар қалай, — деб Ҳумоюн Ҳиндубекка ён босди, — подшо ҳазратлари маҳсус фармон чиқардиларки, ҳинд халқининг азалий удумларига ҳурмат билан қаралсин, эл-улуснинг нафсониятига тегадиган ҳаракат содир бўлмасин.

Ҳўжа Калонбек ўнг қўлини кўксига қўйди:

— Амирзодам, бу фармони олий биз учун қонун! Мен фақат Ҳиндубекка сал тегишдим.

— Бекнинг густоҳлиги маълум-ку, — деб энди Ҳиндубек ҳам Ҳўжа Калонга ҳазил қилди.

Олдинда баланд дараҳтлар орасидан бўй чўзиб чиқиб турган ёnlари қиррадор минора кўринди.

— Қутб Минора! — деди Ҳиндубек.

Ҳұмоюн минора олдидә отдан түшди, сүңг беклар билан миноранинг тепасига чиқди. Минорадан юз қадамча нарида терак бўйи келадиган ёлғиз бир қора устун кўринди. Устун атрофида одам кўп эди.

— Бу недур? — сўради Ҳұмоюн Ҳиндубекдан.

— Бу устун яхлит темирдан ясалган. Билганларнинг айтишича, уч юз йилдан бери бир зайлда турган эмиш. Кимки устунни қучиб, илкини бир-бирига теккизолса, ўйлаган муроди ҳосил бўлар эмиш.

Шу вақтгача ўзини босиқ тутиб келаётган Ҳұмоюн энди ўсмирларча бир қизиқиш билан:

— Қани кўрайлик! — деди ва дуркун гавдасига мос келмайдиган чақонлик билан зинадан чопиб тушиб кетди.

Темир устун атрофидаги одамлар шаҳзодани кўриб, ўзларини четга олдилар.

— Жаноб Ҳиндубек, қани, устунни не тавр қучиш керак?

Устуннинг тепаси ва пасти қорайиб кетган. Фақат ўртаси — беҳисоб одамларнинг қўл ва елкалари теккан жой оппоқ бўлиб, маъдани йилтираб чиқиб турар эди.

Ҳиндубек устунга тескари туриб, елкасини унга тиради-да, қўлларини орқага чўзди. Устун анча йўғон эди. Ҳиндубек уни тескари қучиб, қўлинини бир-бирига чўзди, лекин еткизолмади. Бутун кучи билан чиранди, барibir қўли қўлига тегмади.

Буни кўрганлар хохолаб кула бошладилар.

Ҳұмоюн ҳам кула-кула Ҳиндубек уддалай олмаган ишни қилиб кўрди. Лекин у ҳам қўлинини қўлига теккизолмади. Бек ва навкарлардан яна беш-олтитаси куч синаб кўрди. Шулардан фақат биттаси — қўллари узун, ўзи озғин самарқандлик йигит — устунни тескари қучиб, қўлинини қўлига теккизишга муваффақ бўлди.

Ҳұмоюн унга бир сиқим кумуш танга мукофот берди.

* * *

Деҳлида тўп-тўп бўлиб айланиб юрган ғолиблар орасида ёғли ўлжа излаётганлари ҳам бор эди. Синдарёсининг бўйидан Бобир аскарларига қўшилиб келган Ер Ҳусайнбек илгари Хайбар довонининг жанубида йўлтўсарлик қилган қароқчилардан эди. Ҳозир

унинг навкарлари шаҳар четидаги бир ибодатхонага киришиб, ҳиндлар сифинадиган худоларнинг ҳайкалла-рига ўрнатилган қимматбаҳо тошларни кўчириб олишга тушдилар.

Деворлари оқ-сарғиш мармардан ишланган ибодатхонада кекса бир бараҳман кўзларига ёш олиб, Будда-нинг улкан тош ҳайкалидан нажот сўрамоқда. Ибодатга келган аёллар, чоллар, ўсмирлар худолари олдида бош эгиг жим туришибди.

Ёр Ҳусайнбекнинг навкарлари эса тўрт қўллик худо Шиванинг баланд ҳайкалига нарвон қўйиб чиқишиган, худонинг пешонасига катта қизил холга ўхшатиб ўрнатилган ёқутни ханжар билан кавлаб олишга уринишарди.

Шу ҳодисанинг устига келиб қолган Ҳумоюн нарвондаги навкарга қаҳр билан қичқирди:

— Подшоҳ ҳазратлари номидан буюрамен. Ҳайкалга тегма! Туш пастга!

Ёр Ҳусайнбек нимқоронги ибодатхона ичидаги Ҳумоюнни аввал танимади:

— Кофирларнинг ҳайкалини ҳимоя қиласидиган подшонг ўзингга! — деди-да, нарвондаги навкарга буюрди:

— Олавер!

Навкар ханжари билан ҳайкалининг пешонасини кавлашда давом этди. Шунда Ҳумоюн отган ёй ўқи унинг билагига тегди. Ханжар ерга тушиб кетди. Навкар билагини чангллаганича орқага ўгирилди.

Ёр Ҳусайнбек қиличини суғуриб:

— Ким у? — деб ўшқирди-ю, Ҳумоюн томонга ҳамла қилди.

Ҳиндубек ҳам қиличини суғуриб олдинга чиқди:

— Сиз Ёр Ҳусайнбек бўлсангиз, бу олий зот Бобир подшоҳнинг ўғиллари Мирзо Ҳумоюндирлар!

Ёр Ҳусайнбек бу гапга ишонгиси келмай Ҳумоюнга кўзларини олайтириб тикилди. У энг аввал Ҳумоюннинг эгнидаги аргувоний тўнни таниди. Ёқаларига дурлар қадалган бу тўн — Бобирники эди. Ҳумоюн Панипат жанги арафасида Иброҳим Лодининг Ҳамидхон деган лашкарбошиси билан олишиб, уни енгган, уч юздан ортиқ одамини асир олиб келган эди. Бобир ўғлининг бу жаеоратига қойил бўлиб, эгнидаги шоҳона тўнини ўғлига кийдирган, буни ҳамма беклар, шу жумладан, Ёр Ҳусайнбек ҳам кўрган эди. Уша тўн ҳозир ҳам Ҳумоюн-

нинг эгнида эди — унинг хипча гавдасига бир оз катта келиб, елкалари осилиброқ тўтар эди.

— Амирзодам, мен сизни танимабмен! — Ёр Ҳусайнбек қўлида қиличи билан бир қадам орқага чекинди.

— Қилични топширинг! — буюрди Ҳумоюн.

— Амирзодам, мен ҳазрат отангизга содик хизмат қилган бекларданмен!

— Ибодатхонада суғурилган қилични мен подшоҳ ҳазратларига элтиб топширишим керак! — деди Ҳумоюн. — Сиз йўлтўсарликдан тавба қилиб, ҳазрати олийнинг хизматига кирган экансиз. Бугун яна талончилик кўчасига қайтмишсиз. Подшоҳ ҳазратлари зиёратгоҳларда ножӯя ҳаракат содир бўлмасин деб буюрмаган эдиларми? Нечун назарни бунчалик паст қилдингиз, бек? Ёғий хазиналаридан барча жангчилар ўз улушларни олгайлар! Бу хазина сизга ҳам етиб ортгай! Иброҳим Лодининг одамлари шу ҳайкалнинг пешонасидаги ёқутга тегмаган эканлар. Улар қилмаган пасткашлийни қилиш бизга иснод эмасми? Олинг қиличини! Мана бу нокас йигитларни тутиб, ҳибсга элting! Токи бошқа йигитларимиэга ибрат бўлсин!

Хос навкарлар бу буйруқни бажарганларидан кейин Ҳумоюн Ҳиндубекка бараҳманни¹ ва унинг қавмларини кўрсатди-да:

— Жаноб бек, подшоҳ ҳазратлари бизга тайинлаган гапларни буларга таржима қилиб беринг, — деди. — Буларнинг дини бошқа. Лекин биз барча гайридинларни бир худонинг бандалари деб билурмиз. Биз Ҳиндистонга яхши ниятлар билан келдик. Бу муazzзам кишварни ҳинклар билан бирга обод қилмоқчимиз. Кимки бизга ҳамкор бўлса, ҳамкорлик қилурмиз!

Ҳиндубек таржима қилган бу сўзларни бараҳман ва унинг қавмлари бош иргаб, таъзим қилиб эшидилар. Шаҳзода ва унинг одамлари чиқиб кетгандан кейин эса бараҳман яна Будданинг ҳайкали олдига ибодатга келиб, бутун миннатдорчилигини унга айта бошлади. Муқаддас ёқутни олмоқчи бўлган нокаснинг қўлидан ўқ еб жазоланиши Будданинг иродаси билан бўлганига ба-раҳман ўз қавмларини ишонтириши зарур эди.

¹ Бараҳман — ҳиадларнинг руҳонийси.

Узоқ Сирдарё воҳаларида энди лола барг ёзадиган салқин ҳамал ойида Жамна бўйлари авжи саратон пайтидагидек иссиқ эди. Куни бўйи офтобда отлиқ юриб бадани мисдай қизиб кетган Бобир кечки пайт салқинроқ жой излаб Жамна дарёсининг бўйига келди.

Куннинг иссиғидан ташқари пешиндан сўнг ичилган ароқнинг тафти ҳам унинг ичини ёндиromoқда эди. Ко-булда кўп ичиб ўрганган беклар Панипатдаги ғалаба шарафига ҳар куни бир-икки жойда зиёфат беришиб, уни таклиф қилишарди. Иссиқ ва сернам ҳавода устмавуст ичилаётган чоғир ва ароқлар Бобирнинг юрагини беҳаловат қилиб, кечалари уйқусини қочириб юборарди. Кўп ичиб ётган қунлари эрталаб туриб йўталса балғамга гоҳо қон аралашиб чиқарди. Буни кўрган ҳиротлик хос табиб Юсуфий:

— Ҳазратим, ўтинамен, ичкиликни ташланг!— дейя ялинарди.

Бобирнинг ўзи ҳам уйқусиз беҳаловат бўлиб ётган кечалари «энди ташламасам бўлмас», дерди. Лекин кундуз бирон ташвишдан кўнгли ғаш бўлса ёки аксинча, кайфини чоғ қиласидаган яхши воқеа юз берса, яна ичги-си келиб қоларди. Айниқса, илк қадаҳларни ичиб, кайфи энди кўтарилиб келаётган пайларда беклари бундан кейинги ичкилик мажлисига таклиф қилсалар осонликча розилик бериб қўярди. Бугун пешиндаги ўлтиришда ҳам худди шундай бўлган, «кечаси кемада базм қилурмиз» деб бекларини ўзи зиёфатга таклиф қилган эди.

Холбуки тушда ичилган майнинг губори ҳалигача тарқамасдан борлигини лоҳас қилмоқда эди.

Бобир мулозимлари ва хос навкарлари билан Жамнага яқинлашганда дарё бўйидаги кўкалам ялангликда дағи маросими ўтказаётган бараҳманлар, аёллар, кекса-ёш юздан ортиқ одамларни кўрди. Бобир дағи маросимини яқинроқдан кузатмоқчи бўлди-ю, отини ўша томонга бурди.

Панипатдаги жангнинг даҳшатли тафсилотларини эшигтан одамлар отлиқлардан қўрқиб, маросимни бузиб қоча бошладилар. Бобир яқин борганда ёндиришга тайёрлаб қўйилган ўллик олдида битта мотамсаро келинчак, кекса аёл ва мункайган бир бараҳман чол қолган ёди, ўтин устида чалқанча ётқизиб қўйилган жасаднинг

пешонаси аралаш юзида чуқур қилич яраси кўриниб турарди. Бу — Бобир аскарлари билан жанг қилиб ҳалок бўлган ботир ражпут йигитларидан эди. Бобир сочлари ёйилиб елкасига тушган гўзал келинчакка қаради-ю, унинг юзида ҳам ўлим шарпасини кўрди. Келинчак шу жангчининг хотини эди. Урф-одатга биноан, келинчак умрбод бева ўтиши ёки эрининг жасади билан бирга ёндирилиши керак эди. Кекса бараҳман жасаднинг тагидаги ўтиналрга бирдан ўт қўйиб юборди. Махсус мой сепилган ўтин ловиллаб ёниб кетди. Келинчак оловда қолган жасадга қараб бир талпинди-ю, кейин қўрқиб орқага чекинди.

Бобир Ҳиндубекка юзланди:

— Наҳотки шундай гўзал келинчак ўзини оловга ташласа! Бу не жаҳолат? Бараҳманга менинг номимдан буюнинг! Келинчакни олиб кетсин!

Ҳиндубек отини чу-чулаб, олов олдидағи бараҳманга яқин борди-ю, подшоҳнинг буйруғини ҳиндчалаб айтди.

— Келинчак Бобирга ўғирилиб қаради. Ўз тилида:

— Фотиҳларнинг подшоси шуми? — деди-ю, қичқириб гапира бошлади: — Эримни нега ўлдиртирдинг?! Нега бу ерга келдинг? Қўлингдан келса эримни тирилтириб бер! Унда мен ҳам тирик қоламан!

Ҳиндубек унинг сўзларини Бобирга таржима қилиб берар экан:

— Ҳуши жойида эмас,— деб қўшиб қўйди.

— Ушланг, ушланг, оловга ўзини ташламасин.

Ҳиндубек от устидан келинчак томонга интилиб, уни ўнгариб олмоқчи бўлди. Аммо келинчак:

— Кет, босқинчи! Кет! Юртингга кет! — деб қичқириди-да, ўзини бирдан оловга отди ва эрининг ёнаётгани жасадини қучоқлаб олди. Ловиллаб ёнаётган олов дарҳол келинчакнинг ҳарир кийимларига ва елкасидаги ёйилиб ётган соchlарига илашди. Бобир унинг ўт ичидаги оғриқдан чинқириб юборганини эшилди, шунда ҳам жасадни қучоғидан қўймаётганини кўрди-ю, ларзаға келиб, отини орқага бурди...

* * *

Жамнанинг сокин бир қўлтиғида икки ошиёнлик катта кема Бобирга мунтазир эди. Қеманинг пастки қаватида баковул ва савдарлар кечки зиёфатга ҳозирлик кўрмоқда эдилар. Подшоҳ бугунbekларини май базми-

га таклиф қилгани уларга аллақачон етказилган эди.

Бироқ Бобир кемага ғамгин юз билан чиқиб келди-ю, базмни эртага қолдиришнй буюрди. Сүнг ёлғиз ўзи кеманинг шийпонга ўхшаш болохонасига чиқиб қетди.

Ўзини оловга ташлаган келинчак унинг хаёлидан нари кетмас эди. Панипат жангидә эришган зафаридан Бобир қанчалик қувонган эди! Аммо бу жанг қанча болаларни етим, қанча аёлларни тул қолдирганини, бугунги келинчакка ўхшаган қанча бевалар урф-одат бўйича ўзларини оловга ташлаганини мана энди кўз олдига келтира бошлади... Узоқларда қолган Моҳим бегим эсига тушди. Кўрмаганига олти ойдан ошяпти. Сүнгги марта сухбатлашганларида Моҳим бегим бугунги даҳшатларни олдиндан сезгандай қанчалик изтиробга тушган эди!..

Бояги келинчакнинг «Кет, босқинчи! Кет!»— деб қичқиргани унинг қулоғига қайта эшитилгандай бўлди. Бобир ичидаги «Ё раб, бу не кўргулик!» — деди-ю, хаёлинини бошқа бирон нарса билан банд қилиш учун дафтар-қалам олди. Севган ёридан ва туғилиб-ўсган диёридан узоқда у ўзини беҳад толесиз, баҳтсиз сезган пайтлари кўп бўлар эди. Ҳозир ҳам шу оғир туйғу юрагини чулғаб олди. Бобир кўнглини дафтарига бўшатгиси келиб биринчи сатрни ёзди:

Толе йўки жонимга балолиғ бўлди.

У кенг қирғоқлар орасидан товушсиз жим оқиб ўтатётган Жамнага тикилди. Ботиб кетган қуёшнинг қуюқ шафағидан дарё суви қизғиши кўринарди. Бобирнинг назаридаги, дарё сувини шафақ эмас, жангларда тўкилган қонлар қизартириб юборгандай туюлди.

У изтироб билан кейинги сатрларни ёзди:

Ҳар ишники айладим хатолиғ бўлди.
Ўз ерни қўйиб Ҳинд сори юзландим,
Ё раб, нетайин, не юз қаролиғ бўлди!

* * *

Фира-шира қоронғиликда ўнг қирғоқдан катта бир қайиқ чиқиб, кемага қараб кела бошлади. Кеманинг пастки қаватидан қўрчибоши:

— Ким у қайиқдаги?— деб сўраганини Бобир ҳам ўшилди-ю, қайиққа тикилиб қаради.

Қайиқнинг олтитами, саккизтами эшкаги бор эди.

— Мирзо Ҳумоюн ҳазрати олийларининг ҳузурларирига ижозат сўрайдилар! — деб жавоб берди қайиқдан йўғон бир товуш.

Ҳумоюн билан кўпдан бери яккама-якка суҳбатлаша олмаган Бобир бугун ўғли билан бир дардлашгиси келди-ю, пастдан савдарни чақирди:

— Айтинг, Ҳумоюн толорга чиқсан!

Кўп ўтмай толор зинасида вазмин қадам товушлари эшилди. Ҳумоюн эшикдан кирганда Бобир унинг чақнаган навқирон кўзларига, энди лаб устини қоплаган нозик мўйловига, кучга тўлиб турган хипча соғлом гавдасига ҳаваси келиб тикилди. Бобирни қийнаётган изтиробли туйғулар, уни беҳаловат қилган иссиқлар Ҳумоюн учун гўёй йўқ эди. «Ўн саккиз ёшимда мен ҳам шундай йигит эдим-а, энди нимам қолди?» — деган ўйдан Бобирнинг кўнгли қаттиқ эзилди.

Ота-бала кўришиб-сўрашганларидан сўнг Ҳумоюн отасининг рўбарўсига чўкка тушди-да, кулимсираб қўйнидан чиройли садаф қутича олди.

— Ҳазратим, шуни бир очиб кўринг.

Бобир қутичани қўлига олиб шошилмай очди. Қора бахмал мато орасидан олмосга ўхшаш сержилва бир тош юлдуздай чараклаб кўринди. Лекин тошнинг ёнгоқдай катталигига қараб, Бобир унинг олмослигига ишонгиси келмасди. Жуда кўп хазиналарни ва хилма-хил жавоҳирларни кўрган Бобир бунчалик катта олмосни ҳали учратмаган, олмос донасининг бу қадар улкан бўлишини тасаввур ҳам этмас эди.

— Бу қандай жавоҳир? — деб сўради Бобир ўғлидан.

— Олмос эмиш.

Бобир нур жилвасига чўмиб ўйнаётган тошни қўлига олиб салмоқлаб кўрди:

— Вазни етти-саккиз мисқол келур. Наҳот шунчалик катта олмос бўлса?

— Мен бир муқаййим¹ни чақириб кўрсатдим. Машҳур Кўҳинур² олмоси шу, деди. Оламда бундан катта

¹ Муқаййим — жавоҳиршунос заргар.

² Кўҳинур — «нур тонги» демакдир. Ўша замонда, бу олмос одамэод тоғлан олмосларининг энг улкани бўлган. Олнимлар Кўҳинур олмосининг 1304 йилдан бери борлигини аниқлаганлар. Ҳозир бу олмос Лондонда сақланади.

олмос йўқ эмиш. Баҳоси сандиқ-сандиқ олтинлардан баланд эмиш.

— Мен Бангола подшоси Султон Аловиддинда улуғ бир олмос бор деб эшигтан эдим. Таъриф қилган эдиларки, шу битта олмос катта бир мамлакатнинг бир ойлик сарфу ҳаражатини кўтартгай.

— Муқаййимнинг айтишича, мана бу олмоснинг қиймати тамоми оламнинг икки ярим кунлик сарфига баробар экан.

— Сен буни қаердан олдинг?

Ҳумоюн ўнғайсизланиб жилмайди-ю:

— Гвалиор рожасининг хайлхонасида пешкаш қилдилар,— деди.

— Нечун?

Ҳумоюн воқеани ҳикоя қиласан экан, Бобир Гвалиор вилоятида юз йилдан бери ҳокимлик қилиб жуда катта бойлик орттирган рожа Бикрамадитъянинг ҳашаматли қасрини кўз олдига келтирди. Бикрамадитъя Иброҳим Лодига бўйсунмасдан, у билан узоқ вақт уруш қилган, охири Гвалиорни Иброҳимга бериб, ўзи Шамсобод деган жойга кўчиб кетган ва кўп ўтмай вафот этган эди. Панипатдаги ғалабадан кейин Ҳумоюн бошлиқ илгорлар Деҳлидан ўтиб бориб кўп қасрларни ишғол қилдилар. Шу қасрлардан бирида ўлиб кетган ўша рожанинг бўй етган икки қиз, бир ўғли ва уларнинг оналари яшаб турган эди.

Рожанинг йигирма ёшлардаги ўғли Ҳумоюнни яхши қарши олди:

— Сизларнинг душманларингиз бўлган Иброҳим Лоди бизнинг ҳам душманимиз эди, унинг мағлуб бўлганидан биз шодмиз,— деди.— Энди рухсат берингизлар, биз Шамсободдан она юртимиз Гвалиорга қайтиб кетайлик.

Ҳумоюн ҳам ёш рожа билан илиқ муомала қилди-ю, лекин Гвалиорга кўчиб кетиш учун ўзи рухсат бера ол маслигини, подшоҳни кутиш кераклигини айтди. Уша кеча Вайс деган бир бек элликтача йигити билан рожанинг қасрида тунади. Ҳумоюннинг ўзи қасрнинг ҳовлисидаги боқقا чодир тикириб, кечаси чодирда ухлаб ётганда ичкарида кўтарилиган тўполонни эшишиб уйгониб кетди, Қўрчиларини ёнига олиб, қаср ичига чопиб кирса, Вайсбекнинг йигитларидан бири ички эшик олдида қонга беланиб ўлиб ётиби. Қандилларда шамлар ёниб

турибди. Иккинчи қаватнинг зинапоясида турган ўн саккиз ёшли гўзал қизчувалиб ётган ишак сарисини титроқ қўллари билан олиб, яланғоч елкасига ёпишга уриняпти. Рожанинг ўғлини беш-олтита навкарлар ўртага олиб, қўлидаги қиличини уриб туширишди.

Маълум бўлишича, Вайсбек рожанинг шу қизини ёқтириб қолиб, навкарлари ёрдамида ўз бўлмасига куч билан олиб келтирмоқчи бўлган. Қизнинг акаси қилич яланғочлаб ҳимояяга чиққан. Қизни кўтариб кетмоқчи бўлган навкарни қилич билан уриб йиқитган. Энди бунинг қасдига навкарлар ёш рожанинг ўзини ўлдирмоқчи эдилар.

Ҳумоюн гап нимадалигини суриштириб билгач, навкарларга:

— Рожани бўшатинг! — деб буюрди. — Ўз сингилларини бунчалик мардона ҳимоя қилган йигит эҳтиромга сазовор. Подшоҳ ҳазратлари бундай кишилар билан яхши муомалада бўлишни буюрган эдилар. Фармони олийни унуглан шаҳватпараст Вайсбек ҳибсга олинсин! Қизни иликламоқчи бўлган навкарлар ўн дарра калтаклансин!

Хос навкарлар бу буйруқни бажармагунларича Ҳумоюн уларнинг тепасидан кетмай турди. Бу орада зина-поядан ёш рожанинг онаси қўлида кичкина садаф қутича билан тушиб келди. У олий табақанинг ўқимишли аёлларидан эди, кўп тилларни биларди, Ҳумоюнга форсчалаб гапирди:

— Шаҳзода, менинг бисотимдаги энг катта бойлигим — мана шу қутичанинг ичиди. Менга фарзандларим дунёнинг ҳамма бойликларидан азизроқ. Сиз ўғлимнинг жонини қайтариб бергандек бўлдингиз. Мана бу қутичадаги улуғ олмосни сизга пешкаш қиласмен!

— ...Воқеанинг тафсили шу, — деди Ҳумоюн ва отасига «Бир навкарнинг ўлгани-ю, Вайсбекнинг жазолангани учун гап эшитмасмикинмен?» — дегандек термилиб қаради.

Бобир оғир тин олди-ю:

— Алқисса, бу гўзал олмос ҳам зўравонлигу хунрезлик балосини кўриб келмишми? — деди.

— Ҳазратим, мендан хатолик ўтган бўлса афв этинг. Мен ўйладимки, ўз орномусларини шундай бебаҳо олмосдан ҳам ортиқ қадрлайдиган одамлар ғайридин бўлсалар ҳам...

— Рост, бу мамлакатда шундай орномусли одамлар бўрлигини ўйласам, менинг ҳам кўнглим кўтарилиур, ўғлим! Аммо бизнинг назари паст беку навкарларимиз зўравонлигу талончилик билан ҳинд элини биздан чўчитмоқдалар. Ахир бизнинг мақсадимиз фақат мамлакат олмоқ эмас эди-ку. Биз Ҳиндистонда катта давлат тузиш орзусини кўнглимизга тушиб келган эдик. Ягоча қудратли давлат барпо этилишидан ҳинд эли ҳам манфаатдор эмасми? Барча ўлкалар бирлашса, элнинг тинкасини қуритган ички урушлар тўхтамасми? Улус тинчиб, илму санъатнинг равнақи осонлашмагайми? Буни сезган ҳиндистонийлардан Диловархон, Ҳиндубек кабилар биз билан ҳамкорлик қилмоқдалар. Биз энди бутун ҳинд элининг кўнглини олмоққа интилмоғимиз даркор, ўғлим!

— Ҳинд элининг кўнглини олмоқ?! — таажжуб билан сўради Ҳумоюн. — Қонли жанглар ваҳимасидан қўрқиб, шаҳару қишлоқларини ташлаб қочмоқда бўлган минг-минг одамларнинг кўнглини биз қандоқ олгаймиз?

Бобир Панжобда йўлни адаштириб, фотиҳларни хароб қилмоқчи бўлган филbonни ва боя «кет, босқинчи!»— деб қичқириб ўзини оловга ташлаган келинчакни эслади:

— Ҳа, бу жуда мушкул муаммо! — Бобир миз устида турган садаф қутичани қўлига олди: — Умидвормен, шояд бу муаммони ечишга мусассар бўлсак. Ахир мана сен бир қанча ҳиндистонийларнинг кўнглини олмишсанку. Деҳлига келган кунинг ибодатхонада бу элнинг муқаддас туйгуларини ҳимоя қилмишсан. Бунинг ҳаммасига лойиқ мукофот мана шу олмосдир! Ол, ҳалолиңг бўлсин!

— Ҳазратим, — деб Ҳумоюн қутичани олмай қўлини кўксига қўйди:— бу олмосни мен сизга атаб келтирдим.

Бобир садаф қутичани яна миз устига қўйди-ю, овози хиёл товланиб:

— Сенинг бу саҳоватинг учун тангрига шукрлар қиласмен, — деди. — Панипат жангига сен менга энг биринчи бўлиб зафар келтирдинг, қўшиннинг руҳини кўтаришга сабабчи бўлдинг. Мен ҳали бу хизматларингни кўнглимдагидек тақдирлаганим йўқ.

— Лекин сизнинг аввалги инъомларингиз менинг бутун умримга етгуликдир, — деб Ҳумоюн отасига «Мубайин»ни эслатгиси келди. — Мен ҳам сизга арзирлик бир аргумон келтириш орзусида эдим...

— Ундай бўлса, майли, мен бу армуғонингни бир марта қабул қиласай. Энди шу олмос меникими?

— Сизники!

— Лекин тақдир менга дунёдаги барча олмослардан қимматлироқ бир мукофот бермишдир. Бу мукофот — менинг сенек ўғлим борлигидир. Тождор, тахтдор ота-ўғиллар орасида қандоқ ёмон баҳилликлар, қандоқ разил хунҳўрликлар бўлганлиги сенга сир эмас. Мен истайменки, бу балолар сену менга ҳеч вақт ёвуқ келмасин. Худодан тилагим шуки, мендан сенга, сендан авлодларингга саховату мардлик, фидокорлигу олижаноблик мерос бўлиб қолсин. Бу фазилатлар бизни улкан тоғ силсиласидек доимо бир-биrimizga боғлаб турсин. Ана ўшандагина биз Ҳиндистонга келиб кўзлаган улуғ мақсадларимизга етишгаймиз.

— Сиз айтган улуғ мақсадлар учун ўғлингиз жонни беришга ҳам тайёр!

— Бунга менинг ишончим комил. Шунинг учун бу ноёб олмосни мен фақат сенга муносиб кўрурмен. Ол!

Ҳумоюн энди ўрнидан сакраб турди-ю, садаф қутичани таъзим билан отасининг қўлидан олиб, кўзига сурди.

Бобирнинг бояғи беҳаловатлиги ва тушкун кайфияти энди тарқаб кетган, кўнглида яна яхши истиқболга ишонч туйғуси мавж урап эди. У Ҳумоюнга:

— Утири, — деди-да, қарсак чалиб савдарбошини чақирди: — Ҳиндубекни чорланг. Ҳўжа Ҳалифа билан бирга кирсин.

Чақирилганлар келгунча Бобир Ҳумоюнга Аградаги аҳвол тўғрисида гапириб берди:

— Қўргонни Иброҳимнинг онаси, ўғли, Маликдод Короний отлиқ вазири мингдан ортиқ хос аскарлари билан беркитиб олмишлар. «Сўнгги одамимиз қолгунча жанг қилурмиз» деб аҳд қилишиблар. Бу аҳдни бизнинг қўшин бир ҳамла билан кўкка совурмоғи мумкин. Аммо яна хунрезлик бўлур, шаҳар бузилиб, бизга керакли қанча одамлар ҳайф кетур!

Ҳўжа Ҳалифа ва Ҳиндубек толорга таъзим қилиб киришди. Бобир уларни қаршисига ўтказгач:

— Сизлар Аграга биздан элчи бўлиб бормоқларингиз керак, — деди. — Мақсад — қўргонни жангсиз олиш. Молу жонлари омон қолсин. Иброҳимнинг онаси Жам-

на бўйидан Паргана¹ сўраган эмиш. Майли, берайлик, Иброҳимнинг ўғли арабча-форсча ўрганганд илмлик ўспирин эмиш, уни саройдаги обрўли мулозимларим қаторига қўшай. Маликдод Коронийни тадбиркор вазир деб эшитдим. Уни Ҳиндистон муаммолари бўйича ўзимга маслаҳатгўй қилиб хизматга олай. Бориб яхшилаб сўзлашинг. Яна қандай маъқул тилаклари бўлса қабул қиласайлик. Хуллас, қирғин бўлмасин, бева-бечора кўпаймасин, деб шу йўлни тутмоқдамиз... Яъни, сизларнинг вазифаларингиз — қалъя олиш эмас, балки қалъадагиларнинг кўнглини олишdir!

Оғир жангларнинг олдинги сафида қон кечиб юрган Ҳумоюн билан Ҳиндубек Бобирнинг бу тадбиридан енгил тортишиб, бир-бирларига мамнун қараб олишди.

АГРА. Тақдир тақозоси

1

Иброҳим Лодининг онаси малика Вайдад Панипат жангига ўлдирилган ўғли учун аза тутиб, бошдан-оёқ оқ кийиниб юрар эди. Орага қўйилган одамлар унга истаган паргanasини бериб, Аграпи жангсиз топширишга кўндиридилар. Малика қўргон дарвозаларининг калитини Жамна бўйида Бобирга топшираётганда кўзларидан тирқираб ёш чиқиб кетди.

Бобир бу салобатли кампирнинг кенг пешонаси ва бир-бираига қўшилган қошларини қаердадай кўргандай бўлди. Сўнг бирдан Панипат эсига тушди. Жанг тугандан кейин бир бек минглаб ўликлар орасидан Иброҳим Лодининг жасадини излаб топган ва бошини кесиб олиб, узун найзага санчиб, Бобирга келтириб кўрсатган эди. Энди қирқ ёшларга борган Иброҳим Лодининг кенг пешонаси ва пайваста қошлари ҳам худди онасиникига ўхшар эди.

Бобирга бир лаҳза шундай туюлдики, гўё Иброҳим Лоди тўсатдан тирилиб, онасининг қиёфасига кириб келган. Бобир алланечук саросима бўлиб:

— Малика, йиғламанг, — деди. — Биздан яна қандай тилагингиз бўлса айтинг?

Малика Байдад кўз ёшини кафти билан тез артди:

¹ Паргана — қичикроқ вилоят.

— Менга бошқа озор бермасалар бўлди.
Бобир мулозимлари томонга юзланди:
— Минбаъд маликага ҳеч ким озор бера кўрмасин,
ҳамма уни мўътабар онамиздек эҳтиром қилсин!

Мулозимлар бу топшириқни таъзим билан қабул қилдилар. Малика ҳам бош эгиб, миннатдорчилик билдирган бўлди. Аммо унинг йигидан намланған кўзларин пўлат тифнинг совуқ жилосини эслатиб нафрат билан ялтираб кетганини ҳеч ким кўрмади.

Малика Байда ўғлиниң кушандасини кечирадиган оналардан эмас. Панипатдан мудҳиш хабар келганда малика учун осмон ўпирилиб ерга қулагандай бўлган эди. У ўғлини сўнгги марта кўришни истар, унинг жасадини ўз қўли билан тупроққа қўйиб, қабрини қуchoқлаб йиғласа кўнгли хиёл таскин топадигангага ўхшар эди. Шунинг учун малика энг ишонган одамларини Панипатга юбориб, Иброҳимнинг жасадини топиб келишни буорган эди.

Лекин Агра билан Панипатнинг ораси уч-тўрт кунлик йўл. То ўлим хабари Аграга етиб келгунча сўнг Аградан малика юборган одамлар Панипатга боргунча орадан бир ҳафтача ўтган, унгача ўликларнинг бир қисми кўмдирилган, бир қисмини мечкай қузғунлар суюклигача тозалаб еб кетган эдилар... Малика Байда юборган одамлар Султон Иброҳимнинг жасадини тополмадилар, фақат жанг куни унинг калласини найзага санчиб Бобирга элтиб кўрсатгандар ҳақида хабар топиб келдилар.. Ўғлиниң жасади қандай хор бўлганини эшигтан онанинг қайфу-аламлари аввалгидан ўн ҳисса ошди. У ҳатто жойнамоз устида намоз ўқиб ўтирганда ҳам «Иброҳимжон, энди бу оламда сенинг қабринг ҳам йўқ, худо менга жасадингни ҳам кўп кўрди!»— деб нола қилар, «Илоҳим сенга ўлим келтирган Бобирнинг ўзи ўлсин, бундан минг ҳисса ортиқ хор бўлиб ўлсин!»— деб қарғар эди.

Маликанинг канизлари ва хизматкорлари кўча-кўйдан унга таскин берадиган гаплар топиб келишарди. Бобирнинг аскарлари ем-хашакдан қийналиб, деҳқонларнинг экинларини отларига едирган экан, деҳқонлар галаён кўтариб, навкарлардан бир қанчасини болта ва паншахалар билан уриб ўлдирибди. Фотиҳларни Ҳиндистоннинг иссиқлари ҳам жуда қийнаб қўйған эмиш. Салқин тоғ ҳаволарига ўрганган от ва одамлар бу ер-

иңиг аёвсиз иссиғига бардош беролмай ўлаётган эмиш. Вабо ва қора безгак ҳам уларнинг сафларини сийраклаштириб қўяётган эмиш...

Малика овозаларнинг қанчалик ростлигини Бобир саройида хизматда юрган невараси Баҳодирдан суриштириб билмоқчи бўлди. Баҳодир ҳафта-ён кунда кела-вермагач, малика «уни саройдан чиқаришмаса керак», деб ўйлади-ю, канизини подшоҳ маҳкамасига юборди. «Мен бетобман, неварамга рухсат берсинлар, мени келиб кўриб кетсин» деган маънода мактуб юборди.

Ун етти ёшли Баҳодир форсчани ва санскритни яхши билар, Бобир учун зарур бўлган баъзи ҳужжатларни таржима қилар эди. Саройда бошқа таржимонлар ҳам бор эди. Баҳодирга кўп иш буюришмас эди-ю, лекин уни ўзича эркин ҳам қўйишмасди. Бобир уни қаттиқ қўриқлаб юришни буюрган эди. Бу қўриқчилар Баҳодирни ташқи хатарлардан эҳтиёт қилиб юргандай кўринсалар ҳам аслида улар шаҳзодани «Иброҳим тарафдорлари томонидан уюштирилиши мумкин бўлган бирон фитнага бош қўшмасин» деб синчнеклаб кузатишарди. Шу сабабли Баҳодирни саройдан кўп чиқаришмасди.

Бироқ эшик оға Муҳаммад Дўлдай малика Байданинг «Қасалман, неварам келиб кетсин» деган мазмундаги хатини олгач, Бобирнинг «Маликани мўътабар онамиздай эҳтиром қилинг» деган буйругини эслади-ю, Баҳодирга жавоб берди. Фақат унинг ёнига аввалидан икки баробар кўпроқ навкар қўшди-да, шу бугуноқ қайтиб келишни тайинлади.

Невараси келганда малика Байда дарё бўйидаги мармар кўшкнинг нимқоронги ички хонасида хасталардай шифтга тикилиб ётган эди. Йўлда иссиқдан терлаб-пишиб кирган неварасига ёнидан жой кўрсатди-ю, маҷолсиз бир аҳволда ўрнидан туриб ўтирди. Неварасининг бўғриққан юзларига қараб ҳол-аҳвол сўраши. Ёз бу йил ҳар йилгидан ҳам иссиқ келганини айтди.

— Фотиҳлар иссиққа бардош беролмай ўлаётгани ростми? — деб сўради.

— Бирда-ярим ўлаётганилари бор, — деди Баҳодир.

— «Ҳиндистонда турмаймиз, салқин жойларга қайтиб кетамиз» деяётганилари-чи?

— Подшоҳлари кетгани қўйгайми? Кўпчилик унинг измидан чиқмас экан. Ўзи ҳам жуда гапга уста нотик

одам экан. «Кетамиз», деб юрганларни саройга тўплаб, шундай бир гаплашдики, ҳаммаси жим бўлиб қолди.

— Сен отангнинг қотилини... мақтаипсанми?

Баҳодир эшикка хавотирли кўз ташлаб қўйди. У ўзи билан бирга келган ҳамроҳларидан хавотирда эди. Буни сезган малика овозини пасайтириб сўради:

— Кетингга одам қўйганларми?

— Ҳа, ҳеч ким билан яккама-якка гаплашолмайман. Ҳамиша ёнверимда қўриқчилар... Ёмонласам дарров етказадиганлар кўп.

— Кўрқма, бу хонада фақат биз иккаламиз... Илгари бизга хизмат қилган одамлардан саройда ҳеч ким борми?

— Отамнинг вазири Маликдод Короний бор... Қейин..., бизнинг кутубхонада ишлаган тўртта олим ҳам хизматга олинди. Билишимча, Бобир ҳиндистонликларни ўзига эл қилмоқчи, уларнинг ишончини қозонмоқчи. Шунинг учун отамнинг барча ошпазларини саройга тўплаб, тўртаси ни ўзи учун танлаб олибди.

— Шу бизнинг ошпазлар пиширган овқатларни Бобир ҳам ермишми?

— Ҳа, кўрганлардан эшиздим. Бобир ҳиндистоний таомларни ейиш билан ҳам ўзини бизнинг элга яқин кўрсатмоқчи бўлса керак.

Малика илгари ўзининг итоатида бўлган ўша тўртта ошпаздан бирортасини қўлга олиш мумкинлигини ўйлади-ю, кутилмаган бир бардамлик билан ўрнидан туриб кетди. Унинг қалбини ўртаб юрган қайфу-аламлар энди бирдан янги йўл топгандай бўлди. Зўр интиқом туйғуси унинг хаёлларини бир нуқтага тўплаб, вужудига куч-қувват бергандай бўлди. «Агар Бобир ўлдирилса, унинг одамлари бу ерда туролмайди: кетади, мамлакат яна ўзнимизга қолади!»— деган ўй ҳам унинг ошпазларни қўлга олиш ҳақидаги қарорини мустаҳкамлади. Малика оғзини неварасининг қулоғига яқинлашириб сўради:

— Уша ошпазларни сен кўрдингми?

— Кўрдим.

— Уларнинг орасида Аҳмад чошнагир йўқми?

Баҳодир бувисининг авзойи ўзгарганидан алланечук чўчиб:

— Иўқ,— деди.— Аҳмад чошнагир Аградан Атова-га кетган.

Малика Баҳодирнинг эшикка яна хавотир билан кўз ташлаб қўйганини кўрди-ю, кинояомуз илжайди: «Бу неварам бўшроқ, айғоқчиси ҳам кўп экан, сир бериб қўйса жувонмарг бўлади, мен ҳам ниятимга етолмайман», деди ўзича ва кўнглидаги қалтис ниятни унга билдиримай гапни бошқа ёқقا бурди.

— Бизга шунчалик содиқ кўринган одамлар ҳозир душманларимизга хизмат қиляпти-я! Э, бевафо дунё! Малиқдод Короний ҳам, ошпазлар ҳам ҳаммаси сотилган! Лекин сен... душманлар билан тил учида муроса қилу дилингни отангга содиқ тут!

— Ҳали ҳам шундай, бувижон! — пичирлаб деди Баҳодир.

* * *

Невараси кетгандан кейин малика Байда хасталик тўшагини йиғиштирди, илгариги фифон чекишлилар ва қарғашларни ҳам бас қилди. Унинг фикру зикри — энг садоқатли ва тадбиркор одамларини ишга солиб, Бобирни заҳарлаб ўлдиришта қаратилди. Маликанинг атрофина фотиҳлардан қасос олишга ташна одамлар кўп эди. Бобир аскарлари билан тўқнашувларда бирининг акаси, бирининг иниси ўлган, бири илгариги макони ва мавқеидан ажралиб хонавайрон бўлган... Малика ана шундай қасоскорларнинг энг ишончлиларини излай бошлади. Бобир ишга олган тўрт ошпаздан бирининг ёлғиз иниси Панипат жангидаги ҳалок бўлган эди. Малика зимдан суриштириб буни билгандага қувониб кетди. Бироқ ўзи бу ошпаз билан бевосита алоқа қилишни лозим топмади. Чунки Малиқани ҳамма танийди. Бобир одамлари сезиб қолишилари мумкин.

Илгари Султон Иброҳимнинг саройида бу ошпазлар билан бирга ишлаган ва уларга қадрдан бўлиб қолган энг ишончли одам — Атовага кетиб қолган Аҳмад чошнагир эди. Малика Аградан анча узоқ бўлган Атовага маҳсус одам юбориб, Аҳмад чошнагирни ўз ҳузуринга таклиф қилди.

Аҳмад чошнагир Аградаги ҳовлиси ва молу мулкидан айрилиб фотиҳларга қарши ғазабга тўлиб юрар эди. Малика Байда уни ўз парганасига ишга олди, уй-жой ва маош берди, сўнг аста-секин кўнглидаги ниятини айтди. Аҳмад чошнагир аввал «уддалай олмайман» деб

қўрқди. Лекин Малика унга далда берди, «иниси Панипатда ўлдирилган ошпаз билан гаплашиб берсанг бўлди, қолган ишни ўзимиз қиласмиш», деди. Аҳмад чошнагир саройга қандай киришини билмас эди. Бунинг йўлини ҳам малика ўзи топди. Малика Байда неварасидан хабар олиш учун саройга бориши мумкин эди. Малика нафис шоҳи ва парчалардан совғалар тайёрлатди, сўнг бу совғаларни Аҳмад чошнагирга кўтартириб, саройга борди... Малика подшо қабулига кириб чиққунча Аҳмад чошнагир эски қадрдони бўлган ўша ошпазни топган ва у билан эртаси куни саройдан ташқарида учрашишга келишган эди. Орадан бир ҳафтача ўтга, Аҳмад чошнагир ошпаз билан тил бириктирганини маликага келиб айтди.

— У ҳам келгиндиларни даф қилишнинг йўлини билмай юрган экан. Подшоҳлари ўлса ҳаммаси даф бўлади деб ишонтирдим!

— Агар ҳамма иш ўйлаганимиздай бўлса, отасининг тахтини Баҳодиржон олади. Ўшанда сизга катта бир паргана берамиз. Ошпаз ҳам катта мукофот олади.

— Илоҳим шу ниятимизга етайлик! Ватанимиз бераҳм фотиҳлардан халос бўлсин!

— Омин!

Аҳмад чошнагирнинг сарой ошпази билан келишувига биноан, Бобирнинг овқатига солиниши керак бўлган заҳарни малика ўзининг энг ишончли бир канизидан бериб юбориши керак эди. Энди улар мана шу нозик ишни қайси канизга топширишни ўйлай бошладилар...

2

Уч ойдан бери муттасил кўтарилиб бораётган жазира маисиқлар ҳиндча ашора деб аталадиган тўртингч ойга¹ келиб жуда авжига чиқиб кетди. Ёмғир фаслиниң бошланишига ҳали салкам бир ой бор. Тўрт ойдан бери нам кўрмай қуриб ётган ер иссиқнинг зўридан тарс-тарс ёрилиб кетган.

Жамна дарёсининг чап қирғонига — илгариги ташландиқ ерлар ва чакалакзорлар ўрнига қурилаётган

¹ Ашора — жавзо ойига тўғри келади. Ҳиндистонда ёз фасли баҳорда ҳут ойидан бошланиб, тўрт ой давом этади. Кейин «Пашкол» деб аталадиган ёмғирлар фасли бошланиб, бу фасл мезон ойига ча давом этади.

Зарафшон боғида ҳали соя жойлар кам. Бобир қурилишни отлиқ айланиб кўрар экан, узанги темиридинг иссиғи этикдан ўтиб, оёғини жизиллатиб узинб олаётганини сезади. Олтин қопланган эгарнинг офтобда ялтираётган қошини ушлагандай чўғни ушлагандай бўлиб, қўёли куяр эди.

Шундай бўлса ҳам у иссиқдан беҳаловат бўлаётганини кетидан эргашиб келаётган бекларига сездирмас эди. Чунки бу беклар ўлжа тушган хазиналардан каттакатта улушлар олгандан бери салқин жойларга кетиб, роҳат-фароғатда яшашга интилишар, Агра ва унинг атрофида янгидан иморат қуриб, боғ-роғ қилишга тоқатлари йўқ эди.

Кобул ва Газни каби салқин жойларга тезроқ қайтиб кетишнинг йўлини излаётган беклардан бири марғилонлик Хўжа Қалонбек эди.

Бобир унга узун оқ яктак кийган, кичкина оқ салла ўраган мўйсафид меъморни кўрсатди-ю:

— Танидингизми? — деди.

— Андижонлик Мавлоно Фазлиддинми?

— Ҳа, Кобулдан биз билан кетма-кет келсин деб тайинлаган эдим. Сангтарош ўғли билан етиб келиб, мана шу боғнинг тарҳини чизди. Шундоқ кекса одам чидаған иссиқларга наҳотки биз бардош бера олмасак?

— Лекин межозига иссиқ тўғри келмайдиган одамлар ҳам бор-да, ҳазратим. Қечаги боди самумда¹ менинг навкарларимдан учтаси тап-тап йиқилиб жон берди.

— Ажали етган бўлса, самум бир сабаб бўлган, холос,— деди. Бобир ва таъзим қилиб пешвоз чиқсан, Мавлоно Фазлиддинга юзланди: — Ҳорманг, мавлоно.. Қани арзингиз бўлса эшитгали келдик.

— Арзим шуки, ҳазрати олийлари, бизга фил билан ишлайдиган филбонлар керак. Боғ ўртасидаги мармар қаср учун Деҳалпурдан жуда оғир тошлар олиб келмоқчимиз. Бундай тошларни катта аробаларга фақат филлар ортиб беришлари мумкин.

Бобир Панипат жангига филбонлари билан асир олинган сурув-сурув филларни эслади. Сўнг девонхонага ишга олинган ҳиндистонлик маслаҳатчиси Маликодд Коронийга юзланди:

¹ Боди самум — энг иссиқ гармесел шамол.

— Жаноб Короний, ҳарбий филларни меҳнатга ўргатиш мумкинмикин?

— Мумкин, ҳазратим. Фил жуда знирак жонвордир. Филбонлардан эшитганим бор. Филлар қонли жанглардан кўра осуда меҳнатга тезроқ ўрганаар эмишлар.

— Бизнинг қўшинлар фил ёрдами билан жанг қилишга одатланган эмаслар. Шунинг учун Панипатда ўлжа олинган ҳарбий филларни қурилишларда ишлатмоқ мумкин. Жаноб Короний, бу фармонни шу бугуноқ барча филбонларга етказинг!

— Жоним билан!

Короний буйруқни тезроқ бажариш учун ҳозир кетмоқчи эди, Бобир уни тўхтатди:

— Яна шаҳару қишлоқларга маҳсус тавочилар юборинг. Биз Иброҳимдан ўлжа олинган бойликларни ободончилик йўлида сарфламоқчимиз. Шуни барча вилоятларга маълум қилинг. Қурилишларда ишлаш учун сизга ўн беш минг коргар етарликми, мавлоно?

— Етарлик. Лекин ҳазратим мармар қаср билан тошвойин¹ни бир йилда қўриб битиришни буюрган эдилар. Сангкорлик — тез бўладиган иш эмас...

— Сангтарошларни кўпайтирсак-чи? — деди Бобир.

— Мен ҳам шуни илтимос қйлмоқчи эдим. Ҳиндистоннинг ҳавосига Ҳироту Самарқанддаги гишту кошинидан кўра тошу мармар мосроқдир.

— Ҳозир қурилишларимизда қанча сангтарош уста бор, мавлоно?

— Агранинг ўзида олти юз саксон сангтарош ишлатмоқдамиз. Секрида, Деҳалпурда, яна бошқа жойларда — жами минг тўрт юз тўқсон бир сангтарош...

— Бу оз эмас! — деди Бобир. — Амир Темур Самарқандда энг катта иморатлар қурдирганда турли мамлакатлардан икки юз сангтарош бориб ишлаган экан. Тарихчи Мулла Шарафиддин² буни фавқулодда мақтаб таърифлаган эканлар. Лекин Ҳиндистон ҳунарпешаларга шу қадар бойки, биз юзлаб эмас, минглаб уста-сангтарошларни ишга таклиф этишимиз мумкин. Жаноб Короний, бизнинг қаламравимиздаги барча шаҳарларга жарчилар чиқаринг. Эълон қилсинларки, бизнинг қурилишларимизга келиб ишлайдиган коргару усталар-

¹ Войин — катта ҳовуз.

² Яъни, Шарафиддин Али Яздий.

га истаганларидан ҳам зиёда ҳақлар тўланур, имтиёзлар берилур. Дину миллат айириш йўқ. Барча усталар аввало худонинг, ундан сўнгра бизнинг ҳимоямизда бўлурлар!

Короний таъзим билан:

— Фармони олийга жонимиз фидо! — деди-да, отини буриб, Агра томонга йўл олди.

Бошқа бек ва мулоzимлар тобора кучайиб бораётган иссиқдан бетоқат бўлиб, дарёда лангар ташлаб турган кемаларга қараб-қараб қўйишишарди. Улар қурилишни кўриб бўлганларидан кейин подшоҳ билан бирга шу кемаларга чиқиб дам олишлари мумкинлигини билишарди. Шунинг учун қурилишга оид гаплар тугашини сабрсизлик билан кутишмоқда эди.

Лекин Бобир меъмордан бўлажак қаср билан дарё оралиғига тушадиган мармар ҳаммомининг гумбази ва ичи қандай бўлишини сўради.

— Ичи худди Самарқанддаги Улуғбек мирзо ҳаммомидек сангфарш қилинур,—деди Мавлоно Фазлиддин.— Лекин гумбази мирзо ҳаммомининг гумбазидан хийла улуғ бўлур. Деворлари қизил тошдан ишланур... Мармарнинг бир хосияти шуки, ёзда муздек салқинлик берур.

— Бўлмаса мармар иморатларни тезроқ қурингки, биз бу жазирамада куйиб кул бўлмайлик! — деди иссиқдан бўғриқсан Қалонбек.

— Мармар иморатлар тезроқ битсин дессангиз отдан тушиб ҳашар қилишинг, жаноб бек! — деб тегишиди мавлоно.

Бобир унинг жавобидан мамнун бўлиб кулди-да:

— Қалай, мавлоно, иссиқ ўзингизни кўп қийнамадими? — деди.

— Қийнаса ҳам чидаймиз-да. Мана шундай катта обидаларни Андижонда қурамен деб қуролмадим. Ҳинротда қурамен деб қуролмадим. Чизган тарҳларим ўттиз йил сарғайиб ётди. Қарангки, бутун умр қилган орзуларим узоқ Аграга келганимда рўёбга чиқадиган бўлиб турибдир. Тақдиру насибим шуни тақозо қилса, иссиғи кўзимга кўринурми? Ҳиндистоний усталар салқин тутадиган мева шарбатлари-ю, енгил таомлар ейишар экан. Мен ҳам шунга ўргандим. Эрталаб салқинда туриб бир паҳра¹ ишлаймен. Кун қизиганда бир паҳра

¹ Бир паҳра — тўрт соат.

Етиб дам олгаймен. Иссиқнинг тафти пасайгач, яна бир паҳра ишлагаймиз.

— Биз бўлсак эртаю кеч сергўшт таомлар, қази-ю, кабоблар еюрмиз,— деди Бобир Хўжа Қалонга қараб.— Яна бу етмагандек, оловли майлар ичурмиз.

Хўжа Қалон от устида офтобнинг тифида туриб шундай терлаган эдикни, юзи ва пешонасидан сирқиган тер томчилари мош-гуруч соқолидан оқиб, кўкрагига томмоқда эди.

Бобирнинг ўзи ҳам ҳар нафас олганда ичига ҳаво эмас, олов кираётгандай бўларди. У меъмор билан гапини тугатгач, отини дарёдаги кемалар томонга бурди-ю, елдириб кетди.

Отлар тез юрганда қаршидан шабада эсгандай бўлар ва нафас олиш енгиллашар эди. Шунинг учун Бобирнинг кетидан бошқалар ҳам отларини тез ҳайдай бошладилар. Шу тарзда дарё соҳилига яқинлашар эканлар, Хўжа Қалоннинг навкари мингган бадахшоний қора от суриниб йиқилиб тушди. Бадахшонлик навкар оёғини отнинг тагидан тортиб олди-да, юганни силкитиб, отини турғизмоқчи бўлди. Оғзидан қон аралаш кўпик келаётган от бир-икки талпиниб кўрди, лекин ўрнидан туролмади.

— Буни ҳам офтоб урди!— деди Хўжа Қалон алам билан.— Кошки бу мамлакатда от топиш осон бўлса!

— Жаноби бек, бир от учун мунча изтироб чекманг, мен буюрай, навкарларингиз бизнинг тавиладан бир от олсин,— деди Бобир.

— Фоят миннатдормен, ҳазратим!— деди Хўжа Қалон-бек.— Лекин гап фақат отда эмас, Мен бу ўлимда ўстиқболимни кўриб изтироб чекмоқдамен!

Бобир отдан тушди-ю, дарёда лангар ташлаб турган «Осойиш» номли икки ошиёнлик муҳташам кемани Хўжа Қалонбекка кўрсатиб ҳазиллашди:

— Ҳозир сизга мана бу истиқбол мунтазир! Юринг!

* * *

Қайиқларга миниб кемага етганларида Бобир Хўжа Қалонбекни кеманинг тумшуқ томонидаги хонаи хосга бошлади. Кема дарё бўйлаб сузуб борар экан, сувнинг шамоли энг аввал шу хонага тегар ва ажиб бир салқинлик берар эди.

Савдарлар дарёда совитилган норинж ва лиму¹ шарбатидан келтирдилар. Хўжа Қалонбек муздай норинж сувидан бир чинни коса сипқарди-ю, нафасини сал ростлаб, Бобирнинг юзига қаради.

— Ҳазратим, сиз ҳам қорайиб, жуда озиб кетибсиз,— деди.— Бизга билдирилмайсизу, лекин не чоғлик қийналиб юрганингизни бошқалар сезмаса ҳам мен пайқаймен.

— Ҳа, энди... Сиз билан биз ўттиз йилдан бери биргамиз. Не ранжу не машаққатларни бошдан кечирмадик! Ушал ғаму аламларга нисбатан ҳозирги азобларнимиз — давосини топса бўладиган дардлар-ку.

Хўжа Қалонбекни яна тер босди. У қўйнидан ипак рўмолча олиб, пешонасидан кўзига оқиб тушган терларини артар экан:

— Афсуски, ёшим кетиб қолди,— деди.— Йингитлика иссиқ-совуқни фарқ қўлмас эдик. Ҳозир элликдан ошдик... Сезиб турибменки, Ҳинднинг боди ҳавосидан бир ҳафтада бир ёшга қаримоқдамен. Эски беклардан Қосимбек қавчин бор эди. Бу йил кексайиб, дунёдан кўз юмди. Бу аҳволда мен ҳам кўпга бормасмен, ҳазратим!

— Ундей деманг, жаноб Қалонбек. Иссиққа ҳам одатланурмиз.

— Мовароуннаҳрдай салқин ўлкалардан чиққан одам ҳинд иссиғига ўрганишига ақлим бовар қилмайдир!

— Нечун! Асли Шаҳрисабзнинг лочин уруғидан бўлган Хисрав Деҳлавий Ҳиндда етмиш йил умр кўрмиш. Бунисига не дейсиз?

Хисрав Деҳлавий — Хўжа Қалонбекнинг севимли шоирларидан эди. Деҳлидан ўтганларида Қалонбек ҳам Бобир билан бирга Хисрав Деҳлавийнинг Низомиддин Авлиё мақбарасига қўйилган қабрини зиёрат қилган эди. Уша ерда Қалонбек Деҳлавийнинг «рўй ба Ҳинд овардони соҳибдилон бечиз нест!»— деган машҳур сатрини эслаган, «биз ҳам энди Ҳиндга келган соҳибдилларданмиз» дегандек мағурурланган эди. У пайтда ҳали иссиқнинг тафти бунчалик баланд эмас эди, Хўжа Қалонбекнинг Ҳиндишондан қайтиб кетиш истаги ҳам ҳозиргичалик кучли эмас эди. Бобир Деҳлавийни эслатиш

¹ Лиму — лимон.

билан Қалонбекнинг аввалги аҳдида туролмаётганини айтмоқчи эди.

Хўжа Қалонбек буни пайқаб, томоқ қирди:

— Ҳазратим, Деҳлавий улуғ одам бўлган,— деди.— Менинг улуғ одамларга тенглашадиган қудратим йўқ экан...

— Сиз яна аввалги эътиқодларингизга зид гапирмоқдасиз. Мақсад улуғ одамларга тенглашмоқ эмас, балки уларнинг нек ишларини давом этказмоқ эди-ку. Бизни мафтун қилган ҳодиса — Ҳисрав Деҳлавийнинг қалбида туркӣ улуснинг қудрати билан ҳинд элининг даҳоси бир-бирига пайванд бўлиб, улуғ натижа берганилиги эмасмиди?

Хўжа Қалонбек эътиrozга сўз тополмай тасдиқ маъносида бош иргади ва дастурхонда турган лиму шарбатига қўл чўзди.

Улар Деҳлавий ҳақида илгари ҳам кўп сўзлашган эдилар. Лахўр, Деҳли ва Аграда Деҳлавийнинг ҳинд тилида битган қўшиқларини мусулмонлар ҳам, оташпраст ва будпарастлар ҳам тўю томошаларда куйлаб юрганларини гувоҳи бўлдилар. Деҳлавий Бобирдан икки юз йил олдин ўтган бўлса ҳам унинг ғазаллари, куйлари, қўшиқлари худди бугун битилгандай янги ва таъсирли эди. Бобир Деҳлавийнинг Ҳиндистондаги барча элларни аҳилликка даъват этиб кетганини, агар бу мамлакат дину миллат низоларидан баланд турса ва тарих майдонига яқдилу яктан бўлиб чиқса, жаҳоннинг энг улуғ қитъасига айланиши мумкинлигини айта бошлиди.

Бобирнинг бу гапларини айтишдан мақсади —Хўжа Қалонбекни Ҳиндистонда олиб қолиш эди. Лекин Хўжа Қалонбек дўстлари даврасида чоғир ичиб ўтирганда «Шу бу йил Ҳинддан кетмасам юзим қора бўлсин!»— деб қасам ичган эди. Энди у қасамхўр бўлиб қолмаслик учун ҳам Ҳиндистондан кетишга интилмоқда эди. У Бобирнинг нутқи ва мантиқи жуда зўрлигини яхши билар, Бобир келтирган кучли далилларга жим туриб қулоқ солар, лекин эътиroz учун қулай пайт пойлар эди.

— Ҳинднинг қадимий маданиятини Беруний қанчалик улуғлаб ёзганини билурсиз,— сўзида давом этди Бобир.— Бу элда истеъдоду салоҳият конлари ҳозир ҳам беадад. Фақат инқирозли даврлар бу конларни беркитиб кетмишdir. Биз бу конларни қайтадан очмоғимиз

мумкин. Ҳунармандлар беҳисоб. «Иш топиб берсангиз қилғаймен» деб мунтазир турган қуурур-қуурур¹ заҳматкаши бор. Ҳазиналарини ўзингиз кўрдингиз. Аҳолиси-ю, бойлигининг улканлигини яна шундан билса бўлурки, биэда йўқ рақамлар буларда бор. Юз қуурур — бир арб². Юз арби карб дерлар. Юз карбни нил³ дерлар. Юз нил — падам⁴. Биргина Деҳли вилоятидан ҳар йили давлат ҳазинасига тушадиган даромад уч қуруру олтмиш тўқиз лаку эллик минг тангадан ортиқ. Бундай вилоятлар Ҳиндистонда озми? Сиз шу вилоятлардан қайси бирини маъқул кўрсангиз, шунисини берайлик.

— Ҳазратим, менга Ғазнини иноят қилсангиз, марҳаматингиздан умрбод миннатдор бўлур эдим.

— Яна Ғазни дейсиз-а! Ғазнида нечоғлик тангдастлик билан кун кечиргандаримиз эсингиздан чиқдими? Маҳмуд Ғазнавийнинг бузилган бандни тиклаймиз деб удасидан чиқолмаган эдик. Одам топсак маблағ топилмас эди, маблағ топсак яна бирон нарса етишмас эди. Бу ерда ҳаммаси бор. Кучу қудрат уммондай чексиз!

— Лекин бу уммон мендек... мусофири ном-нишон қолдирмай ютиб юборишидан қўрқамен!

Хўжа Қалон «мендек мусофири» деб фақат ўзи ҳақида гапираётгандай кўринса ҳам аслида у Бобир билан келган барча ватандошларини назарда тутмоқда эди. «Бу улкан мамлакатга биз урвоқ ҳам бўлолмаймиз, катта халқа аралашиб йўқ бўлиб кетамиз, ундан кўра оладиган ўлжамизни олиб, шимолга тезроқ қайтиб кетайлик», деб юрганbekлар ёлғиз Хўжа Қалон эмас эди. Бобир шуни ўйлади-ю:

— Мақсад ном-нишон қолдириш бўлса,— деди,— одам шу мақсадга ўзини фидо қила билиши керакми йўқми? Биз ўрганган салқин боғлар, равон ариқлар бу ерда йўқ. Узум йўқ, қовун йўқ, ях йўқ. Яхши от йўқ. Султон Иброҳимдек подшонинг саройида шаму шамдон ишлатилмас экан. Юз-икки юз чароғбон давтийлар тирик шамдон бўлиб хизмат қилар эканлар. Чап иликларига сепоя бир чироғни тутиб, ўнг иликларига ёғ солинган кадуни кўтариб, улуғларига чироғ керак бўлганда

¹ Қурур — юз лак, яъни ўн миллион.

² Арб — миллиард.

³ Нил — триллион.

⁴ Падам — квадриллион.

ўтруларида шамдонга ўхшаб турар эканлар... Мен бу-
юрдимким, ҳунармандларга бизнинг шамдонлару қан-
дилларни кўрсатиб, шундайларини ясатсинлар. Бир ой
ўтмай саройга етгулик шамдону қандил тайёланди.
Шамгарлик ҳам жорий этилди. Ток эктиридим, насиб қилса
ҳинд узумини ҳам ермиз. Бугун кўриб келган боғимизнинг
ўрни қанчалик бесафо ерлар бўлганини кўрган эдингиз.
Ўлмасак, ушбу ерда Самирқанду Ҳиротнинг энг маш-
ҳур боғу чорбоғларидан ҳам гўзалроқ боғлар, кўшклар
барпо этилганини кўурмиз. Самарқанду Ҳиротда ин-
қирозга юз тутган маданиятни биз энди ҳинд мадания-
тига қўшиб юксалтира олсак... Шунинг ҳаммаси биз-
дан ному нишон бўлиб, авлодлар хотирасида қолмасми,
бек?

— Ҳазратим, ниятларингизнинг улуғлигига тасанно
айтурмен. Лекин ватанимизда қилмаган нек ишларни
бегона юртда қилсанак, ким бунинг қадрига етур? Не
қилсангиз ҳам биз келгинди фотиҳлармиз. «Булар йи-
гитларимизни жангда ўлдириб, кишваримизни зўрлик
билин олган», деб таъна қилмасларми? Пайтини топ-
гандা қасос олмасларми?

Бобир оғир «уф» тортди-ю:

— Не қилай? — деди. — Мен шу орзуларни вата-
нимда рўёбга чиқарай деб озмунча олишдимми?

— Сиздан олдин Ҳиндистонни фатҳ этган Маҳмуд
Фазнавий катта ўлжалар олиб, керакли ҳунарпешалар-
ни Фазнига олиб кетиб ишлатган. Ана!..

— Наҳотки сиз менинг Маҳмуд Фазнавийга ўхша-
шимни истарсиз?

— Густоҳлигим учун маъзур тутинг!

— Ахир биз мамлакатни талаб, бойликларини-ю,
ҳунарпешаларини олиб чиқиб кетадиган қароқчилар
эмасмиз-ку!

— Бир шеърингида ўз еrimизни қўйиб Ҳинд сарн
юзланганимизни юзи қаролик деб атаган эмасмиди-
нгиз ҳазратим?

— Атаган бўлсан, энди юзимизга теккан қарони
ювиб ташлаш ҳаракатидамен! Агар биз ҳам Ҳисрав
Деҳлавийдек шу мамлакатга фарзанд бўлсанак, бутун ақ-
лу заковатимизни унга баҳш этсак, аминмәнки, келажак
авлодлар олдида юзимиз ёруғ бўлғусидир!

Хўжа Қалонбек мунозара йўли билан Бобирга сўзи-
ни ўтказолмаслигини энди аниқ сөзди,

— Ҳазратим, сизнинг метин иродангиз бор,— деб энди Бобирни мақтаб юмшатишга тириша бошлади:— Сизнинг бошингизга тушган кулфатлар бошқа одамнинг бошига тушса, бардош беролмас эди. Лекин сиз ҳам масига бардош берибгина қолмай, яна шундай улкан ишлар қилмоқчисизки, бунга жаҳон таҳсин ўқигусидир. Йиллар ўтган сари мен сизнинг улуғ бир сиймо эканлингизни тобора аниқ сезмоқдамен. Мана ҳозир ҳам сизнинг ёнингизда худди улкан тоғ чўққисининг домонасидағи кичик бир тепачадек ўзимга-ўзим ожиз кўришиб кетдим.

Хўжа Қалонбек овози ҳаяжондан титраб, кўзи аламданми, ўксинишданми чақнаб гапирмоқда эди. Буни кўрган Бобир унинг кўнглини кўтаргиси келиб, Деҳлавийнинг бир сатрини эслатди:

«—Асли кас аз кас набошад кам чу жумла з одаманд!»¹

— Лекин беш қўл баробар эмас, ҳазратим... Менинг ахволим ўзимга маълум. Сиз кўтарган улуғ юкка елкамни тутсам майиб бўлурмен. Мени беш-олти йилтирик юрсин десангиз, рухсат беринг, Фазнига борай. Маҳмуд Фазнавийдан қолган ўша эски бандни тиклатиб, чўлни обод қиласай. Бу ишнинг бутун савобини сизга бағишлай.

Бобир бу сўзларга эътироҳ қилмай ўйланиб қолди. Хўжа Қалонбек кўзлаган мақсадига етказадиган йўлни энди топганини сезди-ю, шоша-пиша сўзида давом этди:

— Ҳазратим, илтимосимни қабул этинг! Умримнинг схирида дуои жонингизни қилиб ором олай. Ўлсан, жасадимни Фазнига қўйсинглар. Ҳарна ватанимизга яқинроқ бўлғаймен.

Бобир Хўжа Қалонбекнинг кўзи нәмланганини кўрди-ю, ўзининг Ҳумоюнга тайинлаган бир гапи эсига тушди. «Урушда қон кечиб юрибмиз, мабодо вафот этсам мени Қобулга элтиб кўмгин» деган эди Бобир. Хўжа Қалонбек кетса, улар яна дийдор кўриша олармикинлар? Шу ўй таъсирида Бобирнинг ҳам кўнгли бузилиб, овози товланиб эшитилди:

— Кетингиздан бошқа бек-навқарлар эргашса... мен ким билан қолгаймен?

¹ Аслида одам одамдан кам эмас, чунки ҳамма ҳам Одам Ато фарзандидир.

— Ҳамма беклар билан ўзим гаплашурмен, «подшоҳ Ғазнидаги бандни тиклаш учунгина рухсат бердилар», дермен. Ҳеч ким менга эргашмайдиган қилиб кетгаймен, бунга ишонинг!

Бобир Ҳиротга, Табризга, Балхга, Андижону Тошкентга одамлар юборган, «кимда-ким бизга хайриҳоҳ бўлса Ҳинди斯顿га келсин, улуфалар берурмиз, не истаклари бўлса адо этурмиз» деган қадаға¹лар йўллаган эди. Кобулдаги доругалар келувчиларнинг сарфу харажатлари учун маҳсус маблағлар олган эдилар.

— Бўлмаса, сиз ҳам... қаердаки қизилбошлар билан шайбонийзодалардан безған олиму ҳунарманд, беку навкар кўрсангиз, бизнинг номимиздан айтинг, келсинлар!— деди у Ҳўжа Калонбекка.

— Жоним билан айтурмен, токи мендек кетганларнинг бири ўрнига юзи келсин!

Ҳўжа Калонбек Бобирга бу гапларни чин дилдан айтгандай кўринган эди. Аммо Ҳинди斯顿дан кетишга ижозат олгандан кейин Бобирга ўзини аянч кўрсатиб ялингани учун алами келди. У бек дўстлари олдида ишган қасамини қойиллатиб бажарганини ҳаммага намойиш қилгиси, Ҳинда қолаётганларни кўйдириб кетгиси келді-ю, Аграда яшаган уйининг деворига бир байт шеър ёзиб қолдириди:

Агар бахайри саломат гузар-зи Синд кунам,
Сиёруй шавам, гар ҳавои Ҳинд кунам!

Ҳўжа Калонбекнинг уйига кўчиб ўтган Ҳиндубек бир кун кечки пайт бу шеърни ёзиб келиб Бобирга кўрсатди ва байтни ўқиган одамлар ҳамма жойда шов-шув гап қилиб юрганини айтди.

Бобир Ҳўжа Калоннинг «Ҳеч ким менга эргашмайдиган қилиб кетгаймен!» деган сўзларини эслади-ю:

— Бу кудурат нечун?— деб ҳайрон бўлди.— Наҳотки, Ҳўжа Калон бошқа бекларнинг ҳам Ҳиндан кетишни истаса?

— Билмадим, бу ерда қолган бекларнинг фидойилиги Ҳўжа Калонбекнинг аламини келтирганими?

¹ Қадаға — чақириқ хат.

² Яхшилик ва саломатлик билан Синд дарёсидан ўтиб олганимдан кейин агар яна Ҳинди ҳавас қилсан юзим қаро бўлсин.

— Ҳа, ўзи шундай фидойи бўлолмаганининг алам бу!— деди Бобир ва қарсак чалиб муншини чақирди.

Мунши келгунча ўрнидан туриб, хонаи хоснинг у бурчагидан-бу бурчагига асабий бир тарзда бориб келди. Бир кўнгли Ҳўжа Қалоннинг кетидан чопар юбориб, уни Ғазни ҳокимлигидан бекор қилишга мойил эди. Лекин шунча йиллик қадрдонидан айрилиш, кейин Ғазнидаги вайрон бўлиб ётган бандни тиклаш учун яна бошқа одам излаш ташвиши уни бу фикрдан қайтарди.

Нима қилиш керак? Ҳўжа Қалоннинг шеъри Ҳиндистондан кетгиси келиб юрган беку навкарларни баттар қўзғатиб қўйиши аниқ. Агар бу байт учун Ҳўжа Қалон жазоланса, шеърнинг таъсири янада ошиши аниқ.

— Бу байт деворга ёзилганича турибдими?— сўради Бобир Ҳиндубекдан.

— Учиртириб ташладим.

— Бекор қилибсиз, бек. Сиз ўчирганингиздан сўнг бу байт одамларнинг хотирасига янада маҳкамроқ ўрнашур. Шеърнинг таъсирини фақат шеър билан кесмоқ мумкин.

Қўлидан қалам-қоғози билан хипча бўй, ўрта яшар мунши таъзим қилиб кирди.

— Ёзинг!— буюрди Бобир унга.

Мунши гилам устига чўкка тушиб, жуздонни тиззасига қўйди, қоғозни кафти билан текислаб, ёзишга тайёрланди.

Бобир бадиҳа оҳангига гапирди:

— Юз шукр де Бобирки, кариму ғаффор,
Берди сенга Синду Ҳинду кишвари бисёр.

«Кишвар» сўзи вазнга тушмай сакталик берганини сезди-да, иккинчи сатрни бошқача қилиб такрорлади:

«Берди сенга Синду Ҳинду мулки бисёр.
Иссиқлигига гар сенда йўқдур тоқат.
Совуқ юзинг кўрай десанг Ғазни бор.

Мушоиранинг нозик қоидаларига мослаб бирпастда яратилган бу бадиҳа Ҳиндубекнинг завқини келтирди. У деворга совуқ гап ёзиб кетган Ҳўжа Қалонбекнинг башираси ҳам Бобирга нечоғлиқ совуқ кўринганини ўзича тасаввур этиб, беихтиёр кулиб юборди. Бобир отган

уқининг нишонга текканини шу завқли кулгидан сезди-ю, енгил бир сўлиш олиб, муншига буюрди.

— Бадиҳани уч нусха кўчиринг. Бир нусхасини Хўжа Қалонбекнинг кетидан жўнатсинлар. Ҳиндубек, бир нусхасини сиз олиб, Қалонбекнинг байтини ўқиган беку навкарларга беринг. Кўрсинлар-чи, мушоирада ким ғолиб?

Бу бадиҳани ўқиган кўпчилик бек ва мулозимлар Хўжа Қалонбекни кулги қилишиб, «Совуқ юзин кўрай десанг Фазни бор!»— дейдиган бўлишди. Йиссиқдан тоқатсизланиб нолийдиганларга ҳам: «совуқ юзин кўрай десанг Фазни бор!»— деб истеҳзо қилиш расм бўлди.

3

Панипатда оғир ярадор бўлган Тоҳир уч ойгача ўринидан туролмай ётди. Саройдан юборилган табиб унинг этидаги яраларни дуруст муолажа қилди-ю, лекин қовурға ва қўл суякларининг майдамайда бўлиб синган жойларини эпақага келтиrolмади. Синган суякларнинг оғриғи туну кун тинчлик бермас эди. Тоҳир Аграда ўша эски қадрдони Мамат билан кичик бир ҳовличада турар, «энди бу ердан ўлигим чиқса керак», деб ўйлар эди.

Шунинг устига Кобулдан Мавлоно Фазлиддин Тоҳирнинг муҳандис ўғли Сафарбекни бошлаб келиб қолди. Улар қурилишда бирга ишлайдиган ҳинд сангтошларидан сўраб-сурништириб, агралик бир жарроҳни топиб келдилар. Жарроҳ камбағалпарвар одам эканини эшитган Мавлоно Фазлиддин жияинини унга таништирас экан:

— Соҳиб Байжу,— деди.— Тоҳир ҳам аслида заҳматкаш бир деҳқон эди. Мен бунинг навкар бўлишига қарши эдим...

— Ушда сиз ҳақ гапни айтган экансиз, мулла тоға,— деди Тоҳир.— Мен бераҳмлар орасида юриб бераҳм бўлиб кетган эканмен... Бўлмаса йигирма йиллик қадрдоним Маматга шунчалик шафқатсизлик қиласмишим? Мана, ҳаммасининг қасоси қайтди. Ҳали ҳам Мамат одамгарчилик қилди. Бўлмаса отларнинг оёғи тагида қолиб мажақланиб кетардим!

Мавлоно Фазлиддин Маматнинг бу яхшилигини келтган кунлари эшитган ҳали бор қурилишига ишга ол-

ган эди. Мавлоно буни табибга форсча аралаш урдуча тилида ҳикоя қилиб берди-да:

— Жияним ҳам энди беклигу навкарликни ташла-моқчи,— деди.— Сизу биздек тинч меҳнат билан кун кўрмоқчи. Бунга ёрдам берайлик!

— Биламан, сиз бизнинг юртимизга ободончилик қилиш учун келгансиз, соҳиб,— деди Байжу. Сиз илтимос қилганингиз учун жиянингизга қўлимдан келганича ёрдам бераман!

Табиб айтганини қилиб Тоҳирни бир ой астойдил даволади. Байжунинг сеэгир қўллари қайси суяк қаे-ридан қандай синганини бехато аниқлаб, ҳаммасини моҳирлик билан жой-жойига қўйиб чиқди. Бир ой давомида Тоҳир унинг кафти оқиш-кўкимтири, усти қора майнин панжаларига худди ўз қўлларига ўргангандай ўрганиб кетди. Кейин тузалиб ўрнидан турган куни Байжунинг шу панжаларини қўлларига олиб, кўзига сурди:

— Айтинг, соҳиб, мен бу яхшилигинги зинни қандай қайтарай?

— Жарроҳнинг қўлини шунчалик эъзозлаб кўзга сурганингиз — яхшилигимнинг қайтгани эмасми?

— Йўқ, мен сиздан умрбод қарздормен!

— Ким билсин, балки мен ўзим ҳозир бир қарзими-ни узгандирман?

Мавлоно Фазлидин ҳам шу ерда турган эди. У табибининг алланимани «Айтайми, айтмайми?»—деб ик-киланаётганини кўрди-ю:

— Соҳиб Байжу, сиз нечун ўзингизни қарздор сез-дингиз?— деди.

— Бунинг тарихи узоқ... Фақат илтимос қиласман, бошка ҳеч кимга айтмангизлар.

— Илтимосингизни бажонидил қабул қилдик!

— Менинг бир филбон акам бор. Иброҳим Лоди замонида акам Аградан иш тополмай Панжобга кетган эди. Ўша ерда қўшинларингиз қанча одамларимизни қирганини эшитипти. «Буларни ватанинга киргиз-майман», дебди-ю, қўшинларингизни адаштириб, чан-галзор ботқоқликка бошлабди.

— Э, бўлди, бўлди!— деди Тоҳир филбон раҳнамо Лаъъл Кумарни эслаб.— Бизнинг иккита навкаримизни филига урдириб, майиб қилиб кетган эди... Аммо мен ўшанда унинг довюраклигига қойил бўлган эдим. Бир ўзи бир қўшинидан қўрқмай олишган эди-я!.. Биз ун-

чангалзор, ботқоқликдан чиқолмайди, деб ўйлаган эдик. Чиқибдими-а? Ҳозир тирикми?

— Тирик, лекин энди Аграга келишдан қўрқади... Акам ўша навкарларингни майиб қилгани... яхши бўлмаган... Эҳтимол, мен соҳиб Тоҳирни даволаганим — ўша гуноҳимизни ювиб кетгандир?

— Сиз акангиз қилган ишни гуноҳ деб атаманг, соҳиб Байжу! — эътиroz қилди Мавлоно Фазлиддин. — Ватанин бундай баҳодирона ҳимоя қилиш гуноҳ эмас, балки шарафдир!

— Яхши сўзларингиз учун раҳмат, соҳиб! Аммо ўша иши туфайли акам ҳамон ишсиз. Ўз ватанида бекиниб қочиб юрибди. Бола-чақаси оч-яланғоч.

— Акангиз қурилишда ишлаганими?

— Ҳа, фил билан доим қурилишда ишлар эди.

— Бўлмаса менга учрасин, иш топиб берай. Биз ҳатто ҳарбий филларни меҳнатга ўргатмоқдамиз-ку!

— Акам бунинг ҳаммасини эшигтан. Иброҳим Лоди бекитиб ётган олтинларни сизлар энди қурилишга сарфлаётганларингиздан мамнун. Аммо қўлга тушиб қолишдан қўрқади.

— Балки акангизнинг Аграга келмагани тўғридир. Бу ерда беку мулозимлар кўп, таниб қолиб, бир бало қурилишлари мумкин. Акангиз аъёнлар кам борадиган чет жойдаги қурилишга келсин. Мен жума куни Деҳалпурга бораман. Истаса ўша жойга борсин.

— Соҳиб, сизни подшоларингиз ҳурмат қилас, эмишлар, энг катта қурилишларнинг саркори экансиз. Подшоҳдан акамнинг гуноҳини сўраб, шафоат олиб беролмайсизми? Ўшанда биз бехавотир юрар эдик.

Мавлоно Фазлиддин ўйланиб турди-ю:

— Сизни бунга ишонтиrolмайман, Байжу, — деди. — Чунки подшоҳнинг жонига қасд қилган одамларни аёвсиз жазолаш ҳақида маҳсус фармон чиқарилган. Бобир мирзо шу фармонга имзо чекканлар. Ўзлари соҳибдил шоир, маърифатлик инсон бўлсалар ҳам подшоҳлик билан фотиҳлик у кишини мураккаб зиддиятларга дучор қилган. Ўшанда Латель Кумар уни аскарлари билан адаштириб, йўқ қилиб юбормоқчи бўлгани эсига тушса, қаҳр устида қатл эттириб юбориши мумкин.

— Бу рост, — деди Тоҳир тоғасининг сўзини маъқуллаб. — Ҳатто мен... энди саройга хизматга қайтишдан чиймен. Бобир мирзони чин дилдан яхши кўрсам

ҳам унинг шафқатсиз муҳитидан узоқроқ юргим келади.

— Ундоқ бўлса, энди менинг акам нажотни фақат сиздан кутади, Мавлоно Фазлиддин!

— Мен унга қўлимдан келган яхшиликни қилишга тайёрмэн. Келгуси жума Деҳалпурга келсин.Faқат... ўзини.. Сизнинг номингиз билан атасин.. Иложи бўлса қиёфасини сал ўзгартирсан.

— Акамнинг ўзи ҳам соч-соқол ўстириб, таниш қиёфага кирган.

— Жуда соз. Балодан ҳазар дейдилар. Фили билан қурилишда ишлаб ўзини ўнглаб олсин, сўнгра яна кенгашив кўрурмиз!

Табиб Байжу акаси Лаъл Кумарни келгуси ҳафтада Деҳалпурга Мавлоно Фазлиддин олдига юборадиган бўлиб кетди.

4

Аграда сершамол ёмғир фасли бошланган саратон кунларининг бирида Тоҳир саройга — Бобирнинг ҳузурига келди.

Девони хоснинг мармар айвонида ўтирган Бобир уни зўрға таниди — Тоҳирнинг соч-соқоли оқариб кетган. Юзидаги чандиқдан ташқари, ёнгаги аралаш бўйнига гўё катта бир ямоқ тушган.

— Хайрият, тузалиб кетибсиз,— деб Бобир унинг кўнглини кўтарадиган гап излади.

— Ҳа, мулла тоғам жонимга ора кирдилар...

— Энди қалай, аввалги хизматга қайтмоқчимисиз?

Тоҳирнинг ўнг қўли заиф, бўйни ҳам дуруст қайрилмайдиган бўлиб қолган, ён-верига қарамоқчи бўлса, бутун гавдасини буриб қаар эди.

— Мен энди қўрчиликка ярамасмен.

— Бўлмаса ички беклар қаторида юраверинг.

— Лекин мен бекликни эплолмадим... Панипатда ўзимдан ўтди.

— Нечун?

Тоҳир жанг бўладиган куни аzonда қандай сабуҳий қилганини, отдан қандай йиқилганини ва қадрдон навкарини қандай шафқатсизларча урганини бир-бир айтиб берди.

— Бек бўлдим деб мағрурланиб золим бўлиб кетгана

Эканмен: Улим тўшагида ётиб ўзимни танидим. Менга беклик... тўғри келмас экан, ҳазратим. Ўзим ҳам энди майиб одаммен. Ижозат беринг, мулла тоғам тарҳини чизган боғда сувчими, гулчими бўлиб қолай... Бир вақтлар Қувада кичкина боғчамиздаги дов-дарахтларни суғоришни яхши кўрар эдим...

Бобир айвоннинг жимжималик мармар устунлари ортидан сузиб ўтаётган ёмғир булатларига тикилиб оғир хўрсинди. У Тоҳирга яхшилик қилмоқчи бўлиб беклик унвонини бергани ахир оқибатда ёмонлик бўлиб чиққан эди.

— Сиз-ку, бекларнинг касофат муҳитидан сувчи бўлиб қутулмоқчисиз. Лекин мен қандоқ қутулгаймен?

Бу савол Тоҳирни шошириб қўйди:

— Сиз... подшоҳсиз, ҳазратим. Беклар сизнинг итоатингиздалар.

— Итоатимда бўлиб итоат этдиурлар... Буларнинг шундай гирдблари борки, сал бехабар қолсангиз ғарқ қилиб юборурлар... Мен Исфарарада сизга айтган гапларим эсингиздами?

— Мен у сўзларингизни ҳеч вақт унумасам керак...

— Ўшанда сиз, умрбод ҳузурингиздан кетмасмен, деган эдингиз-ку!

— Ҳазратим, мен у вақтда соғлом йигит эдим... Ҳозир аҳволим бу...

— Саройда менинг хилватхонамга қарайдиган' дуруст одам йўқ. Шу ишни сиз олсангиз.

Хилватхона — Бобирнинг ёлғиз ўтириб ижод қиладиган жойи эканини Тоҳир билар, Бобир ҳаётининг энг дилкаш томони унинг ижодида эканини сезарди. Лекин саройнинг мураккаб, бўғиқ муҳитидан кўнгли қолган Тоҳир боғда, тоғасининг ёнида ишлашни истарди.

— Ҳазратим, қулингизни маъзур тутинг. Мен боғда ишлаймен деб аҳд қилган эдим...

— Боғда ҳам хилватхона бўлур,— деди Бобир.— Қуриб битирилса унга ҳам сиз қарагайсиз. Маъқулми?

Энди «йўқ» дейишнинг иложи қолмади. Бобирнинг сўзини икки қилиб ўрганмаган Тоҳир қўлини кўксига қўйди-ю, розилик берди.

* * *

Агра қалъасидаги хилватхона девони хос билан подшоҳ ошхонасиининг оралиғида эди. Бир ойдан бери да-

вом этаётган ёмғир фасли ҳали-бери тугайдиганга ўхшамас, баъзи кунлари беш-үн мартадан жала қуйиб ўтарди. Ёғин-сочинли кунларда Бобир кўпроқ Аграда ишлайди. Хилватхона — ичма-ич қўрилган уч хонадан иборат. Бу хоналарнинг майда-чуйда ишларини тўртта савдар қиласди, лавозими «офтобачи» деб аталадиган Тоҳир уларга бошлиқ. Энг ички хонада қоғоз, қалам ва Бобир тайинлаган китоблар туради. Бериги хонага дастурхон солиниб, Бобир хуш кўрадиган гулоб, норинж шарбати, анба меваси¹, қайла², танбул барги³ ва мағзи қизил фуфал ёнғоги қўйилган.

Бир кун Тоҳир дастурхонга энг тоза Ғазни чоғиридан ҳам бир кўзача қўйдирган эди, Бобир:

— Чоғир мажлиси хиргоҳда бўлди, бас,— деди.

Шундан кейин Тоҳир хилватхонага ичкиликни йўлатмайдиган бўлди.

Бобир ички уйда туни билан ишласа Тоҳир ҳам тонг отгунча ухламай, унинг тинчини қўриқлаб чиқар эди.

Унинг ташқи хонада уйғоқ ўтиришини биладиган Бобир гоҳо ичкаридан чиқиб келиб, ғалати саволлар берарди:

— Бадахшонда арчазорларда нафис бир ўт бўлур эди, эсингиздами? Даҳкат атрофида, Осмон Яйловда ҳам мўл эди. Ранги ҳаворанг. Мен бир дафтарга ёзиб қўйган эдим... Кобулда қолганми? Йўқ.

— От ейдими?

— Ҳа, яхши ейди. Бўйи паст-паст, ердан тўп-тўп бўлиб чиқур.

— Бетакамикин?

— Ҳа, ҳа, бетака ҳам дерлар, лекин асли бутака! Бутталаб ўсгани учун бутака дер эканлар. Мен бунинг важхи тасмиясини⁴ Бадахшонда эшитган эдим.

Бобир қидирган сўзини топганидан мамнун бўлиб ичкарига кириб кетди. У Тоҳир билан бирга кўрган жойлари, бирга бошдан кечирган воқеаларининг мана шунақа тафсилотларини сўраб, аниқлаб олган кунлари

¹ А и ба — ананаснинг бир тuri.

² Қ а й л а — банан.

³ Танбул барги апельсин баргига ўхшаб кетади. Фуфал ёнғоги билан бирга оғиага солиб чайналса кайф беради, тишни мустаҳкам-вайди.

⁴ В а ж ҳ и т а с м и я с и — шундай деб аталиш сабаби, этимологияси.

Тоҳирнинг ҳам қўнгли кўтарилиб юарди. У Бобирниң ўз кўрган-кечирганлари ҳақида катта китоб ёзаётганини эшигтан эди. Энди Тоҳир ҳам шу китобнинг ёзилишига бир қадар иштирок этаётгани учун «ҳар қалай, бу ерда ўтган кунларим зое кетмайдиганга ўхшайди», деб қўярди.

Бир кун тун яримлаганда Бобир хилватхонадан хомуш бўлиб чиқди-ю, ҳазин товуш билан бир тўртлик ўқиб берди:

Кўпдан бериким ёру диёрим йўқдир,
Бир лаҳзау бир нафас қарорим'йўқдир,
Келдим бул сори ўз ихтиёрим бирла
Лекин боруримда ихтиёрим йўқдир.

Бу татрлар Тоҳирнинг соғинч туйғуларини шундай қўзғатдики, кўпдан бери кўрмаган Робиясини қўмсаб, ўпкаси тўлди.

— Болалар билан қачон дийдор кўришаркинмиз-а, ҳазратим?

— Йўллар ҳали нотинч. Ҳарам учун хатар кўп. Бу ёқда Раъно Санго биздан норизоларни атрофига тўплаб куч йигмоқда эмиш...

«Биздан норизолар» деган сўзлар Тоҳирга мана шу қалъа ҳовлисида ўтган куни юз берган бир фожиани эслатди.

Ҳинд усталари, пашкол пайтида ер қазиб бўлмайди, ишни тўхтатайлик, дейинди. Лекин саркор бунга кўнмади: «Би Бз войинни олти ойда қуриб битиришга сўз берганимиз, ёмғир фасли икки ой давом этса, кейин қачон улгургаймиз? Подшо ҳазратлари бизни ёлғончи демасларми? Ёмғир писандмас! Қайтага салқин бўлди! Ишлайверинглар!» Хуллас, саркор ер қазувчиларни мажбур қилиб ишлатса бошлади.

Муттасил ёғиб турган ёмғирлар ерни ивитиб, ҳилвирлатиб қўйган эди. Ўтган куни ер қазувчилар ўн қулоч чуқурликдаги чоҳнинг тубида ишлаётгандаридан жардай чуқур ҳавзанинг бир томони ўпирилиб тушди-ю, тўрт одамни босиб қолди. Уларни лой аралаш тупроқ тагидан кавлаб олгунларича учтаси аллақачон жон берган, тўртинчиси тирик бўлса ҳам бели синиб, майиб бўлган эди.

Хилватхонадан сал нарида — сарой ошхонасида овқат пишириб юрган Баҳлул исмли ўрта яшар бир ошпаз ҳамвойининг чоҳи тагида жон берган ер қазувчиларни кўрган эди. Бу фожиа ошпазга Панипат жангидаги фотиҳларнинг қиличидан ҳалок бўлган йигирма яшар суюкли иинисини эслатган ва қалбидаги интиқом туйгусини яна жунбишга келтирган эди.

Аҳмад чошнагир малика Байданинг канизларидан бирини орага қўйиб, заҳарни шу Баҳлулга етказиб берган эди. Малика Байданинг яна бир канизи келиб, режани ҳозирги пашкол кунларда — Бобир бирон ёққа юришга кетиб қолмасидан олдин амалга ошириш кераклигини айтган эди.

Тўрт букланган оқ қофоз ичинда зираворга ўхшаб турган заҳар икки мисқолгина бўлса ҳам Баҳлулга зўр бир пўлат қуролдек оғир туюларди. У жангда ватанини ҳимоя қилиб жон берган иинисининг ўчини шу қурол ёрдамида олишни ва фотиҳларни бу ердан тезроқ қувниши истар эди. Агар Бобир ўлдирилса, фотиҳлар Ҳиндистонда туролмай кетиб қолишларига Аҳмад чошнагир Баҳлулни ишонтирган эди.

Подшоҳ ошхонасида ҳар бир таомни текшириб татиб кўрадиган - маҳсус баковуллар бўлар эди. Қаттиқ ёмғир ёғаётган куни кечқурун шу баковуллар ароқ ичиб, маст бўлиб қолишиди.

Қозонда карунди дараҳтининг нордон мевасидан қўшиб тайёрланган мазали қайла пишиб турибди. Бобир бу қайлани яхши кўришини Баҳлул билар эди. У секин қўйин чўнтағига қўл солиб, тўрт буклоғлиқ қофозни олди. Ошхонада ҳеч ким йўқ. Баковуллар нариги хонада маст бўлиб ашула айтишяпти, шамол аралаш ёмғир ёғяпти.

Баҳлул заҳарни қозонга солмади — баковулларнинг ароққа қайлани газак қилиш одатлари бор, еб кўришса, заҳарланиб, билдириб қўйишлари мумкин. Шунинг учун ошпаз заҳарни Бобир овқат ейдиган чинни лаганга — юпқа лочира нон устига сепа бошлади. Бирдан шамол ташки әшикни қарсиллатиб ёпти. Баҳлулга кимдир келаётгандай туюлди-ю, заҳарнинг қолганини қозон тагида, ёниб турган оловга отди. Кейин чинни лагандаги заҳар сепилган лочира устига тез-тез қайлани солди.

Орадан сал вақт ўтгач, савдар кирди, қуён гўштидан қилинган қовурдоқни ва қайла солинган чинни лаганинни Бобир овқат еб ўтирган хўракхонага олиб чиқиб кетди.

Аҳмад чошнагир бу заҳарни таъмидан билиб бўлмаслигини, унинг таъсири аста-секин билинишини айтган эди. Баҳлул сир очилгунча қўрғон дарвозасидай чиқиб кетиш умидида эди. Аммо у ошхона эшигидан чиқаётгандага ширақайф баковуллардан бирига дуч келди.

— Қани, қуён гўштидан бизга ҳам қолдирдингми?

— Қайла бор, соҳиб.

— Йўқ, қуён қовурдоғи керак!

— Қовурдоқ оз эди, ҳаммасини ҳазратга бериб юбордим. Қайла ей қолинг, газакка яхши.

— Йўқ! Қуён кўп эди-ку! Нега бизга қолдирмадинг?

— Ҳаммасини қовурганим йўқ эди...

— Бўлмаса ҳозир бизга қуён гўштидан қовуриб бер!

Тез!

Баковулнинг йўғон гавдаси эшикни тўсиб турарди.

Ошпаз орқага қайтди ва саросима ҳаракатлар билан ёғ доғлаб, қуён гўштини қовуришга тайёрлай бошлади.

Ёмғири тун саройни чулғаб олган. Шу пайт бирдан хос навкарлар табибга югуриб, баковуллар бир-бирини чақириб, ошхонанинг ич-таши тўполон бўлиб кетди. Хилватгоҳда ўтирган Тоҳир ҳам хўракхонага чопиб келди. Бобир устма-уст қайт қилиб, юзи кўкариб кетган, Унафа-си қайтиб, ташқарига интилди, аммо икки қадам қўйгунча бўлмай гандираклаб йиқила бошлади. Тоҳир чопиб бориб, уни қўлтиғидан суюб олди. Табиб Юсуфий Бобирнинг нариги қўлтиғига кирди. Жонсарак бўлиб қолган савдарларга буюрди.

— Ичкарига жой қилинг!

— Равонга! — деди Бобир ютоқиб.

Унинг кўнгли беҳуд, боши гир-гир айланар, нуқул ҳаво етишмаётгандай бўлар эди.

Бобирни равонга суюб чиқариб ётқиздилар. Табиб юракка қувват берадиган доридан ҳидлатди.

— Сизга не бўлди, ҳазратим? Майни кўп ичдингизми? Ё маъжун аралашдими?

— Овқатда бир сир бор! — деди Бобир ва яна кўнгли айниб, чинни тоз устига энгашди: — Ошпаз тафтиш қилинсин!

Шу пайт қайладан еган яна икки мулозим Бобирга

ўхшаб қайд қилаётгани маълум бўлди. Баковуллар қайла пиширган Баҳлулни тутиб, саройининг энг қаттиққўл терговчисига топширдилар. Терговчи уни турли қийноқларга солиб сўроқ қилишга киришди.

Бобир туни бўйи ўлим билан олишиб чиқди. Ҳар қайт қилганда юрак-бағри узилиб, парчаланиб чиқаётгандай оғрир, гоҳо нафаси ичига тушиб кетар эди. Габиб унинг тепасидан кетмай:

— Шифо топасиз, бардам бўлинг!— деб тасалли берар эд.

Тоҳир ҳам табибга қарашиб, туни бўйи мижжа қоқмай чиқди. У Бобирнинг бошини тутар, тер босган юзи ни, бўйинларини елпир эди. Бобирнинг заҳар азобидан тўлғанаётганини кўрган сари, ўзи ҳам заҳар ичгандай қийналар эди. Тонг пайти Бобир алаҳсигандай бўлиб, Ҳумоюн билан Моҳим бегимни йўқлай бошлади.

Шимолий чегаралар яна нотинч бўлиб қолгани учун Бобир Ҳумоюнни ўтган ойда Бадахшонга қайтариб юборган эди. Моҳим бегим ҳамон Кобулда эди.

— Ҳумоюн мирзога чопар юборайликми?— деб сўради Тоҳир.

Бобир кўзини очиб, хиёл ўзига келгандек бўлди. Чопар Кобул ва Бадахшонга етиб боргунча камида бир ой вақт ўтади. Бу орада бирон кориҳол бўлса на Ҳумоюн, на Моҳим бегим етиб келолмасликлари аниқ. Бобир ғамгин бош чайқаб:

— Фойдаси йўқ,— деди.

Унинг аҳволи тобора танг бўлаётганини кўрган Тоҳир:

— Ҳазратим, бардам бўлинг!— деб илтижо қилди:— Биз сиз билан неча ўлимлардан қолганмиз! Дардга бўй берманг, енгасиз!

— Лекин... бундай фалокат... биринчи учраши!..

Бобир беҳол қўзғалиб яна тоз устига энгашди, оғриқ зарбидан қўзларига дув-дув ёш келди. Сўнг бошини яна ёстиққа қўйиб кўзини юмиб ётганда равонга терговчи кирди.

Юсуфий унга:

— Қисқа сўзланг, фақат ахборот!— деб шипшиди.

Терговчи Байдани ҳам сўроқ қилганини, нариги учовига шу бадбахт малика бош бўлганини, лекин ташқи душманлар билан, жумладан, Рано Сангрим Синх би-

стан алоқаси борлигини рад этганини, бошқа саволларга жавоб беришдан бош тортганини айтиб берди.

— Малъунлар!..— деди Бобир ётган жойида ғазабдан овози қалтираб.— Мен уларга шунчалик ишониб... илкидин таом есам... иззат-икром қилсан!..

— Ҳазратим, бу иблисларни минг қийноққа солиб ўлдирмоқ керак!

— Нариги учовини... қоидага биноан қатл этти-пинг!.. Байда... кейин!

— Баш устига!— деб терговчи чиқиб кетди.

Қоидага биноан, подшоҳнинг жонига қасд қилганлар энг оғир қийноқларга солиб ўлдириларди. Ошпаз Баҳлұлнинг териси тириклай шилиниб олинди. Жаллодлар Құмад чошнагирнинг аввал құл-оёқларини кесиб, кейин бошини танасидан узиб, вужудини парча-парча қилиб ташладилар. Икки орада воситачи бўлиб турган ва усталик билан саройга заҳар олиб кириб, ошпазга берган канизак қутурган филнинг оёғи тагига ташлаб ўлдирилди.

Малика Байда энг қаттиқ ҳибсда сақланар, энди одамлар унинг қандай қатл этилишини кутар эди.

Табиб Юсуфий Бобирнинг ҳаёти учун йкки кечаю кундуз тинмай курашди. Тоҳир ҳам икки кечаю кундуз беморнинг ёндан жилмай, хизматини қилди. Ниҳоят, учинчи кун табиб:

— Худога минг қатла шукр, ҳазратим, бир ўлимдан қолдингиз!— деди.— Онадан қайта туғилгандай бўлдингиз. Энди озгина илиқ сут ичинг. Сўнгра ухланг!

Бобир бир пиёла илиқ сут ичгач, кўзини юмиб, ёстиққа бош қўйди. Лекин бошидан ўтган ўлим даҳшати ҳамон хаёлидан нари кетмасди. Унинг жони шунча вақт қил учиди осилиб турганини ўйласа, беихтиёр ваҳми келарди. Шу қил узилса ўлим деб аталадиган зулмат қаърига қулаг тусишини икки кун давомида муттасил ҳис қилиш унда яшаш истагини беҳад кучайтириб юборган эди. Ҳаётнинг бир лаҳзаси, бир учқуни дунёнинг барча бойликлари-ю, тожу тахтларидан ҳам азиз эканлиги унга энди астойдил сезилди. Унинг азобдан толиқкан вужуди ҳамон беҳол бўлса ҳам руҳида нимадир ўзгаргандек ва дунё кўзига бошқачароқ кўрингандек бўларди. Ҳар бир кишининг фақат биттагина умри бор экан ва умрнинг ҳар лаҳзаси шу қадар ширин экан, Бобирнинг ёшига етмай ўлиб кетганларга осон тутиб

бўладими? Иброҳим Лоди ундан тўрт ёш кичик эди. Малика Байда буни унутиши ва Бобир яхши муомала қилгани учунгина уни кечириб, фарзанди ўрида эъзозлаши мумкиниди? Жангда эришган ғалабалари унга энг мушкул ишларни ҳам осон кўрсатиб қўйгани учун бўлса керакки, Бобир Иброҳим Лодининг онасига шунчалик ишонган ва унинг амрида бўлган ошпазларни ишга олган экан-да! Бу ошпазлар тайёрлаган ҳиндча таомларни ейиш билан эл-улуснинг кўнглини олмоқчи бўлгани ҳам унинг ўз кучига ортиқ даражада ишонганидан келиб чиқмаганмикин? Ҳолбуки, кечаги душманларни бугун дарҳол дўстга айлантириш осонми? Хусусан, Байдадек фарзанд доғида куйиб юрганлар ёки ошпаз Баҳлулдек инисининг қасдини олмоқчи бўлганлар билан муомалада эҳтиёткорроқ бўлиши керак эмасмиди? Кобулда Моҳим бегим айтган изтиробли гаплар яна унинг ёдига тушди. Бегона юртдан борган фотихни осонликча кечирмасликлари, унинг қиличиidan пайдо бўлган яралар асрлар давомида битмаслиги рост бўлса... Бобир бу мәмлакат халқининг кўнглини олиши учун қанча кўп йиллар керак бўлади? Бунга унинг умри етармикин? Умуман, бу ўзи эришиш мумкин бўлган мақсадми ёки сароб?..

Бу ўйлардан Бобир яна боши берк кўчага кирис қолгандай бўлди, келажак кўзига қоронги кўриниб кетди.

Фақат танасига аста-секин қайтиб келаётган ҳаётий кучлар шу зулматни ёриб ўтиб келаётган ёғдулардай илиқ туюларди. Ӯша кеча Бобир яхши ухлади. Эртаси куни табиб унинг томиридан кўпроқ қон олмоқчи бўлди.

— Заҳарланган ҳаром қонни чиқариб юборгаймиз, ҳазратим. Яна бирор ҳафта қимиirlамай ётмоғингиз керак.

Бобир бунга эътироҳ қилди. Бусиз ҳам унинг дармони кетиб қолган эди. Агар табиб кўп қон олса узоқ ётиши аниқ. Ҳолбуки, «Подшоҳ ўлим тўшагида ётган эмиш!», «Умид йўқ эмиш!» — деган овозалар тарқалган, қулай фурсат кутаётган ғанимлар жонланиб қолган эди. Беклар ҳам Бобирнинг тезроқ кўпчиликка кўринишини истар эдилар.

Орадан яна икки кун ўтгач, Бобир тантанали маросимларда киядиган кийимларда девониомга чиқди.

Баланд тахтнинг икки томонида тизилиб турган юздан ортиқ амирлар, саркардалар, вилоят ҳокимлари таъзим бажо көлтириб бўй эгдилар. Бобир тахтга шошилмай чиқиб ўтиргач, иккита навкар малика Байдани пойгаҳдаги эшикдан олиб кирди.

Кампир ҳали ҳам бошдан-оёқ оқ кийиб, ўғли Ибронимга аза тутиб юрар эди. Фақат қадди аввалгидан бир оз буқчайганроқ. Лекин кўзлари Бобирнинг юзига тушгандан унинг оғир касалга ўхшаб сарғайиб қолганидан қаноат ҳосил қилгандай мамнун йилтиради.

Эшик оға Муҳаммад Дўлдай маликани сўроқقا тутиб, суиқасдга яна кимлар иштирок этганини суринтира бошлади.

— Суиқасд эмас, бу интиқом! — деди малика. — Подшоингиз тўккан қонларнинг қасоси бу! Менга ёрдам берган ошпаз ҳам, Аҳмад чошнагир ҳам, каниз ҳам ботир қасоскорлар эди. Ҳаммаси мардларча жон берди. Энди навбат меники. Мен ўғлимнинг доғида куйиб кул бўлганман. Энди қўлларингдан келса кулимни кўкка совуринглар!

Малика саройда ҳамма тушунадиган форсий тилда гапирмоқда эди. Аъёнлар нафасларини ичларига олиб ерга қарашди. Малика бир ўлимни бўйнига олиб келтган, энди ҳар бир сўзини ўққа айлантириб ёвига дадил отар, Бобирнинг ғазабга тўлиб, жаллод чақиришини, қуролсиз онага қарши барча қуролларини ишга солишини истарди. Ушанда маънавий ғалаба малика томонида бўлар, унинг довюраклиги оғиздан-оғизга ўтиб, одамларнинг эҳтиромини қозонар эди. Буни Бобир ҳам сезди-ю, ўзини босиб, Маликдод Коронийга қаради.

— Бу қандай ёсуманлик! — деди Маликдод Короний Байдага. — Шунчалик. ўч олиш ниятингиз бор экан, аъло ҳазратнинг иноятларини нефа қабул қилдингиз?

— Ниятимга етиш учун шундай қилишим керак эди!

— Аъло ҳазрат сизни «Мўътабар онамиздек эъзозланг!» — деганларида йиғлаб миннатдорчилик билдирганинг бизнинг ёдимиздан чиққан эмас!

— Мен у пайтда нафратим зўридан йиқлаган эдим! Ўғлимнинг кушандасига она бўлишдан қийналиб кўзим ёшланган эди!

— Е алҳазар! Ахир сиз ҳам Муҳаммад умматисиз, муслимасиз-ку! Ўғлингиз буларга қарши неча баробар

кatta куч билан чиққанини билмасмисиз? Булар мағлуб бўлса ўғлингиз ёвларининг минг жонларидан бирини ҳам тирик қўймас эди! Сиз Султон Йироҳимнинг ҳанчалик шафқатсиз бўлганини билар эдингиз. Агар сизда инсоғу имон бўлса, қўлида қиличи билан очиқчасига жанг қилган саркардага яшириқча заҳар бермас эдингиз!

— Мен аёл кишиман, қилич кўтариб жанг қилолмайман! Ана ўша заҳар — менинг қиличим эди. Фотиҳлар Панипатда минг-минг одамларнинг ўлимнга сабаб бўлди! Бу мамлакатнинг яна кўп жойларига ажал уруғини экди! Мен каби минглаб оналар ҳозир мотам тутиб, кўз ёши тўкиб юрибди. Қанча-қанча келинчаклар бева қолиб ўзларини эрларининг жасадлари билан бирга оловда ёндирияпти! Мен берган заҳар ана ўша ажалнинг уруғидан тайёрланган эди! Унга бева-бечораларнинг аччиқ кўз ёшлари ҳам қўшилган эди!

Маликанинг сўнгги сўзлари фотиҳ бекларга ҳам тегиб кетди. Серсоқол бир бек ўрнидан сакраб туриб, Бобирга таъзим билан мурожаат қилди:

— Ҳазратим, бу ялмоғизнинг тилини оғзидаң суғуриб олмоқ керак! Шундай малъуналиги устига яна бунча гап!

— Майли, мени қиймалаб ташласинлар! — деб қичқирди Байда. — Мен қўрқмайман!

Бобир Байдани беклар истагандек қийноқларга солиб ўлдириурса эл-улус нима дейишини ўйлар экан, «лоп» этиб Ҳиротдаги Хадича бегим эсига тушди. Маккорликда у ҳам Байдадан қолишимас эди, невараси Мўмин мирзонинг ўлимнiga сабаб бўлгани кўпчиликка маълум эди. Шунга қарамай, Шайбонийхон уни Мансур баҳшининг ихтиёрига топшириб, даҳшатли қийноқларга соггани жуда кўп одамларнинг нафратини келтирган эди. Бобирнинг ўзи бундан бир ҳафтагина олдин хилватхонада хотира ёзиб ўтирганда Шайбонийхоннинг бу ишини жирканиб қаламга олган эди. «...Беш кунлик ўтар дунёда Шайбонийхон мундоқ аплаҳона ишлари билан ёмон от қозғонди» деган сатрларни ўз умр китобига битган Бобир энди мана бу қуролсиз онага қандай чора кўриши керак? Қандай қилса одамларнинг нафратига эмас, ҳурматига сазовор бўлади?

— Беклар ҳамон Байданинг ўлдирилишини талаб қилмоқда эдилар;

— Бу ялмоғизни қутурған филнинг оёғи тагига таш-
лаб қатл эттирмоқ керак!

— Ёки оёқ-қўлини чирмаб боғлаб, баланд минора
устига ётқизиб қўймоқ даркор—гўштини қузғунлар еб,
кўзларини чўқиб кетсии!

Маликага зимдан тикилиб турған Бобир сўнгги так-
лифлардан Байданинг ранги учиб, юзи кўкимтири тусга
кирганини кўрди. Шунда Мұҳаммад Дўлдайнинг ишо-
раси билан беклар жим бўлдила. Бобир малика тушу-
надиган форсий тилди:

— Жаноб беклар таклиф қилган жазолар барчаси
асосли,— деди.— Бироқ хиёнатчи маликага буларнинг
ҳамасидан ҳам оғирроқ бир жазо бор. Бу хонимнинг
гапига қараганда, ҳамма етиму есиirlар учун жони ачири
эмис, заҳарини ўшаларнинг кўз ёшлиридан тайёрлаган
эмис! Бироқ бунинг ўғли Иброҳим Лоди эл-улусга оз-
мунча зулм ўтказганми? Озмунча одамни етиму есиirl
қилганми? Иброҳим сабабчи бўлган ички урушларда
ҳар йили қанча одам ҳалок бўлган эди, жаноб Коро-
ний? Сиз билсангиз керак?

— Ҳазратим, менда ҳисоботи бор: сўнгги уч йил
давомида Султон Иброҳим бошлаган ички урушларда
биздан юз йигирма минг одам ҳалок бўлмишидир.

— Уч йилда бир юзу йигирма минг!— хитоб қилди
Бобир.— Иброҳим Лоди эса ўн йилдан ортиқ таҳтда
ўлтирган! Ҳиндистонда одам кўп. Юз минги ички уруш-
да ҳалок бўлса, Иброҳим яна юз мингини пулга ёлла-
ган. Агар Иброҳимнинг онаси бўлмиш бу хоним ўлган
навкарларга-ю, уларнинг етим-есиirlарига астойдил
жон куйдирса, нечун юзминглаб одамларнинг беҳуда
ўлиб кетишларига йўл қўйган? Нечун ўғлини бундай
ножўя қирғинлардан қайтармаган?!

— Мен фақат она эдим, подшоҳ ўғлимга амр-фармон
беролмас эдим!— деб малика Байда энди ўзини ҳимоя
қила бошлади.

— Ножўя ички қирғинларни тўхтатишга амр-фармон
бермоқ учун мана, биз бел боғладик!— деди Бобир.—
Тангридан умидимиз борки, бу улуғ мамлакат энди ягона
марказий давлат атроғига жипслашгусидир. Биз Ҳинд-
ни ободу қудратли қилмоқ орзусидамиз. Бизга ҳамкору
Ҳамнафас ҳинд беклари, фузалолари, ҳунарпешалари
кўп. Бизни заҳарлаб ўлдирмоқчи бўлган бу маккор хо-
ним учун энг оғир жазо шуки, биз мана, тирикмиз! Бу

Жонимнинг ўзи-ю, ўғли қилолмаган улкан ишларни биз
қилмоқдамиз!

Маликдод Короний бирдан енгил тортиб:

— Ҳазратим лутф қилдилар! — деди.

— Бу малика,— деб давом этди Бобир,— шу дара-
жа бева-бечорага жонкуяр бўлса... Абдукаримбек!

Байдага яқин бир жойда ўтирган шиговул сакраб
ўрнидан турди. Бобир унга буюрди:

— Бу маликанинг барча молу дунёсини мусодара
қилиб, Жамна бўйида бир буқъаи ҳайр¹ қурдиринг.
Барча хизматкорлари ўша буқъада хизмат қилсин,
маликанинг бутун бойлифи, молу дунёсини етим-есир-
га ҳайр-эҳсон қилиб улашсиналар.

— Бош устига! — деб Абдукарим бу фармонни таъ-
зим билан қабўл қилди.

— Маликани то умри етгунича тирик сақлаш ҳам
сизга топширилур, жаноб Абдукаримбек!

— Тирик?! — ҳайрон бўлиб сўради шиговул.

Бошқа аъёнлар ҳам таажжубланаётганини кўрган
Бобир овозини кўтариброқ гапирди:

— Малика бизнинг бундан кейинги зафарларимиз-
ни ҳам кўрсинг. Ёмонликка яхшилик қилиш мард киши-
нинг қўлидан келишига амин бўлсин. Агар маликада
виждон бўлса, ўғли қилмай кетган ишларни биз қилга-
нимизни кўриб виждони азоблансан. Агар виждони
бўлмаса, ичиди фақат баҳиллик чаёнлари бўлса, бу ча-
ёнлар ўзини чақиб ётаверсан. Маликага бундан ўзга
жазо муносаб эмасдир!

Бек ва аъёнларнинг пичир-пичирлари орасидан ал-
лакимнинг:

— Ҳазратим тантлил қилдилар! — деган қувончли
хитоби эшитилди.

Ўз ўлимини ҳам ўткир бир қуролга айлантирмоқчи
бўлиб келган малика Байда энди бу қуролидан айрил-
ганини сезди. Шу пайтгача у ажали етганига ўшиба
қилмас эди. Энди бирдан яна яшаш умиди пайдо
бўлди. Маликанинг ўлим совуғидан музлаган қалби-
га ҳаётнинг илиқ нафаси тегди-ю, кўнглини бўшаштириб
юборди.

Малика юзини қўллари билан тўсиб, елкалари сил-
кина-силкина, йиғлай бошлади.

¹ Бу қъаи ҳайр — ҳайр-эҳсон уйи.

СЕКРИ. Қайта кўз очган булоқ

1

Бобирнинг махсус таклифи билан Ҳиротдан Аграга келаётган Мавлоно Ҳондамир, шоир Шиҳоб Муаммий ва мударрис Иброҳим Қонуний уч ойга яқин йўл юрдилар.

Бадваҳима Хайбар довонидан ўтиб, серсув Синд дарёсидан кечиб, чангалзор ўрмонларни оралаб борар эканлар, Мавлоно Ҳондамир оламнинг нақадар улканлигини энди биринчи марта астойдил ҳис қилди. Ҳафталар, ойлар давомида отлиқ сафар қилиб охирига етиб бўлмайдиган бағри кенг ўлкалар ҳаммаси энди яхлит бир давлат бўлиб бирлашганлиги, Балхдан Қобулгача, ундан Лахўр ва Деҳлигача ҳамма жойда Бобирнинг муҳри босилган фармонни бетўхтов адо этишларидан сезилар эди. Бу фармонга мувофиқ Ҳурросон ва Мовароунинаҳрдан Бобирнинг таклифи билан келаётган илму санъат аҳлини, ҳунарпешаларни барча вилоят ҳокимлари, барча қўриқчи аскарлар ва бекат назоратчилари қўшни давлат элчиларига кўрсатиладиган иззатикром билан кутиб олиб, кузатиб қўйишлари керак эди. Йўлларда ҳали қароқчилар тугатилмаган, тартиб ўрнатилмаган нотинч шаҳар ва қишлоқлар бор эди. Ҳондамир ва унинг ҳамроҳларини бундай жойлардан «бадрақа» деб аталадиган икки юз-уч юз-кишилик қўриқчи аскарлар ўтказиб қўйишарди.

Карvonсаройларда ҳам уларни «подшоҳнинг хос меҳмонлари» дейишиб, энг яхши хоналарига жойлаштиришар, қўлларидаги қофозларига биноан кундалик таомлари учун белул гуруч, гўшт, ёғ беришар, тағин майда харажатлари учун махсус улуфа ҳам тўлашарди. Чарчаган от-уловларини алмаштиришлари керак бўлиб қолса, ёмчилар боқувдаги от-уловларидан уларга биринчи навбатда беришар эди. Қобулдан Деҳлигача бўлган минглаб чақирим йўл бўйидаги карvonсаройлар ва ёмлар Бобирнинг ҳаракатлари билан шунчалик обод ва шунчалик яхши ишлаб турар эди.

Ҳондамир йўлларда, бекатларда Ҳиндистонга бориб келаётган элчилар, сайёҳлар ва савдогарларни кўп учратарди. Бултур Аградан эллик чақиримча гарбдаги Секри деган жойда Бобир Рано Санго билан урушиб,

Панипатдагидан ҳам улканроқ ғалабага эришгандан кейин уни астойдил тан олиб элчи юбора бошлаган подшоҳлар кўпайиб қолган эди. Хондамир Лахўрда учратган қизилбошларнинг элчиси Шоҳ Тахмасп¹ I номидан ғалати совғалар олиб бормоқда эдилар. Бу совғалар орасида оқ түянинг зар уқали кажавасида парваришлиб олиб кетилаётган иккита гўзал черкас қизи ҳам бор эди. Шоҳ Тахмасп бу қизларни Бобирнинг ҳарамига атаб юборган эди.

Хондамир Деҳлидан шимолроқдаги бир бекатда сармарқандлик ва тошкентлик элчиларни ҳам учратди. Секридаги ғалабанинг шуҳрати атроф мамлакатларга ёйилганидан, кейин Бобир Ҳиндистонда тузган янги давлатни унинг ашаддий душманлари бўлган шайбонийзодалар ҳам тан олган эдилар. Ҳозир Самарқанд тахтида ўлтирган Кўчкинчи хоннинг элчиси Бобирга Самарқанднинг сояки майизларидан, Конибодомнинг субҳони ўрикларидан, Бухоронинг ўткир майларидан, Мовароунаҳрнинг бошқа ноёб неъматларидан етти тяуга совға-салом юклаб, ёнига икки юзта яхши отни ҳам тортиқ қилиб қўшиб келтирган эди. Бобир бу элчини ўзининг Жамна бўйида қурдирган янги Ҳишт Биҳишт боғида хонлар ўтирадиган оқ кигиз устига ўтқазиб, камоли эҳтиром билан қабул қилган эди. Бобирнинг қабулидан ва совға-саломларидан мамнун бўлиб қайтаётган хон элчиси Хондамирга мақтанди:

— Э, мавлоно, биз Ҳиндистонда кўрган хирмон-хирмон олтинларни ҳали ҳеч ким кўрмагандир. Бобир мирзо қўйма олтиндан қилинган тахтда ўлтирибдир. Тахтнинг пастига катта гилам тўшалган экан. Вилоят ҳокимлари ҳар йили берадиган олтинларини шу гиламнинг устига келтириб тўқдилар. Бирпасда олтиндан катта хирмон кўтарилди.

Бобир шайбонийзодаларнинг олtingга суқ одамлар эканини билгани учун элчининг кўзи олдида атайлаб шундай хирмон кўтарганини Хондамир ич-ичидан сезиб кулди:

— Жаноб элчи бу хирмондан капсан олмадиларми?

— Подшоҳ бизга қимматбаҳо саруполар кийдирди. Гилам устидаги олтиндан ҳазрат Кўчкинчихонга атаб

¹ Тахмасп I — Шоҳ Исмоилнинг ўғли. 1524 йилда Шоҳ Исмоил вафот этгач, Тахмасп унинг ўрнига шоҳ бўлади.

Совға берилди. Олтин тангаларни санаб ҳам ўлтирумадилар. Икки юз эллик мисқолини бир кумуш тош билан тортиб бердилар-қўйдилар.

— Икки орада бирон шартнома тузилдими?

— Ҳа, бемалол борди-келди қиласиган бўлдик. Савдо-сотиқ тикланди. Алоқалар илгаригидан яхшироқ равноқ топғусидир. Биз булардан ипак, зиравор олурмиз. Буларга ҳўлу қуруқ мевалар, от-уловлар сотурмиз... Йўли узоқ бўлса ҳам карвонларимиз иштиёқ билан келиб кетади. Чунки Бобир мирзо бутун қаламравида тамға¹ солиғини бекор қилмишлар. Ўзбек, туркман, тожик, ҳинд, араб, ажам, форс — қўйингки, ҳамма бани башар² бу оғир солиқдан халос бўлиб, даромадлари ошибди. Ҳунарманду савдогарлар ҳам шунисидан жуда мамнун. Фақат Бобир подшонинг бир амри бизга маъқул келмади.

— Қайси амри? — қизиқиб сўради Хондамир.

— Бутун мамлакатида май ичиш ман этилмийшdir. Бобир мирзонинг ўзи ҳам «минбаъд ичмаймен», деб бутун эл олдида тавба қилибдирлар. Май ичиладиган олтин-кумуш косаларни синдиришишлар. Фазнидан ўн тўрт туяда икки ой овора бўлиб асл чоғирлардан Аграга олиб борган эканлар. Ҳаммасига туз солдириб, сиркага айлантиришишлар. «Бутун мамлакатда ҳеч ким ичимлик сотмасин, ҳеч ким четдан ҳам олиб келмасин!» — деб катагон қилинмишdir... Базмлари ичкиликсиз... муздаккина!

Кўчкинчиконнинг элчисини кўнгилсизлантирган бу янгилик Хондамирнинг руҳини кўтарди. Ҳусайн Бойқарони ва унинг ўғилларини ичкилиқ балоси қай дараҷада хароб қилгани ҳали мавлононинг эсидан чиқсан эмас эди. Бундан тўқиз йилча бурун Бобир Ҳиротга иккинчи марта борганди Хондамир унинг ҳам майхўрликка ружу қила бошлаганини кўрган, «Наҳотки, бу нодир сиймо ҳам бошқа кўп темурнийлар сингари истедодини ичкиликка бой берса!» — деб ташвишланган эди. Элчининг ҳикояси унинг мана шу ташвишини тарқатиб юборди.

Хондамир бу узоқ ва машаққатли сафарга Бобирни орқа қилиб чиқсан эди. Ёши элликдан ошаётган олим

¹ Тамға — қўшимча даромад солиги.

² Бани башар — одам фарзанди.

бу узоқ юртлардан Ҳиротга соғ-саломат қайта оладиши, йўқми, ҳали ўзи учун қоронги эди. У Бобир тифайли мана шу қоронгиликни бўйнига олиб келмоқда эди. Энди йўлларда Бобирнинг иродаси ва ақл-заковатидан далолат берадиган нимаики учраса, ҳаммаси мавлононинг қалбидаги машъум қоронгиликни қуваётгандай бўлар ва ёруғ бир истиқболга ишонч уйғотар эди.

Хондамир Аграга келиб кирганда дарё бўйига қурилган Ҳишт ва Зарабшон боғларини, мармарларига чиройли гуллар солиб ишланган тош иморатларни, томлари майсалар билан безанганди тиллакори толорларни¹, чаман-чаман гуллари кўзни қамаштирадиган гулзорларни кўрди. Бу улуғвор гўзалликлар мавлононинг кела-келгунча кўрган ва эшитганларига қўшилди-ю, у Бобирни аввалгидан бошқача фавқулодда қудратли бир қиёфага киритиб тасаввур эта бошлади...

* * *

Лекин Бобир сўнгги йилларда кўп касал бўлиб, жуда озиб кетган, жуссаси хийла кичрайиб қолган эди. Хондамир унинг ўзини қанчалик олдириб қўйганини Секри тоғига сайдга чиққанларида офтоб ёруғида жуда аниқ кўрди. Бобир Секри тоғининг мўъжазлиги ва текис жойга тушганлиги Ўшдаги Буратонни эслатиши ҳақида гапирав, тоғ этагидаги кўл ичига қурилаётган теш супани қўли билан кўрсатар, пастда қулф уриб ўсан ям-яшил боғ ва дараҳтлар орасидан кўрийниб турган ўнги иморатлар қандай барпо бўлганини ҳикоя қиласарди.

Хондамир эса унинг суюги бўртиб қолган озғин юзинга, кўз атрофлари ва пешонасидаги қават-қават ажинларига, уйқусизликдан ичига ботиб кетган қовоқларига қараб, ич-ичидан унга куюнар эди.

Тоғдан кўл томонга тушиб бораётганларида Бобир Хондамирнинг бу куюнишини сезгандай бўлиб:

— Менинг тақдирим ғалати, мавлоно,— деди.—Атрофимни обод қилганим сари ўзим сўлиб бормоқдамен.

— Унчалик эмасу... ҳар қалай, ўзингизга ҳам кўпроқ ғамхўрлик қилишингиз зарурмикин?

— Зарурликка зарур. Лекин мамлакат қанчалик ул-

¹ Толор — шийпон.

Жан бўлса, уни идора этиш шунчалик қийинлашар экан. Мен зўр бир давлат тузиш мақсадини зиммамга олганимда бунинг қанчалик мушкул эканини тасаввур қилмаган эканмен. Туну кун меҳнат, ташвиш, ўт, олов... Худди ҳаракатдаги вулқонлар орасига тушиб қолган-декмен. Кўзлаган мақсадим амалга ошгунча умрим етгайми, йўқми, билмаймен.

— Ниятни бутун қилмоқ керак, ҳазратим. Сиз ҳали йигит ёшидасиз, алхол қирқ олти ёшдасиз.

— Аммо Ҳиндга келганимдан бери ҳар йили беш-үн ийллик умрим сарф бўлгандек туюлур. Иситма, уйқусизлик...

Хондамир Бобирнинг Ҳиндистонга келиб тузган янги девонини бугун эрталаб ўқиган эди. Шу девондаги бир рубоий ҳозир унинг эсига тушди:

Жисмимда иситма кунда маҳкам бўладур,
Кўздин учадур уйқу чу оқшом бўладур.
Ҳар иккаласи ғамим била сабримдек,
Борғон сари бу ортадур, ул кам бўладур.

Бобирнинг уйқусиз тунлардан киртайган кўзлари сал шамол тегса ёшланадиган бўлиб қолган эди.

— Табиблар уйқусизликнинг давосини билар эдилар-ку?

— Ҳиротлик хос табибимиз Юсуфий муолижа қилиб кўрди. Бўлмади. «Сизга ором керак», дейдир. «Давлат ташвишларини унунинг», дейдир. «Кечалари шеър ёзманг», дейдир. Аммо... давлат тепасида ўлтириб, унинг ташвишини қандай унунтиш мумкин? Фақат шеър ёзганда, ижод қилганда бу ташвиш хаёлимдан кўтариладир. Лекин Аграда бўлсан ижодга ҳам фурсат тополмасмен. Кечаси ҳам, кундузи ҳам давлат ташвиши... Безор бўлиб, мана шу Секрига чиқиб келдим. Ижод учун бу ер тинчроқ... Анчадан бери маснавий ёзмоқдамен. Санасам, бир кеча-кундузда эллик байт маснавий битибмен.

Бобир хасталиги устига кўп ишлаб ўзини жуда толиқтириб қўйганини, уйқусизликнинг бир сабаби шу эканини, табиб кечалари шеър ёзишни ман қилиши тўғрилигини Хондамир сезиб борарди-ю, лекин буни айтишга андиша қиласарди. Табиатан ором нималигини билмайдиган Бобир ўзини аямай ишлаб ўрганиб қолган

эди, у бир кунда шунча шеър ёзганидан мамнун бўли юрганда уни бу мамнуниятдан ҳам маҳрум қиладиган насиҳат гап айтиш мавлонога ўринсиз туюлди.

— Ишқилиб, худо сизга қувват берсин,— деб қўя қолди.

Бобир мавзуни янгилагиси келиб:

— Мавлоно, «Ҳабиб уссияр¹»ни неча йил ёзгансиз?— деди.

— Ўн бир йил. Лекин ҳали хатм қилган эмасмен. Хотиржамлик бўлганда Ҳиротда хатм қилмоқчи эдим. Лекин йигирма йилдан бери суннийпарастлар билан шиа-парастлар Ҳиротни бир-бирларидан тортиб олиб, гоҳ ўтга урдилар, гоҳ сувга...

— Ҳў ўшанд... Унсиянинг минорасида туриб сўзлашганимизда «Ҳиротнинг толе қуёши ботиб кетмасмикин?»— деб изтироб чеккан эдингиз. Шу изтироблар бари ўринли экан-да.

— Ҳиротдан толе кетганда Самарқанд бизга қучоқ очиб турса экан! Шиа-сунний адовати Мовароуннаҳр билан Ҳурросону Эроннинг маданий алоқаларини узиб ташлади. Бу алоқалардан қанча авлодлар баҳра олган эди, қанча истеъоддлар камол топган эди. Жоҳил султонлар Мовароуннаҳрни биқиқ муҳитга солиб қўйиб, хурофот билан бидъатга ем қилмоқдалар. Самарқандан келган бир олим йиғлагудай бўлиб айтиб берди. Обираҳмат бўйндаги уч ошиёнлик Улугбек расадхонаси вайрон бўлмишdir. Шаҳар ҳокимиининг парвойига келмас эмиш. Жоҳиллар нураб ётган расадхонанинг ғиштларини олиб кетиб, ўз ҳовлиларига ишлатмоқда эмишлар.

— Биз ўзга юрга келиб иморатлар қурганда улар ўз юртимиздаги обидаларни бузмоқдалар! Чархнинг бундан аччиқ киноси бўлурми, мавлоно? Шуни ўйласам, ўз еримизни қўйиб, Ҳиндга кўнгил берганим менга худди оқибатсизликдек кўринадир!

— Бироқ фалакнинг гардиши шуни тақозо қилса одам илож тополмас экан-да. Мана, мен ҳам сиздан ибрат олиб, Ҳиндга келдим-ку! Муаррих бўлганлигим

¹ «Ҳабиб уссияр»—«Севимли дўстнинг таржимаи ҳоли» демакдир. Ҳондамир ўзининг бу катта асарида Араб, Эрон, Урта Осиё, Ҳурросон тарихининг олам пайдо бўлганидан то XVI асргача ўтган энг муҳим даъ弗лари ҳақида сўз юритади.

учун тарихий зарурат биздан зўр бўлишини кўп сезмешмен.

Бобир Хондамирнинг сўнгги гапига қизиқиб, отини унинг отига яқин юргиза бошлади.

— Дарҳақиқат, тарих алоҳида шахслар иродасига бўйсунмас экан,— деди Бобир.— Оёғингиз тагидаги тоғ пастига қараб кўчса, сиз юксакка қанчалик интилманг, тоғ кўчкиси билан бирга пастига қулаб кетар экансиз. Энди ўйлаб кўрсан, Мовароуннаҳрдаги кўчкилар мени худди шу кўйга солган экан. Бироқ сиз қадам қўйган тоғ ичдан кўтарилиб ўсиб борса, кўзлаган юксаклигинизга қандай кўтарилганингизни ўзингиз сезмай қолур экансиз. Ҳиндистон менга ичдан кўтарилиб ўсиб борувчи тоғдек туюладир, мавлоно. Шунинг учун Самарқанду Андижонда қилолмаган ишларимни бу ерда қилиш умидидамен!

— Менинг назаримда ҳам эндиғи юксалиш аспи Ҳиндга кўчганга ўхшайдир. Жаҳолат қувган жуда кўп илму. санъат аҳли сиздан паноҳ истаб Ҳиндга келишлари бежиз эмасдир. Чунки фалакнинг гардиши ўзгарди. Ахир бир вақтлар Хуросону Мовароуннаҳр ҳам ичдан кўтарилиб ўсиб борувчи тоғдек юксалган эмасми? Хоразмда— Беруний, Бухорода — Ибн Сино, Тусда — Фирдавсий, Боласуғунда — Юсуф Хос Ҳожиб —булар ҳаммаси бирбирига асрдош. Шунча зўр сиймолар чиқсан асп — бизнинг улуғ бир юксалиш асrimiz эди. Чингизхоннинг кўчманчи ўрдалари босиб келди-ю, маданий тараққиётимиз ипларини бир неча асрга узиб ташлади. Ўлуғбек даврида Самарқандда, Навоий даврида Ҳиротда жуда кўп маданий даҳолар яна уйғонди. Янги юксалишлар аспи бошланди. Лекин кажрафтор фалак буни ҳам бизга кўп кўрди! Яна кўчманчи сultonлар маданий тараққиёт ипларини узиб, чалкаштириб юбордилар... Фақир Ҳиротда тополмай юрган калаванинг учини шу ерда топгандек енгил тортмоқдамен. Мусоғирлик жуда оғир бўлса ҳам, лекин башарият яшаб турган шу кенг оламда янги даҳолари уйғонган, илму санъатга астойдил йўл очилган Ҳинднинг борлиги қалбларга қувват берадир... Мен энди «Ҳабиб уссиёр»нинг сўнгги таҳририни шу ерда қанотингиз остида тугаллаш умидидамен.

— Бажонидил!. Биздан неки кўмак зарур бўлса тортинмай айтинг.

— Фақир Ҳазрат Мир Алишернинг кутубхоналарида

кўп йил ишладим. Ҳусайн Бойқаро ҳазратларининг кутубхоналаридағи нодир -қўлёзмалардан ҳам кўп фойдаландим... Энди... бу кутубхоналар Ҳиротда қолди.

Хондамир Бобирнинг ҳам эллик киши ишлайдиган улкан кутубхонаси борлигини билар, Ҳиротдан топилмайдиган нодир манбалар бу ердан топилиши мумкинлигига ишонар эди. Бироқ подшоҳнинг хос кутубхонасига анча-мунча одам йўлай олмайди. Хондамир шуни ўйлаб, гапининг давомини айтишга ийманди.

— Сиз бизни деб шунча жойдан келибсизу биз кутубхонамизни сиздан аягаймизми, мавлоно? — деди Бобир унинг ийманиш сабабини сезиб.— Абдулла китобдорга буюргаймен, сизга неки асар зарур бўлса топиб бергай. Кутубхонада ҳиндистоний китоблар ҳам кўп. Абдулла китобдорнинг ихтиёрида санскритни яхши биладиган таржимон олимлар бор. Шулардан бир-иккитасини сизнинг ихтиёрингизга берурмен, неки хизматнгиз бўлса адо этурлар.

— То абад миннатдормен, ҳазратим! Густоҳлик саналмаса, яна бир эркалигим бор...

— Марҳамат, мавлоно.

— Ҳиротда ўзингиз ёзган саргузаштларингиздан парча ўқиб берган эдингиз. Мени мафтун этган эди. Агар шу асарингизнинг тайёр қисмлари бўлса, мен учун... энг азиз, энг нодир манба бўлур эди. Чунки сиз бошдан кечириб, тадқиқ этган тарихий воқеаларни бошқа ҳеч ким шундай яхши тадқиқ этган эмас...

Бобир отининг чимирилган қулоқларига тикилиб бир оз жим борди. У икки йилдан бери «Бобирнома»ни бошидан қайтиб кўчириб, яхлит бир асар ҳолига келтирмоқда эди. Бултур ёз иссиқлари тугаб, ёмғир фасли бошлангандаги жуда қаттиқ шамол кўтарилган. Бобир чодирда ишлаб ўлтиргандаги ёмғир аралаш келган довул унинг чодирини йиқитиб, қўлёзмаларнинг ўнлаб варақларини учириб кетган эди. Бутун-бутун бобларни ёмғир довул ҳалок қилган эди. Уларни тиклаш учун ҳалигача яхлит бир вақт топилмас эди. Қўлёзманни шу аҳволда Хондамирга берса тўғри бўлармикин?

— Мен ўйлаб кўрай, мавлоно.

Бу орада улар Секри тоғининг этагидаги булоққа яқинлашдилар. Атрофи ороста қилиб қўйилган суви муздай булоқ Бобирнинг яхши кўрган жойларидан бири эди. Шу ерда Хондамир икковлари отдан тушдилар.

■ Тиниқ мавжларга тоза қумлар қўшилиб қайнаб чи-
қаётган булоқ сокин гулзорларни оралаб, шилдираб оқе-
моқда эди.

— Атроф шундай сокин,— деди Хондамир.— Кўл
бўйида қурилишлар... Бундан икки йил бурун шу Сек-
рида Рано Санго билан даҳшатли жанглар бўлганини
тасаввур этиш мушкул.

Бобир ўша қонли урушнинг таҳликали дамларини
кўз олдига келтириди-ю:

— Мен шу вақтгача кўрган жангларнинг энг даҳ-
шатлиси ўша эди,— деди.— Бу жанг арафасида бўлган
ҳодисаларни, муҳорибанинг барча тафсилотларини мах-
сус бобда ёзмишмен. Хаттот китобнинг тайёр қисмлари
билан бирга шу бобни ҳам бугун кўчириб бўлгай. Оқ-
шом ҳаммасини сизга берурмен, мавлоно. Ўқиб фикр
айтурсиз.

Боя жавобсиз қолган илтимосига энди жавоб олган
Хондамир қўлини қўксига қўйди:

— Сиз менга тенгсиз бир ишонч билдиурсиз, ҳаз-
ратим!

— Сизни Ҳиротдан чорлаб келтиришдан мақсад ҳам
ижодий ишлар бўйича маслаҳатингизни олмоқ эди.

— Сарафрозмен!

Шу пайт от дупури эшитилди. Йўлка охирида узоқ-
дан от чоптириб келган чопар сакраб ерга тушди ва
таъзим билан Бобир томонга кела бошлади.

— Аграда бирон шошилинч иш чиқсанга ўхшайдир,
— деди Бобир.— Мавлоно, агар мен пойтахтга кетсам,
«Вақоиъ»ни сизга оқшом келтириб берурлар.

Бобир отини тутиб турған жиловдор томонга йў-
налди.

2

Секри тоғининг шимолий ёнбағрида салқин боғнинг
тўрида жойлашган уч хонали шинам хилватхона Мав-
лоно Хондамирга берилган эди. Бобир ўша куни Аг-
рага жўнаб кетди. Мавлоно хилватхонанинг ўймакор
айвонига чиқиб, ундан яхши кўринадиган шишадай
тиниқ кўлни томоша қилиб ўтирганда хонаи хоснинг
савдарбошиси Бобирнинг қўллёзмасини унга олиб келиб
берди.

Қўллёзма хаттот томонидан зарварақларга бениҳоя

чирийли қилиб кўчирилган эди. Хондамир уни хона ичи-
га олиб кириб, миз устига қўйди. Тепада ёнаётган шам-
ларни миз устига яхши ёруғ берадиган қилиб ўрнатгач,
кўзойнагини тақди ва асарни эҳтиёт билан варақлаб
ўқишга тушди.

Бундан ўн йилча аввал Бобир Ҳиротга иккинчи мар-
та борганида Хондамирга «Вақоий»дан ўқиб берган
бобнинг услуби мавлонони хиёл таажжубга солган эди.
Мана бу қўлёзмада ҳам Бобир қаламга олган воқеалар
жуда мураккаб бўлса-да, муаллиф уларни оғзаки ҳикоя-
га яқин бир тарзда хийла оддий услубда ёзган эди. Кўп
жойларда Хондамир ҳатто Бобирнинг сўзлаш тарзини,
оҳангি, баъзи бир шахсий хислатларини пайқаб:
«ғалати-ку!»— деб қўйди. Чунки отаси Мирхонд Хон-
дамирни ёшлиқдан бошқача эътиқодлар билан тарбия-
лаб ўстирган эди. Бу эътиқодга биноан, насрнавис мур-
арих ўз шахсий услубини давр услубига бўйсундир-
моғи, ўз «мени»ни давр уммонига қўшиб билинтирмай
юбормоғи керак эди. Агар асарда муаллиф ўзини на-
моён қиласверса, бу — нокамтарлик белгиси ҳисобла-
нарди. Катта тарихий китоблар ҳукмдорлар учун ёзи-
лар, асосий таърифу тавсиф ўшаларнинг ишларига бе-
риларди. Назокатли ўхшатишлар, жимжимадор мажоз-
лар ва шоирона кўтарики услугуб ҳукмдорларга хуш ке-
лар ва барча муаллифлар бўйсунадиган бир қонун
ҳисобланарди.

Бобир мана шу қонунни бутунлай инкор этувчи ус-
луб билан асар ёзгани Хондамирга ортиқ даражадаги
бир шаккоклиқдек туюлди. Бобир ўғли Ҳумоюнга ёзган
хатини ҳам китобида келтирган эди:

«...Хат битирда такаллувф қилай дейсен, ул жиҳаг-
тин муғлақ¹ бўладур. Бетакаллувф пок алфоз била бити,
сенга ҳам ташвиши оз бўлур ва ўқиғувчиға».

«Ажабо!— ўйландй Хондамир,— бетакаллувф тил
билан асар битмоқ Бобир мирзо учун пок услугуб бел-
гиси ҳисобланур экан-да!» Хондамир ўзининг ўн йил-
дан бери ёзаётган «Ҳабиб уссияр»ида назокатли та-
каллувлар кўплигини эслади-ю, ўзини ўнғайсиз се-
зиб, ўқишдан тўхтади ва айвонга чиқди.

Осмонда саккиз кунлик ой сузинб юрар, унинг нури
қаршидаги кўлнинг ўртасида ойдин йўлка ҳосил килган

¹ Муғлақ — тушуниб бўлмайдиган.

эди. Кўлнинг нариги четидан тоғ этагигача келган бу нур йўлкасида тўлқинлар жимир-жимири гавҳар жилвасига ўхшаб кўзни қамаштиарди. Лекин Хондамир шу нур ўйинида ҳам Бобир тасвирилаган воқеаларни кўрар, уларнинг таъсирини хаёлидан узоқлаштиrolмас эди. Сертакаллуф, сербезак услугуб Хондамирдан жуда кўп куч, вақт, меҳнат талаб қиласр эди. Бундай услубда асар ёзиш қанчалик қийин бўлса, уни ўқиб тушуниши ҳам шунчалик қийин эди. Бобир икки томонни ҳам бу қийинчиликдан қутқаришга интилса нимаси ёмон? Ўғлига ёзган хатида «сенга ҳам ташвиш оз бўлар, ўқиғувчига ҳам» деганда у ҳақли эмасми? Унда Хондамирнинг юксак шоирона услугуга оид эътиқодлари пучга чиқадими? Йўқ, бу мумкин эмас!

Хондамир қайтиб ичкарига кирди-ю, ўзининг ҳақлигига далил қидириб, очиқ қўлләзманинг давомини ўқишга тушди.

Ҳали ҳеч бир муаррих қаламга олмаган ғаройиб воқеалар бу қадар кўп! Хондамир китобнинг мазмунни янги ва мароқли эканига тан бермай иложи қолмади. Бобир ўзини-ўзи очиқчасига муҳокама қилган, ўз хатоларини рўй-рост ёзган жойлари ҳам Хондамирга жуда илиқ туюлди. Охирги бобларида яна ажиб бир ҳат учради. Бобир Аградан Кобулга юборган бу мактуб Мөҳим бегимга атаб ёзилганини Хондамир сезди. Бобирнинг заҳарланиш тафсилотлари шу ерда битилган эди: «Дастурхон устида икки-уч марта кўнглум барҳам уриб, қусаёздим. Охир кўрдумким бўйлмас, кўпдум... Обхонага бориб қалин қусдим. Ҳаргиз ошдин сўнг қусмас эдим, балки ичганда ҳам қусмас эдим. Кўнглимга шубҳа кечди.

...Жон мундоқ азиз нима эмиши, мунча билмас эди. и. ул мисраш борким:

«Ким ўлар ҳолатга етса,
Ул билур жон қадрини».

Тенгри таолонинг инояти бор экандир, манга янги бошдан жон бағишлади».

Бобир ўз ҳаёти ҳақида бу қадар очиқчасига ёзгани Хондамирни ҳайрон қолдирдий. Кейинги бобда яна бир тафсилот унинг эътиборини тортди. Ичкиликни бундан уч йил олдин ташлаган Бобир уни ҳалигача қайтиб оғзи-

га олмас эди. Бунинг осон бўлмаганини Хондамир қўйидаги сатрлардан билди: «*Бу ўтган икки йилда чоғир мажлисининг орзу ва иштиёқи беҳад ва ғоят эди, андоқки, чоғир иштиёқидан борлар¹ йиғламоқ сарҳадига етар эдим*».

Ўз истагига қарши курашиб, йиғлаш даражасига борганини очиқ ёзиш тождорлар орасида мисли кўрилмаган бир соҳибдиллик эканига Хондамир ич-ичидан тан берди. Очиқчасига айтган мана шунақа оддий тафсилотлар туфайли Бобир унга ўзи каби бир инсон фарзанди бўлиб туюлди. Аммо бошқа тождорлар тарихий китобларда оддий одамларга ўхшаб кўринишдан қанчалик чўчийдилар! Улар эл-юртдан мумкин қадар баландда бўлишни, оддий инсондан кўра худога яқинроқ туришни қанчалик яхши кўрадилар! Шунинг учун ҳам Хондамирдек муаррихлар подшолар ҳақида оддий одамлар тушунмайдиган баландпарвоз, сертакаллуф тилда китоб ёзишга мажбур бўладилар. Бобир ўзи подшоҳ бўлгач, бундай такаллуфларни ким учун ёзади? Ҳамма томонидан қабул қилинган давр услубининг қонунларини бузиб чиқиб, ўз ҳаёти ҳақида шундай эркинлик ва ростгўйлик билан асар ёзиши — ҳеч кимга қарам эмаслиги туфайли эмасмикин?

Бу фикр Хондамирни Бобирнинг услубидаги ўзгачалик билан гўё яраштириди. Шундан кейин Бобирга хос оддийликнинг теран бир шеърий нафосати ҳам борлигини, бу нафосат одамни сеҳрлаб олишини сезди. Тун ярмидан ошганда эса асарда тасвирланган воқеаларга қизиқиб, услубини бутунлай эсадан ҳам чиқарди.

Тонгга яқин озгина ухлаб, сўнг яна ўқишини давом эттириди-ю, қўллэзманинг охирига етмагунча ундан ажраполмади.

* * *

Бобир Секрига учинчи кун эрталаб қайтиб келди — қундузи ҳаво жуда иссиқ бўлгани учун йўлни тун салқинида босиб ўтган эди. У Хондамирни яна боғда учратди, иккови пиёда ўша булоқ бўйига келдилар.

Бобир йўл юриб чарчаган, уйқусиз ўтган яна бир тун юзини жуда сўлитиб қўйган бўлса ҳам у ўзини хушҳол тутиб:

— Мавлоно, менсиз дилгир бўлмадингизми? — деди.

¹ Борлар — «баъзи пайтлар» маъносида.

- Ҳазратим, мен туну кун сиздан айрилмай суҳбатингизда бўлдим, сиз ёзган, асар саҳифаларида унүтилмас дамларни бошдан кечирдим.
- Ҳали охирга етмагандирсиз?
- Кеча пешинда охирги саҳифасини ёпганимча ҳамон унинг таъсири билан яшамоқдамен.
- Мени аяманг, мавлоно, ростини айтинг.
- Ростини айтсан, сиз мени чил-чил синдиридингиз! Хондамир бу гапни шундай жиддий туриб, ички бир дард билан айтдики, Бобир таажжубланиб тўхтади:
- Нечук синдиришимен, мавлоно?
- Услубингиздаги нафис бир соддалик қаршисида менинг юксак шоирона услубим ортиқча бир такаллуфдек туюлди.
- Э, такаллуфми? Аммо менинг аҳволим ўзингизга маълум. Жумлаларни такаллуф билан безашга фурратим йўқ эди.
- Асли гўзал бўлган юзга ортиқча зеб-зийнат не ҳожат? Ҳазратим, сиз адабиётимизда ҳали ҳеч ким қилмаган улуғ бир ишни қилмишсиз. Муборак бўлсан!
- Миннатдормен, мавлоно. Бироқ ҳали мен бу ишнинг йўқолган саҳифаларини тикламоғим керак.
- Тиклашингизга аминмен. Охири яна бошқа нек ишларингиз ёзилғусидир. Бироқ шу туришда ҳам мен бу улкан асарингизни туркий тилда айтилган янги бир сўз-дек қабул қилдим. Мен аминменки, авлодларимиз сизнинг бу шоҳ асарингизни Алишер Навоийнинг «Хамса»си каби эъзозлагайлар. Чунки шу вақтгача туркий тилда битилган энг улуғ шеърий асар «Хамса» бўлса, шу вақтгача туркий тилда битилган энг улуғ насрый асар, менимча, «Бобирнома» бўлғусидир.
- Мавлоно, гарчи муболага қилган бўлсангиз ҳам дил сўзларингиз учун ташаккур. Мен бу асарни ниҳоясига етказиш учун бугун яна Секрига қайтиб келдим. Агар нуқсонлари бўлса очиқ айтинг.
- Фақир баъзи саҳифалардаги саналару номларда ноаниқликлар учратдим. Ҳусусан, Ҳиротга Ҳусайн Бойқаро саройига оид боблар хиёл таҳрирталаб.
- Мана шу нуқталарда менга сизнинг кўмагингиз даркор.
- Бажонидил, ҳазратим. Неки ноаниқлик бўлса, барчасини алоҳида қоғозга ёзиб қўйдим. Асарингиз билан бирга бермоқчимен.

Шу пайт тепадан ўтаётган қушлар кескин ҳунтак чалганга ўхшаб нохуш овоз чиқаргани эшигилди. Бобир осмонга қараб, қорамтири-қизғиши калхатлар галаси қанот қоқмай учиб бораётганини кўрди. Сўнг уларни Хондамирга кўрсатиб:

— Бу йиртқичлар жанглардан сўнг ўлакса еб мазахўрак бўлмишлар,— деди.— Рано Санго билан бўлган жангдан сўнг мана шу кўл атрофларида, боғнинг ўрнида ўлиб ётган одамлар, отлар, туялар, филлар беҳисоб эди. Калхатлар қон ҳидини сезиб, узоқлардан гала-гала учиб келганлари ёдимда бор...

Бу хотира Бобирда нохуш туйғулар қўзғаганини сезган Хондамир:

— Начора, ҳазратим,— деди. Ҳанузгача ҳеч бир улуғ давлат жангу жадалсиз барпо бўлган эмасдир.

— Сўзингиз чину, аммо... Сўнгги йилларнинг воқеаларини қофозга туширганимда, барча қурбонлар, тўкилган барча қонлар кўз ўнгимда шундай тўлиқ гавдаландики, уйқуларим ўчиб кетди... Бажур қўреонида уч минг кишининг қиличдан ўтказилгани... Панипатда бир неча юз асирининг тўғангдан отиб ўлдирилгани... Бизнинг одамлар ҳам калламиноналар қўпаргани...

— Ҳаммасини умр китобингизда рўй-рост битмишсиз.

— Чунки авлодлар ҳақиқатни билсинлар, бизни фаришта деб ўйламасинлар. Қилган гуноҳларимиз ўзимизга нечоғлиқ оғир тушганидан огоҳ бўлсинлар.

Бобирнинг руҳида дам-бадам сезилиб қолаётган ички бир дард — фақат хасталик ёки чарвоқликдан эмаслигини Хондамир энди сезди. Бобир ижодий ишга берилган сари унинг қаябида шоҳ билан шоирнинг муроса қилиши қийинлашиб кетарди.

Хондамир беихтиёр Ҳиротни ва Алишер Навоий билан Ҳусайн Бойқаро орасидаги мураккаб муносабатларни эслади. Бу икки зот ёшлиқдан бир-бирларини яхши кўрар эдилар, аммо подшоҳнинг шафқатсиз ишлари шоирнинг нағис туйғуларига шу даражада зид келар эдики, Алишер Навоий Ҳусайн Бойқаро билан бир шаҳарга, ҳатто бир мамлакатга сифишмай қоладиган ва Ҳурросонни ташлаб чиқиб кетишга астойдил интиладиган пайтлари бўларди.

Ҳатто бир шаҳарга ва бир мамлакатга сифмайдиган катта шоир билан подшоҳ Бобирнинг қалбida бирга яшашга мажбур эканини ва бу уни қанчалик қийин аҳвол-

ларга солишини Хойдамир ҳозир яқиндан кўргандай бўлди. Унинг ёдига Бобирнинг:

Юз ҳайфки, зоеъ ўтадир умри азиз,
Афусуки, ботил¹ борадир умри шариф!

деган сатрлари тушди. «Шоир бу сатрларни подшоҳлик ташвишларидан тўйиб кетган пайтда ёзган бўлса керак!»— деган ўй кўнглидан кечди.

Бобир булоқ бўйига чўнқайиб ўтириб, кафтини муздай тиниқ сувга тўлдириб олди-да, уни симириб, хиёл тафти босилгандаи бўлди.

Хондамир гапни ёқимлироқ мавзуга бургиси келди:

— Ҳазратим, Ҳиротда учрашганимизда сиз ўз ҳаётингизни... кўчки босган булоққа ўхшатгаи эдингиз. Ёдингиздами?

— Ёдимда бор.

— Фақир ҳозир тахмин қилдимким, Мовароуннаҳрда кўчкп босган булоқ балки шу ерга келиб қайта кўз очгандир?

— Ақл бовар қилмайдир. Орада шунча узоқ масофалар бор.

— Лекин чинакам зўр истеъодлар— ўлмас булоқларга ўхшар эканлар. Уларнинг кўзини ўн жойда бекитсалар, ўн биринчи жойдан яна ёриб чиқар эканлар!

— Лутф қилдингиз, мавлоно. Ҳозир ижодий иш мени худди шу тоза булоқдек ўзига тортадир. Жангларнинг қонли селлари, салтанатнинг тошқин дарёдай бетиним талотумлари жонимга тегди. Тожу тахт бевафолигини кўпдан бери сезиб юрибмен. Менга вафо қилса фақат ёзган асарларим вафо қилмоғи мумкин. Ватанимга ўзим қайтолмасам ҳам асарларим қайтмоғи мумкин. Эндиги орзуим — мен туғилган юртимга қилолмаган фарзандлик хизматини асарларим қилса...Андижону Самарқандни, мени ўстириб шоир қилган ўлкаларни қанчалик соғинганим билсангиз эди, мавлоно!

Бобир кўпдан бери уйқусиз юрганиданми ёки соғинч ҳиссининг зўриданми, кўзлари беихтиёр ёшга тўлди.

— Мен ҳам Ҳиротни беҳад соғиниб юрибмен, ҳазратим. Лекин... ўзингиз айтган эдингизки, Ҳинд ҳам энди биз учун ватан. Ёзган асарларингиз Ҳинднинг шавкатига ҳам шавкат қўшғусидир. Ҳиндда барпо қилган улуғ дав-

¹ Ботил — қалбаки йўлдан бориш, адашиш.

латингиз эса сизни вояга ётказган Мовароуннаҳрга ҳам шуҳрат келтиргусидир.

— Зора шундай бўлса! — деди Бобир.

У Хондамир билан кечгача дардлашиб юрди-ю, кўнглини бўшатиб, ўзини анча енгил сезди. Бироқ кечаси яна уйқуси қочиб, тонг отгучча мижжа қоқмади.

АГРА. Юлдузлар гирдоби

1

Яна ёзниң жазирама иссиқлари бошланди. Бобир тоҳ, девониомда, тоҳ кутубхонада ишлар, мудом ичи куйиб, совитилган норинж шарбати ва яхна чой ичар, лекин чанқоғи ҳеч босйлмас эди.

Бир кун пешин кечроқ Тоҳир хилватхонага уч-тўрт бош оқ кишмиш узум олиб кирди. Ҳозиргина узиб ювилган олтин ранг кишмиш доналари устида сув зарралари йилтираб туради. Кўлдан бери бундай узумни кўрмаган Бобир таажжуб билан:

— Қайдан олдингиз? — деди.

— Узимизнинг Ҳишт Биҳишт боғимиздан. Самарқанддан келтирилган кишмиш кўчатини ўз илкингиз билан экканингиз ёдингиздами, ҳазратим?

Бобир қувониб узумдан бир бошини қўлига олди. Бу ерларнинг тарихида биринчи марта етиширилган оқ кишмиш сал серсувроқ бўлса ҳам, лекин унинг таъмини Бобирга Самарқандни эслатди. Узум еган сари чанқоғи босилиб, ўзини бирдан тетик сезди.

— Буни Моҳимга кўрсатмоқ керак! — деб ўрнидан турди.

Бултур кузда Кобулдан Аграфага кўчиб келган Моҳим бегим бу боғнинг тўридаги мармар кўшкда эди. Бобир баркашдаги узумни Тоҳирга кўтартириб, гулзор йўлкалардан кўшкка қараб кетди.

Ҳаво дим ва рутубатли. Яна пашкол фасли бошланиб, осмондан булат аримай қолган. Баркашдаги олтинранг кишмиш Бобирга шу булатларни ёриб ўтиб, узоқ Самарқанддан етиб келган ёруғ бир нурдек кўринарди.

Моҳим бегим кўшкнинг айвонида миз устига энгашиб алланарса ёзмоқда эди.

Айвонга Тоҳирни эргаштириб кирган Бобир:

— Узумимиз пишибди, Моҳим! — деди. — Бир татиб ҳўринг.

Моҳим бегим ўрнидан туриб, Бобирни одатдагидай таъзим билан қарши олди, лекин ўпкаси тўлиб, дуруст гапиролмади.

Сўнгги икки йил ичида ярасидан қолган асоратлар тузалиб, қўллари аввалгидай ишлайдиган бўлиб кетган Тоҳир узумни таъзим билан Моҳим бегимга тутди.

Моҳим бегим баркашни унинг қўлидан олиб, миз устига қўйди. Унинг қовоқлари шишиб, кўзлари йиғидан қизарганини пайқаган Тоҳир секин орқаси билан юриб чиқиб кетди.

Эр-хотин ёлғиз қолганларида Бобир:

— Сизга не бўлди? — деди. — Йиғлабсиэми?

— Нафасим қисилди...

Моҳим бегим қирқ ёшга боргандан бери юзлари тўлишиб, анчагина семириб қолган эди. Кобулнинг енгил ва қуруқ тоғ ҳавосига ўрганган бегим Жамна бўйидаги иссиқ кунларда сернам дим ҳаводан нафас олиш қанчалик қийин бўлишини аввал ҳам эшитган, бир чеккаси шу сабабдан тўрт йилгacha Аграга келмай юрган, ахийри Бобирнинг юзидан ўтолмай бултур келган эди.

— Пашкол фаслида мен ҳам жуда қийналиб нафас олурмен, — деди Бобир. — Ташвиш чекманг, ўрганиб қетурсиз. Қани, узумдан олинг!

Моҳим бегимнинг ҳеч нарса егиси келмас эди. Шундай бўлса ҳам кишмишдан икки дона олиб оғзига солди-ю, Бобирнинг кўнглига бўла:

— Яхши пишибдир, — деди.

— Мактуб ёзмоқчи эдингизми?

— Ҳа, Ҳумоюнга... Менинг нафасимни пашкол эмас, соғинч қисадир!

Тўлиб ўтирган Моҳим бегим бирдан йиғлаб юборди:

— Мен ҳамиша Ҳумоюннинг дийдорига зормен. Сиз мудом ўғлимни мендан узоқларга юборурсиз! Кобулда эканимда Ҳумоюн Жамна-ю, Ганга бўйларидан бўшамади. Мен Аграга келдим, Ҳумоюн Бадахшонга жўнаб кетди. Бадахшонни тинчтиб қайтди ҳамки, уни яна узоқ Самбхалга юбордингиз. Қаерда бир хатар бўлса, ўшанга Ҳумоюн рўбарў! Қайси узоқ юртда мушкул иш бўлса — яна Ҳумоюн! Мен бу ерда хавотирликда қонютиб изтироб чекурмен!

— Бунчалик хавотирланишнинг не ҳожати бор, Моҳим!

— Сиз хавотирланмайсиз, ҳазратим, сизнинг фар-

зандларингиз кўп! Менинг ёлғиз фарзандим қолган! Учтасини тупроққа топшириб, шу биргина Ҳумоюн билан қолганмен!

Бобирнинг бошқа хотинлари ва улардан бўлган бошқа болалари ҳам борлиги Моҳим бегимда қанчалик мурракаб туйғулар қўзғашини Бобир ҳозир яна бир марта сезди. Шу пайт хонага саккиз ёшли Гулбадан чолиб кириб келди. Бўйнидаги жажжи тақинчоқларини шилдиратиб, отаси қаршисида эгилиб таъзим қилди. Лекин онасининг йиглаб, ўртаниб гапираётганини кўрди-ю, хавотирланиб тўхтади.

— Моҳим,— деди паст товуш билан Бобир,— Ҳиндол билан Гулбадан ҳам сизга фарзанд-ку, ахир!

— Комрон мирзо-чи, ҳазратим? У киши сизнинг ўғлингиз эмасмилар? У киши Лахўрда оналари билан тинчгина юрибдилар! Нечун ҳамма балога Ҳумоюн балогардон бўлмоғи керак?

— Чунки Ҳумоюн— таҳт вориси! Мен қилмоғим керак бўлган мушкул ишларни Ҳумоюн қилиб ўрганмоғи керак.

— Мен хавотирланиб қон ютсан майли! Сиз бунга парво қилмайсиз, чунки бошқа хотинларингиз бор!

Гулбадан ота-онасини ҳеч қачон бундай мушкул ва ноқулай аҳволда кўрмаган эди. У кўзлари жавдира, нима гап бўлаётганини тушунолмай лол бўлиб туради. Ахир ҳазрат онаси подшоҳ отасига ниҳоятда меҳрибон эди-ку. Кобулдан икки ой йўл юриб, кела-келгунча унинг номини тилдан қўймай эъзозлаб гапирав эди-ку! Ҳазрат отаси ҳам уларга Аградан пешвоз чиқиб, Жалоли кўли яқинида кутиб олмаганми? Чарчаган отидан тушиб, бошқа от келтиргунларича сабри чидамаган Бобир Моҳим бегимнинг олдига пиёда келган эмасмиди? Сўнг суюкли хотинини эъзозлаб, уни отдан тушишга қўймаган, ўзи эса Моҳим бегимнинг оти ёнида уч чақиримча жойга пиёда борган эди-ку. Буни кўрган одамлар: «Подшоҳнинг ўз хотинини бу даражада юксак иззат-икром билан кутиб олганини умримиизда кўрган эмасмиз!»— деганларини Гулбадан ўз қулоғи билан эшигтан эди-ку. Ҳозир буларга нима бўлди?

Бобир қизчасининг ҳанг-манг бўлиб турганини сезиб, тез ўрнидан турди, баркашдаги узумдан бир бошини қўлига берди:

— Ма, қизим, е!— деб унга мулойим гапириб, эшик-

дан ташқарига ғақлаб чиқди:— Бор, энди боғда ўйна.

У кўз ёшларини ҳамон тўхтатолмаётган Моҳимнинг қаршиисига қайтиб келиб ўлтирди ва ҳазин товуш билан деди:

— Моҳим, сиз мендан ҳар қанча ранжисангиз ҳақ-қингиз бор. Шариат рухсат бергани билан ҳар бир мусулмон уч хотин олиши шарт эмас эди... Мендек сайёҳтабиат одам... умрининг ярмидан кўпини сафарларда, жангларда ўтказишини била туриб, уч хотин олиши... кечирилмайдиган бир хатолик бўлди. Бу хотинларнинг ҳеч бири мен орзу қилгандек баҳтиёр бўлолмаганини... бугун сизга қараб кўриб турибмен... Кундощлик аламлари... Бир-бирига ўғай болаларнинг рақобати... Отабоболаримизни ўртаган бу жаҳаннамлар бизга дахл қилмас деб ўйлаган эдим... Иўқ, мана, ҳатто сиздек суюкли ёрим ҳам... шу жаҳаннам азобидан кўз ёш тўқмоқдамиз. Мажруҳ дилим сизни кўриб, баттар хасталанди.

Моҳим бегим Бобирнинг сарғайиб қолган касалманд юзига қаради-ю, кўз ёшини апил-тапил арта бошлади.

— Ҳазратим, мендан озорланманг. Мен бир мунглик аёлмен. Сиз подшоҳсиз. Арзимни сизга айтмасам, кимга айтамен?

— Ҳа, мен подшоҳмен — бутун бало шунда. Неки хатолик, неки гуноҳ қилган бўлсан, ҳаммасининг бирламчи сабаби менинг подшоҳлигимдир. Ёшлигимда подшоҳлик занжиридан қутулиб кетмоқчи бўлдим. Лекин мени бу занжиридан халос қиласиган нажоткор топилмади. Энди умидим борки, менинг нажоткорим Ҳумоюн бўлғусидир.

Моҳим бегим Бобирнинг бу сўзларига ишониб-ишонмагандай унга термилиб қаради.

— Моҳим, мактубингизни давом эттиринг. Менинг номимдан ҳам ёзинг, Ҳумоюн Аграга тезроқ қайтсин. Кўзим тириклигига тожу тахтни эгалласин. Ёзинг, мен имзо чекурмен!

— Ҳазратим, сиз Ҳумоюнни тожу тахтга бунчалик интиқ деб ўйламанг! Ҳеч ундей эмас! Мен фақат ўғлимиз ёнимизда бўлсин демоқчи эдим, холос!

— Ёзинг, келсин!. Фақат подшоҳ бўлиш шарти билан келсин. Бу маҳфий гапни ҳозирча сиздан бошқа ҳеч ким билмасин.

Бобирнинг нияти жиддийлигига энди ишонган Моҳим бегим:

— Сиз... Кобулга қайтмоқчимисиз? — деб сўради.

— Мабодо, оламдан кўз юмсан, Кобулда дафн этинглар.

— Нечун бундай дейсиз?

— Сиздан яширадиган сирим йўқ, Моҳим, Сиз Кобулда «фотиҳликнинг қасоси қайтса ёмон бўлур» деган эдингиз. Шу гапингиз рост чиқди. Подшоҳлигу фотиҳлик балолари малика Байда берган заҳар шаклига кириб, менинг умримни кемирди. Агар мен ҳам бор кучими фақат илму ижодга берсан, балки Берунийдек етмишдан ошармидим? Еки Алишер Навоийдек олтмишга киармидим? Бироқ мана, қирқ етти ёшимда умримнинг охири кўриниб қўлди.

— Ниятни яхши қилинг, ҳазратим! Худо хоҳласа ҳали умрингиз узоқ бўлғусидир!

— Не бўлгандা ҳам энди подшоҳлик бас! Қолган умримни ижодга сарфламоқчимен! Менга саройлару қасрларнинг кераги йўқ. Мана шу Зарафшон боғиннинг бир гўшаси бўлса бас... Ортиқча савдару мулоғимлар ҳам даркор эмас. Тоҳир офтобачининг бир ўзи менга етарлик. Ҳумоюнга шу қароримни айтиб, икковимизнинг номимиздан ёзинг!

Моҳим бегим Бобирга жуда оғир тегадиган мавзуларда гап очганидан энди қаттиқ пушаймон бўлди-ю, эрига илтижо қилиб:

— Мени кечиринг! — деди. — Мен ҳеч хаёлимга келтирмаган гап... Бу мумкин эмас! Мен бундай мактубни ёзолмасмен!

Бобир ўрнидан турди.

— Бўлмаса мен ўзим ёзгаймен, — деб кўшқдан чиқди.

У боғ оралаб хилватхонага қараб бораётганда гулзор йўлкада кичкина Гулбаданни учратди. Зийрак қизча отасини қийнаб юрган мушкулотларни тушунмаса ҳам унга ич-ичидан қайнишиб, ҳамдардлик билдираётгандек мўлтираб қараб турарди¹.

¹ Бобирнинг фарзандлари орасида энг узоқ умр кўрган ва саксонга кирган Гулбадан бегим болалигида кўрган-билганларини «Ҳумоюннома»да батафсил ёзган. У отасининг охирги пайтда тожу тахтдан астойдил кўнгли қолганига, ҳокимиятни Ҳумоюнга бериб, ўзи Тоҳир офтобачи билан бир гўшада яшамоқчи бўлганига далиллар келтирган.

Отасининг махфий мактуби борганда Ҳумоюн Самб-халда оғир касалга чалиниб тўшакда ётган эди. Мактубни ўқигач, одамларига:

— Мени тезроқ Аграга етказинглар! — деб буюрди.

Деҳлига келгунча Ҳумоюннинг иситмаси яна ошиб, касали баттар оғирлашди. Уни олиб келаётган Ҳиндубек йўлда бирор кор-ҳол бўлишидан қўрқиб, дарҳол Аграга хабар юборди-ю, ўзи Деҳлида қолиб Ҳумоюнни энг яхши табибларга даволата бошлади.

Лекин дору дармон кор қилмас, қора безгакка ўхшаш бир дард Ҳумоюнни кечаю кундуз куйдириб, гўё жингак қилиб ташламоқда эди.

Аградан икки кечаю кундуз отлиқ йўл юриб, Моҳим бегим етиб келди. Дарё йўли тинчроқ ва салқинроқ дейишиб, Ҳумоюнни Деҳлида кемага солишиди-да, оқим бўйлаб Аграга олиб келишди.

Ҳумоюнни тахтиравонга ётқизиб, саккиз йигит Зарафшон боғига кўтариб кирди. Бобир ранги ердай ўнгиб кетган Моҳим бегимни кўргандаёқ юраги «шув» этиб кетди. Йигитлар кўтариб келаётган тахтиравон унинг кўзига тобутдай совуқ кўринди.

Ҳумоюн туни бўйи алаҳлаб беҳуш ётди. Фақат саҳар палла кўзини хиёл очиб, тепасида турган отасини таниди, ўрнидан тургиси келиб қнимирлади, лекин бошини кўтаришга ҳам мадори етмади. Отасининг махфий мактубида ёзилган гапга рози бўлолмаслигини айтмоқчи бўлиб:

— Биз... хизматда... сизсиз... — «Мумкин эмас!» дегандай бош чайқади-ю, кейин яна алаҳлай бошлади: — Фулга уринг... уринг! Кетди!.. Тўхта!..

Ҳумоюн нафаси қайтгандай талваса қилиб, ўзини у ёқдан-бу ёққа бир-икки отди-ю, яна ҳушидан кетди.

Сарой табиблари бу оғир дардга ҳеч бир даво тополмадилар. Моҳим бегим юм-юм йиғлайди. Бобир суюкли ўғлини ҳадеб ўтга-сувга солиб, шу касалликка ўзи ҳам сабабчи бўлгандай ўртанади. Оғир пайтларда Бобирга суюниб ўрганган одамлар бирон чора топишни ундан кутадилар. Лекин ҳозир у ҳам чорасизликдан ўзини қўядиган жой тополмай қийналади.

Кексайиб мункиллаб қолган шайхулислом Бобирнинг ёнига келди:

— Ҳазрати олийлари, кўп ғам чекманг, парвардигор файибдан шифо юборгусидир,— деди.— Табибларданки иш чиқмади, энди худо йўлига дунё молидан тасаддиқ қилмоқ керак.

Бобир шайхулисломнинг ниятига тушунолмай:

— Қайси молдан?— деб сўради.

— Жон омон бўлса жавоҳир топилур. Ушал... ашхас олмос яхши тасаддиқ бўлғай.

Бобир Жамна устида кемада ўлтирганда Ҳумоюн келтириб кўрсатган олмосни эслади.

— Қўҳинурними?

Шайхулислом тасдиқ маъносида бош иргади. Бобир ҳушини бир жойга йигиб:

— Тақсир, кимга тасаддиқ қиласайлик?— деб сўради.

Қиймати улкан олтин хазиналарига баробар кела-диган бу олмосни ўғрилардан қўриқлаб турish учун ҳам жуда кўп навкар керак эди. Шуни биладиган Шайхулислом «менга» дейишга тили бормади.

— Муртазо Али мозорига,— деди.— Дин йўлига.

Мозор ва Кўҳинур олмоси бир-бирига мутлақо қо-вушмайдиган нарсалар эди. Диндорларнинг каттаси шайхулислом бўлганлиги учун оламни безайдиган бу гўзал олмос айланиб келиб унинг сандигига тушиши аниқ. Бобир ҳозир молу дунёни ўйлайдиган аҳволда бўл-маса ҳам Ҳумоюнга тақдим этилган бу ноёб гавҳарга мункайган шайхулислом кўз тиккани уни сергаклантири-ди. Руҳонийлар иложини топса подшоҳдан ҳам баланд туришга ва уларнинг бошига оғир кун тушганидан фой-даланиб ўз ҳукмларини ўtkазишга интилишлари кўп-дан маълум эди.

— Тақсир, назарингизда, ўшал олмос азизми ёки менинг жоним азиз?

Шайхулислом ҳанг-манг бўлиб:

— Нечун ундаи дейсиз, ҳазратим!— деди.— Ундоқ олмосларнинг юзтасидан сизнинг бир мўйингиз азиз-роқдир!

— Миннатдормен! Ундоқ бўлса, мен Ҳумоюнга жа-ҳондаги барча олмослардан ҳам азизроқ бир нарсамни қурбон қилмоқчимен. Фақат бу қурбонни сизу бизга ўхшаган бандалари эмас, зарур бўлса, парвардигорнинг ўзи олсин!

Бобир ўзига умид билан қараб турган одамларнинг орасидан ўтиб, Ҳумоюннинг тўшаги ёнига келди.

— Ҳумоюн, жигарбандим! — деди у ҳамма эшитатдиган товуш билан. — Сенинг бетоқатлиғингга мен тоқат келтирай. Сенинг шу оғир дардингни худо сендан олиб менга берсин!

Беҳуш ётган Ҳумоюн бу гапларни эшитмас, лекин bemorning хобгоҳидаги аёллар, мулоғимлар, табиблар, рұхонийлар — ҳаммаси Бобирга қулоқларини динг қилиб қараб туардилар.

Бобир умумий жимликда Ҳумоюннің бошидан уч марта айланди-ю:

— Э, парвардигор! — деб илтижо қилди. — Менки Бобирмен, агар жон бериш мүмкін бўлса, умру жонимни Ҳумоюнга қурбон қўлдим! Азройил менинг жонимни олсину худо Ҳумоюнга шифо берсин!

Моҳим бегим йиғидан тўхтаб, Бобирга қўрқув аралаш ҳайрат билан тикилиб туарди. Қеқса шайхулислом эса ҳозирнинг ўзидаётқ Ҳумоюннинг соғайиб кетишини ва Бобирнинг ҳолсизланиб йиқилишини кутгандай анча вақт ота-болага бақрайиб қараб турди.

Лекин кутилган мўъжиза юз бермади. Беҳуш Ҳумоюн алаҳлаб бир нима деди-да, яна жим бўлди. Бобир бошини қуи солиб хобгоҳдан секин чиқиб кетди. Унда ҳеч қандай ўзгариш юз бермагани эса шайхулисломни саросимага солди.

3

Иигирма уч ёшли Ҳумоюннинг йигит юраги касалликни ахийри енгди. Орадан бир ҳафта ўтгач, у касал кўришга келганларни ўрнидан туриб қабул қилди. Яна икки кундан сўнг отасини бориб кўриш учун ўзи уйдан чиқди.

Бобир кутубхонанинг хонаи хосида қадимий бир қўл-еъзами ўқиб ўтирган эди. Ҳумоюн унинг қаршисида тиз чўкиб:

— Мен сизнинг илтижонгиз билан шифо топмишмен! — деди. — Ўзимга келганимдан бери худодан тилайменки, сиз мен учун қилган тасаддиқни даргоҳида қабул этмасин! Бу улуғ давлатни сиз барпо этдингиз, ҳаммазининг суюнган тоғимиз ўзингизсиз! Парвардигор бизга раҳм қилсан!

— Мана, шукур, юрибмен-ку, ўғлим. Ҳозирги иситма-ю, уйқусизлик менда бултурдан бери бор.

— Рұхонийлар «Ҳазратим ўғлиға келгән нақд ажал-
ни ўзларига олдилар» деб қўнглимга ғулғула солмоқ-
далар!

— Сен нечун уларга ишонурсен? Бошимизга оғир кун
түшганды шайхулислом менга ўз ҳукмини ўтказмоқчи
бўлди. Мана хайрият, тузалиб кетдинг. Агар ўшанда
унинг гапига кириб, Қўхинур олмосини тасаддиқ қилсам,
руҳонийлар ғолиб чиқмасмиди? «Ҳумоюнни биз қутқариб
қолдик, подшоҳдан ҳам биз зўрмиз!» деб тантана
қилмасмиди? Сени бир умрга қарздор қилиб қўй-
масмиди?

— Илоҳим, сиз ҳақингиздаги кароматлари ҳам ёл-
ғон чиқсан!

— Ҳар қалай, сен бир нарсани унутма. Рұхонийлар
подшоҳнинг тепасига чиқиб олса тамом! Самарқандда-
ги Абдуллатифнинг инқирози-ю, отасига қарши қилич
кўтариши шундан бошланган.

— Токи тирикмен, бу ўғитингизни ёдимдан чиқармас-
мен!.. Энди... ҳазратим, Самбхал чегарасида яна тажо-
вузлар бўлмоқда эмиш. Мен эртага жўнаб кетай, ижо-
зат беринг.

Бобир ҳозир айтмоқчи бўлган сўзига алоҳида
эътибор талаб қилиб, бир лаҳза жим турди.

— Ҳумоюн, Байда менга заҳар бергандан бери ҳеч
ўзимга келолмаймен. Қолган кучим ижодга етса ҳам
хўп гап. Энди давлат юкини сен елкангга олмоғинг ке-
рак. Майли, Самбхалга бориб чегарани тинчитгину, ўр-
нингга Ҳиндубекни ҳоким қилиб, ҳарҳол Аграга қайт-
гин.

* * *

Емғир фасли ўтиб, осмон яна булултардан тозалан-
ди, тунлар салқин бўлиб қолди. Бобир уйқусиз тунлар-
да боққа чиқар ва юлдузларни томоша қилгиси келиб
осмонга қаради. Лекин танида иситманинг баландли-
гидан осмондаги юлдузлар жойидан кўчиб, гирдобга
тушиб айланиб кетаётгандай кўринар, кўнгли беҳузур
бўлиб, осмондан дарҳол кўзини оларди.

Кундуз саройда давлат ишларини қилган пайтида
гоҳ шайхулисломни гоҳ, нуфузли аъёнларни учратар,
улар Бобирга аввалгидан ҳам пастроқ эгилиб таъзим
қилишар, лекин ўлиши муқаррар бўлган беморга қара-

гандай мусибатли кўзлар билан қарашар, муомалала-ридаги алоҳида мулойимлик ҳам шундан далолат берар эди. Уларнинг эътиқодига биноан, Бобир ўз ҳаётини ўғлига қурбон қилган, шунинг учун Ҳумоюн тузалиб кетган, энди кўзга кўринмас ажал қиличи Бобирнинг боши устида осилиб турар эди.

Очиқ айтилмайдиган, ҳаддан ортиқ майин гаплар, таъзиму тавозелар остига яшириладиган бу машъум ишонч Бобирга жуда оғир таъсир қиласар, гоҳо атрофида айланиб юрган ўлим шарпасини унинг ўзи ҳам сезгандай бўларди.

Мезон ўтиб, қавс ойи кирганда Бобирнинг касаллиги баттар оғирлашди. Бирор жойида яра ёки шиш йўқ, нуқул ичи куяди, иситмаси кўтарилиб, ухлай олмайди, ранги кун сайин сўлиб боради. Мавлоно Юсуфий мамлакатнинг энг машҳур табибларидан уч-тўрттасини чақиртириб маслаҳатлашди. Беморнинг томиридан қон олиб кўришди. Қоннинг ранги соғлом одамникideк тиниқ эмас, алланечук ириганга ўхшаб қолган эди.

Табиблар ўзаро кенгашиб, «Малика Байда берган заҳарнинг қонда асорати қолган» деган хulosага келдилар ва қонни тозалайдиган дорилардан, анор сувидан кўпроқ беришни буюрдилар.

Лекин бу нарсаларнинг ҳеч бири кор қилмади. Бобир ҳолсизланиб ётиб қолгач, Ҳумоюнга чопар юборишиди.

Ҳумоюн келса, отаси ўз хобгоҳида баланд оқ тўшакда терга ботиб ётибди. Ранги сап-сариқ бўлиб кетган. Бобирнинг бош томонида Хонзода бегим пат елпигич билан унинг юзини елпияпти. Оёқ томонида Моҳим бегим ғам-ғуссага ботиб, ҳайкалдай беҳаракат ўлтирибди.

Ҳумоюн тиз чўкиб, отасининг тўшагини қучоқлади. Бобирнинг озғин қўлини ўпиб кўришди, сўрашди. Сўнг отасининг бу аҳволига ўзи сабабчи бўлгандай ёниб гапирди:

— Нечун бизга бунчалик жон фидо қилдингиз, хазратим?

Бобир мажолисиз товуш билан:

— Сен буни ўзингдан кўрма,— деди. Иллат қонда эмиш. Билмадим... Ҳар қандай олов ҳам ёниб-ёниб аҳийри бир кун...— Бобир «ўчади» демоқчи бўлди-ю, лекин аёлларни аяди:— алангаси пасаядир. Мен умр бўйи аёвсиз ёндим.

— Биз учун ҳам куйиб-ёнгансиз! Энди бу қарзларни узишга менинг бутун умрим етмагай!

— Қарзингни менга узолмасанг... фарзандларингга узарсен...

Бобир тўхтаб-тўхтаб сўзлаётган бўлса ҳам кўнглидаги гапларини равон айттаётгани Ҳумоюнни умидлантириди. У отасининг сўзини бўлмай жим қулоқ сола бошлади.

— Темурийларнинг кўпчилиги... фидойиликни унтиб... йўқ бўлиб кетди. Ўғил отани ўлдириди... Оға инига хиёнат қилди... Оқибатда... бари разолатнинг қурбони бўлди... Ундан кўра.. яхшиликнинг фидоси бўлган афзал эмасми?.. Мана, амманг Хонзода бегим... Самарқандда мени қутқариб ўзини асоратга солди. Бу фидойилик мени ҳамиша... шундай бўлишга ундан келди... Сен ҳам энди иниларингу... авлодларингни мардликка... фидойиликка ўргатгин.

Бобир тўшакнинг орқа томонидаги ҳарир оқ парданинг ортига бошини бураб қаради. Парда ортида одам борлигини Ҳумоюн энди пайқади.

— Тоҳирбек, жуздонни келтиринг,— деди Бобир.

Шу вақтгача қимир этмай ўтирган Тоҳир энди тез ўрнидан турди-ю, токчадаги катта чарм жуздоннинг ичидаги янги муқоваланган қўллэзмаси билан икки қўллаб кўтариб келди.

— Бадахшонда, «Вақоиъ»ни сўраган эдинг,— деди Бобир Ҳумоюнга.— Мана, ёзib тугатдим. Ол,

Тоғлар орасида Бобир «Бу китоб битганда менинг умрим ҳам тугагай!»—дегани Ҳумоюннинг ёдига тушди. У жуздон ичидаги китобни олиб пешонасига суриб ўпар экан, кўзидан тирқираб ёш чиқиб кетди. Иирик бир ёш томчиси зарҳал муқова устига томиб тушганини Бобир ҳам кўрди.

— Сендан илтимосим,— деб давом этди Бобир.

— Буни авлодларинг ҳам ўқисин... Хатоларимни такрор этманглар. Яхши ишларим... оз бўлса... кўпайтиринглар. Бу китобдан нусхалар кўчиртириб Самарқандга... Тошкентга... Андижонга... муносиб одамларга юборгин... Мен туғилган юрт билан алоқани узманглар. Шояд мен битган китблар... икки орадаги алоқанинг ришталари бўлса...

Бобир ўғлига васият қилаётганини сезиб турған Хонзода бегим ўзини ортиқ тутиб туролмади.

— Бобиржон, мен эгачингиз!.. Мен... мен сиздан беш ёш каттамен! Бу дунёдан кетиш навбати аввал менини! Сиз таслим бўлманг! Бобиржон, иним!

Хонзода бегим унинг подшолигини унутиб, «Бобиржон!»—деганда Бобир беғубор болалигини эслаб, кўнгли бир орзиқди. У беклардан ҳам, савдарлардан ҳам, бегоналардан ҳам, ҳатто суюкли ўғли ва хотинидан ҳам нуқул «ҳазратим» деган мурожаатни эшитар, кўп ишлатилавериб сийقا бўлиб кетган бу сўз унинг жуда меъдасига теккан эди.

Пиқ-пиқ йиғлаётган Моҳим бегим олдинги оғир сухбатларни эслаб:

— Менинг хархашаларим ҳам сизни хаста қилди, ҳазратим!— деди.— Мени кечиринг!

— Моҳим, сиз мени кечирсангиз бўлди... Мен сиздан розимен... фақат энди мени ҳазратим деманг...

Моҳим Бобирни: «Қўз очиб кўрган танҳо ёримсиз; жисмимдаги жонсиз!»—демоқчи бўлиб оғиз жуфтлаб кўрди-ю, лекин атрофидагилардан уялди. Йиги аралаш:

— Хўп,—дэя олди, холос.

Бобир унинг айтилмаган сўзларини овозидан, кўзларидан сезди. Сўнг ўғлига юзланди:

— Ҳумоюн, мен сендан ҳам «ота» деган сўзни ҳали эшитганим йўқ.

«Ота»деган жўнгина сўзга ўрганмаган Ҳумоюн:

— Падари бузруквор!— деб кўрди. Бундан отасининг кўнгли тўлмаганини сезди-ю,— Отажон!— деди.— Сиз салтанатни менга бермоқчи бўлибсиз. Лекин ишонинг, мен бу тожу тахтдан сизнинг бир нафаслик умринингизни афзал кўрурмен!

— Мен сендан розимен... Энди мендан ҳам рози бўлинглар!

Хонзода бегим розилик сўрашга тили бормай ўртаниб йиғлади. Унинг йиғисига Моҳим бегим қўшилди.

Бу оғир аҳволнинг устига кириб келган Мавлоно Юсуфий Бобирнинг кўзлари бежо бўлаётганини, уни қаттиқ тер босганини кўрди.

— Энди ҳазратим ором олишлари керак!— деб қўлига оқ докани олиб, Бобирнинг юзидан, бўйинларидан терларини арта бошлади.

Қийналиб нафас олаётган Бобир бош томонда турган Тоҳирга шивирлаб:

— Елпинг!..— деди.

Ииги-сиғи билан Бобирни қийнаб қўйганларини энди сезган бегимлар секин чиқиб кетдилар. Бобир Ҳумоюнга:

— Энди эшик оға билан.. аъёнлар кирсин, — деди.
— Кўзим тириклигид... ҳокимиятни сенга топширай.

Ташқарида кутиб турган Мұҳаммад Дўлдай ва бошқа нуфузли беклар кирдилар. Бобир уларнинг олдида подшолик тожини ўғли Ҳумоюнга топширди. Рози-ризолик сўраш пайтида беклардан бир-иккитаси кўзига ёш олгандай бўлди. Лекин чиқиб кетаётганларида ҳаммалари энди Ҳумоюннинг атрофида парвонадай айланниб, янги иноятлар умидида кўзлари тама билан ёнганини Бобир кўриб қолди.

Хонада Тоҳир билан икковлари қолгандан сўнг:

— Энди... беку султонларга менинг керагим йўқ, — деди. — Тоҳирбек, кечга... Мавлоно Фазлиддинни чақиринг.

Тоҳир Бобирга табиб Юсуфий буюриб кетган суюқ доридан ичиртириди, унинг қийшайиброқ қолган ёстигини тўғрилаб қўйди. Сўнг савдарлар хонасига ўтиб, тоғасига одам юборди.

Айтилган пайтга етиб келган Мавлоно Фазлиддин Бобирнинг ўлим тўшагида ётганини кўрди-ю, туғён ичада:

— Ҳазратим, худо сизга қувват берсин! — деб қўлидан ўпди.

— Мен.. подшоҳликни Ҳумоюнга топширдим... Минбаъд ҳазратим, деманг, мавлоно. Муносиб кўрсангиз... мени ҳам мавлоно денг.

— Биз Навоийни улуғ ижодлари учун «ҳазрат Алишер» дер эдик. Сиз туркий тиллик адабиётнимизнинг Навоийдан кейинги энг улкан сиймосидирсиз. Шу сабабли сизни шоир ва адаб сифатида «Бобир ҳазратлари» дейишга ҳақлимиз.

— Миннатдормен, мавлоно... Сиз Аграда, Секрида, Деҳалпурда ажиб кўшклар, оромгоҳлар барпо этдингиз... Худо умр берса мен... Самарқанддаги Биби Хоним мадрасасидек улуғ бир.. мадрасанинг тарҳини сизга... чиздирмоқчи эдим... Опа-сингилларимизнинг қадрини бошимизга... кўтарсак арзигай...

Мавлоно Фазлиддин Бобирнинг сўнгги кучларини тўплаб, қийналиб сўзлаётганини сезди-ю, унинг фикрини ўзи давом эттириди:

— Доно сўзларни айтдингиз, ҳазратим! Чиндан ҳам халқимизда бу одат азалдан мавжуд... Самарқандда Бибихоним мадрасасидан ташқари Шоди Мулк бегим мақбараси бор. Ҳиндларда ҳам аёл зотига эҳтиром зўр экан, ҳатто сифинадиган худолари орасида ҳам аёллар бор... Бизнинг Ҳироту Самарқанддаги энг яхши меъморчилик анъаналаримизни Ҳиндистоннинг энг ажаб анъаналирига пайванд этиб, аёл зотини улуғловчи бир мадраса қуриш менинг ҳам энг эзгу орзуларимдандир!

Бобир Мавлоно Фазлиддиннинг Хонзода бегимга бўлган ёшлик меҳри замона зайли билан қандай қурбон бўлганини эслади-ю:

— Мавлоно,— деди — менинг эгачим Хонзода бегим... инсонийликда тенгсизлар!.. Агар сиз орзу қилган... мадрасани қуриш бизга насиб бўлса... уни «Хонзода бегим мадрасаси...» деб атасак арзир эди...

Мавлоно Фазлиддиннинг кўзларида яшин каби бир олов чақнади:

— Ҳазратим, сиз ҳозир менинг кўзимга муқаддас бир мақсадни кўрсатдингиз! Агар бу мақсадни рўёбга чиқаришга менинг умрим етмаса, уни фарзандларимизнинг дилига жо этиб кетгаймен. Токи улар ҳинд меъморлари билан ҳамкорликда халқларимизнинг аёл зотига бўлган эҳтиромини улуғ бир меъморчилик обида-сида ифода этсинлар!

Бобирни тер босди. Унинг ҳарир оқ кўйлаги қорайиб танасига ёпишиб қолганини кўрган Тоҳир безовталаниб ўрнидан турди:

— Мулла тоға, ҳазратимни чарчатиб қўймайлик!.. Табиб «кўп ҳаяжонланмасинлар!»—деб тайинлаган эди...

Суҳбатнинг тафти чиндан ҳам баланд бўлаётганини энди сезган Мавлоно Фазлиддин ўрнидан кўтарилди:

— Ҳазратим, энди ором олинг! Мен кейин яна келурмен!..

Бобир Мавлоно Фазлиддинга қараб:

— Яна бир ўтинчим бор,— деди.— Оламдан кўз юмсан... Кобулда ўзингиз тарҳини чизган боғ бор... Тоғ тепасида... Абадий оромгоҳим... ўша Гузаргоҳда бўлсин... Ортиқча дабдабасиз... шоирона бир тарҳ чизинг...

Мавлоно Фазлиддин ўпкаси тўлиб гапиролмади. Тасдиқ маъносида бош иргади-ю, кўзидан оппоқ соқолига оқиб тушган ёшни артиб эшикдан чиқди:

Тоҳир Бобирнинг тердан ҳўл бўлган ички кийимла-
ларини алмаштириди. Ўзини одатдагидай осуда тутиб,
кундалик хизматларини қунт билан адо этар эди. Бо-
бир чанқаса сув берадиган ҳам, нафаси қайта бошласа
елпийдиган ҳам Тоҳир эди. Ўшу ерда бўлса Бобир со-
кинроқ ётишини Мавлоно Юсуфий ҳам билар, шунинг
учун Тоҳирни туну кун беморнинг олдидан кеткизмас
эди.

Бугун кечаси Бобир ичкарида ҳадеб беҳаловат бўла-
вергандан кейин Тоҳир савдарларни чақириб, уни тў-
шаги билан ҳовлидаги усти очиқ мармар супага чиқар-
тириди.

Агранинг кеч кузи худди Андижоннинг баҳор пайт-
ларидек салқин ва майнин туюлар эди. Қоп-қора осмон-
да юлдузлар чарақлаб турибди. Иситмаси баланд Бо-
бирга юлдузлар яна гирдобга тушиб айланётгандай
ва бир-бирларига урилиб кетаётгандай кўринди. Бобир
кўзини юмди:

— Баданимда... қон уюшиб қолаётгандай... — деди
Тоҳирга.

Тоҳир унинг елкаларини, қўлларини, кейин оёқлари-
ни секин-секин уқалай бошлади. Бобир бундан сал ен-
гил тортгандай бўлди-ю, кўзини очиб яна осмонга қа-
ради.

Юлдузлар энди жой-жойида тўхтаб, сокин нур соча
бошлади. Ана, Олтин Қозиқ. Унинг ғарб томонидаги
Етти Оғайни юлдузлари уфққа оғиб тушиб кетяпти.
Шарқдан эса бир тўп бўлиб Ҳулкар юлдузлари кўтари-
либ келяпти.

— Бизнинг Қувада ҳам Ҳулкар худди мана шунаقا
бўлиб чиқар эди, — деди Тоҳир.

Бобир ҳам болалиги ўтган Андижон осмонини эслади.
Мана шу Етти Оғайни юлдузлари ўша ерда ҳам Ол-
тин Қозиқни айланиб ўтиб, ғарбга ботиб кетарди. Ўша
ерда ҳам Етти Оғайни уфққа бош қўйган сари Ҳулкар
юлдузлари осмоннинг баланд жойларига чиқиб борар-
ди. Бобир ўсмирилигига Ҳулкар юлдузларини олмосдан
ясалган варракка ўхшатар эди. Думини қувноқ силки-
тиб учадиган олмос варрак унинг хаёлини яна мусаффо
болалик йилларига олиб кетди. Осмон дунёнинг ҳамма
жойида бир экани, умрининг бошланишида Андижон-
да кўрган юлдузлари умрининг охирида Аграда ҳам
чақнаб тургани унга сўнгги бир тасаллидек туйолди. Бо-

• бир осмонга қараб ётганда яна ёш, соғлом йигитга айланиб, Андижон чорбоғининг супасида ётгандай бўлди.

Бир лаҳзалик бу ширин ҳис кетидан яна шафқатсиз бир қалтироқ босиб келди-ю, юлдузли осмонни гирдобига олиб, гир-гир айлантира бошлади...

Тун ярмидан ошганда Тоҳирнинг ўкириб йиғлагани қоронғи боғни зир титратди...

ХОТИМА

Мавлоно Фазлиддин Кобулда Бобирга анвои ранги мармарлар билан зийнатланган серфайз бир мақбара қуришга улгурди, лекин Хонзода бегим номига мадраса қуриш унга насиб бўлмади, унинг бу орзусини орадан юз йиллар ўтгандан сўнг Бобирнинг чевараси Шоҳ Жаҳон қўрдирган машҳур Тож-Маҳалда улуғ ҳинд меъморлари рўёбга чиқарган бўлсалар эҳтимол.

Тоҳир «Бобирнома»дан кўчирилган нусхаларни адибнинг Андижондаги, Тошкент ва Самарқанддаги муҳлисларига элтиб топширгач, ўзи Робия билан бирга Қувага қайтди. Улар умрларининг қолган қисмини туғилган юртларида ўтказдилар. Бироқ ўғиллари Сафарбек Мавлоно Фазлиддиннинг фарзандлари билан бирга Аграда умрбод қолдилар ва ўша ерда оила қуриб, ҳинд халқига қўшилиб кетдилар.

Бобирнинг вафотидан ўн икки йил ўтгандан кейин Ҳумоюн Ҳамида бону бегим деган хотинидан бир ўғил кўрди-ю, исмини отасининг отига уйқаш қилиб Жалолиддин Акбар қўйди. Бу орада Моҳим бегим вабога учраб дунёдан ўтган, лекин Хонзода бегим ҳали ҳаёт эди. Акбар икки яшарлигига Хонзода бегим уни ўз тарбиясига олган, «Бутунлай бобосига ўҳшайди, менинг иним Бобир мирзо кичиклигига қўл-оёқлари ҳам худди мана шундоқ эди!» дер, Акбарнинг қўлчаларини, оёқчаларини суйиб ўпар эди.

Акбар учга киргандага Хонзода бегим олтмиш саккиз ёшида Кобулҳақ деган жойда вафот этди. Уни ҳам Кобулга келтириб, Бобир мирзо мақбараасига дағи этдилар.

Ҳумоюннинг ўгай инилари Комрон мирзо ва Мирзо Аскарийлар мана шу йилларда тахт талашиб, акалари билан қаттиқ жангга киришган эдилар. Бу жанг-

ларда аввал Мирзо Аскарий енгилди, Ҳумоюн уни ҳажга жўнатди. Мирзо Аскарий Макка йўлида вафот этди. Комрон миранзонинг Ҳумоюнга адовати тобора авжига чиқиб бормоқда эди. Бу орада катта йигит бўлиб кетган ва ёши ўттиздан ошган Ҳиндол мирзо акаси Ҳумоюнга қаттиқ садоқат сақлаб келар эди. Шу туфайли Ҳиндол мирзо ўгай акаси Комрон миранзонинг одамлари томонидан Кобулда 1552 йилда ўлдирилди. Бу ҳодисадан кейин Комрон миранзонинг яқин одамлари ҳам ундан юз ўғирдилар, у Ҳумоюндан енгилиб, тоғларга қочиб кетди. Лекин уни тоғликлар тутиб олиб, қўл-оёғини боғлаб, Ҳумоюнга келтириб бердилар. Ҳамма бек ва аъёнлар укасининг кушандасига айланган Комронни беаёв қатл эттиришни талаб қилдилар. Бироқ Ҳумоюн буни ўзига эп кўрмади. «Отам ҳазратлари» фидокор, мард, аҳил бўлинглар», деб васият қилган эдилар. Комрон шуни унугиб, кўрнамаклик қилди, энди бунинг кўзига мил тортсинглар!— деб буюрди. Кўзига мил тортилган Комрон қолган умрини бутунлай кўр бўлиб ўтказди.

Оға-инилар орасидаги бу ички зиддиятлар ташқи душманлар билан олиб борилган оғир жангларга қўшилиб, Ҳумоюннинг бошига кўп кулфатларни солди, у отаси бошлаган катта қурилишларни яхши давом этти ролмади, фақат Бобир қурган давлатни сақлаб қололди-ю, унинг кутубхонасини янада кенгайтириб, нодир китоблар билан бойитди.

Ўнлаб хатарли урушларда қилич чопиб юриб ўлмаган Ҳумоюн суюкли кутубхонасининг зинапоясидан тушиб келаётганда қоқилиб кетиб, иккинчи қаватдан пастга йиқилиб тушди-ю, шунинг жароҳатидан вафот этди. У ҳам отаси Бобир миранзодек эллик ёшга кирмай оламдан ўтди.

Ҳамида бону бегим ўғли Акбар билан бирга Ҳумоюннинг хотираси учун Деҳлида қизил мармардан улуғвор бир мақбара қурдирди.

Авлодлари орасида Бобирга алоҳида оқибат кўрсатгани Акбар бўлди. У «Бобирнома»ни туркий тилдан форсчага икки маротаба таржима қилдирди. Акбар давридаги энг истеъоддли ҳинд рассомлари «Бобирнома» воқеаларига асосланиб, бир туркум ажойиб суратлар чиздилар. Бобир бу асарни ёзиб тугатган Секри тоғида Акбар бобосининг хотирасига атаб Фатҳпур-Секри шаҳ-

рини қурдирди. Бир қанча вақт пойтахтни Деҳлидан шу ерга кўчириб ҳам келтириди.

Акбарнинг бўй пойтахтидаги саройлар ҳанузгача бутун турибди. Ҳозир бу пойтахтда ҳеч ким яшамаса ҳам, лекин ундан эртаю кеч одам узилмайди. Дунёнинг турли мамлакатларидан келган сайёҳлар тарихий обидага айланиб қолган бу пойтахтни кўриб, хаёлан ўтмиш давларга бориб келгандай бўладилар.

Бобир тузган улкан давлат ўз қудрати ва маданий ёдгорликлари билан жаҳонга танилиб, салкам икки аср умр кўрди-ю, тарихда қолди. Унинг авлодлари бугунги кунга етиб келолмадилар — энг охирги бобирийлар ўтган асрларда инглиз мустамлакачилари даврида маҳв этилди.

Фақат Бобир ўз қўли билан ёзган энг яхши асарлар ҳалигача тирик бир қалбнинг ҳароратига тўлиб, одамларга ҳамон маънавий озиқ ва завқ беряпти. Тўғри, унинг бир умри қоронги осмонда оловли из қолдириб учган юлдуздек тез сўнди. Лекин ўлмас асарлари саҳифасида салкам беш асрдан бери давом этиб келаётган иккинчи умри — бу юлдузнинг тундан тонгга қараб учганини ва ўз нурини келажакка йўналтирганини айтиб турибди. Бобир қалб ўтига йўғириб яратган маданий мерос бугунги сернур авлодларни баҳраманд қилгани сари унинг ана шу иккинчи умри ҳам қоронги тунлардан кейинги ёруғ кунларда астойдил обод бўляпти.

МУНДАРИЖА

БИРИНЧИ ҚИСМ. АРОСАТ

Қува. Қил устида турган тақдирлар	5
Ахси. Ажалга даво йўқ	22
Андижон. Гул ва қуюн	33
Қува. Жасоратнинг жазоси	51
Ўш. Нажот қайда?	72
Самарқанд. Зафар ва кулфат	1
Андижон. Увол бўлган орзулар	13
Самарқанд. Ҳал қилювчи олишув	16
Тошкент. Уратела. Исфара. Кўчки босган булоқ	25

ИККИНЧИ ҚИСМ. ФАЛАКНИНГ ГАРДИШИ

Ҳирот. Тўлган паймоналар	24
Кундуз. Самарқанд. Икки қилич орасида	31
Кобул. Тошган дарё ўзан излайди	31
Лахўр. Панипат. Деҳли. Янги қирғоқлар	40
Агра. Тақдир тақозоси	41
Секри. Қайта кўз очган булоқ	46
Агра. Юлдузлар гирдobi	47
Хотима	49

На узбекском языке

Пиримкул Кадыров

ЗВЕЗДНЫЕ НОЧИ

Реман

Редактор Ж. Насрилдинова. Рассом П. Воронкин
Расмлар редактори А. Бобров. Техн. редактор Э. Сайдов
Корректор М. Абдусаломова

ИБ № 694

Босмахонага берилди 5.10.78. Босишга рухсат этилди 14.02.79. Формати 84×108
Босма л. 15,5. Шартли босма л. 26,04. Нашр л. 26,71+0,4 вкл. Тиражи 60000. Р
Ғафур Руслом номидаги Адабиёт ва сағъат нашриёти. Тошкент, Навоий кўчаси,
Шартнома № 154 — 78.

Ўзбекистон ССР Нашриётлар, полиграфия ва китоб савдоси яшлари Дав
комитетининг Тошкент «Матбуот» полиграфия ишлаб чиқариш бирлашимсида
қўюзга босилди. Тошкент, Навоий кўчаси, 30. 1979 йил. Заказ № 1178. Баҳ
1с. 90 т.